

LES
LETTRES
D'ESTIENNE

PASQUIER CON-
seiller & Aduocat general
du Roy à Paris.

*Contenans plusieurs belles matieres & discours sur les
affaires d'Estat de France, & touchant les
guerres civiles.*

TOME PREMIER.



A PARIS,
Chez LAVRENT SONNIVS, rue S. Jacques
au Coq, & Compas d'Or.

M. DC. XIX.

AVEC PRIVILEGE DV ROY.

*El
56*



TABLE
DES EPISTRES
ET MATIERES CON-
tenuës en ce volume.

LIVRE PREMIER.

A Monsieur Loisel Aduocat en la
Cour de Parlement de Paris. *Il rend
raison pourquoy il expose ses lettres en
lumiere.* fueil. 1.

A Monsieur de Tournebus Professeur du
Roy , des lettres Grecques en l'Vniuersité
de Paris. *Sçauoir s'il est bon de coucher les arts
& sciences en François.* fueil. 6.

A Monsieur Sauvage , Seigneur du Parc.
*Que lors que nos Poëtes discourent le mieux de l'a-
mour , c'est lors qu'ils sont moins atteints de mala-
die.* fueil. 16.

A Monsieur de Gournay gendarme. *Il se
rit avec vn sien parent qui estoit à Rome.* fueil. 18.

Au Cheualier de Montereau. *Si la temperie
du Ciel produit les gës doctes en certains pays.* f. 19.

TABLE.

A M. de la Fosse Vandomois. *Il se gauffe avec vn sien amy qui se vantoit luy auoir escrit.* 22

A Monsieur de la Chault Aduocat au Parlement de Paris. 24

A Monsieur de Ronfard. *Que le commun de la France se rend fort aysément singe des autres.* 25

A Monsieur le Picart, Conseiller en la Cour des Generaux des Aydes. *Les opiniōs qui doiuent entrer es esprits de ceux qui veulent marier.* 28

A Mademoiselle de. *Quel contentement on peut receuoir de l'amour.* 32

A Monsieur de Fonsomme, Gentil-homme Vermandois. *De la police que tint le feu Duc de Guise dans la ville de Mets, contre le siege de l'Empereur Charles cinquiesme.* 38

A Monsieur Sebilet, Aduocat au Parlement de Paris. *Siles Romains ont esté superieurs aux anciens Gaulois, soit au fait des armes ou des lettres.* 44

A Monsieur de Postel, Conseiller au siege presidial de Troyes. *Il semond vn sien amy de luy escrire.* 49

A Monsieur Brallion, Conseiller au siege presidial de Lyon. *Lettre plaisante, par laquelle il semond vn sien amy de luy escrire.* 50

A Monsieur de Basmaison, Aduocat au siege presidial de Ryon. *Il console vn sien amy.* 51

A Monsieur de Ronfard. *Del'Eloge Latin & François de Paschal.* 53

A Mademoiselle de. *Ceste lettre fut faite en fa-*

TABLE.

ueur d'un sien amy serviteur d'une Damoiselle. 54

*A Madame de. Ceste lettre est par forme de
gayeté seulement à une Dame d'honneur. 56*

LIVRE. II.

A Monseigneur l'Illustrissime & Reueren-
dissime Charles Cardinal de Lorraine.
*Il fait present du premier liure de ses Recherches
de la France à Charles Cardinal de Lorraine. 60*

*A Mōsieur Bigot Seigneur de Tibermeny,
aduocat au Parlemēt de Rouën. S'il est bon de
coucher par lettre quelques beaux discours. 62*

*Lettre du Sieur de Tibermeny à Pasquier.
fueil. 66.*

*A Monsieur de Marilhac sieur de Ferrieres,
Conseiller du Roy, & Maistre en sa chambre
des Comptes de Paris. Il prefere par forme de
gayeté la vie des villes à celle des champs. fueil. 69.*

*A Monsieur de Marilhac Seigneur de Fer-
rieres, Conseiller du Roy, & Maistre ordinai-
re de sa chambre des Comptes. Il se gaussé de
quelques folles ordōnances qu'il auoit fait d'amour à
un iour des Roys. fueil. 78.*

*A Monsieur Cujas Conseiller au Parlemēt
de Grenoble, & Docteur regent és Loix en
l'Vniuersité de Bourges. Le fruiēt que se peuuent
promettre enuers la posterité les autheurs qui in-
uentent, au regard de ceux qui translatent des liures.
fueil. 83.*

A Monsieur de Ronfard. En quelle recom-

TABLE.

mandat ion a esté autrefois la Poësie Françoisie entre nous. fueil.87.

A Monsieur Martin Greffier au siege Presidial d'Angoulmois. fueil.94.

A Monsieur Bigot Seigneur de Tibermeny, Aduocat au Parlement de Roüen. *Il se iouë sur la naissance d'un sien fils.* fueil.95.

Lettre du Seigneur de Tibermeny à Pasquier. *Où il est discours pourquoy les gens d'esprit ne produisent enfans semblables à eux.* fueil.98.

A Monsieur de Querquifinen Seigneur d'Arduilliers. *Certains paradoxes qu'il propose au Seigneur d'Arduilliers pour y mettre la main.* f.100

A Mōsieur de Querquifinen Seigneur d'Arduilliers. *Quelle est la vraye naïfueté de nostre lāgue, & en quels lieux il la faut chercher.* fueil.102.

A Madamoiselle du Lis. *Il promet tous bons offices à vne Damoiselle d'honneur, à laquelle il es-*
crit. fueil.110.

A Messieurs Robert & Fournier Docteurs, Regents és droicts en l'Vniuersité d'Orleans. *S'il seroit bon que le consentement des peres & meres fust requis de necesité aux mariages de leurs enfans.* fueil.111.

L I V R E I I I.

A Monsieur de Fonsomme Gentil-homme Vermandois. *Si la vefue faisant folie de son corps doit deschoir de ses conuentions matrimoniales.* fueil.121.

TABLE.

A Monsieur de Querquifinen Seigneur d'Ardiulliers. *Sommaire discours des terres que l'on appelle neufues.* fueil. 125.

A Monsieur Ramus Professeur du Roy en la Philosophie & Mathematique. *Sçauoir si l'orthographe Françoisse se doit accorder avec le parler.* fueil. 127.

A Mōsieur Ramus Professeur du Roy en la Philosophie & Mathematique. *De la propriété de ceste diction de Sens entre nous, d'où est venue cette maniere de parler, Sēs dessus dessous.* 141

A Mōsieur de Fonsomme. *Que nulle nation ne peut dire si elle prononce au vray la langue Latine, comme faisoient les Romains.* 142.

A Monsieur le General d'Estournel. *Il recommande vn sien amy au General d'Estournel.* 151.

A Monsieur de Tiard Seigneur de Bissy, *Sommaire recueil des mœurs du Roy Louys XI.* 152.

A Monsieur de Marilhac Seigneur de Ferrieres, Conseiller du Roy, & Maistre ordinaire en sa Chambre des Comptes de Paris. *Sommaire discours de la fortune de Iacques Cœur.* 158.

A Monsieur de Marilhac Seigneur de Ferrieres. *Pourquoy nous disons Chaperonner pour Bonneter: & aussi d'où vient qu'on fait quitter la ceincture à celuy qui fait cession de biens.* 163.

A Monsieur de Marilhac Seigneur de Ferrieres. *Il se gausse par ceste lettre avec le sieur de Marilhac.* 165.

TABLE.
LIVRE. IV.

A Monsieur de Fonsomme. *Commencement des troubles de la France.* 167

A Monsieur de Fonsomme. *Suite du voyage.* 169. 194.

A Monsieur de Fonsomme. *Mort lamentable du bon Roy Henry deuxiesme du nom.* 172.

A Monsieur de Fonsomme. *Aduenement du petit Roy François à la couronne.* 177.

A Monsieur de Fonsomme. *Suite des troubles d'Amboise.* 181

A Monsieur de Fonsomme. *Voyage du petit Roy François à Orleans, en deliberation d'exterminer l'heresie.* 184.

A Monsieur de Fonsomme. *Mort du petit Roy François.* 187.

A Monsieur de Fonsomme Gentil-homme Vermadois. *Arrest donné en faueur du Prince de Condé demãdeur en declaration d'innocẽce.* 190.

A Monsieur de Fonsomme Gentil-homme Vermandois. *Assemblée des Estats dans Orleans.* 192

A Monsieur de Fonsomme Gentilhomme Vermandois. *Edit du vingt-cinquiesme Iuillet 1561. sur la souffrãce de la Religion nouvelle.* 196.

A Monsieur de Fonsomme Gentil-homme Vermandois. *Colloque de Poissy de grand' parade & peu d'effect.* 198.

A Monsieur de Fonsomme. *Presches des Hu-*

TABLE.

<i>guenots commencent de prouigner impunément par la France.</i>	202
<i>A Monsieur de Fonsomme. Le Minime mené prisonnier au Roy , retourné dans Paris avec triomphe.</i>	205
<i>A Monsieur de Fonsomme. Changement de la Volonté du Roy de Nauarre contre les Huguenots, & pourquoy.</i>	216
<i>A Monsieur de Fonsomme Gentil-homme Vermandois. Monsieur de Guise retourne en Cour , ligué avec le Connestable & Marechal de S. André.</i>	221
<i>A Monsieur de Fonsomme, Gentil-homme Vermandois. Feu des troubles de lxj. allumé generalement par la France.</i>	227
<i>A Monsieur de Fonsomme. Ruines publiques par la Frãce, sous le pretexte de la Religion. fueil. 232.</i>	
<i>A Monsieur de Fonsomme. Siege deuant Paris par les Huguenots.</i>	235
<i>A Monsieur de Fonsomme. Acheminement au siege d'Orleans.</i>	240
<i>A Monsieur de Fonsomme. Mort de Monsieur de Guise.</i>	241
<i>A Monsieur de Fonsomme. Comme Dieu s'est diuersement ioué tant des Catholiques que Huguenots.</i>	249
<i>A Monsieur de Fonsomme. Comme toutes choses rioyent aux Huguenots soudain apres la mort du Duc de Guise.</i>	252

A Monsieur de Fonsomme. *Voyage du Roy Charles neufiesme par la France.* fueil. 256.

A Monsieur de Fonsomme. *La cause entre l'Vniuersité & les Iesuites traitée au Parlemēt.* f. 259

L I V R E V.

A Monsieur de Querquifinen Seigneur d'Ardiuiilliers. *Comme toutes choses se tournerent au desaduantage des Huguenots contre leur opinion.* 270

A Monsieur du Faur Seigneur de Pybrac, Aduocat du Roy au Parlement de Paris. *Cette lettre escrite apres les grands iours de Poitiers.* 1567. 275.

A M. de Querquifinen Seigneur d'Ardiuiilliers. *Recit de l'estat des troubles de lxvij.* 279

Tombeau de Messire Anne de Mōtmorēcy, Pair & Connestable de France. 286

A M. de Querquifinen Seigneur d'Ardiuiilliers. *Monsieur le Duc d'Anjou, frere du Roy fait Lieutenant general de France.* 190

A M. de Querquifinen Seigneur d'Ardiuiilliers. *Deportemens de nous autres François pendant la courte Paix de 1568.* 291

A Mōsieur d'Ardiuiilliers. *Suite du mesme discours.* 292

A M. de Querquifinen Seigneur d'Ardiuiilliers. *Mort de Monsieur le Prince de Condé.* 296.

A M. de Marilhac Seigneur de Ferrieres, controolleur general del'Espargne. *Iournée de*

TABLE.

Montcontour, où la fortune tourne visage aux Huguenots. 299

A Monsieur de Querquifinen Seigneur d'Ardiulliers. *Edict de Pacification de l'an 1570.*

304

A Monsieur Loisel Aduocat. *Mort de l'Admiral de Chastillon.* 307

A M. de la Bite Iuge general de Mayenne. *Acheminement au siege de la Rochelle.* 316

A Monsieur de la Bite Iuge general de Mayenne. *Siege de la Rochelle, & quel progres & euement il eut.* 318

A Monsieur du Faur Seigneur de Pybrac, Aduocat du Roy au Parlement de Paris. 373

L I V R E. V I.

A Monsieur de Sainte-Marthe. *Il raconte quel fut le motif du plaidoyer qu'il fit en l'an 1576. pour le pays d'Angoulesme.* 321

Plaidoyé pour la ville d'Angoulesme, fait en Parlement à Paris le 4. de Feurier 1576. 325

A Monsieur Chopin Aduocat au Parlement de Paris. *De quel dangereux effect sont les Euocations du propre mouuement des Princes, & comme elles ont pris leur ply par la France.* 363

A Monsieur Buisson Seigneur de Vaillebresay, Aduocat en la Cour de Parlement. *Il se ioie icy avec Monsieur Buisson en se ramenteuât de quelques Epistres amoureuses qu'il auoit fait imprimer en sa ieunesse, sans l'inscriptiõ de son nõ.* 366

T A B L E.

A Monsieur Buisson Aduocat en Parlemēt.
Suite du mesme propos qu'en la lettre precedente.
 368.

A Monsieur Nesmond Lieutenant general
 au siege Presidial d'Angoulmois. *De quelques
 iours & mois qui ont esté fatalement heureux ou
 malheureux à vns & autres.* 369.

A Madame de Ferrieres, vefue de messire
 Guillaume de Marilhac, en son viuant Cōseil-
 ler d'Estat, & intendant & Cōtroolleur gene-
 ral des Finances. *Cette lettre ne gist qu'en curialité.*
 373.

A Monsieur Pithou sieur de Sauoye, Aduo-
 cat en la Cour de Parlement de Paris. *Il escriit
 à Monsieur Pithou quel a esté le motif de faire le
 Poëme de la Pulce, auquel plusieurs nobles esprits
 s'employèrent en l'an 1579. les grands Iours estans à
 Poictiers.* 374.

La Pulce de Catherine des Roches. 378.

La Pulce d'Estienne Pasquier. 382.

A Monsieur Pithou seigneur de Sauoye,
 Aduocat en la Cour de Parlement de Paris.
Il louë Mesdames des Roches mere & fille. 385.

A Madame de Ferrieres. *Il s'excuse de n'auoir
 escrit à la Dame de Ferrieres.* 387.

A Madame de Ferrieres. *Il accuse la Dame de
 Ferrieres de ce qu'elle ne luy escrit.* 388.

Lettre de la Dame de Ferrieres à Pasquier.
Elle s'excuse avec vn bel artifice de n'auoir escrit. 389.

TABLE.

A Madame de Ferrieres. *Il respond aux excuses de la precedente lettre.* 390.

A Monsieur de Boileuesque Seigneur de S. Leger. *Il promet tous offices au Seigneur de S. Leger.* 392

A Madame de Ferrieres. *Ceste lettre gist en remerciement.* 393

LIVRE. VII.

A Monseigneur de Foix Conseiller du Roy au Conseil d'Estat, & Ambassadeur au S. Siege. *Il recõmande vn sien fils à Monseigneur de Foix, estant lors à Rome.* 394

A Monsieur d'Ossat, en la maison de Monsieur de Foix. *Il recommande à Monsieur d'Ossat son fils.* 396

A Monsieur Morin. *Suite de mesme propos.* 397

A M. de Foix, Ambassadeur pour le Roy à Rome. *Il loüe & remercie Dieu, de quoy ce Seigneur a esté receu & promeu à l'Archeuesché de Tolose.* 398.

A Monseigneur de Thou Conseiller au Cõseil d'Estat, & Aduocat du Roy en sa Cour de Parlement de Paris. *Il rit par ceste lettre avec Monsieur le President de Thou, lors Aduocat du Roy.* 399

A M. Mole Seigneur de S. Remy, Conseiller en la Cour de Parlement de Paris. *Il discourt*

TABLE.

en ceste lettre cōbien il estoit malaisé lors des grands iours de Clairmont, de reduire toutes choses en bon train, & en rend les raisons. 403

A Monseigneur de Harlay Conseiller d'Estat, & premier President en la Cour de Parlement de Paris. *Il congratule à Monsieur le premier President de sa promotion en cest estat.* 414

A Monsieur l'Archer Conseiller au Parlement de Paris. *Combien il est bien seant à vn homme de ne s'estimer plus haut pour auoir esté appelé à vn grand estat.* 417

A Monsieur de Basmaison, Aduocat au siege Presidial de Ryon. *Il dissuade vn sien amy, de quitter l'estat d'Aduocat, pour prendre vn office de Indicature.* 420

A M. de la Bite Iuge general de Mayenne. *Il fait icy recit de la belle vie & belle mort de Monsieur le premier President de Thou.* 423

A Monsieur de Basmaison Aduocat au siege Presidial de Ryon. *Il se rend Aduocat enuers le sieur de Basmaison, de son fils.* 442

A M. Loisel Aduocat du Roy en la Chābre de Iustice de Guyenne. *Que pendant que nous mettons tout nostre estude de paroistre sçauans dās nos plaidoyers ou harangues, nous corrompons la naïfueté de l'eloquence François.* 443

LIVRE. VIII.

A Monsieur Pithou Seigneur de Sauoye, Procureur general du Roy en la Chā.

bre de Iustice de Guyenne. *Par ceste lettre il discourt la forme qu'il a tenu tant en commun cours de ses estudes , que exercice de son estat.* 452

A Monsieur Bigot Seigneur de Tibermeny, President au Parlement de Rouën. *Il desire d'entendre d'où vient l'ancienneté de la Fiertre de saint Romain à Rouën.* 461

A Madamoiselle de la Herbaudiere. *Toutes les lettres presque qui sont au present liure, concernent les nobles inuentions que l'on auoit fait sur le Tableau de Pasquier.* 463

A Monsieur de Taix abbé de Basse-fontaine, & Doyen de l'Eglise de Troyes. *Il se gausse avec Monsieur de Taix , tres-docte homme , auquel il ennoye quelques Vers qu'il auoit faits.* 464

A Monsieur de Pincé, Aduocat au Parlement de Paris. *Pasquier ayant fait le premier des Sonnets dessusdits , & le Sieur de Pincé le second, Pasquier rechargea de ce troisieme , & de l'Epistre qui le suit.* 464
fueil. 464

Lettres de Monsieur Neuelet , seigneur d'Osche à Pasquier. 466.
fueil. 466.

A Monsieur Neuelet seigneur d'Osche, Aduocat en la Cour de Parlement de Paris. *En respondant à l'autre lettre il louë la beauté de l'esprit de Monsieur Neuelet.* 467
fueil. 467

Lettre de monsieur de Taix Abbé de Basse-fontaine , à Pasquier. *Il s'excuse de ce qu'ayant esté conuié par Pasquier à disner, il ne pouuoit s'y*

TABLE.

trouuer.

468.

A Monsieur de Taix Abbé de Basse-fontaine, Doyen de l'Eglise de Troyes. *Je respõd à la precedente lettre par forme de gaufferie.* 469.

A Monsieur Binet Aduocat en la Cour de Parlement. *Il enuoye à Monsieur Binet tant l'Apologie que l'Ode qu'il auoit faite sur sa main.*

470.

Aux ingenieuses mains qui ont honoré la main de Pasquier de leurs vers. 472.

Apologie de la main au Lecteur. 476.

A Monseigneur de Morfan, Conseiller au Conseil d'Estat, & President au Parlement de Paris. 489.

A Mõsieur de Tabourot Procureur du Roy au bailliage de Dijon. *Il raconte en cette lettre plusieurs gayetes dont il s'est diuersement égayé quand les occasions s'y sont presentees.* 491.

A Monsieur Iuret Chanoine en l'Eglise de Langres. *Il s'excuse enuers Mõsieur Iuret des deux vers qu'il auoit enuoyez à Monsieur Tabourot.* 507.

Lettre de Monseigneur le grand Prieur de France à Pasquier. *Monsieur le grand Prieur fait cest honneur à Pasquier de celebrer sa main comme plusieurs autres auoyent fait.* 509.

A Monseigneur le grand Prieur de France Lieutenant general de Prouëce. *Responce aux precedentes lettres.* 512.

L I V R E

TABLE.
L I V R E IX.

A Monseigneur Briffon Conseiller au Conseil d'Estat, & Presidēt en la Cour de Parlement de Paris. *Il discours de la difference qu'il y a entre le droict de Frāce & des Romains.* 513

A Monsieur de Tolet Abbé de Plimpie. *Il remercie l'Abbé de Plimpie des bons offices qu'il faisoit dans Rome à deux de ses enfans.* 527

A Monsieur Taucou Procureur au siege Presidial de Sens. *Il prie Monsieur Taucou sien amy d'apporter quelque diligence à l'expedition d'un procez.* 528

A Mōsieur de Luzarche Cheualier de l'ordre, & Lieutenant de la cōpagnie de Monseigneur de la Chappelle des Vrsins. *Il se gausse avec le seigneur de Luzarche sur sa lōgue absēce.* 529

A Monsieur Maillard seigneur de Sourche, Conseiller & Maistre des Requestes ordinaire de l'hostel du Roy. *Il descrit la calamité de ceux qui plaident en leur nom.* 530

A Theodore Pasquier son fils. *En exhortant icy son fils, il monstre de quelle façon doit estre le bon Aduocat.* 532

A Monsieur Chandon Secretaire du Roy. *Il combat Machiauel qui a faiēt un chap. de la Sceleratesse, par lequel il monstre comme un Prince se peut maintenir en son estat par meschanceté.* 539

A Monsieur Chandon Secretaire du Roy. *Combien le Romain auoit l'esprit resolu d'exccuter*

ce qu'il se promettoit.

551

A Monsieur de la Croix du Mans. Il exhorte le seigneur de la Croix du Mans, qu'il se garde d'estre surpris par les recommandations d'vns & autres, qui desireront d'estre couchez cōme autheurs en sa Bibliotheque des autheurs de la France. 554

A Monsieur de Mornac Aduocat au Parlement de Paris. Combien les Romains s'oublièrent en la guerre que les Gaulois leur firent sous la conduite de Brennus, & comme depuis ils tascherēt de couvrir leurs fautes par leurs historiographes. 560

A Monsieur Seue seigneur du Pré, Presidēt au Siege Presidial de Melun. Il se gausse avec Monsieur le President de Melun, qui l'auoit conuié à dīner en sa maison du Pré. 567

A Monsieur de. Il conseille à vn sçauant homme de ce temps de n'escrire point contre vn autre, qui auoit mis en lumiere vne histoire qu'il ne trouuoit Vraye. 568

A Monsieur Seue Docteur en Medecine, demeurant à Melun. Il escrit à Monsieur Seue Medecin quel est son naturel, à fin que sur iceluy il aduise quelle medecine il luy pourra ordonner. 570

A Monsieur du Port seigneur des Roziers, Conseiller au siege Presidial d'Angoulmois. Il raconte des morts de quelques Seigneurs de robe longue, qui aduindrent en l'an 1584. 572

A Monsieur Seue seigneur du Pré, President au Siege Presidial de Melun. Il s'esgaye

T A B L E.

avec le President de Melun, & le semond à dîner. Ceste lettre se rapporte à une précédente où il auoit vſé des termes de pratique. 576

A Monsieur du Port seigneur des Roziers, Cōseiller au siege Presidial d'Angoulmois. 577

L I V R E X.

A Monsieur Tournebus Conseiller en la Cour de Parlement de Paris. *Lettres en forme de Paradoxe pour les bestes brutes.* 580

A Mōsieur Morin. *Il recōmande Monsieur de Tournebus le ieune allant à Rome à M. Morin.* 610

A Monsieur de Gourdan Cheualier des deux Ordres du Roy, Gouverneur de Calais & pais circonuoisins. *Il luy recommande vn sien fils.* 611

A Monsieur le Baron de Ramefort. *Il se mocque de l'hypocrisie que les Gentils-hōmes apportent auioird'huy pour se sauuer d'vn dementir.* 612

A Monsieur de la Bite Iuge general de Mayenne. *Il s'excuse d'auoir esté paresseux d'escrire à Monsieur de la Bite.* 614

A Mōsieur Brulart seigneur de Chillery President en la troisieme chābre des Enquestes du Parlement de Paris. *Il deplore la calamité des troubles, & le danger qu'ils traissent avec soy.* 617

A Monseigneur de Tiard seigneur de Bissey, Euesque de Chaalons sur Saulne. *Il se plaint de quelques singes, qui veulent à fausses enseignes paroistre grāds aux despēs des œuures d'autruy.* 634

TABLE.

diquer son fils en quellien qu'il le trouue, qui s'estoit rendu Religieux. 699

A Monsieur de sainte Marthe. *Recit de la paix entre le Roy & M. de Guyse.* 704

A Monsieur de Maugarny, Intendant des affaires de M. le Duc de Guyse. *Il le remercie de ce qu'il luy auoit enuoyé vne certaine lettre de Monsieur de Guise.* 706

A Monsieur de sainte Marthe. *Quel iugement il fait sur la pacificatiõ faite avec la ligue.* 707

A Monsieur de sainte Marthe. *Grands preparatifs du Roy contre les Huguenots tournez à neant, avec vne description des miseres du tẽps.* 708

A Monsieur de sainte Marthe. *Il décrit la deffaicte & mort de Monsieur de Joyeuse tué à la bataille de Contras.* 710

A Monsieur de sainte Marthe. *Sur l'arrinée des Reistres, & leur deffaite.* 713

A Monsieur d'Espesse Conseiller d'Estat & Aduocat general du Roy en sa Cour de Parlement de Paris. *Il le reprend de ce qu'il n'auoit daigné lire certaines Meditations à cause de l'au-
theur.* 719

A Monsieur d'Espesse. *Il décrit la vie & les cruantez de Basilides Roy des Moscouites.* 722

LIVRE XII.

A Monsieur d'Espesse Conseiller d'Estat & Aduocat general du Roy en la Cour de Parlement de Paris. *Discours du plaidoyé que*

T A B L E.

fit M. Pasquier pour Iean Blosset seigneur d'Arconuille accusé d'un assassin le plus enorme qui fust oncques, dont il fust depuis absous par arrest de la Cour de Parlement. 733

Plaidoyé pour Iean de Blosset, seigneur d'Arconuille & sa femme, appellante du Preuost de Paris ou son Lieutenant criminel, de certain decret de prise de corps, & de tout ce qui s'en est ensuiui. Contre Maistre Simon Bobie Aduocat en la Cour de Parlement, & Bailly de Colommiers inthimé. 738

A Monsieur de sainte Marthe. Il raconte comme la Chambre des Comptes ne voulut inthimer un Edict que le Roy y enuoyoit. 767

A Monsieur de sainte Marthe. Histoire au long des Barricades, & comme le Roy sortit de Paris. 781

A Monsieur de sainte Marthe. Suite de ce qui se passa apres les Barricades. 794

A Monsieur de sainte Marthe. Il desploie la calamité du temps, & en décrit les miseres. 796

A Monsieur de sainte Marthe. Description du proces de la ligue, & comment elle prinist son accroist tout d'un coup. 818

A Monsieur Tournebus Conseiller au Parlement de Paris. Recit de l'histoire de la Papesse Ieanne. 829

Fin de la table des Chapitres.

Anno aetatis.
87.



PATIONVM PATRONVS. STEPH. PASCHASIVS REGIARVM

Nulla hîc Paschasio manus est, Lex Cincia quippe
Caussidicos nullas sanxit habere manus.

L. Gaultier incidit.
2617.



LE

PREMIER LIVRE
DES LETTRES
D'ESTIENNE PASQUIER,
CONSEILLIER ET ADVOCAT
General du Roy en la chambre des
Comptes de Paris.

*A Monsieur Loisel Aduocat en la Cour de Par-
lement de Paris.*



E n'estoit point aux François (à-
fin que sans me flater ie descou-
ure ce que i'en pense) auxquels
ie deuois adresser cest ouurage:

*Il redrai-
son pour-
quoy il ex-
pose ses let-
tres en lu-
miere.*

Assuré que dès l'entree vn cha-
cun lisant le titre, comme trop bas, le vilipen-
dera à l'instant. Non, que ie ne sçache bien
que toutes autres nations, qui ont fait profes-
sion de bien dire, n'ayent grandemét approu-
ué ceste façon d'exposer au public les lettres
que les gens de marque s'entr'escriuoyent
priuément : car encores au regard des Grecs
nous ressentons nous de celles d'Hipocrate, &
Platon : & quant aux Romains de celles de
Ciceron & de Pline Second : & sur le declin
de l'Empire, de Symmaque, Cassiodore, Si-

donius & Ennodius, desquelles nous tirons quelque lumiere de l'ancienneté dans l'obscurité de leur siècle. Voire que lisant celles de Sidonius, Euesque de Clairmont, l'on recueille que la plus-part d'icelles estoient faites à plaisir, dans lesquelles vns & autres desiroient estre inferez, tout ainsi que si c'eussent esté Epigrammes. Et à la suite d'eux, le Toscan desirieux au possible de l'illustration de sa langue, s'est tellement desbordé en ce sujet, qu'il apreste quelquefois plus de risée que d'edification au lecteur. Nous seuls entre tous les autres (peut estre d'un esprit plus hautain) ne nous sommes iamais rendus soucieux de mettre noz missives sur la monstre. Aussi pour dire le vray, quel besoin est-il que le peuple entende mes affaires priuees ? Affaires dy-je le plus du temps sans discours, & ausquelles ie n'auray voulu que folastrer & donner carrière à ma plume avec mes compagnons & amis. Car d'esuenter celles qui importent à ma famille, tout ainsi que cene seroit chose asseuerée, aussi sembleroit-il que ce fust vn jeu d'enfant. I'adiousteray que mettant la main à cest œuvre, ie me delibere de luy oster la teste & les pieds: Ie veux dire ces mots de Monseigneur, Monsieur, & autres dont nous faisons les premiers frontispices de nos lettres: & plus encore ceste closture des quatre & cinq lignes de recommandations aux bonnes graces, qui ne seruent que de perte de temps, & remplissage de papier. Mais tout ainsi que le Romain quand il prenoit congé d'un homme, fust en

presence ou par lettres, le fermoit de ce mot *Vale*: pareillemēt puis que prenant entre nous congé de noz amis de bouche, nous vsons de ce mot A Dieu, aussi me plaist-il de le mesnager à la fin & conclusion de mes lettres. Chose qui ne plaira pas de prime face au peuple, cōmenouuelle & inacoustumee entre nous. C'est pourquoy (amy Loisel) vous me deuiez appeller à quelque meilleure entreprise, plustost que de m'importuner tant de fois de recueillir mes minutes esparſes çà & là comme d'un naufrage, pour les hazarder au iugement d'un chacun. Mesmement que ie m'assure que plusieurs lisant ceste excuse ne la digereront d'autre sorte, que comme d'un honnestepretexte que chacun faict contenance de se forger, lors que volontairement il se precipite à quelque ouurage : faignant de remettre sur les prieres & sermons d'autrui vne chose dont luy mesme est le premier instigateur en sa conscience. Toutesfois à fin que nul ne se troye, mon intention n'est pas d'employer cecy pour excuse. Puis qu'une fois i'ay paillé les bornes de honte, rougisse pour moy qui vouldra. Je diray seulement ce mot, qu'en toutes choses du monde, auparauant qu'elles se trouuent estre arriuees à leur accomplissement, il faut que premierement il y ait quelque hardy entrepreneur qui face plâche aux plus sages. L'entrepreneur veritablemēt de publier mes Epistres, sujet non accoustumé à la Frâce. Mais quoy? Vns Erasme & Budé (lumieres de nostre siecle) & deuant eux vn Politian, n'en ont ils pas

fait tout autant ? Mais ils les ont dictées en Latin, me dira quelqu'un d'adventure. Que peut importer au Lecteur que ce soit Latin ou François, veu que tous les deux sont instrumens pour expliquer noz conceptions ? Le Grec estoit le vulgaire à Hipocrat & Platon, le Latin à Ciceron & Pline. Cela ne destourna pas toutesfois ceux qui estoient de leurs temps de donner le cours à leurs lettres. Voire que ie me puis vanter auoir plus d'occasion de ce faire que tous ces modernes, d'autant qu'ils redigerent leurs fantasies par escrit en vn langage qui ne leur estoit naturel, & par ce moyen encores qu'ils fussent personnages fort doctes, si nous peurent ils apprendre plusieurs traits de parler mal couchez, mal limez, mal appropriez, comme de la part de ceux qui les accommodoyent plus à la liberté de leur esprit, qu'à la pureté du langage, ores que le principal but de ceux qui escriuent en ce genre doie estre l'embellissement de la lague en laquelle ils descouurent leurs sens. Et de ma part escriuât en mon vulgaire, pour le moins escry-ie au langage auquel j'ay esté allaieté dès la mamelle de ma mere. Me promettant que si nostre langue prend pied entre les nations estranges, ie leur pourray seruir d'exéple non adopté. En tout euenement esperc-ie de rapporter ceste faueur d'auoir bien voulu aux miens : entre lesquels puis que pour la conformité de nos estudes & mœurs, vous tenez l'un des premiers rangs, aussi vous en presente-je maintenant des premiers fruits, ayant pour vous o-

beïr ramallé non toutes, ains vne partie de mes lettres, telles que le hazard me les a peu conseruer. Vous en trouuerez les aucunes serieuses; les autres gayer, autres folastres, autres accompagnées de discours, & les autres n'auoir plus beau subiet sinon qu'elles sont sans sujet, & comme fleches descochees à coup perdu: somme ce sera vne denree meslee telle que de ces marchands Quinquaiïliers, lesquels asfortissent leurs boutiques de toutes sortes de marchandises pour en auoir plus prompt debit: Ou pour mieux dire vn tableau general de tous mes aages, dans lequel vous verrez icy mon Printemps, là mon Esté, puis mon Automne tirez au vif, ie veûx dire mes lettres moulees sur le patron des aages qui ont diuersement commandé à mes opinions: Ne m'estant proposé maintenant de contenter seulement les sages, mais aussi les fols. Ceux là le gagneront au poix, ceux-cy au nombre. Et parauanture aduiendra-il que voulant contenter les vns & les autres, ie desplairay à tous deux. Toutesfois puis que ie vous ay obey; c'est à vous en contre-change de prendre mon party en main, contre vntas de controuleurs; ausquels ie ne seray iamais marry de desplaire en vous complaisant. A Dieu. En Ianu. 1586.

*A Monsieur de Tournebu professeur du Roy
 és lettres Grecques en l'Vniuersité
 de Paris.*

*Sçauoir
 s'il est bon
 de coucher
 les arts &
 sciences en
 François.*



T bien, vous estes doncques d'o-
 pinion que c'est perte de temps
 & de papier de rediger noz cõ-
 ceptions en nostre vulgaire, pour
 en faire part au public: estant
 d'aduis que nostre langage est trop bas pour
 receuoir de nobles inuentions, ains seulement
 destiné pour le commerce de noz affaires do-
 mestiques: mais que si nous couuons rien de
 beau dedans nos poicttrines, il le faut expri-
 mer en Latin. Quant à moy ie seray tousiours
 pour le party de ceux qui fauoriseront leur
 vulgaire: & estimeray que nous ferons renai-
 stre le siecle d'or, lors que laissans ces opinions
 bastardes d'affectionner choses estranges, nous
 vsferons de ce qui nous est naturel & croist en-
 tre nous sans main-mettre. Quoy? Nous por-
 terons donc le nom de François, c'est à dire,
 de francs & libres, & neantmoins nous asser-
 uirons nos esprits souz vne parole aulbaine?
 N'auons nous les dictions aussi propres, la
 commodité de bien dire, aussi bien que cest
 ancien Romain? Lequel mesmement ne nous
 a laissé que quelques liures en petit nombre,
 par le moyen desquels nous puissions auoir co-
 gnoissance de sa langue. I'adiouste que les di-
 gnitez de nostre France, les instrumens mili-
 taires, les termes de nostre pratique, brieuf la

moitié des choses dont nous vsons aujour-
d'huy sont changees, & n'ont aucune commu-
nauté avec le lāgage de Rome. Et en ceste mu-
tation, vouloir exposer en Latin ce qui ne fut
iamais Latin, c'est en voulant faire le docte,
n'estre pas beaucoup aduisé. Je sçay bien que
vostre opinion est assistee de plusieurs garents.
Parce que ces grands personnages que les sie-
cles passez ont portez vns Valla, Politian, Pi-
cus Mirandula, & de nostre temps Erasme,
Budé, Alciat, & infinis autres, nous ont fait
part des despouilles de leurs esprits en Latin,
& non en leurs langues maternelles. Et laissāt
leurs authoritez en arriere, encores pouuez
vous adiouster que s'il est ainsi que ceux qui
publient leurs œuures, le font souz vne inten-
tion qu'ils ont d'estudier, ou au commun pro-
fit du peuple, ou à l'exaltation de leurs noms,
il faut que d'une traite l'on vous confesse qu'il
est beaucoup meilleur de s'employer du tout
au Latin qu'en nostre langue, puis que d'un
commun accord de tout le monde, & quasi
par un droit de gent, le Latin a desia gaigné
tant de païs, qu'il n'y a contree si estrange ou
barbare qui n'en ait quelque cognoissance:
Nous esloignans de tant plus de nostre but,
quand nous escriuons seulement aux François
qui sont cloz & limitez de certaines bornes.
Et n'est pas hors de propos pour vous, de dire
que le Latin est aujourdhuy comme la mon-
noye qui fut jadis introduitte pour nous en
pouvoir aider & subuenir par tout le monde;
pour le fait & communication de toutes sortes

de marchandises: aussi qu'il semble que ceste langue par vn long succez & prescription de temps ait esté generalement approuuee par toutes les nations politiques, comme vn outil & instrument des traffiques de noz esprits, dont nous voulons faire part à tout le monde. Mesmes que nous n'auons entre nous, ni orthographe asseuree (chose toutesfois necessaire pour la perpetuation d'vne langue) ni telle varieté de mots, comme eurent iadis & le Romain & le Grec: Estans nez en vne Monarchie où l'on s'addonne plus à contenter son Roy par effet, & les Romains en vn estat populaire, auquel l'estude principale estoit de contenter le peuple par amadouement de paroles. De sorte qu'il ne faut point trouuer estrange, que leur langue fructifiast plus que la nostre, cōme celle qui estoit par eux cultiuee d'auantage pour la necessité publique: Ne se trouuans parmy le monde les choses prendre accroissement, sinon de tant que l'on en reçoit salaire & recompense condigne. Brief que nostre langue estant pauvre & necessiteuse au regard de la Latine, ce seroit errer en sens commun, d'abandonner l'ancienne, pour fauoriser ceste moderne. Raisons certes dignes de vous, & qui ne sont de petite estoffe. Or entendez dōc s'il vous plaist, quelle est ma conception en ceste dispute. Mon opinion ne fut onques d'exterminer de nous, ni le Grec ni le Latin: Je veux que nous nous aidions de l'vn & de l'autre, selon que les occasions nous admonesteront de ce faire; mais ie pretends que le pro-

fit qui en viendra, soit communiqué aux nostres, plustost qu'aux estrangers. Que s'ils ont affaire de noz inuentions, qu'ils les viennent chercher chez nous, & qu'ils apprenent nostre vulgaire, si par nos escrits il se rend digne d'estre appris. Si nous voyons les marchands pour leur commun traffiq d'une marchandise perissable, apprendre, qui l'Allemand, qui l'Espagnol, qui l'Anglois : doubterons-nous en ce louable commerce d'esprits, d'apprendre les autres vulgaires, si d'eux nous pouuons espuiser chose qui face à nostre edification? Et si peut estre vous vous desliez; d'autant que nostre François mis en balance avec le Grec ou Latin se trouue foible & leger de quelques grains: Bien fut vrayement à vn Romain necessaire oster ceste taye de ses yeux: lequel si pour mesmes scrupule se fut tenu clos & couuert sans donner vogue à sa langue, pour vn respect ou reuerence qu'il eust porté au Grec, maintenant serions nous frustrez de mille belles gentilleses & eruditions que nous apprenons du Latin. Cela mesme que vous m'objectez auourd'huy fut autrefois proposé à Cicéron pour le destourner d'escire en sa lague: qui ne le destourna toutesfois. Mais ie vous prie dites moy, en quoy gist ceste paureté que regretez en nostre langue? Est-ce que n'ayons les mots propres pour bien & deuëment exprimer les conceptions de nos ames? Ie ne vous en passeray condamnation. Est-ce qu'en cinq ou six sortes ne puissions varier vn poinct? Qui nous en empeschera? Vray que

ce priuilegen'est pas octroyé à chacun; mais à ceux qui avec vne bonté de nature ont conioinct vne estude assidue, de ceux qui ont fait estat de bien parler. Donnons que ce defaut soit en nous, & accordons qu'un Ciceron diuersifie son langage en autant de sortes cōme Roscius le Comedien se deguisoit en diuers minois, aussi ne nous est ceste diuersité necessaire: nous mettant seulement en bute d'endoctriner nostre peuple, & non de luy imposer. Tels fanfares sont propres en vne Democratie, à vn Orateur du tout voué & entétif à la surprise du peuple, par doux traits & emmieclemēt de sa Rhétorique. Ce qui ne se presēta oncq' entre nous. Et neantmoins si vous puis-
ie dire, que iamais nostre France, anciennemēt appelée Gaule, ne fut denuée de son eloquēce: & celebroyent nos anciens aussi bien leur Hercule Gaulois pour ce subiet, comme les Grecs & Romains leur Mercure. Et nous ressentirons à iamais des loüanges qui nous furēt à ceste occasion baillées par les Romains mesmes, quand ils disoyent que sur nostre patrō ceux de la grand Bretagne apprenoyent à orner leur langage. Aussi tant que Lyon durera, son honorera la memoire des declamations que l'on y faisoit tous les ans. Et s'il me faut passer plus bas, encores nous vanterons-nous que le Toscan (par sa confession mesme) mandia de nous les premiers traits & rudimens de sa Poësie. Qui me fait penser qu'en quelque temps que ç'ait esté, nostre langue ne fut iamais necessiteuse, mais que nous vsons d'icelle, ainsi que

fauaricieux d'un tresor caché, & ne la voulés
 mettre en œuvre. Toute terre ores que grasse
 ne rapporte aucun fruit, aussi ne fait vne lan-
 gue si elle n'est cultiuee. Quoy qu'il en soit ie
 m'aduise qu'entre tant de nations elle n'eust
 receu cest honneur que le Romain luy donna
 anciennement en ce suiet de facode: & de frai-
 che memoire les modernes Italiens (sobres ad-
 mirateurs d'autrui) si elle se fust trouuee si
 courte d'elegance, comme il y en a quelques-
 uns des nostres qui la pleuiēt. Mais pourquoy
 dy-ie cecy, si nous la voyons auourd'huy en
 telle reputation & honneur, que presque en
 toute l'Allemagne (que dy-ie l'Allemagne, si
 l'Angleterre & l'Ecosse y sont comprises?) il ne
 se trouue maison noble qui n'ait precepteur
 pour instruire ses enfans en nostre langue Fran-
 coise? Doncques l'Allemand, l'Anglois & l'E-
 cossois se paissent de la douceur de nostre vul-
 gaire, & nous François naturels ne mettrons
 peine à l'illustrer par escripts, & faire aux autres
 nations paroistre que ce n'est point vn corps
 sans ame? Doncques la publication du Latin
 espars par ce grãd vniuers, nous osterà le soing
 de bien vouloir particulièrement aux nostres?
 Ia à Dieu ne plaise, & tant que ceste main du-
 rera, & que l'ame me battrà au corps, ie m'es-
 loigneray de ceste ingrate volonté. Lors que
 le Romain commença d'escrire en sa langue,
 la Grecque estoit farcie d'un' infinité de grands
 autheurs qui n'eurent oncques puis leurs sem-
 blables: vns Hippocrate, Platon, Aristote, Xe-
 nophon, Theophraste, Isocrate, sans ceux que

l'ingratitude desans nous a perdus, de telle sorte qu'il ne nous en reste que les noms. Leurs noms & leur sçauoir vogueoyent entre toutes les nations bien polies. tant s'en faut que l'opinion de ceste grâdeur fist perdre cœur aux Romains, qu'au contraire il leur augmenta. Et de fait, combien que Ciceron par vne grande estude se fust rendu admirable entre les Grecs, de son temps, si est-ce qu'il ne se trouue point qu'il ait iamais esté gueres soucieux d'escrire en cestel langue adoptee, ains en la sienne. Afin que ie vous recite que Tibere Empereur abhorra tant les langues estrangeres, qu'ayant par mesgarde vsé d'un mot Grec, qu'il pouuoit dire en Latin, luy-mesme le fit par expres corriger. Et tous les Romains en general s'estudierent à l'embellissement de leur langue. Quoy faisant ils rendirent plusieurs de leurs pays Philosophes, & donnerent occasion à d'autres gens d'auoir recours à eux, comme à vne ancre de seureté. Le Grec s'est fait grand pour escrire en son vulgaire. Tels'est aussi rendu le Romain, & après eux le Toscan. Nous seuls sommes demeurez en ceste superstitieuse ingratitude, de ne rien communiquer aux nostres, sinon en paroles dont nous ne pouuons sans truchement estre entendus. Mais laissons les exemples des autres nations à part, & examinons quel fruit on peut rapporter de ma proposition. Je m'asseure que tout homme de bon iugement sera d'accord avec moy, que nous deuons estudier les langues, non point à cause d'elles, ains pour les disciplines, pour les

beaux discours & suiets dont nous les voyons accompagnées par le labeur de ceux qui y ont dextremēt employé leurs plumes. Encores que ie sçache biē qu'il le soit formé vn certain sçauoir pedantelque entre nous de plusieurs qui font estat d'apprendre le Grec; Non pour tirer la mouelle qui est es œuures de Platon ou d'Aristote, ains sans plus pour discourir sur le dialecte d'vn mot. Or si i'ay cest auantage sur vous, que ces langues Grecque & Latine ne soyent autre chose qu'instrument pour paruenir à vne intelligence de la doctrine qu'elles contiennent, vray Dieu! quel profit rapporterions nous si toutes les disciplines estoient redigees en nostre langage? Nous tous dès nostre moyen aage commencerions à philosopher, enjambant autant dessus nos predecesseurs, que nous employerions le temps à la cognoissance des sciences & de la Philosophie, lequel ils estoient contraints d'employer à la cognoissance des langues. Car nous tous estans composez d'vn esprit né à la ratiocination, toutesfoi brusque de soy s'il n'est bien façonné & poly, quantes personnes estimez-vous qui par ce moyen arriueroyent à la cognoissance des arts, qui pour le defaut de cela demeurent au iourd'huy en croupe? Par ceste voye au temps jadis Cimon Athenien, vieil, & de son mestier corroyeur, par les instructions & iournelles leçons de Socrates, vint en tel degré de Philosophie qu'il en escriuit plusieurs liures. Et Protagore yurongnant, estant par cas fortuit tombé en la lecture que faisoit Antistene, disputant

du bien & du mal en la langue, goustâ tellemēt ses propos, que deporté-fais & gaigne-denier qu'il estoit, il se fist de puis entre les liés tel personnage que nous sçauons. Le semblable aduint à Polemon, homme du tout intéperé & adonné à ses plaisirs, lequel tombant à demy yure en l'escole de Xenocrates, où il faisoit vne leçon de la temperance, l'oyant discourir sur ce poinct, il se conuertit tout à faict, de telle façon qu'il luy succeda & en mœurs & en doctrine. Et pour ne voyager en la Grece, ains m'heberger quelque peu en la Toscan, nous auons veu en nostre ieune aage dans la ville de Florence Iean Baptiste Gello exerçant avec les lettres la cousture, homme qui ne sçauoit ni grec ni Latin, & toutesfois il fit plusieurs liures pleins de bonne Philosophie; ainsi que nous voyons sa Cyrcé, & son liure qu'il nomma Caprices, où il n'y a rien de caprice sinon le tiltre. Chose qu'il falloit qu'il eust necessairement espuisé des œuures de Philosophie, qui sont diuersement semez an langage Toscan. Quoy que ce soit, ie ne me puis persuader que la grece eust produit de si grands Philosophes qu'elle fit, si on y eust appris les sciences en Chalde, ou Egyptien; dont les Grecs emprunterent toutesfois vne partie de leurs secrets. Ni Romenenous eust enfanté de si grands personnages que nous y auons veu, si elle n'eust esté plus soucieuse de sa langue que del'estrangere. Ce que nous pouons encore recueillir de Caton le vicil, lequel bien qu'il fust l'un des premiers de sa ville, tant en l'Oratoire, qu'en

la medecine, & qui fit l'histoire de Rome, escriuit plusieurs harangues par luy prononcees tant au Senat, que deuant le peuple, composa vn liure de la Medecine, & vn autre de la vie rustique: bref ores qu'il fust accomply de tout ce quel'on peut desirer en vn grand personnage, si n'apprit-il iamais la langue Grecque que lors qu'il estoit sur le bord de sa fosse, quasi par maniere d'acquit. Je ne veux pas cependant que vous pensiez que ie voulusse bannir les escolles Grecques ou Latines. Elles nous sont necessaires. Mais ie veux dire que si nous auions receu tant d'heur que toutes les fleurs & beautez qui sont en icelles estoient transplantees dans nostre France, nous aurions grandement racourcy nostre chemin. Et par ce qu'elles ne le sont aujourd'huy, pour le moins donnons ordre avec le temps d'y satisfaire : excitons ceux qui auront quelque assurance de foy, d'y mettre la main. Quoy faisoit ne faictes doute qu'au long aller nostre langue ne passe les monts Pyrenees, les Alpes & le Rhin, aussi bié qu'vns Petrarque, Bocace, Arioste, Baltazard de Chastillon, lesquels au commencement cogneus seulement par les leurs, se sont ouuert avec le temps voye en vne infinité de nations. Car quant à l'orthographe quel'on dit n'estre bien formee entre nous, vous-vous abusez si vous le pensez. Celuy quel'ancienneté nous a produit est tresbon, quelque nouvelle heresie qui se presente au contraire de ceux qui veulent faire en tout & par tout conformer l'orthographe au commú parler. Le Romain mes-

mes n'orthographioit comme il prononçoit. Et la mesme dispute qui est auiourd'huy entre nous par le moyen de Louys Megret & Jacques Pelletier, fut aussi quelquefois entre les Romains, mais de cela vne autre fois. Cependant ie vous prie m'aimer comme vostre allié, disciple, & amy. A Dieu, 1552.

A Monsieur Saulhage, Seigneur du Parc.

Vous me mandez qu'entre autres propos que M^{onsieur} de Tiart vous a tenus de mon Monophile, il trouuoit mauuais l'endroit où faisant mention de luy, ie soustiens que lors que noz Poètes discourent le mieux de l'amour, c'est lors qu'ils sont moins atteints de maladie. Au moyen dequoy pour le contenter estiez d'aduuis qu'à la seconde impression ie corrigeasse ce passage. Quant à moy, mon intention ne fut oncques donnât air à ces miés premiers fruiçts, d'offenser aucune personne: & quant au seigneur de Tiart, tant s'en faut que i'estimasse auoir rien dict à son des-advantage, l'ayant aggregé avec les Sieurs de Ronfard & du Bellay, qu'au contraire ie croy que nul ne lira ce lieu qui ne die qu'il a receu sinon honneur, pour le moins recit honorable de moy: & ce sans esperance (croyez m'en) d'aucun retour. Vray qu'en cest endroit il semble que i'incline plus sur l'opinion, que ceux qui discourent par leurs escrits plus brauement de l'amour, ne sont ceux qui aiment le plus. Ne sçauiez vous
quelle

quelle loy a celuy qui met la main à la plume ?
 Telle est mon opinion, ce n'est neantmoins vn
 oracle. Si oracle vous n'appellez, d'autant
 que ie deduis ce poinct si ambiguement, que
 i'en laisse la resolution à l'arbitrage de chacun.
 Et au fort si mon opinion n'est vraye, pour le
 moins est elle vray-semblable, & telle que ie
 la souhaittois. Ainsi à mon iugement le prati-
 quent ceux qui veulent dialogiser, & specia-
 lement aux discours dont on rapporte plus de
 plaisir que de profit, comme est le sujet de
 mon Monophile. Car quant à ce que me man-
 dez que sa maistresse luy a par expres cotté ce
 passage, pour luy en faire reproche, ie ne la
 pense pas de si pauvre esprit, que l'autorité
 de celuy qui s'est voüé à elle, ne luy soit de plus
 grand effect que celle d'un homme estranger.
 Que si la Damoiselle qui s'est mise en posses-
 sion de mon cœur, eust voulu faire son profit de ce
 lieu à mon dommage, il m'en seroit tres-mal
 pris. Mais à ce que ie voy, vous ne fustes iamais
 amoureux, & ne sçavez de quelles mignardi-
 ses (ie dirois volontiers hypocrisies) les Dames
 sçauent entretenir leurs amans, de peur que
 les propos ne leur faillent. Et pour vous dire
 en vn mot, si n'avez autre raison, ne pensez
 point que sur vostre aduisie change iamais ce
 passage : ne m'estant proposé de plaire à vn
 homme ou vne femme seulement, ains à nostre
 posterité, si i'y puis toutesfois attaindre. Et à
 pis prendre, i'en serois quitte pour effacer le
 nom de Tiart : mais ie le cognois homme de si
 bon entendement, qu'il en seroit grandement

marry. Je vous prie me recommander à luy: & s'il vient à propos luy faire part de la presente. A Dieu, 1554.

A Monsieur de Gournay gendarme.

*Il se rit a-
uecques vn
sien parent
qui estoit a
Rome.*



Ce que ie voy le papier est à meilleur marché dans Rome que l'ancre. Je le dy, par ce que receuant n'aguères de vous vne lettre dans vne grande feuille de papier, n'y auoit que trois mots escrits: & encores ces trois mots se ressentans de leur ancien citoyen de Rome, ie veux dire du tout haut à la main & superbe. Quoy? que vous me deffiez par cartel? En quel sujet prenez vous ce deffy? Est-ce aux armes à toute outrance? Vous sçauiez que le peu d'experience qu'en auez, & la longue profession que i'en fais dedans le Palais, vous en doiuent oster l'opinion. Est-ce en l'escrime de la plume? Mais vous voyez que vostre lettre qui est si courte, vous faict declarer vn couiard. Est-ce au mestier duquel sont affrâchis les plus vieux? Si en cestuy, ie vous en quitte le champ. Car le vœu de chasteté que i'ay depuis peu de tēps iuré, m'en dōne pareille dispense, qu'aux vieillards le priuilege de leur aage. Mais en bonne foy, que faictes vous, que dites vous, brief de quel bois vous chauffez-vous? Car ie desire entendre de voz nouuelles iusques à ces petites particularitez. Quant aux miennes, elles dependent du tout de l'estat des vostres. Parquoy si vous auez enuie d'en sçauoir, mandez

moy premierement quelles sont les voïtres. A
Dieu, 1554.

An Cheualier de Montereau.



Stezi e vous prie de vostre teste ceste folle persuation que la temperie du ciel rende les gens plus ou moins doctes ; comme s'il y auoit certains pays ausquels les bonnes lettres fussent plus affectees qu'aux autres. Ie ne vous denieray point que chaque nation a certaines vertus & vices, qui le transmettent de l'un à l'autre comme par un droit successif & hereditaire : & ne voy nul pays auoir esté anciennement repris de vice, qui ne se soit perpetué en la posterité, encores que l'on l'ait repeuplé de nouuelles colonies. Mais quant à ce qui appartient aux sciences, c'est tout un autre discours. Cela se peut recueillir par exemples fort oculaires. Y eut il iamais plus de grands personages en toutes sortes de sciences & disciplines qu'en la Grece ? y eut il iamais tant de Barbarie au monde que celle qui y est maintenant ? Considérez moy d'Afrique, en quelle opinion de doctrine auoit elle oncques esté ? toutesfois quelque peu apres l'aduancement & progres de nostre Christianisme, il n'y eut pays au monde qui produisit de plus grands docteurs de l'Eglise que celuy là, tesmoins Tertulian, Optat, Lactance, S. Cyprian, & S. Augustin. En cas semblable y eut-il iamais du temps de la Republique de Rome, nation plus esloignée des bonnes let-

Si la temperie du ciel produit les gens doctes en certains pays.

tres que la Germanie ? Laquelle vous voyez aujourd'huy, & depuis cent ou six vingt ans en çà fleurir en toutes sortes de disciplines sans parangon. C'est doncques l'exercice & vigilance que l'on y apporte, & non le naturel des contrees qui nous rend doctes. Voire ie vous puis dire, car il est vray, que tout ainsi que les Monarchies, aussi les sciences & disciplines changent de domicile & hebergement, selon la diuersité des saisons. C'est pourquoy du commencement elles florirent aux Chaldeens, puis en Egypte, de là s'acheminèrent en la Grece, puis à Rome. Et depuis s'estant plantee entre nous par plusieurs centaines d'ans vne longue Barbarie, par le moyen de ce rauage general que brassèrent plusieurs nations brusques à l'Empire Romain, en fin elles se vindrent loger, partie en Italie, partie en Allemagne & en France, où elles font encor leur sejour. Le tout par vne entre-suitte de toutes choses, laquelle faict que vous verrez en certains siecles les armes prosperer en vn pays, & les sciences en apres. Mais sur tout i'ay faict vne obseruation dont ie ne seray desdit, qu'aux premiers establissemens des Monarchies ou estats politiques, vous ne trouuerez que les lettres ayent flory, ains les armes, par lesquelles les braues guerriers prennent pied dedans les pays qu'ils se donnent en proye, & les ayans conquis s'y maintiennent par icelles. Et quand les Republiques commencent d'estre florissantes & en leur grandeur, il aduient fort souuent que les lettres y entrent en credit, lesquelles avec le

Au commencement des Monarchies les armes sont plus en vogue que les lettres.

declin de la republique commencét aussi à décliner. Vray que ce dernier poinct n'est pas du tout si assuré que le premier concernant les armes, pour y auoir eu plusieurs grands estats qui ne se sont iamais amusez aux lettres, comme vous voyez celuy du grand Seigneur. Estât l'opinion de quelques vns, que tout ainsi que l'homme pour establir sa fortune met pendant sa ieunesse la main à l'œuvre à bônes enseignes, puis estant sur son vieil aage arriué au période qu'il souhaittoit, tout le plus beau deduit qu'il ait, est de l'employer en discours fondez tantost sur l'exaltation de soy & du temps passé, tantost sur le controole de celuy qu'il voit deuant ses yeux pour n'auoir plus ny le corps ny l'esprit disposé à l'action. Aussi qu'il en aduient tout autant aux republiques, lesquelles sur leur premier auenemēt & croissance consomment tout leur temps aux armes, & lors qu'elles se trouuent gorgees d'honneurs, de grandeurs & dominations, elles commencent à s'assoupir & se nourrir en la delicatessé des lettres pour apprendre à en compter: chose qu'ils dient estre vn tres-certain presage de la vieillesse & definement de l'estat. Toutesfois ie ne leur en voudrois aisément passer condamnation, spécialement aux Monarchies, où tous les sujets se composent à la volonté de leur Roy, lesquels s'addonnant aux bonnes lettres, vous les y verrez tout soudain plantées: & ayant vn successeur d'autre naturel, encores espoussé l'on de nouueaux ses meurs, ny pour cela les royaumes ne viennent en decadence. Mais

de cecy comme de plusieurs autres poincts de mesme sujet, nous en discourrons quelquefois de bouche plus au long. Quant à present il me suffit de vous auoir monltré en passant que toute nation est capable des disciplines selon la diuerfité des occurrences. A Dieu, 1554.

A Monsieur de la Fosse Vendomois.

*Il se gausse
auecques
vn sie amy
qui se van-
toit luy a-
voir escrit.*



En'eusse iamais pensé que dedans si petite ville y eust eu tant de Rhetorique pour pallier vne paresse encontre vn homme diligent. He vraiment i'ay esté du tout honteux de ce que vous n'estiez honteux, trompetant vostre diligence au desauantage de la mienne, & cognois que l'air Vendosmois est fertile en Orateurs & Poëtes. Car outre les autres exemples qui m'en sont assez familiers, vous seul me le faictes assez paroistre par ces figures & fleurs de Rhetorique (que quelques-vns appellent desguisemens de verité) lesquelles vous sçauiez si bien dorer par vos lettres. Comment ? que depuis vostre partement, vous m'ayez escrit par six fois sans auoir aucune responce de moy ? O Dieu quelle singuliere hyperbole ! & toutes-fois par vous si dextrement proferee, que la lisant, comme si i'eusse songé, ie me suis quasi faict accroire, non que m'eussiez escrit par six fois, mais que ie ne vous auois rescrit. Ie n'adiouste à cecy, qu'en me mordant dès lors mesme de la morsure m'auiez comme le Scorpion par vostre huile garenty du mal que m'auiez

procuré: en m'excusant sur la multiplicité d'affaires que nous auons au Palais, pendant que vous autres messieurs les damoiseaux & muguets (ainsi le dites vous) estes pour tout sujet occupez à faire l'amour à vos dames. Chose par vous escrite de si bonne grace, qu'encores n'ay-ie refusé de le croire. Ce neantmoins ie vous iure que riant ainsi par vos lettres, soudain m'auiez remis en memoire par ceste nouvelle rencontre, mon ancienne seruitude. Au souuenir de laquelle ie me suis trouué si esgaré, que quasi me baignant en larmes, i'ay regretté mille & mille fois, non pas la presence de ma maistresse, mais le temps que i'y ay perdu. Et saultant d'un discours en autre, encores me suis-ie lamenté de la fortune à laquelle ie me suis à present voué, qui semble avec le tēps me pouoir appeller à quelque plus haut degré, mais dont par auenture vn iour ie diray tout autant comme maintenant de l'amour. Car quel moindre tourment ie vous prie cou-
Les pointes de l'ambition non plus fortes que de l'amour.
 ure l'ambition que l'amour? veu qu'en cetuy noustrouuons quelque extremité, qui est le point de iouissance, & en l'autre n'y a nul assouuissement, ne trouuant l'ambitieux iamais fonds ny riue sur lequel il puisse seurement assoir ses pieds. Ainsi souhaittoit Alexandre apres auoir subiugué vne partie de l'uniuers, en subiuguer d'autres: deplorant sa condition d'auoir employé tant d'annees à la reduction d'un seul monde. Ainsi chacun estant diuerlement arriué par son trauail & industrie au but qu'il s'estoit proposé, tournant tout à coup les

penſees ailleurs, ne penſant auoir rien fait pour ſa famille ſ'il ne monte plus haut, & en ceſte fa-
çon mettant ſa fortune à l'eſſor , luy facilite
vne voye à vn malheureux precipice. C'eſt
pourquoy, puis que i'é ſuiſt tombé ſi auant par
la preſente, ie vous diray en deux mots que ie
me reſouls prendre vn vol à toute la teneur de
ma vie, qui ne ſoit trop haut ny trop bas : ie
veux dire eſlongner l'enuie de moy ſi ie puis,
mais auſſi bannir le meſpris. A Dieu 1555.

*A Monsieur de la Chault Aduocat au Parle-
ment de Paris.*

PE preſent porteur ſ'eſtant fort com-
modement offert, ie n'ay voulu laiſ-
ſer perdre l'occaſion de vous eſcrire:
Non pour vous mander de mes nouuelles, ains
pour apprendre des voſtres, & du plaſir dont
iouyſſez maintenant en voſtre maiſon. Du-
quel ie ſerois à demy ialoux, n'eſtoit qu'en eſtes
ſi bon diſtributeur, qu'encores que ie ne ſois
auec vous, ſi en ay-ie neantmoins ma part :
Non telle comme ſi eſtiez preſent, mais i'eſpe-
re à voſtre retour me faire payer des arrearages
de voſtre abſence , auec ſi haut intereſt qu'à
grand' peine y fournirez vous. A Dieu
1555.

A Monsieur de Rosford.

N bonne foy on ne veit iamais en la France telle foison de Poëtes, *Que le cōmun de la France se rend fort aisément* comme celle que nous voyons au iourd'huy. Je crains qu'à la longue le peuple ne s'en lasse. Mais c'est vn

vice qui nous est propre, que soudain que voyons quelque chose succeder heureusement à quelqu'un, chacun veut estre de sa partie, sous vne vaine promesse & imagination qu'il conçoit en foy de mesme succez. Nostre France du temps du Roy Charles septiesme eut vne fille nommee Ieanne la Pucelle, laquelle poulsee d'une inspiration diuine, se presenta au Roy comme deleguee de Dieu pour restablir son Royaume. Ce qui luy succeda si à propos, que depuis son arriuee toutes les affaires de France allerent de bien en mieux, iusques à ce que finalement les Anglois furent totalement exterminiez. Pendant ce temps se trouuerent deux ou trois affronteules, qui se firent prescher par Paris, comme estans aussi enuoyees des cieux à mesme effect que la Pucelle. Toutesfois en peu de temps leur imposture fut halenee, & se tourna tout leur feu inopinément en fumee. Ceste maniere de faire est beaucoup plus familiere es choses qui concernent l'esprit. Il n'y a celuy de nous, qui ne sçache combien le docte Rabelais en folastrant sagement sur son Gargantua & Pantagruel, gaigna de grace parmy le peuple. Il se trouua

peu apres deux Singes qui se persuaderent d'é pouuoir faire tout autant, l'vn sous le nom de Leon l'Adulfy en ses propos Rustiques, l'autre sans nom en son liure des fanfreluches. Mais autant y profita l'vn que l'autre: s'estant la memoire de ces deux liures perdue. Nous auons veu en cas semblable le Romant d'Amadis fait François par le Seigneur des Essards estre heureusement reüssi à son autheur, pour la naïfueté du langage qui est en luy, & autres belles considerations qui appartiennent à l'entre-gent. A la suite duquel nous auons aussi veu tout soudain vn Palmerin d'Oliue, vn Palladié, vn Primalcon de Grece, & plusieurs autres de mesme marque, qui ne se sont faits que morfondre de reputation au regard du sieur des Essards. Autant en est-il aduenü à nostre Poësie Françoisse, en laquelle vous & le sieur du Bellay ayant plus heureusement rencontré que l'on n'auoit iamais esperé entre les nostres, chacun s'est fait accroire à part soy, qu'il auroit mesme part au gasteau, & à tant vne infinité ont mis la plume à l'enuy. Si bien ou mal ie ne diray pas, que la posterité en iugera, mais eux-mesmes le pourront cognoistre, d'autant que nous voyons leurs liures mourir du viuant de leurs autheurs, encores qu'ils ne couchent d'autre chose que de l'immortalité de leurs noms. Croyez que vous verrez au long aller ce beau nom de Poëte venir au nonchaloir du peuple, ainsi que celui de Philosophe, que l'on adapte maintenant à ces tireurs de Quint'-essence, qui transforment leurs esprits & espe-

rances en rien, en s'amufans, ou pour mieux dire abusans à la transformation de la pierre Philosophale. Or quelque chose qu'il en aduienne, tout ainsi qu'aux plus riches diamans l'on donne vn teint lors que l'on les met en œuvre, aussi tous ces nouueaux escriuaſſeurs donneront tant plus de lustre à vos escrits. Lesquels, pour vous dire en amy, ie trouue tres-beaux lors qu'avez seulement voulu contenter vostre eſprit: mais quand par vne seruitude à demy courtisane estes sorty de vous mesmes pour estudier au contentement, tantost des grands, tantost de la populace, ie ne les trouue de tel alloy. Vous me direz qu'un autre en iugera autrement. C'est ce qui nous perd en la reformation de nos œuvres: car pendant que nous estimons que ce qui desplaist à l'un, plaist à l'autre, nous penserions nous couper vn doigt, si nous retranchions quelque chose de nos inuentions: combien qu'il ne fault faire nulle doubte, que ce qui est vne fois bien fait, ores que sur son auenement ne plaise, peut estre pour la nouueauté, si faut-il qu'avec le temps il prêne pied ferme entre nous. Et pour ceste cause ie seray tousiours du party de ceux qui suiuront le grand chemin de la raison, sans se detraquer à quartier pour cuider contenter le vulgaire. Quant à ce que me mandez, qu'en quelques endroits de vos œuvres, vous estes souueni de moy, ie vous en remercie, comme celuy qui ne sera iamais marry que l'on sçache à l'aduenir que Ronſard & Pasquier furent de leurs viuans amis. Mais en vous remerciant ie

souhaitterois que ne fissiez si bon marché de vostre plume à hault-loüer quelques-vns que nous sçauons notoirement n'en estre dignes. Car en ce faisant, vous faictes tort aux gens d'honneur. Je sçay bien que vous me direz qu'estes contraint par leurs importunitéz de ce faire, ores que n'en ayez enuie. Je le croy : mais la plume d'un bon Poëte, n'est pas telle que l'oreille d'un Iuge, qui doit donner de mesme balance audience au mauuais, tout ainsi qu'au bon. Car quant à la plume du Poëte, elle doit estre seulement voüice à la celebration de ceux qui le meritent. A Dieu, 1555.

*A Monsieur le Picart, Conseiller en la Cour des
Generaux des Aydes.*

*Les opi-
nions qui
doivent en-
trer es es-
prits de
ceux qui
se veulent
marier.*



ME n'y auois iamais tant pensé, comme i'ay faict depuis que i'ay receu vos lettres : car & mon aage & mon opinion ne sont quant à present aucunement disposez à me marier. Toutesfois puis qu'estes en termes d'entrer en ce vœu, & qu'en voulez sonder mō auis, ie vous escriray franchement ce que i'é pense. Je ne vous diray point les incommoditez qu'appportent tant le Mariage, que le Celibat, ny les commoditez dont ils sont accompagniez ; c'est vn lieu cōmun dont plusieurs personnes se sont voulu iouir pour & contre. De ma part ie seray tousiours pour le Mariage contre la vie Celibe, non seulement par ce

qu'en general c'est le moyé de nous perpetuer de l'un à l'autre en ceste humaine société; mais aussi pour autant qu'en particulier, lors que nous n'avons plus affaire de femme, c'est lors que nous en avons plus affaire. Je veux dire pour soutenir les deffauts & impuissances de nostre vieillesse, que nous n'oserions tant commettre à quelques autres personnes, quoy que elles nous attouchent de proximité de lignage, comme à nos femmes, avec lesquelles nous avons voüé l'indivuidité de nos vies. Mais d'autant que les feries en sont longues, ie ne souhaite point qu'un mariage se poursuiue par amourettes pleines de sottie & indiscretiō: ie laisse telles fleurs sans fruiet aux conionctiōs passageres, qui ne prennent traict iusques à la mort. Je ne veux pas cependant qu'il prenne fondement sur vne avarice, ny que nous desdaignions tant soit peu celle avec laquelle nous voulons nous lier. Mais que nous accompagnions nos pensemens d'un respect, & considerions s'il y a rien en elle qui nous deplaise, ne voulant toutesfois que ce plaisir soit assaisonné d'une cuisante passion, si elle sera de mœurs compatibles avec les nostres, & quels moyens nous pourrons avoir ensemble pour bannir de nous la necessité. Il n'y a femme si belle soit elle qui ne soit indifferente à un homme quand ils ont couché ensemble un an, ny laideur moderee qui ne se rende aussi tolerable avec le temps, quand d'ailleurs on l'accompagne de douces mœurs, & obeissance à l'endroit de son mary. Un feu d'amourettes s'estaint par un peu

d'eauë que l'on y apporte. Vn mariage composé sur tel fondement que celuy que ie vous propose, va tousiours de bié en mieux, & produit tel effect qu'au bout de dix ans on le porte plus d'amitié que l'on ne faisoit la premiere année. Je vous ay dict que nous deuions faire entrer en ligne de compte la consideration de la compatibilité de nos mœurs, & bannissement de la necessité. Le premier vient de nostre fonds & estre: le second depend des biens extérieurs de la fortune. Entant que touche les mœurs, encores que par vn droit de nature la femme doie ployer souz le mary, pour introduire l'egalité entre eux deux, toutesfois par ce qu'il peut eschoir du contraire, de ma part i'estime estre vne regle generale que nul mariage ne peut estre en paix ou repos que la femme ne ploye aux commandemens de son mary, ou le mary aux volonte de sa femme. Tout ainsi que les artisans n'accouplent iamais deux metaux aigus ensemble: car l'acier dessus l'acier se consumeroit fort aisément: au contraire l'airain, mis au dessous du tournant de l'acier, dure infiniment. Ainsi en prend-il au mariage entre deux esprits qui sont primes: & c'est pourquoy Platon ne vouloit que deux personnes fort coleriques fussent mariez ensemble. Nous auons veu de nostre aage quelques personnes d'honneur & bié renommées, auoir faict vne separation volontaire de maisons, fondees seulement sur ce qu'ils ne pouuoient compatir ensemble. Je scay bien que la femme se doit rendre souple aux volonte

de son mary. Mais aussi qu'un mary par vne prerogative de son sexe se vueille roidir contre toutes les opinions de sa femme, il perd tout: Car si la femme n'auoit ce priuilege de deſdire par fois les opinions de son mary, elle ne penseroit en rien auoir sa condition differente d'avec celle des seruantes. Je seray plus hardi & diray qu'encore vaut-il mieux ployer sous vne femme testue en choses specialement indifferentes, que viurè en perpetuelle inquietude d'esprit. Vous me direz que ie m'abuse, & que par le moyen que ie propose pour nourrir paix avec nos femmes, ie blassè vne guerre intestine en l'esprit du mary. Et ie vous respõd en vn mot, que c'est apporter grand repos à son esprit, quand on vit en repos avec sa femme. Au bout de tout cela i'estime que quelque sagesse que l'on y apporte, encore est-il impossible d'estre aise en vn mariage, si on ne se voit aisé. Tout ainsi que *l'aise & l'aise* sont deux mots par maniere de dire mariez ensemble: n'y ayât differēce entr'eux que de l'E masculin & feminin: aussi vous estes mal-aisez en vostre mariage, quelque amitié que vous vous portiez; vous iouiez à l'esbahi, vous resſouuenant de la commodité du temps passé, qui vous apporte vne repentance du present, & par mesme moyen vne haine taillible non de vous, ains de vostre mariage; qui est en bon langage vn chemin pour apprendre à haïr sa femme. I'en parle comme vn aueugle des couleurs, mais puis qu'allez mettre la voile au vent pour entreprendre ce long voyage, vous nous en comp-

terez non quand serez arriué au port, qui ne se trouue que par la mort, mais lors que singlerez en pleine mer. A Dieu.

A Mademoiselle de

*Quel contentement
on peut
recevoir de
l'amour.*



Ombien que pour le peu d'habitude & familiarité que j'ay à l'amour, ne luy communiquant aujourd'huy en aucune façon mes pensees, ie ne me deussie ingérer de vous rescrire la presente, toutesfois puis que ces iours passez vous & moy sommes entrez en vne dispute du contentement que peuuent receuoir deux amans, qui sont assurez l'un de l'autre, ie me suis delibéré pour en tirer plus certaine resolution, vous escrire tout au long ce que i'en pense: esperant par ce moyen que vous & moy sans passion feroins le procez à l'amour, qui le fait aux Roys, Princes, grands Seigneurs & à tout le monde. Nostre question (comme vous sçauiez) estoit sur ce que vous sousteniez que quand les deux amans ont reciproquement assuree de leurs volontez, il n'y a plus que le contentement qui coure entre eux sans aucune fascherie. Et moy ie disois que ie ne sçauois sur quoy fonder ceste assurance, qui nous moyennast vn contentement si precis; qu'il n'y eust avec luy cent mille traueses qui viennent presque au supplement ou cõtre-poix de tout le plaisir que vous vous pouuez figurer en l'amour. Question vraiment qui n'est pas petite au subiect que
nous

nous traictons, en laquelle toutes-fois il me semble que pour paruenir à nostre projet, il faut que vous & moy resoluions qui est celuy que vous estimez estre assëuré en ses amours. De ma part iene fus iamais rien moins que ialoux tât que i'ay aimé, si est-ce que pour le vous trâcher court, i'estime premierement qu'il n'y eut iamais assëurâce en amour. Chose qui me faiët dire, que si le contentement prend ses principales racines de l'assëurance que proposez, il n'y eust iamais ce contentement que vous imaginez. Secondément ie soustiens (encores que ce soit contre l'opinion du vulgaire) que si l'assëurâce dôt vous parlez apportee ce contentement, certainement c'est le mesme interest de l'amour que l'on bannisse aucunemët ceste assëurâce de noz deux amans. Ie sçay bien que l'une & l'autre de ces propositions vous semblera de prime-face de facheuse digestiõ, mais i'espere les vous faire gouster par le discours de ceste lettre. Entant que touche le premier poinët, cõbien que mon opiniõ soit qu'au contentement que l'õ reçoit en amour, il ne faille establir vne reiglẽ generale en forme d'arrest, (par ce que celuy qui est d'une humeur Iouiale meinel'amour gayement & auec plus d'allegresse, & le Saturnien auec vne plus grande crainte) toutesfois en ceste varieté de plus ou de moins, il me semble qu'il y a vne reigle tousiours ferme, stable & perpetuelle. C'est à sçauoir que de quelque façon que vous vouliez balancer l'amour, celuy qui aime parfaictement, en vne assëurance de tout

craint tout : on bien s'il eslongne ceste crainte de luy, il commence ja de diminuer ie ne sçay quoy, de l'opinion & ardente affection qui se desire entout amant. Qu'il ne soit vray, cōsiderons nostre amant, ou deuant qu'il ait attainé à cest heureux poinct de iouissance, auquel il dresse tous ses penfers, ou apres. Si vous le vous representez deuant, ores que luy & sa maistresse ayent en eux quelque estincelle d'assurance, pour quelques demōstrations qu'ils se font, toutesfois il n'ya point de vraye assurance. Car ou la damoiselle luy refuse ce dernier poinct, ou bien peut estre luy accorde, mais la fortune ne veut que les occasions s'y presentent : si elle luy refuse, cela luy procede, ou d'un defaut d'amitié, qui est vne ruine d'esprit : ou qu'elle vueille faire vne plus longue preuue & experience de son cœur, auquel cas elle n'est assurée de sa foy : ou bien qu'elle craigne que luy ayant fait part & portion de son meilleur, il cōmence ou de la mespriser, ou de la vouloir maistriser, qui est vn autre poinct de desfiance : ou pour conclusion, qu'elle ait peur du parler du peuple : en quoy elle rend tousiours son seruiteur bien peu assuré de sa volonté, veu qu'elle a en plus grande recommandation le parler du peuple, que leur satisfaction mutuelle. Et si parauenture elle luy accorde ce qu'il luy demande, mais que le malheur eslongne d'eux la iouissance, vray Dieu y a il plus grand martyre en ce monde que d'estre alteré au milieu des eauës, & qu'il y ait homme qui nous presente le verre pour boire au-

quel nous ne puissions atteindre? Tellement que de quelque sens que vous consideriez l'amant auant la iouissance, vous vous mescontentez, si l'estimez assésuré. Aussi l'amour n'est lors qu'un auégulé desir reuestu d'un espoir, d'une crainte & de toutes sortes de passions qui nous apportent plus de mescontentement en vne heure que de contentement en dix ans. Puis doncques que vous m'accordez aisémēt qu'auant la iouissance l'amant ne se peut vanter d'estre vrayement assésuré, ni conséquemment content, refigurés nous le, s'il vous plaist, cōmē celuy qui ait obtenu de sa maistresse le salaire où tout loyal seruiteur aspire. Mesnageōs encore ce poinct de toutes les façons qu'il vous plaira: donnons luy qu'il ait vne iouissance à l'abandon, & en laquelle toutes les facilitez du monde se presentent sans aucun desfourbier; ou bien qu'il l'ait avec les difficultez ordinaires en amour pour n'y estre toutes les occasions disposees ainsi qu'on souhaiteroit. Ie ne vous veux poinct particulariser toutes ces difficultez: car en cecy le temps me defaudroit plustost que le suiet: mais lors qu'elles se presentent, ie vous supplie dites moy combien de tintoins, combien d'algarades nous repassent par les esprits pour n'auoir le temps, les heures & faisons à nostre apoinct, pour iouyr de nostre plaisir que nous ne recognoissons plus par imagination apres la iouissance, comme nous faisons auparauant, ains par effect: & d'autant que l'effect surmonte l'imagination, d'autant sommes nous plus

affligez pour veoir lors nos opinions demeurer en friche par l'iniustice du téps. Celuy qui est né dans la pauvreté, bien qu'il appete grandement d'estre riche, si supporte-il beaucoup avec plus de patience sa fortune, que l'autre qui de riche est devenu pauvre, ou qui au milieu de ses grands thresors & richesses, ne peut iouyr de son bien. Mais faignons que les deux amans ayét toutes heures à leur propos, & que les occasions leur rient de telle façon que sans scandale, & sans crainte du parler du peuple, ils ayent iouyssance entiere & de leurs corps & de leurs esprits toutes & quantes fois qu'il leur plaist. Estimez-vous que pour cela leur contentement en soit de plus auancé? Si vous l'estimez, vous faillez, & croy en ma conscience, que tout amant qui sera vrayement amant, & qui desirera quel'on amitié prenne traicte, se donnera songneusement garde de tomber en cest accessoire, encores que la faueur generale des astres l'y conuiast. Sçaez vous pourquoy? Par ce que pour ne dissimuler point ce que ie pense, ie voy que nous tant hommes que femmes, sommes d'une si miserable nature, que si voulons mettre ce contentement à tous les iours, il se tournera en contemnement. Contemnement qui fait mettre à nonchaloir tout le plaisir dont nous disputons: car comme vous sçaez trop mieux, és choses qui se tournent sur l'indifferent, tout ainsi que le deplaisir en est moindre, aussi le plaisir ne nous touche point de si pres. Ce que l'on se peut mesmes représenter par exemples és

personnes mariees qui se sont portees infinie amitié auparauint leur mariage, mais à la longue pour auoir iouyssance à plain drap, leurs atouchemens mutuels ne leur sont rien, au regard de ceux qui ne iouyssent de leurs volontez qu'à la desrobee. Les difficultez qui se presentent entre les amans apportent ie ne sçay quoy de mescontentement, qui nous augmente de plus en plus vn desir de nous reuoir & reioindre, desir qui est la flâmeche & entretene-mét de l'amour, desir toutesfois qui ne va iamais qu'en la compagnie d'une infinité de tourmens. Et en effect voila les causes qui m'ont tousiours induit à penser quel'amât de quelque façon que le figuriôs, ne peut estre si asseuré qu'il reçoie ce parfait & accomply contentement que vous discouriez dernièrement: & ores mesmement qu'il le peust, si est-ce quel'amour mesmes a interest que les choses n'arriuent à cest extreme degré. Vous me direz qu'il ne faut dōcques point aimer, puis que l'amour en quelque faisō que ce soit est tousiours enuironné de tourmens. Parauéture ne seroit-ce pas le pire party que l'ō pourroit prendre, si l'aimer ou nō aimer depēdoit de nōstre choix: mais il est si malheureux traistre que le plus du temps lors que nous y pensons le moins, il nous surprend. Et neâtmoins si quelque damoiselle bié apprise veut aimer, ie seray trefaise qu'elle n'en soit point degoustee par mon discours: car les mescontentemens de l'amour sont plus gaillards que tous les autres contentemens de ce monde. Toutesfois par ce que ce seroit,

faulter d'un propos à autre, ie suis content de n'y entrer, pour vous aduertir en fin que tant s'en faut que ie condescende à vostre opinion, & que ie vueille rendre nostre amant si assésuré & content comme vous le dressez, que au contraire ie pense que les desdaings, les craintes, les facheries font vne grande & meilleure partie de l'amour: & à peu dire qu'en l'amour le mescontentement est l'assaisonement du plaisir. Ie m'assure que vous ne demeurerez courte de repliche, mais la verité est de mon costé. A Dieu.

A Monsieur de Fonssomme, Gentilhomme Vermandois.

De la police
que tint le
feu Duc de
Guise, d'as
la ville de
Mets cõtre
le siege de
l'Empe-
reur Char-
les cinquiesme.



O v s'avez peu entendre (car ie croy que les nouuelles en sont arriuees iusques à Rome) comme les Allemands auoyent appellé le Roy à leur secours contre l'Empereur: ensemble la grande leuee d'argent & de gens que l'on a faite en France pour fournir à ceste entreprise. Entendez maintenant comme les choses se sont depuis passees: Le Roy n'estoit presque arriué au Rhin avecq' son armee, que l'Empereur estoñné de ceste nouuelle confederation, se trouua en tel desarroy de ses opinions, qu'il reestablit tous les Princes & Potentats d'Allemagne en leurs anciennes prerogatiues & libertez. Lesquels pour ceste cause depescherent soudain ambassades par deuers le Roy, pour le re-

mercier de l'aide qu'ils auoient receu de luy: ayans par son moyen recouu la liberté, qui leur estoit plus chere que la vie:& deslors mesmes luy baillerent le tiltre de Protecteur de la liberté Germanique. Le Roy les receut avec vn fauorable accueil,&à l'instât rebroussa chemin. A son retour il remeit sous son ancienne protection Mets, Toul, & Verdun, villes Imperiales; quoy faisant ila grandement flâcqué du costé de la Champagne nostre France, contre les auenues des estrâgers. Je croy que vous serez d'accord que iamais entreprise ne reüssit plus à souhait que celle là, que sans coup ferir nostre Roy n'estant ni veu ni venu, ait atteint au comble de son intention: mais la suitte en a encores esté plus belle. l'empereur fasché que tous ses desseings se fussent comme vn tourbillon tourne en fumee, & aussi estimant que c'estoit faire bresche à sa memoire, si pédant sa dignité Imperiale, ces trois villes demouroyēt sous la protection des François, delibera de poulser de sa reste. Il fait vn grâd amas de gens, & pour ne nous donner temps de respirer, vient mettre le siege deuant la ville de Mets sur la fin de l'Automne. Le Roy auoit esté deuant aduertuy de ceste entreprise, & à ceste cause y auoit depesché Monsieur de Guise pour son Lieutenant general, qui s'y estoit transporté, suiuy d'une bonne troupe de gens de guerre, & parce qu'il preuoyoit qu'en peu de tēps l'orage deuoit tōber celle part, il seroit impossible de vous raconter combien de deuoir ce gentil Prince apporta à la conseruation de la

ville. Car apres l'auoir fait retrancher & fortifier de toutes parts à suffisance, luy sçachant que la noblesse Françoisse est coustumiere de courir à vauderoute la part où l'on commence vne guerre, afin d'oster le desordre, ordonna que tous Gentilshômes volontaires, & qui y estoient venus pour leur plaisir, eussent à vuideler la ville dedans certain temps, ou bien de choisir party sous l'vn des capitaines de la caualerie ou infanterie, pour auoir logis dedans son quartier, & le suiure à toutes sailles, factions & entreprises, tout ainsi que s'ils eussent receu la soulde & fait le serment au Roy sous leur charge. D'une mesme main il enuoya chasques bandes aux quartiers qui leur estoient departis, celles des gens de pied pres des murailles, à fin d'estre voisins des lieux où ils auoyent à faire la garde, & les gens d'armes & cheuaux legers sur le milieu de la ville. Enioingnant tres-estroitement à tous capitaines, Gentils-hommes & soldats ne faire logis hors leurs quartiers, à peine de punition corporelle. Et à fin que l'on fit plus de diligence de resserrer les grains & vins, qui estoient encores dehors, il fut par luy ordonné que dedans quatre iours on mettroit tous les viures & bestail des villages dans la ville, pour en fournir la munition, ou les vendre au marché à tel prix que l'on trouueroit, sur peine que le temps expiré les gens de guerre en pourroyent aller prendre impunément à discretion là où ils en trouueroient. Et pour nettoier la ville de personnes superflues, pour l'espargnemēt des viures, il fit reuoyer à

la gendarmerie son train & bagage, en ses garnisons ordinaires, sans reseruer au gendarme que deux varlets & deux cheuaux de seruice: & à l'archer, vn varlet, & vn cheual, regeant la caualerie legere selon l'ordre des archers. Et aux gens de pied de dix en dix vn goujat, & six cheuaux seulement en chaque bande. Faisť aduertir les citoyens de se retirer où il leur plairoit, transportans avec eux or & argent monnoyé & non monnoyé & tous leurs meubles, horsmis ceux qu'ils trouueroyent estre necessaires pour l'hebergement des soldats: & neámoins qu'ils les baillaissent par inuentaie aux Seigneurs de Piepape & Saint-Belin commissaires des viures, à ce que le tout leur fust conserué. Et entre autres citoyens il retint les charpétiers, maçons, ouuriers de fer pour employer aux remparts, fortifications, & seruice de l'artillerie. Comme aussi mareschaux, boulägers, cordonniers, chaullétiers, certain nombre de chaque mestier: & par expres barbiers, & chirurgiens, auxquels il fit auancer argent pour se fournir de drogues & oignemens. Que l'on n'eust à sōner nulle cloche sinō celle de l'effroi. Qu'il n'y eust que deux horloges. Que les citoyens n'eussent à sortir de leurs maisōs quād l'alarme sōneroit. A chacū des capitaines fait departemēt de chaque quartier, lequel ils auroiēt à defēdre sās en bouger: & luy & ses cōpagnies seroyent au milieu de la place pour y subuenir selō que besoin le desireroit. Que des prisonniers qu'on prendroit on tiendroist cest ordre, de ne mettre dans la ville les varlets & garçons de

fourrage, desquels on n'esperoit aucune rançon, à fin qu'ils ne consommassent les viures, ains seulement les gens d'apparence, lesquels on boucheroit en entrant dedans la ville, à fin qu'ils ne peussent remarquer chose aucune de nostre fortification. Et craignant la longueur du siege il feit resserer tout le vin qui se trouuoit au quartier des gens de pied en vne ou deux caues, souz les clefs des capitaines, pour en distribuer puis apres à chaque soldat deux pintes le iour, ausquels il ordonna aussi deux pains chacun de douze onces. Il reduisit le nombre de douze cents pionniers à six cets. Et souz ces belles polices attendit de pied quoy l'Empereur, qui se vint heurter contre la ville presque aux faubourgs de l'hyuer, voulant ce sembloit non seulement combattre les François, mais le temps mesme. La plus grande partie de ses gens estoient logez en des loges de bois ou de cuir, à fin que si le siege s'acheminait à longueur, ils n'eussent à s'attedier. En ceste sorte la ville demeura assiegee six mois entiers ; pendant lequel temps monsieur de Guyse voyant estre deu à ses soldats la soulde de deux mois, & qu'il n'estoit possible que le Roy leur enuoyast promptement argent, feit battre de la monnoye, & luy donna beaucoup plus haut prix que de sa valeur, souz l'obligation toutesfois à laquelle il se soubmettoit par cry public de la reprendre pour autant qu'il la bailleroit. Vous pouuez recueillir de tout ce cy quelle a esté la fin du siege : toute telle que vous la pensez. L'Empereur s'en est retourné

avec sa courte honte tout ainsi qu'il estoit venu sans rien faire : si faché que le bruit commun est, qu'il desire de se demettre de l'Empire entre les mains de Ferdinand son frere Roy des Romains : & aussi de se despouiller de tous ses Royaumes entre celles de l'Infant, d'Espagne son fils, & choisir sur ses vieux iours vne vie solitaire. Au contraire le Seigneur de Guyse est retourné en ceste ville plein de gloire & reputation, accueilli du Roy & de toute sa Cour, avecques telle faueur que vous pouuez imaginer. A son retour il s'est trouué au mariage de la fille naturelle du Roy quel'on a solemnisé avec vne infinité d'allegreses. La magnificence des nopces a esté faicte en la grand' salle de Bourbon enuironnée d'une infinité de chapeaux & festons de lauriers, apposez en commemoration de tout ce qui s'estoit passé, dans lesquels estoit ce distique.

*Herculis optasti longas transire columnas,
Siste gradum Metis, hac tibi meta datur.*

La rencontre se faisoit sur la deuise de l'Empereur, qui estoient deux colonnes d'Hercule entrelassées de ces deux mots, PLUS OVTRE. Les gens de guerre auoyent auparauant aguissé leurs cousteaux pour la defense de ceste ville de Mets : le siege leué les Poëtes & gens doctes aguiferent leurs plumes pour l'illustration & exaltation des tenàs, entre lesquels le Seigneur de Ronfard a emporté l'honneur. Je vous manderay toutes ces particularitez, & par special toute la police qui a esté tenuë dans Mets, par ce que comme l'on dict qu'en la conflagration

generale de la ville de Corinthe, se fait vn tel
 pelle-mesle de l'airain & autres metaux ensé-
 ble, que depuis & long temps apres on recher-
 choit par tout le monde le cuiure de Corinthe
 pour en faire des tableaux de parade: au con-
 traire en la conseruation de la ville de Mets
 toutes ces belles ordonnances doiuent seruir
 non de tableaux, ains de miroüers à tous ceux
 qui d'oresnauant se delibereront de soustenir
 le siege d'vne ville. Vne chose me resiouit infi-
 niment en ce faict cy: c'est que l'Empeccur a-
 yant failly pour vn bon coup à son dessein, ie
 me persuade que ceste ville nous est asseuree
 pour vn long temps. Car ie ne voy point en
 nulle histoire qu'apres que l'on a failly en vn
 long siege, on ne reprenne puis apres longue
 haleine auant que d'y retourner. Vous voyez
 comme ie ne suis point chiche à vous mander
 des nouuelles de nostre France: mandez moy
 en contr'eschange de mesme liberalité de cel-
 les del'Italie, & quel iugement on faict dans
 Rome de tout ce que ie vous escriis maintenât.
 A Dieu.

*A Monsieur Sebilet Aduocat au Parlement
 de Paris.*

*Si les Ro-
 mains ont
 esté supe-
 rieurs aux
 anciens
 Gaulois,
 soit au fait
 des armes
 ou des let-
 tres.*



Ar ce que le iour d'hier ie vous veis
 soustenir à outrance, que les Romains
 auoient esté superieurs aux Gaulois,
 en prouesse & vaillantise, & qu'au regard des
 bonnes lettres nous n'entriens en nulle com-
 paraison avec eux, ayant depuis à part moy

recueilly mes esprits, i'ay pensé de vous en escrire mon aduis; non pour vne enuie que i'aye de vous contredire, mais parce que de vostre opinion en est issuë vne de plus dange-reux effect entre nous, par laquelle nous autres François estimons n'auoir rien de bon que ce que nous auons emprunté de la ville de Ro-me: & nous estans par ce moyen donnez en proye à l'estranger, depuis par succession de temps quelques fots & glorieux Italiens se sôt voulus affubler de tel hōneur par dessus nous, qu'ils semblent par leurs écrits nous reputer comme chiffres: & neantmoins (permettez ie vous prie que dès l'entree de ma lettre ie vous serue de ce mets) tant s'en faut que nous deuions rien à ce superbe Romain, que soit pour le regard des armes, soit que nous tournions nostre esprit aux lettres, il nous en deira de retour. Ie ne veux pas denier que les Romains n'ayent esté grands au faict des armes: mais si faut-il qu'ils nous recognoissēt qu'il n'y eust iamais nation qui les traitast de telle façō, ne qui leur apportast tant de dōmage & preiudice, cōme la nostre. Ie vous allegueray les victoires qu'obtindrēt jadis nos gaulois en Italie souz la cōduite de Bellovese, quād pour le siege & demeure qu'ils y planterent, fut par vn long espace de tēps appelée Gaule Cisalpine, ceste partie d'Italie qui fut depuis enuahie & occupée par les Lōbards. Ie me cōtenteray de vous remettre deuant les yeux le sac & rauage de Rome, qui fut souz la conduite de Brennon, lequel apporta tel effroy au Romain, que

depuis tant que sa Republique dura, il ne s'en peut asseurer. De sorte qu'à la moindre rumeur de guerre de la part des Gaulois, toute la ville de Rome à vn clin d'œil se mettoit en armes, sans exception ny d'aage ny de personnes, se rendant nostre nom si célébré & redouté en ce sujet, qu'Antioche Roy de Macedoine delibérant guerroyer les Romains, estima qu'il ne pourroit venir à chef de son entreprise, s'il ne prenoit à sa soulde des Gallogrecs, qui estoient issus de l'ancien tige des Gaules: ne considerât pas qu'ils ne tenoyent plus de leur ancienne & originaire vertu; & que s'estans habituez dans l'Asie, ils auoyent par vne longue traicte de temps, avecques l'air, humé aussi la mollesse & delicatessse des mœurs de ce pays là. Que si nous voulons venir à Iules Cesar, quel'on recite auoir esté subiugateur de noz Gaules, si vous le pensez tel, vous vous abusez: par ce que les Gaulois se subiuguerent eux-mesmes par vn malheur qui est presque familier à tous peuples, quand leur estat se doit changer; ie veux dire par les guerres ciuiles & intestines qui lors vogoient dans les Gaules. Lesquelles furent tout de mesme façon renuersees comme la ville de Rome quelque temps apres par les factions & diuisions qui s'y presenterent. Mais encores en ce malheur là eusmes nous cest heur, que la fortune n'appresta telle faueur à Cesar, sinon à fin qu'ayant reduit souz sa deuotion les Gaulois, les tenant en rang non de vaincus, ains de ses confederez, il se preparast puis apres par leur vertu vne voye pour ruiner & mettre à fin

toute la gloire de Rome. Ce que recognoillât tenir principalement des Gaulois, estant venu à bout de ses affaires, il donna seance aux chefs & principaux au Senat de Rome, en recognoissance des bons offices qu'ils luy auoient faicts. Et combien que pendant l'Empire nous fusions reduits souz l'obeïssance des Empereurs, si est-ce que pendant ce temps nous leur seruismes de perpetuel exercice pour les tenir en ceruelle: parce que de soixante en soixante ans, nous leur remuâmes tousiours quelque nouveau mesnage, iusques à ce qu'apres plusieurs reuolutions d'annees les François s'estans emparez de noz Gaules, en fin l'Empire de Rome tomba en la persône de nostre Charlemaigne: & comme ainsi soit que toute la fleur & puissance de l'Empire eust esté long temps auparauant transportee par Constantin en la ville de Bizance, depuis appelée Constantinople, encores ne se peut ceste ville au long aller garantir de nos forces: par ce qu'elle fut prise par nos Bauldoïins Comtes de Flandre, qui y commanderent l'espace de soixante tant d'ans. Et s'il vous plaist passer plus bas, & descendre à la memoire de noz bisayeux, ne voyez vous vn Roy Charles huietième auoir faict trembler vne Rome? Afin que ie ne vous face recit d'un Bourbon du temps de nos peres. Au contraire vous verrez que quand elle a esté oppressee par nations estrangeres, & qu'elle a imploré nostre ayde, non seulement nous ne luy auons denié, mais qui plus est l'auons restablie en son ancienne dignité & grandeur. Vous aduisant

au demeurant que nostre Gaule ne fut iamais desgarnie de grands personnages, faisans profession de la cognoissance tant de la Philosophie naturelle que morale. En quoy ils furent tant renommez, que plusieurs anciens estimerent que des Bardes & Druydes, qui manioyēt & la Theologie & la Philosophie des Gaulois, la Philosophie auoit pris sa premiere source & origine : & les autres que les Grecs mesmes auoyēt emprunté d'eux leurs caracteres. Accompagnans outreplus tous leurs discours d'une telle grace, que les Romains mesmes, lors qu'ils n'estoient aueuglez de jalousie, celebroyent entre tous les autres pays la faconde des Gaulois, de telle maniere qu'ils estimoyent qu'ils seruoyent d'exemple & patron aux nations circonuoinnes. Vne chose sans plus en eux me desplaist, qu'ils contemnerent de rediger leurs sens & conceptions par escrit, donnant à entendre leurs secrets de main en main seulement. Dont les Grecs & puis les Romains sceurent fort bien faire leur profit à nos despens. S'il vous plaist de recognoistre sans passion toute l'ancienneté, vous trouuerez que ie ne dy rié qui ne soit tres-veritable, & en petillent toutes les escholes d'Italie si bon leur semble. Quant à vous, si vous auez rien à me rephiquer sur ce que dessus, la porte vous en est ouuerte. A Dieu.

A Monsieur

*A Monsieur de Postel Conseiller au siege Presidial
de Troye.*

*Il semond
un sien a-
mi de luy
escrire.*



v o z precieuses lettres! car precieu-
ses puis ie bien dire celles qu'en six
mois ie reçoÿ de vous avec si gran-
des ceremonies. Mais dites moy en
bonne foy, depuis quel temps a on erigé es-
cole de Rhetorique dans Troye, en laquelle
vous aÿez si bien appris ces commun traits de
Rhetorique que l'on appelle Preuention?
Vous estes vn paresseux, me dites vous. Et vous
quoy? Vous aurez acte de vos diligences. Mais
à bon escient pensez vous que depuis le com-
mencement de Carefme, i'ay receu aucunes
lettres de vous? & si aucunes auparauint, au-
tres que par eschantillons? Ce neantmoins si
vous puis-ie bien asseurer que depuis vos der-
nieres ie vous ay escrit par trois fois. Nō point
lettres affamees, comme les vostres, ains plei-
nes de long discours, concernant tant vos af-
faires, que les miennes. Car quant à ce que
me mettez au mesmerang de paresse que
Monsieur Braillon, vous luy faictes grand
tort. D'autant que ie luy cede, & le recognois
mon aîné en ce cas, comme en tout autre,
vous aduisant qu'en matiere d'escrire il me
reste tant en arrerages, que ie luy ay mādé, que
puis qu'il ne me veut enuoyer de ses lettres, il
me renuoye les miennes, à fin qu'en ce faisant
ie pense qu'il a quelque souuenâce de moy. Au
regard des mille liures de rêté dōt m'escriuez, si

c'estoit chose asseuree, le party ne seroit à negliger, mais que les mœurs s'y accordassent. Car quant à moy, ie ne me vus point marier aux vz & coustumes de Paris, & m'enquerir premier du bien que des mœurs de celle dont on me portera parole. A Dieu.

*A Monsieur Braillon Conseiller au siege Presi-
dial de Lion.*

*Lettre plai-
sante par
laquelle il
semond vn
sien amy
de luy es-
crire.*



VOUS estes doncques resolu tout à fait de ne m'escrire apres tant de diuerses semonces. I'en'ay point (direz-vous) de subiect. Ie ne le croy nullement, estant dans vne ville de Lyon emboucheure de toutes nouuelles qui viennent tant par la voye de Rome, que de Piedmont. Mais comment vn François estre sans subiect? Ecrivez moy, seulement que vous n'avez nulles nouuelles, & ie prédray cela pour nouuelles toutes nouuelles, veu que le François est de telle nature qu'il les recherche ambitieusement, s'en repaist ores qu'elles fussent fausses, & en vn besoin luy-mesmes se les forge pour se contenter. Donnons que vous n'en ayez nulles. Or iusiene seray facheux creancier, & vous en quitte pour ces deux lignes dont nos ancestres honoroyent le commencement de leurs lettres: & que nous auons depuis reiettees sur la fin. Ecrivez moy seulement cela: Ie me recommande à vos bonnes graces, priant Dieu de vous conseruer aux siennes. Ceste lettre sera merueilleusement accomplie:

car estant le commencement & la fin, elle représentera l'ancienneté & le temps present tout ensemble. Ou si vostre plume est si desdaigneuse que du tout fuyez le trauail de m'escire, renuoyez moy pour le moins mes lettres, à fin qu'en ce faisant ie cognoisse que ie reçoÿ de vous quelque chose. A Dieu.

A Monsieur de Basmaison Aduocat au siege Presidial de Rion.



STANT en grande deuotion *il console*
d'apprendre de vos nouuelles, ie *un sien de*
receu dernièrement vos lettres: vo- *my.*
stres vraiment puis-ie dire, pour
la grande humanité & courtoisie

qu'elles contenoient: mais non vostres pour le regard des longues plaintes dont m'auez fait vn gros volume: & ne puis presque m'engarder d'vser d'vne plus grande plainte contre vous, en ce que desja il semble que vous repentiez de vostre entreprinse. Estimez vous si fortune ne vous a esté soudain apres vostre retour fauorable, que toute la suite en soit telle? Comme si vous estiez à cognoistre que les commencemens aspres & fascheux produisent vne fin tres-doulce, & vous mesmes en appelleray-ie à tescmoin, au peu de residence que vous feites en ceste ville. Qu'est il doncques besoin de m'escire que voulez vous despouiller de toute amitié pour espouser vne haine encôtre vous? Vous auez tort & recognoissez tresmalles dons de grace que nature

vous a eslargis pour en estre auare enuers les autres. Vous & moy courons mesme risque, vous en la ville de Rion, moy en celle de Paris; & encores que i'aye mille suiets & argumens de mescontentement, si vy-ie en ceste ferme esperance que le temps nous gardera nos rangs & prerogatiues, comme il a faict à ceux qui par priorité de leurs aages tiennent maintenant le deuant de nous : moyennant que nous accompagnions nos estudes & bonnes volonteiz d'une continue. Vray qu'en la comparailon de nous deux, ie trouue vostre condition meilleure que la mienne: d'autant que du premier coup auez mieux aimé estre le coq en vostre païs, que par vne longue traicte de temps mettre en ceste ville de Paris tous vos pensemens sur vne table d'attente, de laquelle neantmoins ie charme mes plus grands ennuis; Me consolant tousiours de cest ancien Prouerbe, que petit à petit on exploite grand chemin. Au demeurant quant à ce que me mandez auoir rendu l'amour esclau; comment? se pourroit il bien faire? Si ainsi est, ha pauvre malheureux! as tu mieux aimé vne seruile liberté, qu'une franche & libre prison? Amorty ne l'auez vous point, quelque chose que m'en escriuiez, ains endormy, & à la charge de se reueiller de plus beau quelque iour, pour vous faire reparer l'iniure que vous vantez luy auoir fait. Mais pour ne m'esgarer trop auant au poinct que i'ay si affecté, & vous departir de mes affaires, i'ay rompu tout le dessein que ie brassois de l'entiere mutatiõ de ma vie: vous

sçauéz ce que ie veux dire. Autre chose de nouveau & dont vous ne serez marry, i'ay fait mon premier coup d'essay à la Cour. En chose peut estre triuiale (direz vous) & dont il ne falloit lauer que ses mains. Non, ains en vne cause toute publique, qui concernoit la generale reformation du college des doctmans, que l'on appelle de Beauuais, avec grande assistance d'escoliers, qui desiroient desçauoir quelle fin prédroit ceste affaire. Mais elle fut appointee au conseil. Quoy plus? i'apprend tous les iours combien est folle l'opinion de ceux qui maintiennét qu'il ne faut s'adresser aux Saints. Car au contraire ie croy n'y auoir si petit Saint, & mesmement en nostre estat, qui ne desire sa chandelle. Mais de cela & autres choses qui concernent nos affaires particulieres, vne autre fois plus à loisir. Cependant ie me recommande. A Dieu.

A Monsieur de Ronsard.

VOYEZ quel commandement ont vos ouurages sur moy: à peine estois- ie arriué à Argentueil que i'ay leu & releu l'Eloge Latin que vous auez fait de Pascal; & l'ay leu de bien bon cœur. Car quelle chose peut venir de vostre lime qui ne me plaise? Vray Dieu que vous auez à propos descouuert sa piperie? Comme non seulement vous auez combatu, ains abatu ce grand môstre? si que ie me promets (quelque priuilege d'impudence qu'il se donne) que deormais

il apprendra à se taire, & de ne publier ses inepties deuant la face de nostre Prince. Parquoy soudain que i'ay esté de repos, ie n'ay eu rien en plus grande recommandation que d'habiller à la Françoisé vostre Latin. Ce sera à vous de iuger si bien ou mal. D'une chose vous puis-je asseurer, que si ie ne vous ay satis-fait, ie me suis contenté moy-mesme, pour reuanger vne iuste querelle de nostre France & des gens doctes. Entre lesquels combien que ie ne me donne nul lieu, si vy-ie en ceste esperance, que chacun d'eux tant par vostre exemple que le mien apprendra à la parfin de garentir ce Royaume de ceste dangereuse beste. En quoy nous ne faisons rien qui n'ait esté attenté par ce grand personnage Tournebu. A Dieu.

A Mademoiselle de

Ceste lettre fut faite en faueur d'un sien amy seruiteur d'une Dameselle.



Y A N T passé quelques iours en ceste ville de Paris avec monsieur de la Croix vostre affectionné seruiteur, & l'un de mes meilleurs amis, ie pensay ne pouuoir faire chose plus pour mon auantage, que luy donner à entendre par toutes voyes & manieres, de combien s'accroissoit de iour en iour pour mon regard ceste amitié, qui est ja entre luy & moy conceüe de longue main. Or m'ayant descouuert toutes ses particularitez (comme à son plus cher secretaire) mesme de l'entiere seruitude qu'il a en vous, i'ay pensé ne luy pouuoir mieux congratuler

à son depart, que vous escriuant la presente. Non que ie ne fusse bien asseuré que dés l'entree de ceste lettre ne deussiez trouuer fort estrange, voire m'imputer à grande legereté d'esprit, la hardiesse que i'en ay pris: n'ayant de vous aucune cognoissance, que celle que i'en ay peu prendre par les discours qu'il m'en a fait. Mais aussi m'asseure-ie bien que là où il y auroit aucune faute en cest endroit de ma part, trouuera ce neantmoins quelque excuse & satisfaction en vous. Et ne fut-ce qu'en faueur de celuy, lequel si auparauant i'ay eu en reputation d'homme d'esprit, maintenant l'estimeray-ie beaucoup plus & mieux appris, pour auoir adressé ses vœus à l'endroit d'une telle sainte où repose toute misericorde & pitié. Qui m'a fait plus hazardeusement mettre la plume au papier, esperant que toute ma temerité seroit couuerte & effacee, par vostre debonnaireté, sous la protection de laquelle ie suis forcé me rendre: sans pretendre ce neantmoins faire tort à la Croix, de la volonté duquel disposez comme de la vostre. Mais vous sçauiez que si par vn commun accord de nature les volontez de luy & moy se sont vnies ensemblement, que luy s'estant vouié à vous, il me seroit impossible m'exempter de vostre seruice. A la poursuite duquel i'espere me porter en telle sorte, que cestuy mien amy & moy diuiserons nos offices sans aucune jalousie: luy, en esperance d'un iour auoir en vous telle part comme sa deuotion me-

rite : & moy en perpetuelle contemplation & plaisir du contentement que ie pense que receuez l'un de l'autre de voz affections reciproques. Ausquelles ie prie Dieu vous donner tel accomplissement, que tout autre voulant faire estat d'amour, apprenne par vostre exemple aimer de penlee & de cœur. Duquel, ma Damoiselle, ie me recommande du tout à vostre bonne grace. A Dieu.

A Madame de

*Ceste lettre
est par forme
de gayeté
seulement
à une Dame
d'honneur.*



VIS que d'une si prompte volonté auez tant osé entreprendre sus vous & sus vostre honneur, que de solliciter en mon absence ce mien seruiteur, lequel mandastes hier querir pour se trouuer aujourd'huy du matin à vostre leuer (qui est, comme il est facile à voir, & comme ie suis tres-seur, pour luy faire part de vostre meilleur) ie le vous ay bien voulu en voyer pour ne vous desobeïr, & semblablement la presente comme cheualier d'honneur de toutes Dames, entre lesquelles si par le passé ie vous auois tousiours en bonne estime & reputation, ie vous veux bien à présent aduiser que ie ne trouue ce tour bon ni honneste. Et m'en rapporteray à la commune de toutes femmes faisans profession de vertu. Ains me semble, puis que si auât vouliez lascher les resnes à vos passions, que deuiez choisir heure plus deuë, sans encourir tel scandale, & vous adresser à homme de plus grád merite, & d'autre calibre

que celuy duquel ne sçauriez recevoir que toute honte & vergongne. Et combien que i'amaïs ne m'étrast en l'esprit vouloir chose que ie sceusse redonder à vostre des-avantage, & où ie l'entreprendray, ce sera à mon grand regret : toutesfois voyant que vous oubliez si a-
uant, aussi m'oublieray-je à ce coup : non sous aucune esperance de maculer vostre honneur, ains pour la seule enuie que i'ay de le maintenir contre vous mesmes, que ie voy si aduantageuse à le prosterner. Ie ne doute point sus ces erres que ne me mettiez en jeu l'amour n'auoir acception de personnes. Car telle est la commune excuse des amans. Mais laissant telles disputes en arriere, qui me semblent gesir plus en la parole qu'en l'effect, ie me suis resolu (pour la grande obligation dont ie demeure redeuable enuers toutes les preude-femmes) prendre la cause de vostre honneur, à l'encontre de vostre desordonnee volonté : laquelle ie maintiendray contre tous à tres-grád tort vouloir tacher & maculer chose si precieuse à l'endroit d'homme de si peu de valeur. Ie ne sçay s'il s'offrira cheualier qui se mette de vostre party : toutesfois s'il s'en rencontre, il trouuera en moy homme qui l'en pourra faire repentir, tant est ma querelle iuste, en laquelle si ie ne pensois vous porter plus de faueur & d'amitié, que vous mesme ne vous portez, i'amaïs ne me fusse ingeré à la poursuiure. Pourtant vous supplieray-ie tres-humblement ne m'en sçauoir malalent. Car par ce seul effect pouuez vous assez amplement cognoistre en

quelle sorte i'entreprendrois la defense de vostre honneur à l'endroit des estrangers, veu que contre vous mesmes ie m'estudie le defendre. Et si ie ne puis impetrer tant de grace de vous de penser que tout ce que ie brasse est seulement moyenné pour vostre aduantage, ie me soumettray à la mercy du temps, lequel (comme i'espere) vous pourra quelque iour faire trouuer doux, ce que peut estre pour le present trouuer de trop aigre digestion. Et de ce en suppliray- ie le haut Dieu, lequel seul ie prieray telmoigner de ma sincere affection. Vous protestant, Madame, par celuy mesme Dieu que ie viens d'appeller en tesmoin, que ny maligne jalousie, ny outre cuidee volonté (quelque cas que de prime-face il v'ous puisse sembler) ne m'ont appelé à vne si haute entreprise. Laquelle ie me delibere par fournir & mettre à fin, si Dieu plaist, incontinent que m'aurez mis homme sus champ, pour soustenir vostre querelle. Et sera l'issuë de ce combat telle, qu'en tout euenement ie receuray vn extreme contentement. Car où il ne plaira à fortune fauoriser le succez de ceste mienne volonté; quelle extremité de plaisir pensez vous que ie reccuray, me voyant vaincu & mis ius, pour retourner ceste victoire à l'illustratiõ de vostre renom & louange? Et là où il plaira à Dieu m'enuoyer le dessus: pour le moins vous pourrez vous vanter en tous lieux auoir vn seruiteur en moy, plus soucieux de vostre honneur que de vous mesmes. Ainsi à bien bon & iuste droit me retiendrez-vous des vo-

stres. Ie m'estendrois sur ce en plus long propos, si ie ne craignois encourir en vostre endroit l'opinion de grand parleur, & petit executeur. Or pour ne demeurer tel enuers vous, auisez (Madame) derechef, Cheualier propre pour se soumettre au hazard de ce combat, auquel ie vous penseray defendre: car telle est la deliberation de celuy qui vous est destiné de tous temps. Le Cheualier du parc d'honneur, 1552.





L E
D E V X I E S M E
LIVRE DES LETTRES
 D'ESTIENNE PASQUIER.

*A Monseigneur l'Illustrissime & Reuerendissime
 Charles Cardinal de Lorraine.*

*Il fait pre-
 sent du
 premier li-
 ure de ses
 Recher-
 ches de la
 France à
 Charles
 Cardinal
 de Lorrain-
 ne.*



OMBIEN que pour les grandes affaires que soustenez sur les bras, ie me deusse plustost cômâder vn silêce, que de vous vouloir inciter à la lecture de ces miennes petites Recherches; toutesfois cognoissant la foy & hommage qu'un chacun diuersemêt vous doit en ce grand theatre de la France, sur laquelle Roy vous a constitué comme souuerain apres luy, i'ay pensé qu'entre tant de Seigneurs, Gêtils-hommes & autre sorte de gens qui vous sont acquis, ie serois trop ingrat si en reco- gnoissance du bien que nostre France vniuer- selle reçoit par vostre moyen, ie ne vous fai- fois particulièrement present du plus excellêt de mon creu. Non vrayement sous vne sottè opinion que i'aye de vous distraire ou escarter

de vos pl⁹ serieuses occupatiōs: mais tout ainsi qu'en vos maisons de parade chacun s'estudie de vous apporter quelques antiquailles de marque, desquelles parauenture vous repaissez seulement vne fois à la trauerse vos yeux, demeurant au surplus content de les auoir vne fois en vostre possession: aussi vous enuoyant ces fragmens que i'ay tirez des anciennetez de nostre France, i'espere qu'encores que ne les couriez que de l'œil, si en ferez vous estat comme des vostres. En quoy ie me promets auoir la fortune de tant plus fauorable, que la plus part de ceux qui ont par le passé employé leur entendement à escrire, n'ont eu autre sujet de leur eloquence que l'histoire des Grecs ou Romains, ne iettans les yeux sur la nostre, combien que nous ne leur cedions rien en gloire de hautes entreprises: & de ma part i'estime vous estre de tant plus agreable, que i'ay rappellé en ce lieu toute mon estude & labeur en la deduction de la France, principale bute de tous vos discours & pensees. Vous promettant prester telle continue à cest œuure (si i'ay le moindre sentiment qu'il vous retourne à gré) qu'auant quelques reuolutions d'annees aurez les autres ensuiuans: dās lesquels ie me delibere poursuiure mon entreprise avec vn vœu public & solennel de despendre desormais ma vie au plaisir de si honorable exercice, tant pour reuanger nostre France cōtre l'iniure des ans, que pour trouuer, s'il vous plaist, quelque lieu de retenuë en vostre bōne

grace, seule ressource à present des bonnes lettres & disciplines. A Dieu.

A Monsieur Bigot, Seigneur de Tibermeuil, Advocat au Parlement de Rouen.

*S'il est bon
de. coucher
par lettres
quelques
beaux dis-
cours.*



O v s en rirez, ie m'asseure: Aussi que sçaurions nous maintenant faire parmy ces tumultes qui voguent par la France, sinon à la Diogenique rouler, tourner, & retourner en no-

stre vaisseau, ie veux dire, fueilleter & refueilleter nos papiers? Nos plumes nous seruent de glaiues, toutesfois glaiues de telle trempe, que nous sommes au temps qui court bien empeschez de sçauoir de quelle sorte les affiler. Car d'en vser comme d'espees qui coupent à deux trenchans, nous le pourrions entreprendre sãs encourir l'opinion d'impieté: si en forme de cimeterre à vn trenchant, les vns ont de leur costé la force des gens & des armes, & les autres, les esprits gaillards & nō engourdis. Brief c'est chose fort chatoüilleuse de vouloir desployer sa plume à bon escient, & à peu dire entre tant de picques baissées vser de quelques escrits de picque. Parquoy le meilleur est de s'ē escrimer comme d'vne espee rabatuë en vn jeu de prix: duquel il faut que ie vous confesse rondement que le Seigneur d'Ardiulliers m'a du premier coup donné la touche, comme pourrez mieux iuger par les poësies de luy & de moy que ie vous enuoye. Tellement que le voyant en ma-

tiere de versauoir si heureusement rencontré
dés la premiere desmarche, ie ne puis dire au-
tre chose fors que luy & moy ressemblons les
terres: luy celle qui est encore neufue, laquelle
non accoustumee de nourrir dans son sein les
semences, dés son premier depucelage rappor-
te à son laboureur vn fruit avec vne usure ex-
cessiue, comme si de longue main elle eust
couué dans ses entrailles ceste grosseste: & moy
à celle qui pour auoir receu plusieurs chocs de
la charruë est lasse de satisfaire à l'esperance de
son maistre. L'enuie (mon Bigot) que i'eus de
bien faire me conuia à ce noble exercice de
Poësie: duquel par frequent vsage i'appris
par aduanture à escrire non impertinemment
(il me suffit qu'entre vous & moy ie me le face
accroire) & le bien & souuent escrire en apres
m'apporta contre tout ordre de nature vne
nonchalance & paresse. Qui est cause que pour
fin de ieu ie me suis trouué comme lourche &
despourueu de toute place entre ceux qui por-
tent le nom de Poëtes. Ce naifquitient com-
me le sage pilote le gouuernail de nos œuures,
me conuia à autre sujet, duquel ie ne me puis
distraire. C'est pourquoy ie trouue Arduil-
lier trop mieux né, lequel comme ce gentil
Romain Pollion a commandement sur ses
heures: moy en l'estat auquel ie me suis voué,
tanquam seruus adscriptitius perpetue glebae
addictus videor. Toutesfois pour le mal que
ie luy veux, ie ne seray iamais marry qu'entre
ceux qui auront cognoissance de nous deux,
l'on die à l'aduantage de luy, qu'il y a plus de

peuples qui adorent le Soleil leuant , que le couchant. Mais ie vous prie, voyez ce que ie luy ay en cecy conseillé, & vous rendez iuge & arbitre de mon conseil. Il me semble que ceste Poësie Françoisé, qui depuis dix ou douze ans en ças insinua entre nous, commence de perdre son credit : quoy que soit que ceux qui ont preueni les derniers, cōme fils aînez des Muetes, se sont donnez de grands aduantages & precipus par dessus les autres. Parquoy ie me iuis aduisé d'vne chose. Vous cognoistiez l'esprit de ce Gentil-homme. Vous sçauiez l'eslite qu'il a de paroles non recherchees que bien à poinct. Vous sçauiez encores les discours qui luy tombent en la bouche par vne promptitude d'esprit à chaque propos. Et toutesfois pour autant que tels discours sont poinctes qui contentent ou l'oreille de l'escoutant , ou l'œil de celuy qui les lit tant que peut porter vne page, mon aduis estoit qu'il se mit à tracer des lettres Françoises, non toutesfois à l'imitation de ceux qui ne nous discourent que les affaires de leurs maisons, dont nous n'auons que faire: mais enuoyant ses lettres ou feignant de les enuoyer aux vns & autres (car ie n'y trouue grand interest) il les accompagne de quelque honorable narré, tiré ou d'un gentil discours, ou d'une notable erudition, ou de la commodité d'une histoire ancienne , ou du temps qui court : entrelassant de fois à autres ces matieres serieuses de quelques gentilleses d'esprit : de la façon que nous en voyons plusieurs & dans Plin & dans Politian. Ceste
maniere

maniere de faire n'a pas pleu au bon homme Erasme, qui veut que sans fiction vne epistre ait esté enuoyee. Et quant à moy, son iugement ne me plaist. Par ce qu'estant cecy pratiqué de la façon que ie dis, il apportera profit & plaisir ensemble. Ie ne veux point icy vous ramenteuoir l'aage de nos peres: nous vismes en nostre enfance vns Longueil, Contarein, Bèbe, Sadolet, Pole, Bonamic, & plusieurs tels autres qui s'acquirent le bruit de sçauans parmy le peuple, pour dicter bien vnes lettres en langue Latine, & toutesfois lettres dans lesquelles il n'y a qu'un amas de paroles bié choisies de Ciceron, & proprement, rapportees à leur ouurage, en forme de marqueterie. De ma partie ne voudrois pas qu'on acquit vn bruit pour sçauoir seulement bien dire. Mais, pour ne m'esloigner d'exemple fort conuenable au cas qui se presente, nous vismes en Italie vous & moy Claudio Tolomei, qui depuis fut Ambassadeur pour la Republique de Sienne en France, lequel fut grandement estimé entre les siens pour les epistres qu'il fit en son vulgaire: non pour autre raison, que pour ces belle pointes qui sont si familiares à Ardiuilliers, que malaisémēt sçaurions nous trouuer son semblable. Mais vous demadant vostre aduis & franc arbitrage, il semble que par mes raisons ie vueille preuenir les vostres, & vous oster les moyens de me desdire. En effect voila les jeux par lesquels nous essayons de tromper le tēps, pendant qu'il plaist à dieu nous frustrer de vostre presēce. Car quāt aux affaires publi-

ques, ie ne vous en mäderay chose aucune; ayât ceste perpetuelle reigle & obseruance dans mes lettres, d'employer pour signe desilence ceste lettre de S. que les Romains employoyent au dessus de l'inscription des leurs pour signification de Salut, vsant de ce caractere presque en la mesme forme que les Lacedemoniens. D'autant qu'ils le faisoient pourtraire sur les porches & entrees de leurs maisons, pour donner à entendre qu'il falloit contenir sous perpetuel silence les communs deuis qui's'estoyent entre eux paîlez pendant leur boire & manger. Et de moy ie le veux empraindre non seulement dessus mes lettres, ains en moy, pour me commander en tous mes deuis & escrits vn silence des affaires esquelles ne sçauois donner ordre, & ne les puis neantmoins proferer ou ouyr sans vn grand ressentiment de douleur. A Dieu.

Lettres du Sieur de Tibermeny à Pasquier.



A y par plusieurs de mes lettres faict plaintes à Monsieur d'Ar-diuiers de quelques fascheries qui m'estoyent suruenues par deçà; à fin de tirer de luy quelque remede & consolation. Ses lettres m'ont iusques icy soulagé: mais à ce coup la concurrence de vos odes & missiues m'en a du tout deschargé. Me rafraichissant la memoire du temps que i'ay autre fois passé en toute gayeté avec vous. Qui me fait esperer d'y en passer encor quelque autre, si ie ne puis

tout le reste de ma vie. Vous direz tout ce qu'il
 vous plaira, mais ie n'y trouue que rire: ie ne
 voy rien de vous qui ne soit bien fait, non par
 mon opinion seulement, qui n'y seruiroit de
 gueres, ains par le iugement de ceux qui s'y
 cognoissent mieux que moy. l'ay cherché &
 leu vos œuures imprimees: mais receuant
 maintenant ce present de vous, ie l'ay leu d'v-
 ne plus grande deuotion, comme gaige & as-
 seurance de nostre amitié. Et si vous me don-
 nez congé de me chatouiller moy-mesme, ie
 m'en tiens vn peu plus glorieux. Car par cela
 ie fay consequence que vous faites estime de
 moy & de mon esprit. Autrement le present se-
 roit inutile. Brief l'opinion que i'ay de moy ne
 prend petit accroissement de la coniecture que
 ie fais de la vostre. C'est bien de quoy rire cela,
 & non pas des beaux fructs que m'avez en-
 uoyé: puis qu'il faut que gens sôbres, obscurs &
 Saturniés pèsent quelque chose d'eux. Bié vous
 diray-ie qu'ores que ie n'aye de quoy payer,
 ie me melle de donner iugement des autres.
 Quant à vostre Bachelier courant, i'açoit qu'il
 se soit trouué estonné, si merite-il entrer au
 cours, puis que luy voulez assigner place. Il
 s'est acquis vn sçauoir exquis & diuers par vne
 longue leçon des bons liures. Il a la memoire
 prompte & presente, l'apprehension viuë, la
 diction Françoisë en main, en quelque chose
 où il se vueille addonner, il luy sera impossible
 de mal faire. S'il veut suiure le conseil que luy
 donnez, ie le trouue bon: sinon, il me semble
 que les Dialogues sont fort propres pour

communiquer nos conceptions. La Philosophie fournit plusieurs discours, lesquels ont meilleure grace en carmes qu'en prose. S'il se peut addonner à la prose, ie ne suis pas d'aduis qu'il oublie l'autre, si son naturel l'y pousse. La grandeur des premiers Poëtes ne le doit detourner de faire ce qu'il pourra : la literature n'est pas comme la tyrannie. Ceste cy n'endure point de compagnon, celle là s'en fortifie, pourueu qu'elle ne soit point questuaire. Vous le comparez à vne noualle, tresbien : pour ce qu'elle rapporte apres qu'elle est purgee de broussailles, espines & autres mauuais bois : & encores mieux au Soleil leuant. Mais c'est vn Soleil du Prin-temps, qui excite les humeurs, & ne les resoult. Vne chose ne vous puis-ie accorder, que le vostre soit Soleil couchant, ains vn plein Soleil d'Esté, qui par sa chaleur & lucur fait fructifier toutes choses. Plusieurs en toute leur vie ont pensé s'estre aduantagez en grande reputation pour auoir moins fait que uous. Mais aux œuures que bastissez ie suis prest de vous monstrier par certaine demonstration que n'estes encores à vostre Midy. Il n'est pas temps de se retirer : le sçauoir croist, le iugement se renforce, l'expérience se multiplie : & vous voulez vous contenter du passé ? Ie vous promets de vous reueiller, si faites semblant de vous endormir. Ie vous écris vn peu librement, mais ie m'asseure sur la chartre de mon pais. D'autres affaires ie suis aussi aise de n'en ouir parler, comme vous de vous en taire. A Dieu.

*A Monsieur de Marillac, Sieur de Ferrieres,
Conseiller du Roy, & maistrè en sa chambre
des Comptes de Paris.*

VOYANT que par vn bannissement volontaire vous auez choisi vn plaisir muet (vous estant confiné aux champs) pour laisser la communication qui se trouue es villes, ie me deliberois en contreschange vous gouverner à part moy sans mot dire. Et de fait me promenant seul & pensif dans mon estude, il me sembloit, comme si eussions esté ensemble, que ie vous voyois fort ententif à faire la ronde en vostre parc de Ferrieres. Maintenant esmondant vn arbre, maintenant allignant vne allee, & ores dressant avec vostre Iardinier vn parterre. Et pour vous dire le vray, prenois grand plaisir à toutes telles actions, non pour plaisir que i'y eusse de moy, ains pour vous faire plaisir. Tellement que ie n'estois moins content de me nourrir en vne contemplation de vous, que vous en vne contemplation de vos arbres. Toutesfois puis que par vos lettres auez voulu destourner vostre esprit du pensémēt des chāps, pour l'acheminer à la ville: aussi veux ie faire vne saillie de nostre Palais pour rustiquer maintenāt avecques vous. Vous estimerez dōcques auoir en ceste lettre affaire nō à vn Amphioū ou Orphée, qui par la douceur de sa voix vous vueille ramener en la ville, ains à vostre frere Chrestien,

*Il presere
par forme
de gayeté la
vie des vil-
les à celle
des chāps.*

lequel ayant compassion de vostre fortune vous veut remettre en meilleure voye, encores que ne la desiriez. Car pourquoy ne tascherai-je à vous y remettre, puis que ie vous voy auourd'huy si mal aduisé de choisir le silence pour le deuis, la solitude pour la frequency, la crainte pour la seureté, vn air morfondu pour vn chaud, brief au lieu d'une liberté auoir pris les champs pour prison? Et sur tout n'auoir autre personne maintenant (apres Madamoiselle vostre bonné partie) à qui puissiez communiquer le secret de vos pensées, sinon aux arbres? Et encores arbres qui dès vostre premier abord se sont voulus despouiller de leurs robbes gayeres, pour vous donner par signes à entendre combien en leur vegetatiue ils sont marris de vostre presence. Malheureux est, dient les saintes lettres, qui choisit la vie solitaire. Je sçay bien que pour vous reuanger vous m'obieçterez que miserable est la condition de nos villes, qu'en icelles abonde & le vice & l'enuie avec trop plus grande prodigalité qu'aux champs. Mais tout ainsi que le vice, aussi y est la vertu plus plantureuse & frequente. Et si l'enuie y faict de plus grandes preuues, en contre-balance de ce nous sommes recompensez d'un plus grand honneur. Honneur qui non seulement fait oublier toute la desfaueur de l'enuie, honneur dy-je, qui est l'ame des bons esprits & cœurs genereux. Je sçay encores que vous me direz que quelques anciens Philosophes furent d'aduis qu'il falloit du tout abandonner la ville & les affaires pour trouuer son

repos aux champs. Mais ie vous responds que tel estoit par aduerture leur aduis, par ce qu'ils n'estoyent pas employez, & que pour autant, ou que nature, ou la fortune les auoit rendus gens contemplatifs & oiseux, ils vouloyent induire & semondre à mesme oisiueté tous les autres. Que si peut estre vous me couchez les Cincinnats & Curies, qui des affaires de la ville prindrent la route des champs, comme en vne retraite de leurstrauaux, ie vous diray que ce n'estoit pas qu'ils aimassent plus la vie champestre, que la ciuile, ains parce qu'ils se delectoyent plus de la diuersité. Et tout ainsi que celuy qui est de son ordinaire nourry de viandes delicates & friandes, est quelque fois tres-content de laisser vne perdris, pour se prendre à du bœuf salé, ou du lard; aussi ceux-cy & tous ceux qui les ressemblerent, par vn attediement que leur apportoit l'accoustumance de manier les grandes affaires, se retiroyent parfois aux champs: non qu'ils ne s'estimassent beaucoup plus heureux de negocier dans les villes, que de se rendre oiseux aux villages. Par ainsi toute ceste vie rustique leur estoit tout ainsi qu'une parenthese. Et au surplus si sans nous arrester aux exemples qui couurent quelquesfois beaucoup de dissimulation, nous voulons considerer la nature, qui est celle que nous deuons nous proposer pour seule & principale bute de nos actions, ie vous supplie dites moy quelle est la fin pour laquelle nous sommes establis en ce monde, sinon pour la conseruation de ceste humaine societé? Vous

m'accorderez d'ôcques, cōme ie pèse, que plus nous approchons de ce but, & plus nous satisfaisons au deuoir auquel nous sommes appellez. Ie ne veux pas vrayement dire que le laboureur, qui est membre de nostre republique, n'estudie en quelque façon à cest entretenement: mais que son estat y aspire de telle sorte que le nostre, ie ne l'estimeray iamais. Et croy que vous Syndic & Procureur general de la vie Rustique m'en passerez condamnation. Es villes affluent les grâdes traffiques, non seulement des marchandises, ains des esprits: es villes sejourne le mechanique industrieux, es villes heberge le grand Magistrat, qui est la bride & retenail de tout le peuple: es villes les bōnes lettres & disciplines, par lesquelles nous nous rendons excellents par dessus tout le commun peuple. Et encores que ie sçache bien qu'on puisse estre Philosophe aux champs, toutesfois que profite ceste belle Philosophie si en cultiuant vostre terre vous tenez vostre sçauoir en friche, sans en faire part à ceux pour lesquels vous estes aussi bien né, comme pour vous? D'auantage si sans faire estat de ceste generalité, nous voulons nous arrester au contentement de nous seuls en nostre particulier (par ce qu'il semble que ceux qui quittent les villes le facent pour vn repos de leurs esprits) considerons ie vous prie d'où prouiennent les ennuis, tribulations & fascheries qui trauaillent nos esprits. Et certes vous m'accorderez que c'est de l'apprehension que l'on conçoit pour vne chose que nous

aimons ou desirons-Ainsi le pere se tourmente & afflige d'auoir perdu son enfant, l'Aduocat d'estre succombé de la cause, & le marchand que sa marchandise ait esté submergée d'une tourmente. Je veux doncques dire, ou que le laboureur est du tout sans apprehension, ou que si aucune apprehension il a au suiet qu'il se propose, il n'est pas moins passionné quand il est frustré de son esperance, que l'Aduocat ou le marchand en leur estat. Et mesmes si l'on me veut dire qu'il traueille sans passions hazards qui trompent ses opinions, il faut que tout d'une suite l'on me confesse qu'il ne reçoit point de plaisir des choses qui luy retournent à souhait. Car les plaisirs & desplaisirs prennent leur origine en nous d'une mesme source & fontaine. En sorte que celui qui ne prend à desplaisir le mal, ne prend aussi plaisir du bien, comme luy estant vne chose indifferente. Mais donnons que sans passion l'esprit de l'homme, qui est aux chaps, viue en repos, estimerez vous pour cela qu'il y ait quelque marque sur nous? Au contraire i'estime que c'est le plus grand bien que nous puissions recueillir des villes, si elles nous apportent le bannissement du repos. Car si nos esprits furent faits à la sèblâce & image de ce haut dieu, qui est en perpetuelle action, he vrayement ie ne voy point pourquoy nous voulions nous pourchasser vn repos:specialemēt lors que nous l'assaisonons de quelque honnestetrêpance. Et pour ceste cause quelques grāds & sages personnages se conformas à mon dire, disoyent

qu'ils n'estoyent iamais moins seuls que quand ils estoyent seuls, ny moins entachez de l'oisiveté que quand ils estoient oisifs. Nous voulans donner à entendre, que non seulement es villes closes, où abonde la frequency du peuple, mais aussi aux hermitages & lieux sombres nous devons tousiours estre accompagnez de quelque belle occupation d'esprit : esprit dy-ie que l'on ne peut bonnement occuper sans quelque entrelas de passions selon la diuersité des objets. Et toutesfois pourquoy bannirons nous tout à faict du laboureur le trauail d'esprit ? Il me souuient à ce propos auoir leu dans Marcellin qu'au parauant que les Bourguignons se fussent inuestis d'une partie des Gaules, comme ainsi fust qu'ils feissent seulement profession, ou des armes, ou du labour, consequemment qu'ils deussent auoir l'esprit moins mondanisé que nous tous : toutesfois lors que contre leur espérance la terre leur faisoit faillite, ils entroyent en vne fureur si estrange, qu'ils chassoyent leur Roy de leur Royaume, & en installoyent vn autre en son lieu. Estimans par vne opinion barbaresque prendre belle vengeance de Dieu, lors qu'ils s'attachoyent à celui qui representoit sa Maiesté sur la terre. Et puis soustenez maintenant que les passions, voire extraordinaires, ne se trouuent aussi bié aux gens rustiques, comme à nous autres citoyens ? Que dy-ie aussi bien, si par demonstration infailible ie vous monstre qu'il faut qu'ils en soyent plus touchez ? Car pour vous parler seulement de mon estat, laissant les autres en

arriere, si le malheur se rencontre que trauaillant pour autrui, ie perde d'aduéture ma cause, encores qu'il soit impossible que ie n'en sètte quelque trauerse en mon esprit, si en est elle beaucoup moindre. Par ce que ie perds sans rien perdre, lors que i'ay faict mon deuoir, voire me flate-ie de ceste opinion, que ma perte est aduenüe pour auoir esté exposé au iugemēt des hommes, dont les opinions sont peu seures & mal arrestees. Au contraire, le laboureur qui laboure son heritage, combien doit-il estre fasché estant deceu de son attente, quand sur luy seul tombe ceste perte ? Or combien plus, quand il laboure sur autrui, & que par la calamité d'une année il tombe à la mercy d'un maistre impiteux, qui ne luy corne autre chose dans les oreilles, qu'une fascheuse appreciation de grains ? Laquelle sortant effect ne luy laisse pour l'aduenir nulles esperances de ressource. A fin que ie n'entre en nulles autres particularitez, comme de la pillerie du gendarme, cueillette des tailles & subsides, desquelles combien que pour le rang que soustenez soyez franc & exempt, si ne vous sçauriez vous exempter d'une affliction commune, voyant tout ce pauvre peuple affligé. Toutes lesquelles choses ne se rencontrent pas si aisément dans les villes, esquelles combien que nous sentions quelquefois la rigueur des daces, si apprenons nous à les supporter plus doucement par l'industrie de nos estats. Aussi disons nous que le laboureur traine avecques sa charruë tout le malheur du temps quant &

foy. Au demeurant si laiffans toutes ces confiderations à part, il vous plaist que nous discourions sur les plaisirs exterieurs que parmy ces aduerfitez vous pouuez receuoir aux champs: vous me direz (ie le fçay bien) que lors que la saison nouuelles s'y addonne, vous oyez fous le couuert d'un arbriffeau la musique des oyfillons de goifans à l'enuy leur ramage. Quel plus doux chant demandez vous, qu'une voix bien organifée, vne parole articulée, vne harangue bien trouffée, soit de la part d'un professeur des bonnes lettres, ou d'un prescheur, ou d'un Aduocat bien-disant? Prenez vous plaisir au deduit de la chasse? Je chasse plus en un quart d'heure en mon estude, que vous en un iour par les champs. Et puis presque dire de nous ce que disoit anciennement le Roy Edoüard d'Angleterre de nostre Roy Charles cinquiesme. Car tout ainsi qu'il disoit que le Roy Charles prenoit plus de villes & chasteaux, ioüant seulement de sa plume, que tous ses predecesseurs avec leurs affusts militaires: aussi avec nos escrivoires & papiers faisons nous plus grande queste de lieures, lapins, ou de venaison, que tous vous autres messieurs avecques vos meutes de chiens, panneaux & filets. A fin qu'outre telles questes ie ne mette en ligne de compte les amitez, obligations, & alliances des personnes que nous acquerons tous les iours: Ce que les champs ne vous apportent. Voulez vous passer vostre temps sur les herbes? Et qui est celuy qui ne fçache qu'un Plin, Dioscoride, & Mathiole

m'en apprendront plus en vne heure, que tous vos iardins en dix ans ? Vous delectez-vous du fruitage ? Et où en est l'abandon sinon aux halles, où est le grand iardin de Paris ? Et à peu dire nous recouurons dans les villes avecques tout contentement en abondance & a choïson, ce que vous avecques mille trauaux & fatigues recueillez escharlement sur vos lieux. Pour mettre cependant en oubly vne infinité d'autres parcelles, esquelles nous vous deuançons en tout. Je ne puis doncques me persuader qu'il y ait vne seule occasion qui vous induise au delaissement de la ville, si ce n'est qu'ayez crainte que les tuilles de nos maisons ne tombent sur vostre teste, comme il en aduint à Pyrrhus Roy des Epirotes. Et de moy ie crains qu'il n'y ait encores quelque aigle de la race de celuy qui tua Eschile au milieu des champs, quand il laissa tomber sur sa teste chauue vne tortuë pour la casser, pensant que ce fust vn rocher. Parquoy, pour mettre fin à ma lettre, ie vous supplie reuenir non pas à nous, ains à vous, & recueillir vn peu vos esprits. Autrement si estes tant attaché à vostre opinion, ie me feray deormais accroire qu'estes possédé par Ferrieres, & non Ferrieres par vous. A Dieu.

*A Monsieur de Marillac Seigneur de Ferrieres,
Conseiller du Roy, & Maître ordinaire en
sa chambre des comptes.*

*Il se gausse
de quel-
ques folles
ordonnan-
ces d'a-
mour qu'il
auoit faites
à vn iour
des Roys.*

PAr ce que pour le present mettez toute vostre estude à bastir, ie vous ay voulu imiter, mais d'une imitation si gaillarde, que ie me puis bien vanter vous passer de tout poinct. Car au lieu que materiellement dressez Palais & chasteaux pour estre receptacles de vous & de vos amis, i'ay voulu d'un plus haut dessein bastir vne republique: & encore republique composee sur vn modele si spacieux, qu'elle ne s'estendra point à vn seul peuple, comme est l'ordinaire de toutes loix, ains generalement à tous de quelque estat, qualité, region, & religion qu'ils soyent. Ce sont les ordonnances d'amour que ie vous enuoye, lesquelles sous l'autorité de Genius Archiprestre d'amour ont esté publiees aux grâds arrests tenus la veille des Roys en ma maison, en presence de nostre Roy, en vne bien grande assemblée tant d'hommes que de Damoisselles. Vous iugerez par la lecture d'icelles si ie suis digne d'estre ou Chancelier d'un grand Monarque, ou grand Escuyer des Dames, ou l'un & l'autre ensemblement. Voyla de grandes & superbes propositions. Pour le regard de la premiere ie vous remets deuant les yeux ces belles & magnifiques loix: loix que ie puis dire, sous meilleurs gages que Ciceron en sa harangue pour Milon, non dictées, ains nees,

lesquelles nous n'auons apprises, prises, ou par longue lecture acquises, ains qui de la mesme nature se tirent, s'inspirent, & de ses propres mammellès s'espuisent. De maniere que ie me vâteray que toutes les autres ne sont que masques au regard de celles-cy. Partant peut on à bonne & iuste raison dire, selon le vieux Prouerbe François, que i'y ay bien planté mes seaux. Consequenment que c'est à moy auquel appartient ce grand estat de Chancelier. D'un autre costé si vous considerez le sujet, & de quelle viuacité i'ay enfourné le fait des Dames, il n'y a homme de iugement qui ne me declare digne d'estre leur grand Escuyer. Toutesfois en ceste conclusion & arrest i'entre en nouuelle perplexité. Par ce que ie me tiens asseuré qu'il y aura quelques superstitieux personages, comme vous, qui me diront que ces deux estats sont incompatibles ensemble. Mais pour ne demeurer longuement en ce scrupule, ie sçaurois volontiers qui leur à enseigné ceste leçon. Ne veit-on iamais Châcelier estre seruiteur des Dames, ou quelques seruiteurs des Dames auoir esté Chancelier? Au contraire ie soustiens que le seruice des Dames est la premiere planche pour paruenir aux grands lieux. Chose qui se peut aisément recognoistre par vne demonstration oculaire. Car qui sont ceux qui conferent tels estats sinon les grands Roys? Desquels si nous voulons escheler la puissance, qui sont ceux qui ont plus de commandement sur eux que les femmes? Et de ce ie m'en rapporte au passage exprez de la

saincte escripture. Je veux doncques en cest estrif conclurre que tant s'en faut que pour paruenir aux honneurs ce soit chose mal compatible d'estre seruiteur des femmes, qu'à l'opposite ie pense que leur seruice est accident inseparable de ceux qui veulent paruenir. Car mesmes si nous voulons peser plus subtilement les choses (mais toutesfois à leur vray poinct) voustrouuerez que ceux qui montent aux estats, ou par Vertu, ou par Pecune, ou par leur Diligence, ou par leur Dexterité & Industrie, ou par Importunitéz, & Prierez, ou par Faveur, ou par Píperie, encores sont en cecy toutes leurs actions accompagnées du feminin. Je sçay bien que vous me direz, & me sèble vous voir s'écouant à demy la teste me dire en paroles douces comme l'ancien Philosophe. Mon amy il est desormais temps que tu entres en la cognoissance de toy, il faut que tu balances tes forces, il y a bien grande difference de coucher ou en du papier blanc, ou sur des draps blancs, de iouer du plat de la langue, ou bien de l'aigu de la lance. L'un ressemble à vne escrime qui se fait avec l'espee rabatuë, l'autre à fer esmoulu. Les Dames ne se contentent de parolles, & ne prennent le bon vouloir pour satisfaction de l'effect. Mais à cecy ie vous responds, que ces obiections viennent de la part d'un homme couïard, & de desfiante nature, tel que vous. Au demeurant ie vous aduise que ie suis tant affectionné seruiteur des Dames, que le plus grand traict de sagesse que ie puisse iamais faire, est de ne me cognoistre point, à fin qu'elles me

cognoissent. Aussi est-ce à elles de faire poix de mes forces, & non à moy. Que voulez plus? S'il faut bailler coup de lance; j'en feray voler les esclats. Les forces croissent par l'object: tirez souuent eauë d'un puits, vous n'y trouuez du iour au lendemain nulle diminution: chommez d'en tirer tout vn an, il sera tousiours en vn mesme estat. C'est pourquoy ie m'estimeray tres-heureux d'vser mon corps & mon esprit à leur seruice, sçachant bien que ie n'en empireray en rien. Et toutesfois si par vn commandement special que vous auez acquis sur moy, voulez que pour vous complaire ie me desplaise, & que par vn mesme moyen ie quitte & l'esperance des seaux, & le seruice des Dames, pour quelque impuissance que iugez assez mal à propos estre en moy par vn argument superficiel, c'est à dire d'un visage blesme, d'une delicatessè de membres, d'une calote qui me faict bonne compagnie. Or sus soit contre ma volonté vostre commandement accompli. Mais pourquoy contre ma volonté? si c'est vne regle generale que les loix ne lient iamais celuy qui les a faictes & ordonnees? Ie me conformeray doncques en cecy, non à vostre commandement, mais bien au priuilege commun des Roys & Princes; lesquels pour estre les premiers ordinateurs de leurs loix, se donnent loy de n'y obeyr. Et neantmoins (voyez comme facilement ie faulte d'un penser à l'autre) à fin que par vn sinistre exemple ie ne sois veu mettre mes pensers à l'eslor, ie ne veux point me donner tel passe-droit

que les Princes. Veu mesmement que le Prince sage reduit sa puissāce absoluë sous la ciuilité de la loy. Parquoy pour contenter en partie vostre vouloir, & neantmoins n'estre veu tyrannizer sur les miens, ie veux en cecy ressembler au grand legislateur Licurge, lequel apres auoir accommodé ses citoyens de braues & excellentes ordonnances, les pria de ne les changer iusques à son prochain retour, se feignant de faire vn court voyage qu'il disoit luy estre besoin d'entreprendre. Ce que luy ayant esté accordé, il se bannist à iamais de son pais par vn exil volontaire. Aussi d'vn mesme propos, me veux- ie rendre absent & bannir de ceste mienne republique : mais à la charge que mes loix, qui nē cedent en rien à celles de ce grād Licurge, seront à tousiours mais entretenuës selon leur forme & teneur, non en vne contree seulement, ains generalement par toutes. Et suis si resolu en cecy que ie ne veux stipuler l'entretienement d'icelles : m'asseurant que sans aucune stipulation ni promesse, chacun d'eux y tiendra la main de pere à fils & de siecle en siecle. Qui n'est pas vn contentement petit dont ie nourris mon esprit, vous priant me donner telle & si bonne part en vos bonnes graces, comme mes ordonnances trouueront, voire à l'endroit de ceux & celles qui par dissimulation & hypocrisie feront contenance de les condamner. A Dieu.

*A Monsieur Cujas, Conseiller au Parlement de
Grenoble, & Docteur Regent des Loix en
l'Vniversité de Bourges.*

EN CORES que ie n'aye aucune
cognoissance de vous, que celle
que la commune renommee &
la lecture de vos doctes escrits
m'en a peu donner, toutesfois
ayant trouué occasion non impertinente de
vous escrire, ie ne l'ay voulu laisser escouler,
esperant par ceste presente faire ouuerture à
vne amitié de laquelle les fondemens seront de
tant plus solides, qu'ils auront esté iettez sur
la vertu. Monsieur Loisel m'a dit que dernie-
rement vous arriué en ceste ville, il vous fit fe-
ste des trois derniers liures du Code, mis en
vieux langage François que ie luy auois presté,
& qu'auiez grand desir d'en auoir communi-
cation, d'autant que faisiez quelque commen-
taire sur iceux. Je suis marri que deslors ne
vous en emparastes de vostre priuce autorité
& ainsi le faut dire, par main souueraine, sans
que mon consentement y fust requis. Asséu-
ré qu'ils ne pouuoient estre mieux employez
qu'és mains de celuy qui tout d'vne main
sçaura faire son profit du Grec, Latin &
François tout ensemble pour l'vsage du droit
ciuil. Et combien que de ces liures vous ne
rapportiez peut estre tel profit que desi-
rez, si est-ce chose digne d'estre remarquee,
que nos anciens François ayent autrefois ap-
porté ce soing de defricher en leur langue

*Le fruit
que se pen-
uent pro-
mettre en
uers la po-
sterité les
auteurs
qui inuen-
tent, au re-
gard de
ceux qui
translatent
des liures.*

les secrets plus cachez des Constitutions Romaines. Et ce que vous verrez en ce traducteur, ne pensez pas qu'il n'ait esté commun à plusieurs autres, qui d'une mesme estude translaterent en nostre vulgaire la Bible, la plus grande partie des œuvres d'Aristote, Tite Live, les liures de S. Augustin de la Cité de Dieu, & vne infinité d'autres dont i'ay veu quelques liures entiers en la Librairie que nostre grand Roy François auoit establie à Fontainebleau, & les autres en autres Bibliothèques, selô que les occasions se sont presentées. Vray que leurs œuvres se sont perduës, & se perdront plus nous irons auant. Non qu'ils n'eussent tous bien escrit selon la portee de leurs siècles: mais c'est le fruit que nous rapportons d'une penible traduction. Je sçay bien qu'une traduction bien faite n'apporte point peu de profit à nos citoyens, pour les rendre participans des belles & nobles conceptions des estrangers, sans qu'il y aille grandement du nostre. Mais ie puis dire, car il est vray, qu'il n'y a labeur plus ingrat que cestuy, ne qui soit si peu recogneu par vne posterité. Le traducteur comme vn esclau s'alambique tous les esprits à suiure à la trace les pas de l'autheur qu'il translate, il y consomme son aage, & y desploye tous les plus beaux traits qu'il pense auoir cours entre les siens pour se conformer de plus pres au naïf de l'autre. Cependant petit à petit sa langue maternelle se change de telle façon avec le temps, que comme si nous luy auions baillé vne robe neuue, nous ne voulôs plus vser de

la vieille. Cela est cause que tout ainsi que le vieux vulgaires'est esuanouy entre nous, aussi quittons nous les vieilles traductions, & voulons auoir recours aux liures originaires, soyét Grecs ou Latins, qui auoyét esté translatez. Et ny a que les inuétours qui se perpetuent. Par ce qu'encores que les vulgaires se chagent, si est-ce que pour nous seruir des sources, nous sommes necessitez de les lire, pour ne pouuoir puiser d'ailleurs leurs conceptions, si elles sont bones. Ciceron ce grand Orateur voulut traduire quelques liures Grecs: se sont-ils perpetuez? Rié moins, encores qu'il fust le pere de bié dire. Je le vous représenteray par vn exéple fort familier, & qui est de nostre creu. La lógue ancienneté nous a-elle fait perdre nostre bó Roman de la Rose? Le premier qui y mit la main fut Guillaume de Lory, qui estoit vers le téps de Philippe Auguste: & l'autre qui le paracheua Ieá Clopinet dict de Mehun, estoit sous le regne de S. Louys. Le plus braue traducteur que produisit iamais du temps de nos ancestres la France fut Maistre Nicole Oresme, auquel le Roy Charles cinquiésme fit tomber l'Euesché de Lisieux pour le recompenser de ses labeurs: car ce fut luy qui mit en nostre vulgaire & la Physique, & les Politiques, & les Ethiques d'Aristote, & plusieurs autres liures qui furent lors leus avec vn tres-fauorable accueil. Toutesfois vous n'é voyez auourd'huy que quelques demeurans que l'on a recueillis en quelques Bibliothèques, comme fragmens du naufrage d'vne longue ancienneté. Au contraire

il n'y a homme docte entre nous qui ne lise les doctes escrits de Maistre Alain Chartier, qui fut son contemporain, & qui n'embrace le romant de la Rose, lequel à la mienne volonté que par vne bigarrure de langage vieux & nouveau, Clement Marot n'eust voulu habiller à la moderne Françoisse. Qui doncques cause ces deux diuersitez? Il est aisé d'en assigner la raison. Or esme n'auoit presté à ses traductions que le langage de son temps qui s'est perdu, à maniere qu'il faut auoir recours à l'auteur mesme. Et quant à Lory, Mehun, & Chartier, ores que leur langage se soit enseuely dans le cercueil de nostre aage, si est-ce que leurs belles sentences & conceptions ne pouuans mourir, ceux qui desirent faire leur profit, comme les abeilles des belles fleurs, les lisent & relisent, par ce que la necessité les y contraint de ce faire, & qu'ils ne les trouueroient ailleurs. Je ne veux pas pour cecy destourner aucuns hommes de nostre temps de traduire cōme ceux lesquels en faisant peu pour leurs noms enuers vne posterité, procurent vn grand bien aux viuans. Au demeurant vous vserez de la traduction que ie vous enuoye, cōme faisoit Virgile des œuvres du bon Ennius *Ex stercore aurum*: à la charge que s'il s'é presēte quelque autre de ceste parcure, qui puisse seruir à vos estudes de droit, de ne vo' en estre chiche. De moy ie me suis mis à la recherche des anciennetez de la Frāce. Et pour ceste raison i'ay appelé mon œuvre, Recherches. L'entreprise est de grand labeur, & qui re-

quiert de fueilleter plusieurs liures anciens: si vous en auez quelqu'un sur ce sujet, vous me ferez ce bien de m'en faire part, à la charge de vous le renvoyer, tout de la mesme façon que ie vous prie faire de mon liure, aussi tost qu'en aurez fait. A Dieu.

A Monsieur de Ronsard.



A VOIS reserué le discours dont m'escriuez à vn chapitre de mes Recherches, auquel ie deduits l'origine, progresz, & accomplissement de nostre Poë-

En quelle recommandation a esté autre fois la Poësie Francoise entre nous.

sie François: toutes-fois ie suis tres-aïse que nos Princes en ayent le premier aduis par vos mains. Parquoy puis que l'occasion s'y presente, & que vous estes deliberé de discourir sur nostre Poësie Francoise, adioustez à vostre œuvre par maniere de remplissage (ainsi que font les peintres à leurs tableaux) la recommandation en laquelle quelques vns de nos Roys eurent les lettres. Pour à quoy parfournir, vn Chilperic, petit fils de Clouis, vous pourra seruir de garād, lequel escriuit plusieurs liures en vers Latins, & ores qu'ils ne fussent de telle efficace que l'on eust peu desirer, si se rendoyēt il excusables, en la personne d'un Roy enuironné de tant d'affaires, & eu esgard mesme ment à la barbarie & infelicité de son siecle. Et non content de cecy pour mōstrer en quelle estime il auoit nostre vulgaire, il voulut adiouster à l'Alphabet des François ces lettres

Grecques doubles; dont il pensoit que nostre orthographe auoit affaire, $\theta\chi\psi\xi\phi$; commandant par tout son Royaume à tous Scribes & Maistres d'escoles de les mettre en œuvre en l'escriture François. Sous la seconde lignee il est certain que Charlemagne fust fort docte. Le moine Sigebert escrit qu'il estoit Prince non seulement bien entendu au langage particulier de son pais, ains de plusieurs autres, & qu'il escriuit plusieurs vers en la langue par lesquels il celebroit les faits & exploits memorables des anciens: & aussi fit-il vne grammaire en son vulgaire, & donna les noms aux vents. Cecy peut estre dit en passant pour la premiere & seconde lignee de nos Roys: car quant à la troisieme des & de puis le temps de Philippe Auguste iusques bien auant dans le regne de Louys neufiesme (duquel nous auons enregistré l'ame au Calendrier des bien heurées) florirent assez heureusement les bonnes lettres: & par special y eut vne grande flotte de Poëtes François (c'est ce dont vous m'escriuez.) A quoy mesmes les Princes de France voulurent estre les premiers guides du commun peuple. Entre autres l'on fait estat du Comte Beranger de Prouence, & d'un Raymond Comte de Tholose, qui furent environ le regne du mesme Auguste en l'an mil deux cens que plus que moins. Ces deux-cy, & leurs courtizans en faueur d'eux donnerent tel aduancement à nostre Poësie, que les Italiens (ores qu'entre autres choses, sobres admirateurs d'autrui) sont contrains de reconnoistre ne tenir en foy & hommage leur

*Les Italiens
redevables
à nostre
France de
leur Poësie.*

Poësie que de nous. Ainsi le recognoist Bem-
 bedans les Proses, ainsi Speron Sperone en
 son Dialogue des langues, ainsi Æquicola en
 ses liures de l'amour, & ainsi à peu parler le
 voit-on à l'œil dans les œuvres de Dante, le-
 quel embellist vne partie de ses escrits de plu-
 sieurs traits, mi-partis tant du Prouençal
 que François. Aussi occasionnerent ces Prin-
 ces plusieurs autres à suiure puis apres leurs
 traces desquels ien'ay entrepris de vous faire
 recit en celieu Je me contenteray seulement
 de vous dire, qu'entre les Princes de la France
 qui florirent en Poësie sous la troisieme lignee
 de nos Roys, nous deuons faire grand estat
 d'un Thibault Comte de Champagne, lequel
 fit vne infinité de chansons amoureuses en fa-
 ueur de la Royne Blanche mere de S. Louys,
 non pour vn amour impudique qu'il luy por-
 tast, ains par honneur, & pour se ioier de son
 esprit. I'en ay le liure par deuers moy, sur le
 commencement duquel vous y verrez vne
 description de ses passions : sur le milieu il
 prend congé de sa maistresse, estant contraint
 pour son deuoir de prendre le chemin de Je-
 rusalem avec les autres Princes croisez : & sur
 la fin il proteste de vouloir quitter l'amour, &
 se reduire du tout à la volôté de Dieu. Et pour
 derniere conclusion de son œuvre, il adres-
 se quelques chansons à quelques-vns de ses a-
 mis, dans lesquelles ou il interroge, ou il est
 interrogé sur quelques questions d'amour. Et
 me souuient entre les autres d'une qui est assez
 gentille, par laquelle il introduit le Comte

*Les œuvres
 Poëtiques
 du Comte
 Thibault
 de Champ-
 pagne.*

Raoul de Soissons, qui luy demande, lequel des deux apporte plus de contentement à vn amant, sentir & toucher samie sans parler à elle, ou la veoir & parler à elle sans la toucher: & comme Thibault soit pour le party du parler, Raoul replique, qu'au deuis y a plusieurs hypocrisies qui mal-aisément se rencontrent au toucher: conclud neantmoins Thibault que le plaisir qui n'est accompagné du deuis, est vn contentement à tastons. Au demeurant fort heureux en plusieurs beaux traits Poëtiques; comme quand il appelle en son vieux langage sa Dame, *sa douce amie ennemie*, qu'il dit qu'amour l'a tollu à soy-mesme, & neantmoins ne fait compte de le retenir en son service, ains que la beauté de sa Dame pour exalter sa loy, veut retenir ses ennemis sans en auoir mercy, laquelle mercy toutesfois il penseroit trouuer en elle; s'il y en auoit aucune en ce monde: que Dieu meit si grande plaieté de graces en elle, qu'il luy en conuient oublier les autres, qu'il a les beautés d'elle escrites en son cœur, que de mil souspirs qu'il luy doit de rente, elle ne luy en veut remettre & quitter vn tout seul, que sa beauté le rend si confus & esbahy que lors qu'il pense venir le mieux apris deuant elle, pour luy descouvrir son tourment, il ne luy peut tenir aucun langage, que du premier iour qu'il la veit il luy laissa son cœur en ostage, que les faueurs ou defaueurs d'elle luy apprennent à chanter, qu'il veut eslire dans amour le meilleur cœur qu'il ayt, pour loyaument servir. Et vne infinité d'autres gentilleses d'amour, dont il se rend infiniment recommandable. Et d'autant que tels vieux liures ne se laissent manier,

sinon par ceux qui prennent plaisir à l'ancienneté, ie vous veux icy reciter quelques beaux couplets de ce Comte, sans rien changer du langage, à fin que vous iugiez quel il fut.

Cil qui d'Amour me conseille

*Que de luy doye partir,
Ne sçait pas qui me resneille,
Ne quel sont mi gries souffrir,
Petit a sens & voidie
Cil qui me veut chastier,
N'oncques n'ama en sa vie,
Si fait trop nice folie
Qui s'entremet du mestier
Dont il ne se sçait aider.*

Et en vne autre chançon:

*De bien amer grand ioye attend,
Ce rien est ma grignour enuie,
Et sçachiez bien certainement
Qu'amour a telle seigneurie,
Que double guerre donne rend
A celuy qui en luy se fie,
Et cil qui d'amer se repend
C'est bien trauaillé pour neant.*

Ailleurs disant qu'il veut quitter l'Amour :

*Tant ay amour seruies longuement,
Que desormais ne m'en doit nulz reprendre,
Si ie m'en part, or à Dieu le command,
Qu'on ne doit pas tousiours folie emprendre,
Et s'il est forz qui ne s'y sçait deffendre,
Ni ne cognist son mal & son tourment,
On me tiendrait desormais pour enfant,
Que chaque temps doit sa saison attendre.
Qui sont couplets extraits de diuerses chan-*

sons, mais en voicy vne toute entiere qu'il fit
au retour de son voyage d'outre-mer.

*Si i'ay long temps esté en Romanie,
Et outre-mer faiët mon pellerinage,
Souffert y ay moult douloureux domage,
Et enduré maint grande maladie,
Mais or ay pis qu'oncques n'oy en Surie,
Que bonne amour m'a donné tel malage
Dont mille fois la douleur n'asouage,
Ains croist ades, & double & multiplie,
Si que la face en ay toute pallie.*

*Car ionie Dame, & cointe, & auoisie,
Douce & plaisante, belle, courtoise & sage,
M'amise au cœur vne si doncerage,
Que i'en oubly le voir & la ouye.
Si comme cil qui dort en letargie,
Dont nuz ne peut esveiller son courage,
Car quand ie pens à son tres doux visage,
De mon penser aim' mieux la compagnie
Qu'oncques Tristan ne fit I seul s'amie.*

*Bien m'a amour fern en droite veine,
Par un regard plain de doulce esperance,
Dont nauré m'a la plus sage de France,
Et de beauté la rose souveraine.
Si m'esmerueille que la playe ne saigne,
Qu'oncque ne vy si trenchant fer de lance,
Mais el' ressemble au chant de la Seraine,
Dont la douceur attend douleur & peine.*

*Si puisse-ie sentir sa douce haleine,
Et retenir sa simple contenance,
Que ie desirés amour & s'acointance*

*Plus que Paris ne fit oncques Helcine,
 Et s'amour n'est mie en moy trop vilaine,
 La sans mentir n'en feray penitence,
 Car sa beauté & sa tres grand vaillance,
 M'ont cent sospirs le iour donné d'estraîne.*

*Et sa face qui tant est douce & belle,
 Ne m'a laissé qu'une seule pensee,
 Et celle m'est au cœur si embrasée,
 Que ie la sens plus chaude & plus isnelle,
 Qu'oncques ne fut ne braize n'estincelle,
 Si ne puis pas auoir longue duree,
 Si de pitié n'ay Madame nauree,
 Quand ma chanson luy dira la nouuelle,
 De la douleur que pour ly meflaelle.*

Ie vous represente ces vers habillez à la vieille Françoisse, mais en ceste naïfueté ie m'assure qu'y trouuerez plusieurs traits d'ot nous pourrions aujourd'huy faire nostre profit, & qui est vne chose que ie vous veux icy dire par excellence, c'est que sur chaque premier couplet y est la Musique ancienne. Qui monstre bien que ces vers estoient lors de grande recommandation, ou pour la bonté d'iceux, ou pour l'autorité de leur auteur, ou pour tous les deux ensemble. Du commencement que ce liure tomba en mes mains, ie doutois qui l'auoit composé, comme de faict il y a quelques-vns qui estiment qu'il soit faict de diuerses pieces. Mais la generale æconomie; telle que ie vous ay cy dessus deduite; m'enseigne que c'est d'un seul auteur. Et au surplus ie voy ce prince si souuent nommé en des chansons, où il s'introduit parlant avecques vns & autres, que

ie ne fais nulle doute qu'elles ne soyent toutes de luy. Et si de ce gentil Comte de Champagne vous voulez sauter iusques à nous, vous pourrez notoirement inserer au rang des Poëtes nostre grand Roy François, qui fit de fois autres plusieurs beaux vers, & avec luy mettre la Roynne de Nauarre sa sœur, comme nous en porte assésuré tesmoignage ce beau liure qui court par nos mains, que l'on appelle la Marguerite des Marguerites. Car quant aux autres Poëtes qui furent du commun ie ne vous en feray mention, pour n'auoir icy entrepris de vous escrire vne histoire, ains vne epistre. A Dieu.

*A Monsieur Martin, Greffier au Siege Presidial
d'Angoulmois.*

NE ne reçois aucune lettre de Monsieur Iameu, que ce ne soit avec vne expresse & singuliere mention des bons offices que me faictes par delà en vostre estat. Cela prouient de vostre bonté naturelle, sans aucun mien merite, & serois digne d'estre couché au chapitre des plus ingrats qui furent oncques si en defaut de l'effect, pour le moins ie ne vous en remerciois affectionnément par lettres, en attendant quelque bonne occasion de m'en reuanger. En quoy ie proteste m'y employer de si bon cœur, que vous ne serez iamais marry d'auoir faict plaisir à celuy qui desire vous demeurer tout le temps de sa vie amy. A Dieu.

*A Monsieur Bigot seigneur de Tibermeny Ad-
uocat au Parlement de Rouen.*

PVER nobis natus est. Il me plaist de commencer ceste lettre par vn passage de l'Eglise, à l'imitation de nos anciens Aduocats en leurs plaidoyers d'importance. A la charge que si ceste maniere d'escrir vous semble contreuenir au temps qui court, vous l'imputerez au grand aise qui dissipe mes esprits, & ne permet que le peu de mō iugement exerce ses fonctions ordinaires. Je suis donc augmenté d'un enfant, & augmenté de la façon que souhaitoit vn ancien Philosophe, c'est à dire, d'un masle, & non d'une fille; ie dirois Parisien & non barbare, n'estoit que ce mot sōne mal aux oreilles de tous. Mais pour trouuer remede à cecy, il ne sera point s'il plaist à Dieu Parisien, mais né de ce doux air de Paris, auquel abondent toutes sortes de Philosophes. Qui me promet que n'estant venu en ceste commune lumiere, ny femme, ny barbare, encores auray-ie cest heur, si Dieu plaist, d'en faire vn iour quelque grand Philosophe. Non pas de ces contemplatifs qui ne tirent toutes choses qu'à desdain, ains tel que l'heur ou malheur du temps sous lequel il aura à viure le desirera. Et si toutes ces particularitez ne vous plaisent, süssise vous que i'ay vn citoyen du monde. Mais pour vous apprestier à rire, c'est le bon. Car estant si mere en trauail, il me souuint que les Romains,

*Il se ioue
sur la nais-
sance d'un
sien fils.
Forme
ancienne
des plas-
doiries de
France sur
leur com-
mencemēt.*

*Les sorts
Virgiliens*

voulans ſçauoir quel ſort leur eſtoit à venir, l'apprenoyent du hazard des vers de Virgile qu'ils appelloyent *Sortes Virgilianas*, & auſſi que nos premiers peres François faiſoyent le ſemblable ſur les liures de la ſaincte Eſcriture. Parquoy me voulant en ceſte doute conſoler, & ſi voulez que ie die ; cōſeiller avec les liures, ie commanday à mon clerc de m'apporter le premier quiluy tomberoit és mains. Auſſi toſt dict, auſſi toſt fait : il m'apporte le liure d'Ouide, dans lequel ſont compris ſes amours & ſes epiſtres. Adonc pourſuiuant mon entrepriſe, pour ſçauoir ſi ma femme auroit ſi prompte deliurance que ie deſirois, ie deſigne dans moy la douzième ligne ſur laquelle ie jette mon ſort à l'ouuerture du liure. Pour le faire court ie tombe ſur ce carme de la lettre de Didon à Ænée :

Nulla mora eſt, venio.

Et ainſi trompant ma crainte d'un ſonge, j'ay nouuelles tout auſſi toſt que ma femme eſtoit deliurée d'un enfant ſain & dru, comme ſi ſur la rencontre de ce verſil fuſt venu à point nommé. Parquoy après auoir careſſé ce nouuel hoſte, ainſi que l'inſtinct de nature me ſemonnoit, & fait tous mes tours, ie retourne ſoudain au conſeil ſur la longueur de ſa vie, & tombe en l'epiſtre d'Aconte à Cidippe ſur ce vers :

Seruetur facies iſta fruenda mihi.

Vous mocquez vous ? me direz vous. Non certes, & ſi ie ne le vous mande à autre intention, ſinon à fin que vous en mocquiez. Mais pour
vous

vous acheuer mon compte, comme vous sçavez que c'estoit la coustume des vieux oracles de tromper tousiours leurs hommes par vn mot à deux ententes, voulant m'informer de sa fortune par le nombre septenaire, comme le plus parfait, ie trouue pour septiesme vers d'un feuillet de la lettre d'Helene à Paris:

Est virtus placitis abstinuisse bonis.

He vrayement dy-ie lors me voicy payé! Car ou il vsera de ceste Dame vertu, en contemnant les richesses, comme les prodigues & dissipateurs de leurs biens, ou bien comme les philosophes Stoïques, ou Cyniques: & de moy i'en approuue ny les vns ny les autres, ains me plaist en ce bas estre la sentence du sage-mondain Aristote: iouir de la vertu en affluence de biens. Voila comment petit pere i'ay commencé à doreloter mon enfant. Vous priant rire de cecy, mais non de moy, ni de ce que i'en ay fait, ains sans plus de la folie de tels sots, auxquels ie n'adiouste nulle foy. Autrement si pretendiez en faire vostre profit par forme de risée contre moy, i'en appellerois de vous, comme de iuge incompetent, à cest ancien Roy de Sparte Agesilaus, iusques à ce que vous iouissiez du priuilege des peres. Mais où me pers-ie sans y penser? I'ay presque oublié de vous remercier de vostre bon aduis, lequel aura telle puissance sur moy, venant de la part non seulement d'un amy, ains d'un amy pourueu d'un parfait iugement, que puis que ie voy mes escrits vous venir à gré, ie donneray ordre que n'aurez occasion de me reueiller.

Mais à la charge que ce sera à vos perils & fortunes, & que là où l'amitié que me portez aura quelque peu surpris en cest endroit vostre iugement, vous me servirez de garent contre ceux qui ne se rencontreront en mesme opinion que vous. A Dieu.

Lettres du seigneur de Tibermeny à Pasquier

*Lettres où
il est dis-
cours
pourquoy
les gens
d'esprit
ne produi-
sent enfans
semblables
à eux*



Audeamus &c. Ie m'aide aussi mal à propos du service de ces nouveaux Chrestiens que vous: mais pour ce que ie suis fort deuot au service ordinaire, ie sçay aussi bien employer l'introit d'une Messe au commencement d'une missive, quel'un de Messieurs de Sorbonne au commencement de son sermon en prenant son theme. Mais laissons la Theologie quant à present, & nous mettons sur la Physique. Vous avez doncques un garçon, dites hardiment Parisien, & ne craignez pourtant si ie suis Normât. Car outre que vous sçavez que ie suis Parisien par adoption, & de tous autres païs esquels il y a à apprendre, ie suis aussi peu Normant, comme vous estes Parisien, & voulez que vostre fils le soit. Il n'est pas qu'à sa naissance vous ne l'en ayez garenty avec quelques exorcismes. C'est grand cas qu'en chaque nation on aduise seulement le vice, & partant fait-on honte à mes compatriotes. Les Tholoains ont esté les plus sages en cecy, lesquels n'ont pris le nom de leur pays, mais Philoso-

phiquement se sont appelez mondains: vous les auez veus & hantez. Et pour ceie concluds que vostre Theodore sera mondain: la conclusion n'en est elle pas tresbonne? Et si sera encores Philosophe. Non Philosophe misanthrope, ains ciuil. Le Genie & les fees, qui luy ont assisté à sa natiuité, n'ont point tant peu en cest endroit, que son pere. Car laissant la rencontre heureuse de vos vers, il me souuiét que vous estant pour quelques affaires en nostre ville de Rouen, me dites que lors que vostre femme engrossa, vous vous estiez distrait des liures & de toutes occupations plus par hazard que par conseil. De là ie tire vne tresbonne coniecture, car iamais pere, qui consomme ses esprits en discours & affaires, n'engendra enfans pareils de luy. Je vous en puis nommer plusieurs exemples, que cognoissez, l'estude grande consomme & espuise le plus subtil sang, duquel, & auquel sont les esprits, & n'y reste que le plus terrestre & pesant. Les enfans sont faits de ceste matiere. Pour ceste cause les Physiciens, & par special Plutarque, ont fort recommandé aux personnes, qui desirét le nom de peres, qu'ils ne s'y employassent apres la viande prise, & sur vne indigestion: d'ailleurs qu'ils fussent libres d'affaires & gais d'esprits, non seulement pour la santé d'eux, mais aussi pour la bonne habitude de leurs enfans, tant du corps, que de l'esprit. Je vous remercie de ce qu'il vous a plu me communiquer ceste ioye, & vous assure que pour l'aïse que ie voy que vous en auez, i'en suis au-

tantioyeux que le pere. Faites le nourrir en vostre maison, vous estes en assez bel air, & me croyez de cela ie vous prie. S'il tient de son pere, il sera Philosophe: si de sa mere, *strenuum se hominem & nunquam cessantem præstabit*. I'ay leu le sonnet que Monsieur d'Arduilliers a fait sur sa naissance. Il me desplaist de mon ignorance; si ie pouuois faire chose digne de luy, il ne fust demeuré sans estreine. A Dieu.

*A Monsieur de Querquisinen seigneur
d'Arduilliers.*

*Certains
paradoxes
qu'il propo-
se au sei-
gneur d'Ar-
duilliers
pour y met-
tre la main*



STANT n'agueres arriué en ma maison d'Argentueil, la plus belle compagnie que i'ay eu, a esté des Offices de Ciceron, & de tous les autres liures qui sont à leur suite. Entre autres choses i'ay voulu passer sur ses Paradoxes, par lesquels Ciceró se vante terrasser la commune opinion de la populace. Qui n'est pas à mon iugement œuvre de trop grand merite. Car qu'y a il rien si aisé, que de combattre sur le papier telles opinions qui sont ordinairement brusques & sans fondement de raison? C'est pourquoy apres auoir fait en moy vn long diuorce du pour & cōtre de plusieurs choses, il m'est entré en la pensee qu'il y auroit matière de faire des Paradoxes plus hardis, qui y voudroit mettre la main. Et pour le premier ie voudrois par forme d'auantjeu soustenir que les paradoxes des anciens n'estoyent paradoxes, ains que c'est vrayement paradoxe

de faire teste à toutes les anciennes propositions de ceux qui se sont estimez les plus sages. Et par ce que ie voy que la plus part des hommes qui mettent la main à la plume, le font sous vne imagination qu'ils ont emprainte en eux de rendre leurs noms immortels, ie voudrois pour second assaut combattre à mon possible ceste folle persuasion, & soustenir qu'entre toutes les vanitez de ce monde, il n'y en a point de plus grande que ceste cy : à ce mot il me semble des-jà voir tous les Poëtes de nostre temps me corner la guerre: & que quelque autre qui pëslera estre plus discret, dira qu'en ceste proposition il y a de l'impieté. Au contraire ie la soustiens comme bon Chrestien. De vous en dire les raisons, ie ne me le suis proposé, ains seulement de vous monstrier au doigt ce que ie serois d'aduis de traiter. Le troisieme seroit que ce que les sages estiment sagesse terrienne, est vne vraye follie : & que tous ces vieux refueurs qui se donnerent le nō & tiltre de Philosophes, n'estoyent gueres sages. I'adiousterois volontiers pour quatrieme, qu'il n'y a point plus grande beste que l'homme, lors qu'il estime estre luy seul entre les animaux sociable, & que les autres animaux ne le sōt en leurs especes. Pour cinquieme que la nature a esté plus indulgente aux bestes qu'à nous : mesmes en nous donnant cest intellect dont nous nous préualōs dessus elles. I'esçay que le trait est hardy : mais plus y aura il de louange à celuy qui en viendra à chef. En somme ie vous ay taillé assez de besongne; il

n'y reste plus que l'aiguille. Vous estes si voulez en plain drap : & puis qu'avez le loisir à vostre commandement, aiguisiez & vostre esprit, & vostre plume, à tels argumens. Asseuré que le plaisir n'en sera pas moindre qu'à la lecture des discours fantasques de Justin le Tonnelier dont vous avez entrepris la traduction. A Dieu.

A Monsieur de Querquifinen seigneur d'Arduilliers.

*Quelle est
la vraye
naïfueté de
nostre lan-
gue, & en
quels
lieux il la
faut cher-
cher.*



Vous n'estes pas le premier qui estes de ceste opinion & y en a vne infinité en France, qui estiment avec vous qu'il faut puiser l'Idée, & vraye naïfueté de nostre langue de la Cour de nos Rois, comme séjour & abord general de tous les mieux disans de la France. Si vous me disiez que c'est là où il faut aller pour apprendre à bien faire ses besongnes, ie le vous allouerois franchement : mais pour apprendre à parler le vray François, ie le vous nie tout à plat. Au contraire (voyez ie vous prie combien ie m'efflonne en cecy de vous) j'estime qu'il n'y a lieu où nostre langue soit plus corrompue. De cecy la raison est bonne. Car comme ainsi soit que nostre langage symbolise ordinairement avec nos mœurs, aussi le courtisan au milieu des biens & de la grandeur, estant nourry à la mollesse, vous voyez qu'il a transformé la pureté de nostre langage en vne Grammaire toute

effeminee, quand au lieu de *Roine* alloit, tenoit, & venoit, il dict maintenant, *Reine, allet, tener, & venet*. Je vous passe sous silence dix mil autres particularitez : ne m'estant proposé d'offenser ceux qui ont puissance de nous offenser. Bien puis-je dire que le peu d'estude qu'employent les courtisans à bien parler, fait que ie ne les choisiray iamais pour maistres d'une telle escole. Vous penserez par aduventure que ie vueille donner ceste louange à nostre Palais. Si vous le pensez, vous vous abusez. Je ne dy pas que le bié dire ne soit vne propriété & vertu qui deust estre annexee à nostre estat : mais ie ne sçay comme le malheur veut que la plus part de nous nō seulement ne s'estudie d'vfer de paroles de choisis, mais, qui pis est, le faisant il y a ie ne sçay quelle jalouſie qui court entre les Aduocats mesmes, d'imputer nō à louange, ains à vne affectatiō, l'estude que l'on y veut apporter. Qui est cause que plusieurs, oresqu'ils le puissent faire, sont contents mieux pēler & moins dire. Quoy doncques ? est il impossible de trouuer entre nous la pureté de nostre langue ? Veu qu'elle ne fait sa demeure, ni en la Cour du Roy, ni au Palais ? Vous entendrez s'il vous plaist quelle est mon opiniō. Je suis d'aduuis que ceste pureté n'est restrainte en vn certain lieu ou païs, ains esparse par toute la France. Non que ie vueille dire qu'au lāgage Picard, Normant, Gascon, Prouençal, Poiteuin, Angeuin, ou tels autres, sejourne la pureté dōt nous discourons. Mais tout ainsi que l'Abeille volette sur vnes & autres fleurs, dont elle for-

me son miel, aussi veux-je que ceux qui auront quelque assurance de leur esprit, se donnent loy de fureter par toutes les autres langues de nostre France, & rapportent à nostre vulgaire tout ce qu'ils trouveront digne d'y estre approprié. Car mesmes en vn besoin voulant représenter vn esprit tel qu'est ccluy du Gascon; ie ne doubterois d'emprunter de luy le mot *d'escarbillai*, qui est né au milieu de l'air du païs, pour designer ce qu'il est. Et non seulement desire-je que ceste emploie se face és païs qui sôt cōpris dans l'enceinte de nostre Frāce, mais aussi que nous passions tant les mōts Pirenees, que les Alpes, & traffiquions avec les langues qui ont quelque communauté avec la nostre, comme l'Espagnole & l'Italienne. Nō pas pour ineptement Italianiser comme font quelques sotars, qui pour faire paroistre qu'ils ont esté en Italie, couchent à chaque bout de champ quelques mots Italiens. Il me souvient d'un quidam, lequel demandant sa *Berrete*, pour son *Bonnet*, & se courrouçant à son varlet qu'il ne luy apportoit, le varlet se sceut fort bien excuser, luy disant qu'il estimoit qu'il commandast quelque chose à sa chambriere *Perrette*. Et l'autre au lieu du Bon-iour François, faisant vn mal façonné *Buongiorno* à vn sien voisin, à peine eschapa-il de venir aux mains pour ceste sorte courtoisie: d'autant que l'autre pensoit qu'il l'eust appelé *Bougerrone*. Comme en cas semblable puis, n'agueres me promenant avec vn Gentilhomme accort, l'un de mes compagnons me saluant du *Buon di*,

Italien : ie pensois, me dit l'autre en se moc-
 quant, qu'il voulust dire que vous bondissiez.
 J'ay vsé de propos deliberé en ce lieu de ce mot
Accort, qui est emprunté del'Italian, aussi bié
 que *Reussir*, mais le temps nous les a naturali-
 sez. Ie ne diray pas *imboscade*, comme faisoit le
 soldat sous le regne du Roy Héry second, pour
 dire qu'il auoit esté à la guerre de Parme, ou au
 voyage de monsieur de Guise. Le mot *d'embus-*
che nous est tres-propre & naturel. Et à mon
 grand regret diray *cauallerie, infanterie, enseigne*
colonnelle, esquadrons, au lieu de *chenalerie, pietôs,*
enseigne coronale, bataillons : mais pourtant si en
 vseray ie, puis que l'vsage commun l'a gagné,
 contre lequel ie ne seray iamais d'aduis quel'o
 se heurte. Ce que ie vous dy est pour vous mô-
 strer qu'il faut mesnager les autres vulgaires
 dans le nostre, mais avec telle dexterité que l'o
 ne s'en apperçoine. Æquicole en son liure de
 l'amour dict que Petrarque acquit la vogue
 entre les siens pour ne s'estre seulement arresté
 au langage Toscan, ains auoir emprunté tou-
 tes paroles d'eslite en chaque sujet de diuerses
 contrees del'Italie, & les auoir sceu naïfuemét
 adapter à ce qu'il traittoit. Ie seray plus hardy
 que luy, & diray, que tout ainsi que ses amours
 hebergeoyent au pays de Prouence, & qu'il
 viuoit en la Cour du Pape quilors sejournoit
 en Auignon, aussi mandia-il plusieurs mots
 qu'il sçeut fort bien adapter à ses conceptions.
 Le semblable deuôs nous faire chacun de nous
 en nostre endroit pour l'ornement de nostre
 langue, & nous ayder mesmes du Grec & du

Latin, non pour les escorcher ineptement: cōme fait sur nostre ieune aage Helisaine, dont nostre gentil Rabelais s'est mocqué fort à propos en la personne de l'escolier Limosin, qu'il introduit parlant à Pantagruel en vn langage escorche-latin. Mais avec telle sobriété, que comme le bō estomach qui ne se charge point mal à propos de viandes ne les rend morceau pour morceau, ains les digere & transforme en vn sang pur, qui s'estend & distribue par toutes les veines, iettant le marc és lieux les plus vils: aussi nous digerions & transformions doucement en nostre langue ce que trouuerōs pouuoir faire du Grec & Latin, & ce qui sera insolent, que le reiettions liberalement, faisant ce perpetuel iugement en nous, qu'il y a plusieurs choses bien-seantes en chaque langue, qui seroient de mauuaise grace en la nostre. Mais sur tout me semble qu'il y a vn chemin que nous deuons tenir en ce faict cy. Je veux que celuy qui desire reluire par dessus les autres en sa langue, ne se fie tant en son bel esprit, qu'il ne recueille, & des modernes, & des anciens, soyent Poètes, ou qui ont escrit en Prose, toutes les belles fleurs qu'il pensera diure à l'illustration de sa langue. Nulle terre, quelque fertile qu'elle soit, n'apporte bon fruit, si elle n'est cultiuee. Je souhaite qu'il lise & vn Romant de la Rose, & vn Maistre Alain Chartier, & vn Claude de Seissel, & vn Maistre Iean le Maire de Belges, duquel Monsieur de Ronfard tira tous les plus beaux traits de l'Hymne triōphal qu'il fait sur la mort de la Royne de Na-

uarre: & le mesme Iean le Maire se feit riche de quelques belles rencontres des Pierre de saint Cloct, & Iean le Niuellet, qui escriuirēt en vers de douze syllabes la vie d'Alexandre, que nous auons de là nommez Alexandrins. Non pas pour nous rendre antiquitaires (d'autant que ie suis d'aduis qu'il faut fuir cela comme vn banc ou escueil en pleine mer) ains pour les transplanter entre nous, ny plus ny moins que le bon iardinier sauuageo, ou vieux arbre, ente des greffes nouueaux, qui rapportent des fruits souefs. Je veux encores que celuy mesmes que ie vous figure, ne contemne nul quel qu'il soit en sa profession. Pour parler du faict militaire, qu'il haleine les capitaines & guerriers: pour la chasse, les veneurs: pour les finances, les thresoriers; pour la pratique, les gens du Palais, voire iusques aux plus petits artisans en leurs arts & manufactures. Car comme ainsi soit que chaque profession nourrisse diuersement de bons esprits, aussi trouuent ils en leur sujet des termes hardis, dont la plume d'un homme bien escriuant sçaura faire son profit en temps & lieu, & peut estre mieux à propos que celuy dont il les aura appris. Vn iour deuisant avec des Veneurs du Roy, & les sondant de tous costez, sur toutes les particularitez de la Venerie, entre autres choses l'un d'eux me dist qu'ils cognoissoient la grandeur d'un cerf, par les voyes, sans l'auoir veu. Ha (dy-ie lors) voyla en nostre langue ce que le Latin vouldroit dire *Ab vnguis leonem*, & de faict il m'aduient d'en vser par expres au premier li-

ure de mes recherches, au lieu qu'un escolier reuenant frais esmolu des escoles eust dit reco-
gnoistre le Lyon par les ongles. Vne autre fois
deuisant avec un mien vigneron que ie voyois
prompt & dru à la besongne, ie luy dis en me
riant qu'il seroit fort bon à tirer la rame. A quoy
il me respondit promptement, que ce seroit
tres-mal fait: par ce que les galeres estoient
dediees pour les fait-neants & vauriens, & non
pour luy qui estoit franc au traiet. Recherchez
telle metaphore qu'il vous plaira, vous n'en
trouuerez nulle si hardie pour exprimer ce
qu'il vouloit dire: laquelle est tiree des bons
cheuaux qui sont au harnois. Dont ie ne me
feusse iamais aduisé, pour n'auoir esté chartier:
un pitault de village me l'apprit. Acheptant
un cheual d'un macquignón, & luy disant qu'il
me le faisoit trop hault: defendez vous du prix
(me fait-il) ie marquay dès lors ceste chasse,
qui valoit mieux ce me sembloit que le che-
ual que ie voulois achepter. Quand nous li-
sons quelques fois, reprendre nos anciens ar-
rhemens, pour dire que nous retournions à
nostre premier propos, de qu'il le tenons nous
que de la pratique? Quand sur un mesme su-
jet nous disons retourner sur nos brisées ou sur
nos routes, qu'est-ce autre chose que meta-
phores tirees de la Venerie? Il y en a dix mille
autres sortes dont pouuons nous rendre ri-
ches en nostre langue par la despoüille de tou-
tes autres professions, sans toutesfois les ap-
pauvrir. Qui est un larcin fort loüable, & dont
on n'eust iamais esté repris dedans la ville de

Sparte. Qui suiura ceste voye, il attaindra à mon iugement à la perfection de nostre lāgue, laquelle bien mise en vsage est pleine de mots capables de tous sujets. Et n'y a rien qui nous perde tant en cela; sinon que la plus part de nous, nourris dès nostre ieunesse au Grec & Latin, ayans quelque assurance de nostre suffisance, si nous ne trouuons mot apoinct, faisons d'vne parole bonne Latine, vne tres-mauuaise en François: Ne nous aduifans pas que ceste pauvreté ne prouient de la disette de nostre langage, ains de nous mesmes & de nostre paresse. En quoy il nous en prend presque tout ainsi comme à plusieurs de nos Medecins, lesquels ayans esté nourris en leurs ieunes ans en Hipocrat, Galien, Auicenne, & autres tels auteurs, vont rechercher les simples au Leuāt; contemnant ceux qui naissent à leurs pieds, selon la temperie de l'air qui se conforme à la température de nos corps. Vous me direz que ceste estude est inutile & non necessaire, veu que les langages vulgaires se changent de siecle en siecle. Vous dites vray, si ie ne desirois que la parole, mais ie souhaite qu'elle soit accompagnée de sujet qui prouienne de nostre fonds & estoc. Brief que ce soit vn corps solide, auquel les paroles ne seruent que d'accoustrement & de lustre. Mais de ceste particularité nous en discourrons vne autre fois ensemblement plus à loisir. A Dieu.

A Mademoiselle de Lis.

*Il promet
tous bons
offices à
vne Da-
moselle
d'honneur,
à laquelle
il escrit.*



L ne falloit me solliciter par vos lettres d'une chose dont ie me sollicite moy mesmes : vous sçavez quelle part vous avez en moy ; c'est pourquoy vous-vous pouuez asseurer que sans autre recommandation i'embrasseray non seulement ceste affaire, ainstoutte autre que ie sçauray vous estre agreable. Ie croy que Monsieur vostre mary vous a peu mander comme Monsieur le President a aduerty vostre rapporteur de s'éapprestet. C'est vn premier acheminement, qui prendra comme i'espere plus beau traict. Et à la mienne volonté qu'à meilleures enseignes, & en sujet moins fascheux, ie vous peusse faire paroistre le desir que i'ay de vous obeïr. Toutesfois par ce que ie m'assure que n'en faictes doubte, ie me contenteray de vous escrire que faciez cest estat en vous, que ie n'oubliroy rien pendant vostre absence de ce que ie penseray vous concerner : mais à la charge aussi que vous ne vous oublierez point de delà, & prendrez temps & mesure de vostre retour, non seulement pour ne permettre que sentions si long temps eclipse de vostre Soleil, mais aussi que ie suis seur que vostre presence redoublera les forces aux poursuites qu'il conuient faire. Et sur cest aduertissement ie clorray ma lettre, mais avec vne ouuerture de mes tres-affectionnees recommandations à vos bonnes graces. A Dieu.



L E
T R O I S I E S M E
L I V R E D E S L E T T R E S
D'ESTIENNE PASQUIER.

*A Messieurs Robert & Fournier, Docteurs
Regents ès Droits en l'Uniuersité
d'Orleans.*

L'EDICT des mariages a esté publié en nostre Cour de Parlement, grand certes & magnifique, mais plus grand si vous entendiez le motif. Par ce que quelques vns de ceux qui tiennent des premiers lieux de la France en ont esté cause. L'on dict que la plus part des mauuais exemples prouiet ordinairement des choses qui furent autrefois sainement & sainctement ordonnees, qui se tournent avec le temps en abus. Au contraire, iamais ne fut bonne loy, qui ne soit prouenuë de quelque scandale. Il faut que la maladie soit venuë, auant que l'on trouue le remede. Quant à cest Edict chacun s'en esioüit comme beau & digne d'un Roy. Moy seul, comme vn autre Timon & Misanthrope, le pleure, gemis, & lamente, non que ie ne sois bien aisé de l'au-

S'il seroit bon que le consentement des peres & meres fust requis de nécessité aux mariages de leurs enfans.

thorité quel'on donne aux peres dessus leurs enfans, mais par ce que ie suis marry que l'on ne leur en octroye d'auantage, & que tout ainsi qu'Alexandre le grand estant arriué en l'Asie, ne s'amusa de desnoier les entre-las du nœud Gordien, comme les autres Princes qui y auoyent passé deuant luy, ains pour en venir plustost à chef le coupa tout à fait : aussi quel'oeust franchy le pas, & que par vne ordonnance faicte du commun consentement de l'Eglise Gallicane, on eust déclaré tous mariages des enfans nuls, esquels il n'y auroit que les simples paroles de present, sans l'autorité & consentement des peres & meres. En cest endroit i'ay pitié de nostre France, qui ne fut iamais lassé de reduire toutes les choses Ecclesiastiques en vne bonne & louable discipline, & qu'en ce faictcy elle n'ait osé y mettre la derniere main. Nos ancestres cognoissans combien c'estoit chose de mauuais exemple, qu'un enfant au dessous de vingt-cinq ans fust estimé marié par les paroles de present au preiudice de l'autorité paternelle, introduisirent en l'action de Rapt

Ce que l'on appelle entre nous Rapt fait aux parés. (que nous appellons vulgairement *Raptum in parentes*) qui est incogneu à toutes autres nations. Par laquelle on permettoit aux peres & meres, voire aux tuteurs d'accuser deuant le Iuge Royal celuy ou celle qui par telle affecterie de paroles auroit attiré & suborné à vn mariage l'un de leurs enfans : & est ceste poursuite de telle puissance & effect que pendant le cours d'icelle, elle suspend & arreste toutes les procédures que l'on pourroit faire pardeuant

pardeuant vn Official & iuge d'Eglise pour la validité du mariage. Mais quel fruit auez vous iamais rapporté de ceste accusation? Non autre, sinon que comme vrays François nous sommes du commencement plus forts que les hommes, mais en fin plus foibles que femmes. Chacun sur la premiere pointe de ceste poursuite se remuë chaudement, les iuges mesmes semblent infiniment fauoriser ceux qui en font plainte. mais au partir de là vous ne veites iamais que l'on en ait fait vne punition exemplaire, & que pour fin de compte celuy-là qui a commis le rapt ne demeure victorieux, & de la iustice, & de la famille affligée; demeurant avec le temps en pleine possession de celle qu'il a rauie. De ma part i'estime, ou que du tout il ne falloit introduire entre nous ceste accusation, ou qu'il estoit de besoin de la terminer par la mort de celuy qui auoit forfait; à fin qu'en la dissolution de la vie, se trouuast aussi la fin & dissolution de son mariage. Maintenant par ce nouuel Edit, on permet d'abondât aux peres & meres d'exhereder leurs enfans, lesquels auront esté si mal aduisez que d'entrer en ce lien de mariage sans leur vouloir. Mais, ô bon Dieu, n'est ce vne chose cruelle, quand en executant vne vangeance, il faut qu'elle retombe sur celuy-mesme qui l'execute? I'ay donné l'estre à mon enfant, sous vne opinion de luy donner le bien estre, ie l'ay nourry ou aux lettres, ou aux armes, en intention d'en faire vn homme de bien: i'ay, si ainsi le faut dire, passé les erreurs d'un Hercule pour dompter en luy.

les monstres qui enuahissent ordinairement vne ieunesse forte en bride: en fin s'il est trouué vaincu d'une desbordée volupté, masquée d'un faux visage de mariage: est-ce pas rendre ma vieillesse tres-malheureuse, que non seulement ie voye ce sot, à demy miserable, pour estre follement lié, mais que pour toute consolation ie n'ay recours qu'à le rendre du tout miserable, par vne exheredation que la loy met entre mes mains? Il est forgeron de sa misere (me dira l'on) mais moy plustost de la mienne, & de la sienne ensemblement (repondray ie.) Quelque autre qui pensera estre plus aduisé adiousterà, qu'il vaut mieux y apporter ceste bride, que de laisser voguer & fluctuer les mariages à l'abandon d'une desordonnée ieunesse. Car, comme disoit Hipocrat, aux maladies aigües & extremes, il y faut apporter remedes de mesme. O combien il eust esté plus seant de ne tomber en ces extremitez, & par vne ordonnance conciliaire declarer ces mariages du tout nuls? Il me souuiét de ce que dit ce grand personnage Erasme en vn Colloque, où il fait parler vne fille qui auoit voué perpetuelle virginité. Quelques-vns (fait-il) nomment mariage, ores qu'il ait esté fait au desceu ou contre la volonté des peres & meres par paroles de present (car ainsi l'appellēt-ils) choses toutesfois que ni le sens commun, ni les loix anciennes de Rome, ni la doctrine Apostolique n'approuue. Il pouuoit adiouster que ni les Canons & saincts Decrets, mais il n'ozà: voila beaucoup de sujet en peu de paroles. Le

ne veux pas asseurer que ce qu'il dit soit veritable, mais ie souhaiterois qu'il le fust. Car en somme ie ne vous escrirs icy qu'un souhait. Premièrement si l'enfant pour estre procréé de la substance tant paternelle que maternelle, represente ceste Androgyne qui fut figuree par les anciens, par ce qu'en luy se peuuent li-
re les mœurs & esprit du pere & de la mere, si nous-nous marions seulement pour auoir lignee, & que ceste enuie prouienne d'une plus haute enuie, qui est de nous immortaliser en ce bas estre par un prouinement de l'un à l'autre, certainement il semble que ce soit peruer-
tir tout ordre de nature, que l'on permette à celui, auquel i'ay donné la vie, de pourchas-
ser ma perpétuation en autre sujet que celui que ie desire. Je ne vous diray point que du droit ancien des Romains le consentement du pere y estoit requis. Mais si nous auons em-
prunté de ce droit que l'enfant mineur d'ans ne puisse aliener son bien sans l'autorité de son tuteur, n'est-ce faillir, en sens commun de
luy permettre l'alienation de son corps sans le consentement de ses pere & mere? Si vous cō-
siderez ce qui est de la Loy de Dieu, reco-
gnoissez ces bons Patriarches du vieux Testa-
ment, leurs mariages sont bornez en la volon-
té bien reiglee d'un pere: & là où fut la male-
diction, comme en Esaii, là aussi ne fut inter-
poscel'autorité paternelle au mariage. Mais
pourquoy m'arrestera-ye seulement au vieux
Testament? Quand S. Paul parle des maria-
ges en baille-il la iurisdiction aux enfans? Il

s'adresse nommément aux peres. Si tu maries ta fille, tu fais bien, si tu ne la maries, tu fais mieux. Et si vous descendez plus bas vous trouuerez ceste reigle auoir esté tres-longuement obseruee entre les Chrestiens de siecle en siecle. Permettez moy de fauoriser à bônes enseignes mon souhait. Tertullian au liure qu'il escrit à sa femme, non seulement requiert ceste mesme autorité, mais qui plus est la confirme de tant que si les Payens qui ne voyoyent la lumiere de Dieu que dans les tenebres, voulurent le mariage estre nul s'il n'estoit autorisé du pere, combien doncques (dit-il) nous autres Chrestiens qui sommes imbus d'un meilleur enclin deuons nous auoir ceste proposition empreinte dedans nos poitrines? Et S. Ambroise confirme mon opinion par l'autorité d'Euripide, la part où faisant parler Hermione à Orestes. Mon pere (dit-elle) aura le soin & charge de mes nopces; cela ne me regarde en rien. Chose qui fust tant recommandee par ces bons vieux peres & docteurs de l'Eglise, qu'ils appellèrent plustost vne honte & paillardise, que mariages, telles folles conuictions qui se faisoient contre le gré des peres & meres. Et pour vous monstrier clairement que l'on n'en faisoit nulle doute, c'est qu'il n'y a celuy qui ne sçache que l'empereur Iustinian estoit Chrestien; du temps duquel il est certain que ceste mesme autorité estoit essentiellement requise en tous mariages des enfans, comme nous apprenons des loix auxquelles il donna vogue par l'entremise de Tribonian.

Ce qui sortit tel effect que nous trouuons dedans nostre France, non des personnes vulgaires, ains deux enfans de Roy, Carloman & Loys surnommé le Fai-neant, auoir esté tenus pour bastards, non pour autre cause, sinon qu'ils auoyent esté engendrez d'un mariage de Louys le Begue, fait & consommé sans le consentement du Roy Charles le Chauue son pere, comme vous pourrez apprendre de Reginson qui attouchoit presque ce temps là. Je ne trouue point qu'il y ait eu depuis Concile qui ait osté ceste belle iurisdiction aux peres à l'endroit de leurs enfans. Bien sçay-ie que depuis quelques centaines d'ans quelques Moines rapetasseurs de vieilles gloses, nous ont insinué ceste barbare & brute opinion, que de droict Canon le consentement des peres & meres n'estoit requis aux mariages de leurs enfans que par honneur, & non de necessité. Ceux-cy firent perpetuelle profession de celibat. Et à la mienne volonté que tout ainsi que ce sage Roy de Sparte Agesilaus estant par quelque sien amy surpris faisant l'enfant avec ses enfans, le pria de suspendre son iugement de ce qu'il auoit veu iusques à ce qu'il fut pere: aussi que tous ces Moines ne se fussent empeschez d'interposer leur opinion sur le fait des mariages, puis que leur vœu & reigle les dispoist d'estre peres. Cela a fait qu'ils ont mesuré l'affection paternelle, à la leur propre, ie veux dire à l'affection commune & triuale. Mais il conuient separer l'honneur de la necessité. C'est vrayement l'aduis des gens nourris en

l'obscurité d'un cloistre. Je ne vous ramente-
uray en ce lieu la noblesse de nostre France,
qui sur vne pointille d'honneur fait estat de
perdre la vie. Cela tient plus du Paganisme,
que du Chrestien. Je vous diray que tout ain-
si que le Stoïque soustenoit que ceux qui pre-
miers separerēt l'utilité d'avec l'honnesteté ga-
sterent l'ordre de tout cest vniuers: aussi firent
le semblable ceux là qui nous desloignirent
l'honneur d'avecques la necessité. Vray Dieu
quand ce grand Iustinian establit trois theore-
mes generaux de tout le droit, L'honnesteté,
ne mesfaire à autrui, rendre à chacun ce qui
est sien, mettoit il pour premiere pointe ceste
honnesteté pour la tourner seulement en ter-
mes de curialité, & que les deux autres precep-
tes fussent de necessité precise? Je ne veux cō-
batre ces moines que par nos docteurs de l'E-
glise: fueilletez les Offices de S. Ambroise,
vous cognoistrez combien l'honneur & la ne-
cessité fraternisent ensemblement. Mais il ne
faut point separer (me direz vous) ceux que
Dieu a liez ensemble par le ministere de son
Eglise. Si vne proximité de lignage, qui est
dans le quatriesme degré, si vne simple alliā-
ce & affinité, si vne cognation spirituelle peu-
uent empescher tous mariages, nonobstant
& les paroles de present, & l'interuention de
l'Eglise, qui nous empesche d'en faire autant
des mariages esquels le consentement, & au-
thorité paternelle & maternelle a esté negli-
gee? D'auantage appellerez-vous conion-
ction de l'Eglise vne alliance qui se fait contre

la volonté du pere, auquel Dieu veut estre apres luy porté sur toutes choses obeissance? Direz-vous conionction de Dieu celle qui sera bastie sur vn appetit charnel & desordonné, sur vne opinion brutale qui enyure ordinairement les effects de nostre raison? Je ne m'ose persuader quand vne ieunesse euentee n'a autre guide qu'une demesuree passion, que Dieu se mette de la partie. Or en petille qui voudra, il ne me peut entrer en la teste que le droit Canon ait rié en cecy innoué au droit des Romains. Vous trouuez dans les Decretales, que les paroles de present font le mariage, aussi faisoient elles par les loix de Rome. Mais pour cela n'estoit exclus du mariage des enfans le consentement paternel. Bien seray-ie d'accord que si ces parolles estoient reuestües de l'atouchement charnel, nous auons textes expres en nos Decretales, qui ne permettent de denoüer le mariage, ores que le pere n'y eust consenty. Mais en cecy encores ne contreuenons-nous rien au droit des Romains, comme nous apprenons de Paule le Iurisconsulte au troisieme liure de ses Sentences. Brief l'ignorance de nos glossateurs a introduit ceste opinion entre nous. Car toutes & quantes-fois qu'ils veulent soustenir le consentement des peres n'estre requis aux mariages de leurs enfans, ils se preualent tout aussi tost du Canon *Sufficiat*, qui n'en parle ni loing ni pres. Par ce qu'en ce lieu il s'agit tant seulement de sçauoir si pour la perfection du mariage le consentement seul y est suffisant, ou bien qu'auccques

iceluy la copulation charnelle y soit requise. A quoy il conclud que le seul consentement y est suffisant. Et le preuue premierement par l'autorité de la loy ciuile. Puis venant à ce qui estoit de la loy de Dieu, il autorise sa proposition par l'exemple de la vierge Marie qui auoit voüé perpetuelle virginité, & toutesfois l'on ne peut dire qu'elle n'eust esté la vraye femme & espouse de Ioseph. Et de faict apres que Gratian a deduit amplement ce poinct là, venant puis apres en vne autre question à traiter si le consentement des peres & meres estoit necessaire aux mariages de leurs enfans, il soustiét que toutes choses de generent contre tous mariages ausquels les enfans n'ont interposé la volonté de leurs peres & meres. Je ne veux pas icy combattre vne longue ancienneté, i'entreprendroistrop fort party : aussi ne vous ay-ie pas dit du commencement de ma lettre que le consentement des peres & meres y fust requis de necessité, ains seulement que ie le souhaiterois. Tout ainsi que l'on ne peut bannir les esperances de nous, aussi ne peut-on oster nos souhaits. Ce sont choses esquelles les plus petits & miserables se flattent & chatoüillent aussi bien comme les plus grands, & sur quoy ils trompent & endorment le deschet de leurs fortunes, se rendans en cecy esgaux avecques les Princes. Je desire que sans replastrer on ordonnast par vne bonne & stable loy que le mariage des enfans fust nul, auquel les peres & meres n'auroyent interposé leur autorité. Si bien ou mal ie desire, vous m'en man-

derez vostre aduis, & y adiousterez & soustrairez ainsi que le bon Arithmeticien: n'ayant en particulier espousé ceste opinion, ains souhaitant sans plus que l'on l'espouse. A Dieu.

*A Monsieur de Foussomme, Gentilhomme
Vermandois.*

E le veux, si vous voulez que ie le vueille, mais ie vous puis dire que nyl le droict ciuil des Romains, ny la raison commune ne veulent que la vefue faisant folie de son corps perde son douaire, tout ainsi comme si elle auoit forfaict contre son mary pendant & constant son mariage. Je scay bien que vous pouvez appeller quelques anciens docteurs à garans, qui furent induits à mesme opinion que la vostre. Pour autant qu'ils estimerent que s'il falloit de mesme balance compenser la peine avecques l'honneur, selon la proportion des merites ou demerites, il y auoit grande apparence de chastier à bon escient la vefue qui faisoit tort aux cendres de son mary, puis que pendant sa viduité elle iouïssoit des priuileges deluy. Opinion certes qui semble prendre ses racines sur l'honnesteté publique, qui n'est pas vn petit fondement en droict. Voire qu'il n'y a nulles personnes qui ayent tant d'interest à l'entretenement de ceste proposition, que celles mesmes au des-aduantage desquelles on la veut establir. Car la femme estant foible

*Si la vefue
faisant folie
de son
corps doit
deschoir de
ses consen-
sions ma-
trimonia-
les.*

& de corps & d'entendement au regard de l'homme (foible de corps, qui est l'occasion pour laquelle nous ne la receuons à l'exercice des armes : foible d'entendement, qui faict que l'on luy interdise l'administration de la republique) elle n'a qu'un seul moyen par lequel elle demeure forte, & dont elle triomphe des hommes : c'est la conseruation de sa pudicité. Bannissez d'elle ce seul poinct, vous la rendez esclau des plus petits, ores qu'elle fust Princeesse. Au contraire qu'elle le conserue, elle triomphe des Princes, iacoit que pauure & petite. Par ainsi de premiere rencontre ceste opinion aie ne sçay quoy de specieux, ce neantmoins captieux si vous venez à vostre second penser. Par ce que quand le legislateur permit au mary d'accuser sa femme d'adultere, il y apporta vne infinité de respects qui ne tombent ny en l'heritier, ny en la vesue. Il estima que la femme forfaissant enuers son mary, estoit beaucoup moins excusable que la vesue, pour auoir vn moyen honneste de tromper les pointes de sa chair, par l'object qui luy estoit donné par la loy. Il estima encores qu'elle ne pouuoit apporter vn enfant faux & dérobé à son mary. Dauantage que le mary ne seroit aisément induit à intenter ceste poursuite, s'il n'estoit outré d'une tres-iuste douleur, comme ainsi fut que sa femme estant sa moitié, le des-honneur d'elle redondoit sur luy. Et finalement on meit es mains de la femme vne defense tres-poignante encontre son mary : estant par expres enioint aux Iuges d'examiner soigneusement si le mary

auoit seruy de miroüer de bien ou mal-faire à sa femme. Estimant chose de pernicieux exemple de requerir en elle vne chasteté estroite dõt il auroit esté le premier infracteur. Toutes ces particularitez se rencontrent elles en vne vefue? Nenny vrayement. Car laissant à part que après le decez du mary la femme commence d'estre iouiſſante de ses droits, encores trouuez vous qu'elle n'a ny ſuſſect par lequel elle puisse apporter refrigerer à ses passions naturelles, ny que s'oubliant de son honneur elle trāſporte en la famille de son feu mary vn enfant putatif, ny qu'elle se puisse pour ses defences preualoir contre l'impudicité de l'heritier. Partant si elle estoit assaillie, on luy oſteroit les armes naturelles pour parer aux coups. Et à peu dire le mary ne venant (comme i'ay dict) que timidement à ceste accusation, & apres auoir quelque-fois sondé tous les moyens pour reconcilier sa femme avec son honneur, si vous y admettiez l'heritier qui n'a en pensement que le bien, en ouurant la porte à ceste accusation, vous pourriez tout d'une main à la calomnie, & n'y auroit vefue, si femme de bien fust elle, qui peust faire bouclier de sa conscience contre les calomnieuses poursuites. Brief il y auroit grandement à craindre que la loy ne feist plus de mal que les femmes. Ce furent (ce me semble) les causes pour lesquelles ce grand Iuriconsulte Papiniā traittant de la matiere des adulteres disoit, que si quelque-fois par mesgarde, on auoit compris sous le nom d'adultere la honte de la fille ou de la femme vefue, c'estoit

tres-abusiuellement parler. Et en vn autre passage il est dict que l'heritier n'a nulle reprimende ou esgard sur les mœurs de la vefue du defunct. Chose que l'on tient pour tres-veritable, n'estoit que le mary eust de son viuant fait appeler la femme en iustice. Car lors l'heritier peut reprendre les arrhemens de ceste poursuite, & non autrement. Et de faict vous ne trouuerez en tout le droict des Romains aucune peine ordonnee à la vefue, sinon à celle qui se remarioit dedans l'an de son dueil, ou qui ne se remariant auoit enfant apres l'onzième mois du mesme an. En l'vn & l'autre desquels cas l'heritier gaignoit en pure perte sur elle son augment de dot, & les dons & aduantages qu'elle auoit receus de son mary. Cen'est donc point que par oubliance la faute des vefues soit passée deuant les yeux des anciés. Ils s'en sont fort bien souuenus, mais ils ne penserent rien appartenir à la memoire du deffunct, horsmis ce qui estoit commis par la vefue dedans le premier an de son vefuage, qu'ils estimerent estre affecté à l'honneur de son premier liét. Mais elle iouit des priuileges de feu son mary, dites vous. Il ne faut pas pour cela induire qu'elle doie deschoir de toutes les conuentions matrimoniales. Tout ainsi comme la vefue conuolant en secondes nopces perd les priuileges dont elle iouissoit, faictes que l'autre forfaissant les perde aussi. Afin qu'elle ne soit de plus grand merite & recommandation en son impudicité, que la femme honneste (qui se remarie) en sa chasteté. C'est en effect toute

la peine à quoy peut aboutir ceste faute. Ny pour cela ie ne veux pas que vous m'estimiez Aduocat del'incontinence des vefues. I'entends sans plus bannir la calomnie des hommes, & non la chaste honnesteté des femmes : faisant ce perpetuel iugement en moy, que la femme perd beaucoup plus que son doüaire, quand elle faict perte de son honneur, sans lequel elle ne doit souhaïter de viure. A Dieu.

*A Monsieur de Querquifinen Scigneur
d'Ardinilliers.*



'Est grand cas que iamais nos an- *Sommaire*
ciens n'ayent eu cognoissance de *discours*
toute ceste Amerique, que nous *des terres*
appelons Terres neufues. Non *que l'on*
qu'elles soyent moins vieilles que *appelle*
neufues.

les nostres, ains par ce qu'elles ont esté seulement depuis cent ans en çà descouvertes par quelques mariniers Portugois. Et neantmoins vrayement neufues, si vous parangonnez les mœurs brusques de leurs peuples, avecques la ciuilité des nostres. Quelque Gentilhomme que ie rencontray n'agueres à saint Germain en Laye, qui auoit esté au Brezil, me racontoit qu'en ce pays là les hommes vont tout nuds, sans cacher leurs parties honteuses, & que ceux qui veulent faire les plus braves, y portent quelques petites fueilles d'arbres. Et que quand ils veulent coucher de la grandeur, ils frottent leurs corps de gomme,

qu'ils couurent en apres de duvet de Perroquets, & autres telles especes d'oyseaux. Quât à leur administration politique, ils n'ont nuls magistrats, nulle ville, nulle forme de republique, fors qu'ils sont diuisez en familles selon leurs consanguinitez & parentelles, sur lesquelles le plus ancien a toute iurisdiction & esgard. Chaque famille contient enuiron quatre cens tant d'hommes que femmes. Leurs maisons sont sans huis, exposees à tous venans & allans. Les biens toutes fois non communs, non plus que les femmes. Celles qui sont surprises par leurs maris, sont par eux tuees, puis mangees. Ils s'entre-font la guerre de pais à pais, ceux qui sont pris, sont soudain destinez à la mort. Et n'ayans autre prison que de leur foy, on les engresse quelque temps, puis le tēps de les massacrer venu, l'on faict vn banquet de parade, où l'on conuie les principaux parens & amis, là on enyure le patient, que l'on faict disner, & puis dancer apres le repas avec les autres, & au milieu de la dance on l'assomme. Son corps mis en pieces on en fait des presents, cōme les veneurs de leur venaison. Sa teste est pendue deuant la maison de son maistre, pour faire monstre de sa victoire. Des dents on en faict des chaisnes qu'ils portent autour de leur col. Et n'ont ces Sauvages plus grand vengeance, que de manger leurs ennemis, ny plus grand tesmoignage d'inimitié contre vn homme, que quand ils le menacent de le manger. Supputans au demeurant leurs ans par les Lunes, ainsi que nous au cours du Soleil. Voyla en somme

ce que i'ay appris de ce Gentil-homme: si vray ou non, ie m'en rapporte à ce qui en est. L'on dict que celuy peut impunément mentir, qui vient de loing. Quant à moy ie vous debite ceste marchandise pour le prix qu'elle m'a cousté : ayment mieux le croire, que de l'aller veoir : ayant aussi mieux aymé charger le present messager de ce compte, que de le laisser en aller par deuers vous les mains vuides. A Dieu.

A Monsieur Ramus Professeur du Roy, en la Philosophie & Mathematiques.



R fus, ie vous veux denoncér vne forte guerre, & ne m'y veux pas presenter que bien empoint. Car ie sçay combien il y a de braues capitaines qui sont de vostre party. Le premier qui de nostre temps prit ceste querelle en main contre la commune fut Louys Meigret, & apres luy Iacques Pelletier grand Poète, Arithmeticien, & bon Medecin; que ie puis presque dire auoir esté le premier qui mit nos Poètes François hors de page. A la suite desquels vint Iean Antoine de Baïf, amy commun de nous deux, lequel apporta encores des regles & propositions plus estroites. Et finalement vous pour clorre le pas, auez fraichement mis en lumiere vne Grammaire Françoisse, en laquelle auez encores adiousté vne infinité de choses du vostre, plus estranges que les trois autres. Je dy nommément plus estranges : car plus vous

*Sçavoir si
l'orthographe Fran-
çoise se
doit accor-
der avec le
parler.*

fouruoyez de nostre ancienne orthographe, & moins ie vous puis lire. Autant m'en est-il aduenu voulant donner quelques heures à la lecture de vos partisans. Je sçay que vostre proposition est tres-precieuse de prime rencontre. Car si l'escriture est la vraye image du parler, à quoy nous pouuons nous plus estudier que de représenter par icelle en son naissance pourquoy elle est inuentee? Belles paroles vrayement. Mais ie vous dy que quelque diligence que vous y apportiez, il vous est impossible à tous de paruenir au dessus de vostre intention. Je le cognois par vos escrits: car combien que decochiez toutes vos fleches à vn mesme blanc, toutesfois nul de vous n'y a sçeu atteindre: ayant chacun son orthographe particuliere, au lieu de celle qui est commune à la France. Commé de faict nous le voyons par l'Apologie que Pelletier a escrit encontre Meigret, où il le repréd de plusieurs traits de son orthographe. Et vous mesmes ne vous rapportez presque en rien par la vostre à celle, ny de Meigret, ny de Pelletier, ny de Baif. Qui me faict dire que pensant y apporter quelque ordre, vous y apportez le desordre. Par ce que chacun se donnant la mesme liberté que vous, se forgera vne orthographe particuliere. Ceux qui mettent la main à la plume, prennent leur origine de diuers pais de la France, & est mal-aisé qu'en nostre prononciatiō il ne demeure tousiours en nous ie ne sçay quoy du ramage de nostre pais. Je le voy par effect en vous, auquel, quelque
longue

longue demeure qu'ayez faite dans la ville de Paris, ie recognois de iour à autre plusieurs traits de vostre Picard; tout ainsi que Pollion recognoissoit en Tite Liue ie ne sçay quoy de son Padouan. I'adiouste que soudain que chacun en son particulier se faict accroire estre quelque chose entre nous, aussi nous veut il seruir de mots non meilleurs, ains qu'il nous debite par vne faulse persuasion pour tels. Le courtisan aux mots douillets, nous couchera de ces paroles, *Reyne, allét, tenét, venét, menét*: comme nous veismes vn des Essars, qui pour s'estre acquis quelque reputation par les huit premiers liures du Romant d'Amadis de Gaule, en ses dernieres traductions de Iosephe & de Dó Flores de Gaule, nous seruit de ces mots, *Amonnester, Contenner, Sutil, Calonnier, amini-*
stration, Ni vous ni moy (ie m'asseure) ne prononcerons, & moins encorés escrirons ces mots de *Reyne, allét, tenét, venét, & menét*, ains demeurerons en nos anciens qui sont forts, *Royne, alloit, venoit, tenoit, menoit*. Et quant à mon particulier dès à present ie proteste d'estre resolu & ferme en mon ancienne prononciation, d'*Admonnester, Contemner, Subtil, Calomnier, Administrer*. En quoy mon orthographe sera autre que celle des Essars, puis que ma prononciation ne se conforme à la siéne. Pelletier en son dernier liure de l'Orthographe & prononciation Françoisé commande d'oster la lettre G des paroles esquelles elle ne se prononce, comme en ces mots (dit-il) *Signifier, Regner, Digne*, quant à moy ie ne

les prononçay iamais qu'avecques le G. En cas semblable Meigret en sa Grammaire Françoisse escrit, *Pouure & Saurions*; d'autât que vraysemblablement sa prononciation estoit telle. Et ie croy que celuy qui a la langue Françoisse naïfue en main, prononcera, & par consequent escrira, *Pauure & Sçaurions*. A tant puis que nos prononciations sont diuerses, chacun de nous sera partial en son escriture. La volubilité de la langue est telle, qu'elle s'estudie d'addoucir, ou pour mieux dire racourcir ce que la plume se donne loy de coucher tout au long par escrit. Et de fait n'estimez pas que les Romains en ayent vsé autrement que nous. Car quand ie ly dans Suetone qu'Auguste fust du nombre de ceux qui pensoient qu'il falloit escrire comme on prononçoit, ie recueille quel'escriture ne symbolizoit en tout au parler; ains qu'Auguste par vne opinion particuliere, telle que la vostre, estoit d'un aduis contraire à la commune, toutesfois si ne le peut-il gagner. D'autant que du temps mesmes de Neron, Quintilian nous enseigne que l'on escriuoit autrement qu'on ne prononçoit. C'est vne regle generale non seulement en nostre langue, ains en tous vulgaires, que se trouuant vne parole close d'une consonante, la consonante perd sa puissance, si le mot qui la suit commence par vne autre, & n'en entendez la force sinon quand elle est suiuite d'une voyelle. par exemple, que ie die, *ne pensez pas que ie vous ayme*: le Z de *pensez*, & l'S du *pas* se mangent & elident par les subsequentes con-

*Que les
Romains
n'orthogra-
phiserent
meils pro-
nonçoient.*

sones, & n'y a quel'S du *vous*, qui soit ouye & exprimee pour tomber en vne voyelle immediate. Le semblable fut-il aux Romains, comme l'on peut recueillir de ces vers d'Ennius.

Egregie cordatus homo catus Aeliu' Sextus.

Où vous voyez à tous les mots qui sont suivis de voyelle, l'S estre prononcee, & non à celui d'*Aelius*, par ce qu'il estoit recueilly d'un *Sextus*. Ennius escriuoit vray-semblablement comme il prononçoit; d'autant que la langue Latine n'estoit encore en sa fleur. Mais la posterité ne trouua pas bonne ceste maniere d'orthographe, ores que la prononciation fut plus courte. Ostez de nostre esriture les lettres que nous ne prononçons pas, vous introduirez vn chaos en l'ordre de nostre Grammaire, & ferez perdre la cognoissance de l'origine de la plus grande partie de nos mots. Confondant singulier & plurier ensemble: par ce qu'en ces mots *Il fait & ils font*, le mot d'*Il* se prononce tout d'une mesme teneur, & represente neantmoins diuers nombres. Car quant à ce que vous vantez faire beaucoup par vostre opinion pour l'estranger, qui voudra apprendre nostre langue; pour autant qu'il apprendra en la lisant, de la prononcer, si vous le pensez, vous-vous mesprenez grandement. Estimez-vous que pour estre le Latin escrit tout de son long, nous le prononçons à son naif? De ma part ie croy que si Ciceron, Cesar, Salluste & tous ces grands auteurs de la langue Latine reuenoyent en leur premier estre, & qu'ils nous ouyssent parler leur langage,

ils ne nous entendroyent pas, ains trouue-
royent nos prononciations agencees, les vnes
à la Françoisë, autres à l'Espagnole, autres à
l'Alemannde, selon la diuersité des nations.
Chose que vous mesmes recognoissez en pas-
sant dans vostre Grammaire Françoisë, & dont
nous feismes ample preuue dans la ville d'Es-
tampe en l'an mil cinq cens soixante sept,
Monsieur Loyfel & moy allans aux grands
iours de Poitiers, où ayans rencontré vn es-
colier Allemant, qui nous voulut entretenir
en Latin, nous n'en entédions pas la moitié, ni
luy de nous. Ce que ie cogneus à l'œil proue-
nir de ce qu'en parlant Latin il ne se pouuoit
dispenser de la prononciation de son pais à
nous incogneuë, ni nous de la nostre. Aussi
faut-il que vous me confessiez qu'il y a quel-
que naïfueté en la pronōciation de toutes lan-
gues, que l'on ne sçauroit représenter dessus le
papier. Ie le vous verifïeray en peu de paroles
sur le sujet mesmes du Latin. Priscian en son
premier liure remarque que Plin disoit que la
lettre de *L* receuoit trois diuers sons selō qu'elle
se rencontroit diuersement avec vnes & au-
tres lettres : y a il aucun de nous qui puisse
maintenant sentir ceste diuersité de sons ? Ie
croy que Priscian mesmes ne le sentoit pas, &
que l'interualle des ans en auoit fait perdre l'v-
sage en son temps, veu qu'au faict de la pro-
nonciation de sa langue il alleguoit l'authori-
té de Plin. Le semblable est-il en nostre lan-
gue Françoisë, en laquelle il ya vne infinité de
choses qui tombent en nostre parler, que nous

ne ſçauroions figurer par eſcrit. Qu'ainſi ne ſoit il n'y a lettre qui ſoit tant ſolemnifée, ni que nous mettions tant en œuvre comme l'*E*. Or tout ainſi qu'il nous eſt familier, auſſi en auons nous fait deux eſpeces; l'un que nous appel-
lons masculin, l'autre feminin. Quant au mas-
culin, nous l'auons accommodé en trois ſortes,
que ie ne vous puis exprimer que par exem-
ples, & encores à ceux qui ſont nourris en no-
ſtre vulgaire. En la derniere ſyllabe de *René*
vous y voyez vn ſon, vſez maintenant de ce
mot de *cet* pour dire *Cet homme a fait cela*: vous
y cognoiſſez vn autre air: paſſez à ce mot de
c'eſt, comme quant nous diſons *c'eſt vn tres-grād*
homme de bien, il y a vn ſon beaucoup plus eſle-
ué qu'aux deux autres. Donnez tant de façons
nouuelles qu'il vous plaira par voſtre ortho-
graphe à ces trois *E* masculins, encores vous
trouuerez vous court de voſtre opinion: &
beaucoup plus en l'*E* feminin qui n'a qu'un
demy ſon entre nous, incogneu preſque à tou-
tes autres nations, & neâtmoins à nous ſi com-
mun que ſoit en rime plate ou croiſée, il faut
pour la grace que de quatre vers les deux ſe
terminent en l'*E* feminin. Nous eſcriuons la
derniere perſonne du pluriel, aux verbes de la
premiere coniugaifon par *ent* comme ils, *ai-*
ment, *donnent*, *logent*, & autres. I'aduoue que
nous ne prononçons point l'*N*. Ce que Pelle-
tier auſſi & Meigret cognoiſſans l'oſterent; ſe
contentans de marquer ceſte troiſieſme per-
ſonne par vn *E* feminin conioint avec vn *T*, &
diſent *Aimet*, *Donnet*, *Loget*, & *Bouget*. Preſup-

posez que leurs liures tombent entre mains des estrangers qui ne soyent nourris en nostre langue, s'aduiseront-ils de prononeer c'est *E*? non vrayement, ains par *l'E* plain & masculin commun à toutes natiōs: & à tant il y aura plus d'absurdité prononçans ces mots de ceste façon, que s'ils les prononçoient à la Poiteuine avecques *l'N*. Mesnagez comme il vous plaira les lettres de *L* & *N*, que nous appellons mignardes, ie meure s'il est en vostre puissance de vous rédre plus entendible par vostre nouvelle orthographe, que nous par la nostre ancienne, à ceux qui n'ont cognoissance de ces mignardises de lettres. Ie viens à ces aduerbes qui tombent plus que souuent en nos bouches, *Diligemment*, *Bonement*, *Ententiement*, *Doucement*, *Mollement*, *Mignardement*, & vne infinité d'autres, il ne vous sera possible de designer par figure leur derniere syllabe, ainsi qu'elle est prononcee. Que nous ne prononçons *l'E* pur, i'en suis d'accord: il n'y a que le Picard qui le prononce, & par ceste prononciation on cognoist du premier coup qu'on est extrait de Picardie. Que nous le prononçons en *A*, comme Pelletier l'a voulu escrire (car il escrit *Doucement*, *Diligement*) ie le nie. Le seul mot de *Nuitamment* le vous fera paroistre, auquel vous cognoistrez combien *l'A* de *Tam* est prononcé d'autre façon que le *Ment*. C'est donc vne prononciation qui naist avec nous entre *l'A* & *l'E*, quel'on ne sçauoit en aucune façon que ce soit exprimer dessus le papier. A fin que ie ne passe sous silence que

pendant que vostre vœu est de nous garentir d'une extremité que vous estimez viciueuse, vous tombez en vn plus grand vice. Nous auons vne diphthongue Oy qui est nee avec nous, ou qui par vne possession immémoriale s'y est tournée en nature. Diphthōgue des pieça recogneuë estre nostre par les estrangers. Car ce docte personnage Erasme l'a sçeu fort bien remarquer en son liure de la Prononciation. Puis qu'elle nous est naturelle, & que l'estranger ne s'en est pas voulu rédre incapable, quelle faute a elle commise depuis pour laquelle il la falle exterminer de la France ? Au lieu d'icelle vous avez introduit vn OE, & au lieu de ce que nous disons *Moy, toy, Soy, Roy, Loy, Foy*, vous dites *Moë, Toë, Soë, Roë, Loë, & Foë*. Ce n'est pas faire conformer l'orthographe à la prononciation, ains vouloir introduire vne nouuelle prononciation sous ombre de vostre nouuel orthographe. Je voy bien qui vous induit à ceste opinion. Vous estimez que l'I simple, ou l'Y Grec ne peuuent produire autre son conioincts avecque l'O, que celui qu'il leur est naturel estant separez. Qui le vous a dit ? Le mesme v aux Grecs ne produisit-il point en Grece autre son que le lien, quand lié & vny avec l'O micron on en fit vne diphthongue ou ? Prononcez cest v ou ainsi que Lambin & les modernes font à present, du son de nostre V François, ou comme les anciés faisoient en I Latin, vous ne trouuerez point qu'il face cest ou. Le Grec toutesfois ne le trouuera mauuais, & nous serons si enuieux

Les diphthongues oy & ay Françoises.

rencontre nostre ancienneté, que nous n'admettions le fruit que nous rapporte l'*Y* Grec conioint avec nostre *O* ? Je voy le semblable estre aduenü en la diphthongue de *ou*, au lieu delaquelle Monsieur de Baif a voulu inuenter vne lettre nouuelle sous ceste forme de diphthongue Grecque *u*. On pourroit d'une mesme liberté oster du grec ces deux caracteres *ou*, si nous osons la diphthongue *Oy* qui est nostre. Et à fin que ie vous monstre à l'œil que ce ne fust pas sans raison que noz ancestres en la diphthongue *d'Oy* employèrent l'*y* Grec, ie vous puis dire que c'est vn caractere qui a vn son particulier entre nous, non commun avec toutes autres nations, quand il est immédiatement suiuy d'une autre voyelle, & qui pour ceste cause merite à bonne raison d'auoir sa place en nostre Alphabet François, autant qu'autre lettre qui soit. Car de ces mots *Moy, Toy, Soy*, noz anciens firent vns *Moyen, Toyen, Soyen, Moye, Toye, & Soye*. Comme nous voyons dans le Romant de la Rose, & autres vieux liures que nous auons depuis eschangez en *Mien, Tien, Sien, Mienne, Tienne, Sienne*. Ne nous estant resté de ceste antiquité que le mot de *Moitoyen*, que nous approprions aux mœurs, comme si nous voulions dire qu'il fust *Mien & Tien*. Mais combien que nous ayons perdu l'usage de telles dictions, si est-ce que les mots de *Roy, Foy, Quoy*, & tels autres produisent *Royal, Loyal, Quoye*. Comme aussi voyons nous seblables deriuaisons aux verbes, comme d'*Oüir*, nous

disons, *foy*, puis *l'oye*, de *Voir*, ie *Voy*, *Voye*, cōme quand on dict, Dieu vueille que *l'oye*, que ie *Voye*. Sçauriez vous représenter le vray son & energie de nostre prononciation en pas vn de ces mots, quand vous les escriuez en ceste façon *Loeal*, *Roeal*, *Quée*, *f'oeé*, ie *Voée*? C'est (pardonnez le moy si ie le dy) ou n'auoir point d'oreilles pour iuger; ou penser que nous n'en ayons point. Le mesme se rencontre en l'autre diphthongue, *Ay*, que vous eschangez en vn *Épur*: ne considérant pas que d'un *f'ay*, vienne vn *l'aye*, d'un *Bay*, vne couleur *Baye*, laquelle s'il vous aduient de rendre à vostre façon, vous en ferez vne *Bée*, qui est vne prononciation si ridicule, & que j'appellerois plus volontiers vne baye & mocquerie, comme approchant plus d'un mot de *Bée* du Berger de Maistre Pierre Pathelin, que la couleur *Baye* que vous voudriez signifier. Vous voyez dōcques que ces deux diphthongues *Oy* & *Ay*, n'ont pas esté introduites par nos anciens fortuitement ny sans raison, comme produisant certaines dictions quel'on ne pourroit autrement prononcer que sous le son que nous auōs donné à la lettre *Y* coniointe avec *l'O* ou *A*. Et mesmement qu'elle a ceste particularité naïfue entre nous autres François, qu'estant mise au milieu de deux voyelles en vn mot, elle produit vne pronōciatiō (cōme i'ay dit) nō cōmune à toute autre nation, & que vous ne sçauriez designer par la plume pour en rendre l'estranger capable. Cela se voit en ces mots, *Citoyen*, *Moyen*, *loye*, *joyeux*, *Foye*, *Voye*, *Playe*, *Raye*,

Gaye, Saye. Je le vous représenteray par exemple assez familier en ce mot *Royer*, si vous l'escriuez par vn *I* en forme de voyelle, vous en ferez trois syllabes *Rôier*, si en forme de consonante, vous en ferez vn *Roger*, comme s'il estoit escrit par *G*, si en vostre maniere, vn *Roeer*: & soit lequel des trois qu'il vous plaira, ce n'est point ce que nous prononçons en y mettant la lettre d'*T* Grec, qui nous faict vn son meslé, participant partie de la lettre *O*, partie de la lettre *E*, & netient ny de l'une ny de l'autre, faisans de ce mot *Royer*, deux syllabes tant seulement. Je veux doncques dire & conclure qu'en vain voulez vous debuter nostre orthographe de sa vicille possession, si par vostre inouuation vous ne profitez, ny aux vostres ny aux estrangers: aux vostres, qui se trouuent beaucoup plus empeschez à déchiffrer vostre nouvelle orthographe, que l'ancienne: à l'estranger, pour ne luy pouuoir figurer ce que porte nostre commune prononciation. Et si vous adiousteray (outre ce que ie vous ay discouru des deux diphthongues, *Oy* & *Ay*) que vous corrigez plusieurs autres particularitez en nostre escriture sans raison. Considerons ces deux lettres (que les vns appellent mignardes, les autres molles) *L* & *N*, dont la premiere nous est commune avec l'Espagnol & Italien; la seconde avec l'Espagnol seulement. Celle la nous est representee par l'Espagnol par deux *L L*, & par l'Italien par *G L*, comme vous voyez en ces mots *Gli figliuoli*. Je vous supplie dites moy, y eut-il iamais plus d'incer-

titude que celle que vous y apportez ? Par ce qu'ostant nostre vieille orthographe, auez chacun de vous innoué diuers caracteres, esquels ie me trouue beaucoup plus empesché de trouuer le son mol de ceste lettre, que ie ne faisois auparauant. Or voyez auec quel soing & diligēce nos ancēstres nous voulurent figurer celon : car ils ne se contenterent pas d'accoupler les deux *LL* ensemble, mais deuant icelles adiouterent vn *I* en ceste façō *ILL*, pour monstrier que ceste *L* contient obliquement en soy vn *I* qu'il faut, si ainsi voulez que le die, prononcer sans le prononcer. Par exemple, mettez ces trois mots en auant, *Baller*, qui signifie dācer, *Ballier*, qui veut dire nettoier, & *Bailler*, qui est donner. Au premier, vous prononcez *L* fermement, au second vous pronōcez le son de *l'I* entierement auec *L*, au troisiēme vous entreueſchez *l'I* dedans *L*. Et c'est pourquoy ils retirerent cest *I* deuant les deux *LL*, pour monstrier qu'il ne le falloit pas prononcer auec vn si plein son qu'en *Ballier*, mais aussi qu'il ne le falloit pas oublier, comme en ce mot de *Baller*, où il n'estoit point inferé. Le semblable firent-ils en *l'N* mignarde, que les Espagnols figurent par vne seule figure, nous par *Ign*, *Seigneur*, *Poignarder*, *gaigner*. Si vous dites *Senieur*, vous prononcez *l'I* pleinement auec *l'N*, si *Seigneur*, vous ne le dites qu'à demy. Or de cest entre-las *d'I* & *N* auec le *G*, vous en auez faict *l'N* mignarde. Il n'est pas qu'il n'y ait quelque raison en vne orthographe que nous auons veuē autre-fois en ce mot

*Pourquoy
nos anciens
escriuoient
Vn avec
le G.*

d'Un que l'on escriuoit avec vn G au bout, lettre qui sembloit du tout superflue, de quelque costé que l'on voulust tourner sa pensee. Mais cela aduint pourautant qu'au parauant l'impression, aux liures que l'on escriuoit à la main, on cottoit les nombres par leurs figures I. II. III. IIII. V. VI. VII. & ainsi des autres suiuan: & quand on commença de les coter par leurs noms on adiousta à l'Un le G pour oster l'equiuoque qui eust peu aduenir entre ce mot & le nombre de sept, représenté par la figure de VII. Mais ce dernier poinct soit par moy touché en passant. A quel propos donc tout cela? Non certes pour autre raison, sinon pour vous monstrier qu'il ne faut pas estimer que nos ancestres ayent temerairement orthographié de la façon qu'ils ont faict, ny par consequent qu'il falle aisément rien remuer de l'ancienneté, laquelle nous deuons estimer l'un des plus beaux simulachres qui se puisse presenter deuant nous, & qu'auant que de rien attenter au preiudice d'icelle, il nous faut presenter la corde au col, comme en la republique des Locriens: & à peu dire que tout ainsi qu'anciennement en la ville de Marseille ils executoyent leur haute iustice avec vn vieux glaiue enrouillé, aymans mieux vser de celuy-là, que d'en rechercher vn autre qui fust fraichement esmoulu, aussi que nous deuons demeurer en nostre vieille plume: ie ne dy pas que s'il se trouue quelques choses aigres, l'on n'y puisse apporter quelque douceur & attrépance, mais de bouleuerſer en tout & par tout

*Qu'il ne se
faut esloi-
gner aisé-
ment de
l'ancien-
neté.*

sens dessus dessous nostre orthographe, c'est à mon iugement gaster tout. Les longues & anciennes coustumes se doiuent petit à petit desnouer, & suis de l'opinion de ceux qui estiment qu'il vaut mieux conseruer vne loy en laquelle on est de l'ogue main habitué & nourry, ores qu'il y ait quelque defaut, que sous vn pretexte de vouloir pourchasser vn plus grand bien, en introduire vne nouuelle, pour les inconueniens qui en aduiennent auparauant qu'elle ait pris son ply entre les hommes. Chose que ie vous prie prendre de bonne part, comme de celuy, lequel, combien qu'il ne condescende à vostre opinion, si vous respecte-il & honore pour le bon vouloir qu'il voit que vous portez aux bonnes lettres. A Dieu.

A Monsieur Ramus, Professeur du Roy en la Philosophie & Mathematiques.



Attendois vne forte responce de vous sur le discours de nostre orthographe, mais puis quen'y auez voulu bailler attainte, il aduiendra par aduanture que mes lettres tombans es mains de quelque autre, luy appresteron t sujet de parler. Au regard de ce que me mandez que ne pouuez bonnement gouter ceste loquution Françoise *en dessus dessous*: dont vous escriuant i'ay vsé, vous n'estes pas le premier qui en a faict quelque scrupule: car ie voy plusieurs de ceux qui sont en

Dela propriété de ceste dictio de Sens entre nous, d'où est venue ceste maniere de parler, Sens dessus dessous

reputation de bien dire, auoir doubté d'en verser dans leurs traductions : & au lieu d'icelle auoir mis tantost *Ce dessus dessous*, tantost *Ce que dessus dessous*. Toutesfois i'espere vous leuer fort aisément ce doute, s'il vous plaist de considerer combien ce mot de *Sens* nous est heureusement familier, quand nous disons que quelque chose est de tel ou tel sens. De ceste parole est venu que nous auons aussi dict; qu'une chose est sens dessus dessous, & encores *Sens deuant derriere*, pour donner à entendre que ce qui deuoit estre dessus est dessous, & deuant ce qui est derriere. Je croy que par ceste petite demonstration auez occasion d'estre satisfait. Quant est de moy, ie vous assure que non seulement ie ne la reiette, mais au contraire, i'estime que c'est vne maniere de parler fort riche, & qui n'a esté reiettee, que par ceux qui n'approfondirent iamais les richesses de nostre langue. A Dieu.

A Monsieur de Fonsomme.

Que nulle nation ne peut dire si elle prononce au vray la langue Latine, comme faisoient les Romains.



Vous voulez que ie retourne à ma premiere Grammaire, ie le feray puis qu'il vous plaist. I'ay dit voirement que combié que nous ayons la langue Latine écrite selon sa naïfue orthographe, si croy-ie que nulle nation ne prononce le Latin en son naïf. Ce que ne deuez trouuer estrange. Car si le Romain prononçoit autrement qu'il n'escriuoit, comme i'ay discouru

par la lettre de Monsieur Ramus, comment est-ce que de son orthographe vous pouvez recueillir la vraye prononciation ? Le franchiray le pas, & vous monstreray piece à piece comme chacun s'en faict accroire ainsi qu'il veut. Nous vismes en nostre ieunesse que les grands maistres du Latin prononçoient le *C* conioinct avec *E* & *I* en forme d'*S*, puis peu de temps apres qu'ils le prononcèrent comme le *χ* Grec : ne s'auisans pas que pour ne rendre l'*S* inutile ils tomboyent en pareil vice, faisans tóber au son d'une seule lettre ce que le Latin voulut exprimer par *C* & *H*. Pour ceste seconde opinion l'on disoit que l'Italien successeur du Romain faisoit le semblable en sa langue. Il est successeur immediat du Got. Qui me faict penser qu'il ne le faut pas aisément tirer en exemple. Quoy ? S'il y a vne troisieme opinion qui efface par aventure ces deux autres ? Car si le mot de *Cocus* se deuoit escrire par *Cus* ainsi que *Oculus* & *Arcus*, comme nous l'enseigne Priscian en son premier liure; la rencontre de Ciceron est gosse & froide, quand il rendit le salut au cuisinier deuenu Magistrat, *Et tu cocc*, où il falloit necessairement que ceste lettre de *C* liee avec l'*E*, reçut mesme prononciation comme avecques l'*A*. D'ailleurs pourquoy luy ferons nous exercer en ces deux voyelles, *E* & *I* autre son qu'en ces trois autres *A O U* ? Veu que le Grec en son *κ*, que les Latins representent sous leur *C*, vsa tout d'un mesme son en toutes les voyelles, ie dy en *α κ υ ι η ο* & *ω*. Et de ceste derniere opinion semble

La diuersité qui s'est rencontrée en la prononciation du C Latin.

auoir esté Monsieur Ramus en la Grammaire Françoise, où ils s'est contenté d'un seul C conioinct avec toutes sortes de voyelles pour représenter ce qu'ordinairement nous faisons avec Q & V. Car quant au K que l'on adiouste en l'Alphabet soit Latin, soit François, il n'y a homme si peu clair-voyant qui ne iuge que c'est vne lettre inutile & que l'on y a adiouste sans propos. Venons au G, pourquoy prononçons-nous mollement ces mots *Gnatos*, *Ignauus*, *Ignarus*, si ce n'est à la Françoisse, ou si ce G lié avec N produit ce son en ceux-là, pourquoy ne faict-il le pareil en *Gnem*? Et finalement d'où vient & quel Allemand & l'Italien le prononcent fortement & d'une autre sorte que nous? Il faut que ceux-là, ou nous, ayons tort, & n'y a nul qui puisse iuger de ce tort. Je vous laisse qu'en ceste mesme lettre l'Allemand y apporte tout autre son en ces mots, *Guttur*, *Gaudeo*, *Gordius*, les prononçant par *I*, *Iuttur*, *Iaudeo*, *Iordius*. Je vous laisse encores qu'il nous est impossible de dire si le Romain prononçoit le G es lettres de E & I autrement qu'en celles de A, O, V. Car quant à la lettre de L, où reconnoistrez-vous en nous les trois diuers sôs que Plin luy attribuoit? Au regard du Q que nous faisons estre suuy naturellement par un V, d'où vient que nous prononçons cest V avec les lettres de A E & I, & non avec l'O? Et ie vous dy qu'il y a grande apparence que l'on le doit aussi bien en l'A E & I comme en l'O, si nous voulons rendre la rencontre de Cicéron de toutes

de toutes parts accomplie en ce mot de *Cocce*, dont j'ay parlé cy dessus, car si l'on prononçoit l'*U* en la dernier syllabe de *Quoque* aduerbe, Cicéron manquoit d'une lettre en son *Cocce*. Vous me direz qu'il y a grande apparence que *Cocus* deust estre escrit *Coquus*, & prononcé *Coque*, comme venant de *Coquo*, *Coquus*, & ie vous respons que l'opinion de Priscian estoit que ce mot se deuoit orthographier par vn *C*, & que les premiers & plus vieux Romains l'escrivans par vn *Qu*, ç'auoit esté par vne licence, ainsi qu'en ces mots *Arquus* & *Oquulus*, que la posterité auoit corrigee, escriuant *Arqus*, *Oculus*, *Cocus*. Ie viens à la lettre de *S*. Auquel des deux adiousterez vous plus de foy, ou à celuy qui la prononce comme deux *SS* quand elle est entre deux voyelles, *Caussa*, ou à l'autre qui en fait vn *Z*, *Caussa*? Le premier dit que Cicéron en vsoit ainsi: l'autre qu'il a appris la seconde pronôciation de main en main. Pareille difficulté se rencontre en la lettre de *T*, laquelle au milieu d'un mot nous transformons en *TC* *Vitium*, *Conuictium*, hormis aux deux genitifs du nombre pluriel de *Lis* & *Vitis*, où vous prononcez le *T* plainement. Pourquoy dessous mesme lettre exerçons-nous diuers sons? Ramus prenant ceste consideration en payement, puis quelques ans en ça, a voulu bannir de sa langue ce *TC*, mais tout ainsi que ces genitifs *Litium* & *Vitium*, aussi prononce-il *Planities* *Conuictium*, & tous autres de mesme marque avec le *T*, plain & naturel. En quoy il est encores repris de tous les autres Re-

gens de nostre Vniuersité de Paris. Entant que touchela lettrè *V*, il y a beaucoup plus d'obscurité, soit que vous en vsiez ou comme d'une consonante, ou bien comme d'une voyelle. Si en forme de consonante les anciens la prononcèrent entre l'*V* & l'*F*, & plus approchant de l'*F*, ce que vous ne faites. Et de fait le mesme Priscian (que i'ay cy dessus allegué) expliquant sa valeur dit, que ceste lettre estant mise au lieu d'une consone auoit jadis à Rome pareils effects que le digamma *Æolique*, qu'ils figuroyent sous deux *G* Grecs, & que les *Æoliens* auoyent nommé *Vau* de la lettre *V*, pour lequel *Vau* mesmement Iules Cesar auoit voulu mettre la mesme figure, toutesfois que le long vsage surmonta son opinion. Or que la prononciation de ce *Vau* flechisse plus à l'*F* qu'à l'*U*, la seule figure de ce digamma *Æolic* nous l'apprend. Car mettez deux *G* Grecs ensemblement, vous en composez l'*F* Latine. Si vous prenez ceste lettre de *U* en sa vraye & originaire nature de voyelle, encore y ferez vous plus empesché de sçauoir s'il la faut prononcer de la façon que nous vsons en France de nostre *V*, ou bien comme font les Italiens, Espagnols, Allemands en *ou* : la premiere opinion est fauorisée d'une raison qui n'est pas petite. Car l'on ne fait iamais de doute que le simple des Grecs, ne se prononçoit selon la diphthongue Grecque. Or est-il que pour transplanter dans le Latin quelques mots Grecs escrits avec *υ*, ils choisirent la lettre de *V*, comme nous voyons en ces dictions *υ* *Sus*

μῆς Musa. *ὑπερ Super,* *ὑπερβιος Superbus.* Conlequemment il y a grande apparence de dire que l'*V* Latin ne se prononçoit, non comme l'*ε* Grec, ains avec la simplicité de son que nous le prononçons entre nous. Et de fait sous mesme gage Denys Lambin Professeur du Roy en la langue Grecque prononçant l'*υ* Grecluy donnoit mesme son comme nous faisons à nostre *U* François. Tournez maintenant le fueillet, vous trouuerez que quand les Romains voulurent faire Latins quelques mots grecs qui portoyent la diphthongue *υι* ils y employerét le mesme *V*, cōme no^o voyōs en *μῆις* *Musa*, & autres. Si l'*V* se fut prononcé ainsi que le simple *υ*, il n'est nullement à presumer qu'ils eussent choisi ceste lettre pour représenter la diphthongue. En ce diuorce d'opinions laquelle des deux prononciations iugerez vous la meilleure? De ma part si j'osois en cecy aucunement interposer mes parties, ie serois pour la seconde. Par ce que ie voy toutes les nations de l'Europe incliner en ceste opinion, & qu'il n'y a que nostre France où l'on prononce l'*V* comme nous faisons. Lequel concours de tant de volonteiz ensemble, n'est pas de petit effect & autorité en mon endroit. I'adiouste que combien que le Latin ne porte la diphthongue de *Oυ*, toutesfois nostre langage *V* valon s'estant trans-formé en Romain, que nous appellasmes Roman; & que nous apprismes plus des Romains les oyans parler, que par reigles, ie voy que la plus grand partie de leurs mots, où se trouue l'*U*, nous en a-

uons fait vne diphthongue Françoisse, comme nous voyons en ces mots; *Courir, Cours, Ours, Loup, Pron Four, Tour, Sourd, Tourire, Coupe, Doulx, Poulx, Poulsér, Doubier, Poupee, Doubler, Poupe*, & infinité d'autres que l'on penseroit de prime face nous estre naturels François, combien qu'ils soyent empruntez de ces mots Latins, *Currere, Curia, Versus, Lupus, Multum, Furnus, Turris, Surdus, Turtur, Cippa, Dulcis, Pulvis, Pulsare, Dubitare, Puppa, Duplicare, Puppis*. Qui me fait penser que les Latins n'ayans point ceste diphthongue *Ou*, ils prononcèrent l'*V* de la façon que nous le *Courir, Cour* & autres, & que le prononçant ainsi, nos vieux François à leur suite les accommoderent à leur vîage au plus pres de la prononciation Latine. Et pour descendre plus aisément à ceste opinion, il y a deux vers d'Aufone qui m'en asseurent presque de tout point, l'un en l'epigramme, où s'estudiant de représenter la puissance & valeur des lettres Latines, quand il vient à parler de celle de *V* il dit.

Cecropiis ignota notis furiale sonans V.

Vers duquel ie rapporte deux choses; l'une qu'il n'y auoit nulle lettre Grecque qui se rapportast au son de l'*V* Latin. Par consequent que c'est errer de dire qu'il se prononça comme l'*υ* Grec, L'autre qu'Aufone eut begayé des oreilles de dire que la lettre de *V* rapportast vn son furieux, si on l'eut prononcé comme le nostre, qui n'est pas moins doux que l'*E* & l'*I*. Il faut doncques le rapporter à cest. Chose

que luy-mesme donne bien mieux à entendre en termes precis, quand en vne epistre qu'il escrit à Paulin, il l'accuse de ce qu'il ne receuoit aucune responce de luy, & apres s'estre ioué diuersement sur cela, il luy dit que s'il estoit tant occupé qu'il ne peut, ou si desdaigneux qu'il ne voulut luy respondre, pour le moins qu'il se contentast de luy enuoyer vne lettre Latine, qui signifie *Non*.

Vna fuit tantum qua respondere Lacones

Litera, & irato Regi placuere negantes.

Par laquelle lettre il entendoit nommément l'*V*, qui se prononçoit en *ν*, lequel signifie *Non* en Grec en ce mot *ν*. Mais comme i'ay dit ailleurs c'est chose assez familiere aux langues de ne prononcer outes les consonantes qui se trouuent à la fin des mots. Si i'estois iuge de ceste cause, ie serois pour ce party là; toutes-fois vous voyez qu'il y en a d'autres de contraire aduis, comme i'ay cy dessus deduit. Disans en outre qu'il ne se faut arrester à l'autorité d'Aufone, par ce que de son temps la prononciation du vray *V* auoit peu par succez de temps estre trans-formee en vne autre son par le moyen de la diuersité des peuples qui dès pieça couroyent parmy l'Empire de Rome. Ce que ie vous dy, est pour vous monstrier qu'il n'y a rien si certain en la proposition que soustenez, quel'incertineté. Mais il y a quelques anciens Grammairiens (dites vous) qui nous ont enseigné la valeur des lettres. D'où vient doncques ceste incertitude? Le vous respondray premierement que l'escriture n'est

*Les Gram-
mairiēs se
font apres
que les lan-
gues sont
paruenues
à leur per-
fection.*

que commel'image de la parole: & est impos-
sible à vn peintre de pouuoir parfaictement
attaindre par son pinceau au naïf de celuy
qu'il veut figurer en peinture: combien donc-
ques moins à nous, quand par nos plumes
voulons représenter vne chose qui n'a point
de corps, ie veux dire la parole? D'ailleurs ie
vous pourrois encore dire ce que ie disois
maintenant d'Aufone, que parauenture ces
Grammairiens ont exprimé les lettres selon
l'eson qui s'estoit insinué entre eux par la cor-
ruption de leur siecle, & non selon la pureté
qui estoit lors que la republique de Rome
florissoit en son bien parler. Car pour bien
dire il semble que les Grammairiens viennent
tousiours apres que les langues ont pris leur
perfection. D'autant que ceux qui font pro-
fession de bien parler, estiment chose trop
basse de vouloir donner regles de la Grammai-
re, ou bien ils ne s'en aduisent pas, ains se gou-
uernent selon l'vsance commune. Ce qui ad-
uint par expres dans Rome, où vous ne trou-
uerez nul Grammairien lors de la fleur de la
langue, & long temps apres, comme furent
vns Seruius, Priscian, Donat, Diomedé, Pho-
cas, Agrestius, Caper, Probus: & le dernier
Laurent Valle. Car quant à ceux qui sont so-
lemnisez par Suetone, au liure qu'il a expres-
sément dedié pour cest effect, ce n'estoyent
pas tels Grammairiens que ceux dont nous
parlons auioird'huy, ains comme censeurs,
auoyent charge sur les liures que l'on diuul-
goit, corrigeans les dictions foibles en autres

plus mettables, ainsi que nous apprenons de Quintilian en son premier liure. Par ce que les reigles leur estoient trop familiares & si domestiques, qu'ils eussent pensé apprestera rire, s'ils en eussent voulu faire des liures. Et depuis par succession de temps se diminuant l'honneur de la langue Latine, ceux qui succederent à ces premiers estimerent qu'il falloit rediger en preceptes ce qui estoit de la Grammaire, pour seruir de guide aux autres. Mais ce fut lors que la beauté & naïfueté de la prononciation aussi bien que du langage, auoit pris coup & que la langue Latine ne se trouuoit plus que dans les liures. Partant ne m'alleuez ces Grammairiens au sujet que nous discourons. Ausquels toutes-fois i'adiousterois quelque foy & creance, s'ils eussent sceu si bien exprimer chascun caractere, par leurs plumes, comme ils les representoyent en parlant. C'est en somme ce que i'auois à respondre à vos lettres: si bien ou mal, ie vous en fais iuge. Tant y a que si ie suis fol en cest endroit, ie le pense estre avec raison. A Dieu.

A Monsieur le General d'Estournet.

P OVR-autant que ces iours passez Monsieur Belut vostre Procureur est allé de vie à trespas, & qu'il vous en faut choisir vn autre, ie me suis aduisé de vous escrire la presente en faueur de Monsieur Chauueau: il est homme de bien, & tel que ie m'asseure qu'aurez contentement

*Il 'recom-
mande vn
sien amy
au General
d'Estournet.*

de luy : & encores que ie ne face doute qu'une simple lettre venant de sa part seroit d'aussi & plus grand merite enuers vous, que mes recommandations, pour estre homme qui se recommande de soy mesme & que vous cognoissiez fort bien pour l'auoir puis n'agueres traitté en vostre logisauec moy, si est ce que par vn droit de priorité, & comme ayant la premiere hypothèque sur vous, ie me suis ingeré d'en faire la premiere requeste; laquelle m'estant par vous enterinee, ce me sera vn surcroist d'obligation pour vous obeir en toutes choses où il vous plaira m'employer. A. Dieu.

*A Monsieur de Tiard, Seigneur
de Bissy.*

*Sommaire
ecueil des
mœurs du
Roy Louys
vnzième.*



AM AIS courtoisie ne se trouua qui n'ait esté suiue d'une recompense en vne ou autre sorte, & quelques-fois lors que moins on y pense. A quel propos cela? Pour vous dire qu'il y a quatre ou cinq iours que passant deuant la maison de l'un de mes compagnons, ie le voulus visiter : & apres auoir fait quelque tours dans sa sale, ie demande de voir son estude. Soudain que nous y sommes entrez, ie trouue sur son pulpitre vn vieux liure ouuert. Ie m'enquiers de luy de quoy il traitoit, Il me respond que c'estoit l'histoire du Roy Louys vnzième, que l'on appelloit la mesdisante. Ie la luy demande d'emprunt, comme

celle que ie cherchois, il y auoit long temps, s'as la pouuoir recouurer. Il me la preste. He vrayement (dy-ie lors) ie suis amplement satisfait de la uisitation que i'ay faicte de vous. Ainsi fusse-ie promptement payé de tous ceux qui me doiuent. I'emporte le liure en ma maison, ie le lis & digere avec telle diligence que ie fais les autres. En vn mot, ie trouue que c'estoit vne histoire, en forme de papier iournal, faite d'vne main peu industrieuse, moins diligente & non partiale, qui n'oubloit rien de tout ce qui estoit remarquable de son temps. Tellement qu'il me sembla qu'il n'y auoit que les mesdisans qui la puissent appeller mesdisante. Appelez vous mesdisance en vn historiographe, quand il vous estale sur son papier la verité toute nue? Nul n'est blessé que par soy-mesme. Le premier scandale prouient de celuy qui faict le mal, & non de celuy qui le raconte. Je pensois auparauant que cest autheur se fust seulement voué à la recherche des vices de Louys vnzième. Il n'en est rien : ayant d'vne mesme balance pesé les vertus & vices ensemble. Mais s'il vous plaist rechercher l'histoire mesdisante de ce Roy, vous la trouuerez vrayement & sans hypocrisie dans Claude Sceissel en l'Apologie de Louys XII. où il met sa vie au paragon de tous les autres Roys de France: & quand il arriue à celle de Louys XI. croyez qu'il faict vn fort bel inuentaire de ses mœurs. Au contraire Philippe de Commines faict profession expresse de le celebrer, voire le mettre à la veüe de tous les Princes, pour leur seruir d'exemple,

*Philippe
de Commines
& Claude
Sceissel sur
vn mesme
sujet de
Louys vn-
zième es-
crivent cho-
ses diuerses.*

ainſi que Xenophon vn Cyrus, tous deux certes grands perſonnages : ceſtuy-là Eueſque de Marſeille , & qui par pluſieurs beaux liures qu'il a faits , meſme celuy de noſtre loy Salique, a monſtré combien il auoit de bon ſens: ceſtuy Seigneur de marque qui auoit de ſon temps bonne part à toutes les affaires d'eſtat de noſtre Royaume. Voyez doncques quelle foy hitoriale nous pourrons recueillir de ces deux auteurs. Et neantmoins l'vn & l'autre a dit verité. Car comme Dieu balance en nous les vertus par le contre-poix de nos vices, pour ne nous rendre du tout accomplis, auſſi eſt-il vray que ce Roy ſe rendit autant conſiderable en les vices, comme en ſes vertus. S'eſtant en l'vn & l'autre poinct attaché aux extremitez. Or entendez ie vous prie quel fruit i'ay tiré tant en bien qu'en mal de tous ces auteurs. Ie trouue en ce Roy vn eſprit prompt, remuant & verſatil , fin & feint en ſes entrepriſes, leger à faire des fautes, qu'il reparoit tout à loisir au poix de l'or, Prince qui ſçauoit par belles promeſſes donner la mule à ſes ennemis , & rompre tout d'une ſuite, & leurs choleres, & leurs deſſeins : impatient de repos, ambitieux le poſſible, qui ſe iouïoit de la Juſtice ſelon que ſes opinions luy commandoyent, & qui pour paruenir à ſon but n'eſpargnoit rien ny du ſang, ny de la bource de ſes ſujets; & ores qu'il feit contenance d'eſtre plein de religion & de pieté, ſi en vſoit il tantost ſelon la commodité de ſes affaires, tantost par vne ſuperſtition admirable; eſtimât luy eſtre toutes choſes permises,

quand il s'estoit acquité de quelque pellerinage. Brief plein de volonteز absolües , par le moyen desquelles, sans cognoissance de cause, il appointoit & des-appointoit tels officiers qu'il luy plaisoit : & sur ce mesme moule se formoit quelquefois des fadaïses & sottises dont il ne vouloit estre dedit. Comme quand il se feit apporter tous les oyseaux caquetoirs de Paris en sa chambre, pour se donner plaisir de leur iargon. Mœurs & façons de faire qui luy cuiderent vne fois couster la perte de son Royaume, quand sous le masque du bien public , les Princes se liguerent encontre luy, & qu'il se veit au dessous de toutes affaires à la iournee de Montlehery : toutesfois apres auoir quelque peu respiré par le bon seruice que luy feit le Parisien, il dissipa sans coup ferir tous leurs conseils. Et depuis donna tel ordre à ses affaires par vne habilité d'esprit qui luy estoit familiere, qu'il rompit, par interposition de personnes, la force & l'orgueil du Bourguignon son ennemy formel & iuré : annexa à la couronne, par l'entremise de quelques-vns, le Côté de Prouence : se pourchassa des pretentions sur l'Estat de Bretaigne , lesquelles vray-semblablement il eust faiët reüssir , s'il n'eust esté preuenü de mort. A maniere que se trouuans tous ces meslanges de bien & mal en vn sujet, ce n'est point sans occasion que ce Roy ayt esté extollé par quelques-vns, & par les autres vituperé. Voyla ce que j'ay peu recueillir en brief de toutes ses actions. Mais tout ainsi que les abstracteurs de quinte-essence, ayans

*Iugement
de Dieu
qui courut
sur le Roy
Loyseur-
Xiesme.*

alambiqué pour la premiere fois l'eauë de vie du vin, la rectifient puis apres par vn second alambic, d'où ils tirent vn esprit plus subtil, aussi de tout cest abregé ie tire vn discours plus haut. Ie voy au bout de tout cela vn iugement de Dieu, qui courut miraculeusement dessus luy. Car tout ainsi que cinq ou six ans auparavant son aduenement à la couronne, il auoit affligé le Roy son pere, & qu'il se bannit de la presence de luy, ayant choisi pour sa retraite le Duc de Bourgogne, qui estoit en mauuais mefnage avec nous, aussi sur son vieil aage fust il affligé, non par son fils, ains par soy-mesmes, en la personne de son fils, qui n'estoit encores capable pour sa grâde ieunesse de rien attenter contre l'estat de son pere. Tellement que pour le rendre moins habile aux affaires, il ne voulut qu'en son bas aage il fust institué aux nobles exercices de l'esprit: & encores le confina au chasteau d'Amboise, l'esloignant en ce qui luy estoit possible de la veuë de sa Cour. Dauantage ayant excessiuelement affligé son peuple en tailles, aydes & subsides extraordinaires, & tenu les Princes & grands Seigneurs en grandes craintes de leurs vies, ainsi que l'oyseau sur la branche. (Car nul ne se pouuoit dire assésuré, ayant affaire avec vn Prince infiniment diuersifié.) Aussi sur le declin de son aage, commença-il à se desfier de tous ses principaux sujets, & n'y auoit rien qui l'affligeast tant que la crainte de la mort. Faisant és recommandations de l'Eglise plus prier pour la conseruation de

sa vie, que de son ame. C'est la plus belle Philosophie que ie rapporte de son histoire. Je dirois volontiers que les historiographes se donnent la loy de faire le procez aux Princes : mais il faut que ie passe plus outre & adiouste, que les Princes se le font à eux-mesmes. Dieu les martelle de mille tintoins, qui sont autant de bourreaux en leurs consciences. Ce Roy qui auoit faict mourir tant de gens, ainsi que sa passion luy en dictoit les memoires, par l'entremise de Tristan l'Hermite, luy mesme estoit son triste preuost, mourant d'une infinité de morts le iour auant que de pouuoir mourir, estant entré en vne generale desfiance de tout le monde. Ceste-cy est vne belle leçon que ie souhaite estre emprainte aux cœurs des Roys, à fin de leur enseigner de mettre frain & modestie en leurs actions. Commynes fera son profit de la vie de ce Roy pour monstreauec quelle dexterité il sceut auoir le dessus de ses ennemis : & de moy toute l'vtilité que i'en veux rapporter fera, pour faire entendre comme Dieu scait auoir le dessus des Roys quand il les veut chastier. A Dieu.

*A Monsieur de Marilhac Seigneur de Ferrieres,
Conseiller du Roy & Maistre ordinaire en sa
chambre des Comptes de Paris.*

*Sommaire
discours de
la fortune
de Iacques
Cœur.*

*Iacques
Cœur &
le Conne-
stable de
Luxem-
bourg.*



L est ainsi comme vous le dictes : ie ne pense point que la France ait iamaïs porté homme, qui par son industrie, sans faueur particuliere du Prince, soit paruenù à si grands biens, comme Iacques Cœur. Il estoit Roy, Monarque, Empereur en sa qualité. Et tout ainsi quel'on descouure la grandeur de la vieille Rome par ses ruines, aussi pourroy-ie dire le semblable de cestuy-cy. Je dirois volontiers que ce grand Connestable de Luxembourg, sous Louys vnzième, estoit vn autre Iacques Cœur entre les Princes, & Iacques Cœur, sous Charles septiesme entre les gens de moyëne condition, estoit vn autre Connestable de Luxembourg. L'vn & l'autre commanderent quelquefois aux Princes, se maintindrent diuersement chacun endroit soy en leurs grandeurs, en fin receurent le guerdon dont la fortune iournaliere récompense ordinairement les plus grands : celuy là par vne mort honteuse, cestuy par vne amende honorable, & perte generale de ses biens. Toutesfois ny l'vn ny l'autre ne furent si mal appointez, que leur posterité ne se soit trouuee grande. D'autant que le Connestable de Luxembourg eust vne fille de son fils aîné, laquelle depuis alliee par mariage avec l'vn des premiers Princes de

France, laissa vne infinité de grands biens: & Jacques Cœur eust aussi vne petite fille, qui pour la grandeur de ses biens fut coniointe par mariage avec l'une des premieres familles de Paris. Or quant à son procez, si les Iuges n'y eussent passé, ie dirois presque que c'estoit vne calomnie, mais ie ne mentiray point quand ie diray que la jalousie des grands qui estoient pres de Charles septiesme luy trama ceste tragedie. Les principaux chefs de son accusation estoient, qu'il auoit faict transporter dans ses galeres des armes en Egypte, dont il auoit fait present au Souldan, qui depuis en auoit obtenu victoire encontre les Chrestiens: qu'il auoit faict empoisonner Agnes Sorelle (c'est celle que nos Annales appellent la belle Agnes) que dès l'an mil quatre cens vingt neuf (voyez où l'on alloit rechercher ces fautes, car son procez luy fut fait en l'an mil quatre cens cinquante) estant personnier & compagnon à la ferme des monnoyes de Bourges, il auoit faict forger escus à moindre prix & alloy, comme de lxxvj. lxxxiiij. & lxxxix. pour le marc, & à quatorze & xv. carats, combien qu'il les deust auoir forgez à lxx. escus pour marc, & vingt & deux carats pour escu: & par ce moyen y auoit eu gaing de xx. & xxx. escus pour marc, au lieu de dix. Plus; qu'en l'an mil quatre cens xlvj. la galere de Saint Denys, à luy appartenant, estant en Alexandrie sous la conduite de Michelet Teinturier, patron d'icelle, vn ieune enfant Chrestien de l'aage de xiiij. à xv. ans, de la terre de Preteian,

*Causés
pour les-
quelles
Jacques
Cœur fist
condamné.*

detenu esclave, s'estoit venu rendre à ceste galere, & prosterné à deux genoux devant ce patron, criant, *Pater noster. Ave Maria*, & protestant qu'il vouloit viure & mourir Chrestien: duquelle patron ayant compassion, l'auroit chargé dans son vaisseau, & emmené en France. Chose qui n'auroit esté trouuee bonne par Iacques Cœur, qui l'auroit faict ramener à son maistre, craignant que si le Souldan en eust esté aduerty, il n'en eust esté courroucé contre luy. Tellement que l'enfant estant ramené, auroit de rechef abiuré le Christianisme. Il y a quelques autres charges, mais celles-cy sont les principales de son procez, pour lesquelles par arrest donné par le Roy Charles septiesme en son grand Conseil, au Chasteau de Lusignan le xxv. de May, mil quatre cens cinquante & trois, il fut condamné en cent mil escus, pour la restitution des choses mal prises au Roy, & trois cens mil escus d'amende, & ses biens declarez acquis & confisquez au Roy es lieux où confiscation auoit lieu: & declara le Roy qu'il luy remettoit la vie, par ce qu'il en auoit esté prié par le Pape. Ce neantmoins qu'il seroit inhabile à tenir offices Royaux, & portoit l'Arrest en ces termes. *Qu'il estoit condāné à faire amēde honorable en la persōne du Procureur general, nuē teste, sans chaperō, & ceinture, à genoux, tenāt en ses mains une torche ardēte de 10. liures de cire: en disāt que mauuaisēmēt, indenēmēt & cōtre raisō, il auoit enuoyé des harnois & armes au Souldan ennemy de la foy Chrestienne, & fait rēdre aux Sarrazins le susdit enfant, & transportē grāde quantitiē d'argent.* Iugez ie vous

ie vous prie, si ie l'ay mal à propos appelé. Monarque en sa qualité, veu que d'un costé l'un des principaux chafs de son accusation estoit pour quelque correspondance qu'il auoit eue avecque le Souldan d'Egypte : & que d'un autre, le Pape se rendit intercesseur enuers le Roy pour luy remettre la vie. Et qui est histoire plus admirable & dont ne se trouue la semblable, soudain qu'il fut fut condamné, estant au dessous de toutes affaires, il trouua soixante ou quatre vingts hommes les anciens seruiteurs, qui en luy faisant seruice estoient paruenus à grands biens, chacun desquels luy presta mille escus, pour supporter plus doucement son infortune, pendant qu'avecques le temps il trouueroit moyen de se rehabiliter en ses biens, sous le bon plaisir du Roy. Prest non fondé sur autre hypothèque que sur la memoire des plaisirs qu'ils auoyent receus de luy, quand il auoit le vent en poupe. N'estant chose moins esmerueillable qu'un simple citoyen durant sa prosperité eut fait tant de creatures, que de voir tant de creatures auoir recogneu leur bien-faicteur au temps de son aduersité. Somme ie veux dire que c'estoit en sa qualité un autre Roy Alexandre, qui auoit produit plusieurs Roys. Au demeurant pour ne vous laisser rien de ce qui appartient à son histoire, & luy seruir d'un Quinte Curse, ie trouue qu'il eut quatre enfans, Messire Henry qui fut Archeuesque de Bourges, Renault, Geofroy & Perrette Cœur, laquelle auoit esté mariee à Iacques Troussiau seigneur de

Meuil & de S. Palez dés l'an mil quatre cens xlvij. à laquelle en faueur de mariage ses pere & mere auqyent baillé la somme de dix mille liures, moyennant laquelle somme elle renonça à toutes successions futures de pere & mere & de ses freres. L'arrest ne fut si tost prononcé contre luy que l'on proceda par voye de faisie & arrest sur vne infinité de biés meubles & immeubles à luy appartenans, dont la plus grand' part fut exposée en vente. Et ceste commission baillee à Iean Briçonnet citoyen de Tours. Depuis il brisa les prisons, qui ne luy estoyent pas, à mon iugement, trop fermées, puis que l'on auoit ce que l'on desiroit de luy, & quelque temps après deceda. Nous trouuons aux registres de la chambre des Comptes de Paris, la composition que le Roy Charles septiesme fit avec Rauault & Geoffroy Cœur ses enfans, qui est du cinquiesme Aoust 1457. par laquelle il leur remet les maisons de Bourges & des enuirons, ensemble celle de Lyon, avec les mines d'argent, plomb & cuiure de la montaigne de Pompalieu & de Cosme, & le droit que le Roy auoit és mines de S. Pierre le Palu, & de Ioz de la montaigne de Tarare, avec les vtenfiles, terriers & registres, sans aucune reserue, fors du dixiesme & ancien droict. Leur cede encores les biens meubles & debtes actiues du defunct, lesquelles n'estoyent encores venuës au profit du Roy ou de ceux ausquels il en auoit disposé, sauf & aussi reserué les biens qui estoyent à Tours, ou autrés esquels Briçonnet auoit esté commis, & quelques autres

*Composition
des enfans
de Iacques
Cœur avec
le Roy
Charles
septiesme.*

particulieres debtes deuës par des Seigneurs courtifans, plus amplement mentionnees dans ceste composition, à la charge que Rauault & Geofroy Cœur seroyent tenus d'acquiter le Roy de toutes les debtes passiuës en quoy Iacques Cœur pouuoit estre tenu. Et aussi qu'ils renonçoient à tous les biens saisis & mis en la main du Roy, encores qu'ils eussent preten- du les aucuns auoir appartenü à leur mere. Ce- cy me fait souuenir de ceux qui desmenagent, lesquels en desmenageât recognoissent beau- coup plus la quantité de leurs meubles, que lors qu'ils estoient en bonne ordonnance de- dans leurs maisons, aussi par ceste compo- sition, qui estoit comme vn desmenagement, du reste des grands biens de Cœur, l'on peut presque recueillir quelle fut l'ineestimable grâ- deur de ses facultez. A Dieu.

*A Monsieur de Marillac, Seigneur
de Ferrieres.*

LA particularité del'arrest de Iac- ques Cœur, portant qu'il feroit amende honorable sans chape- ron, & sans ceinture, m'a fait ra- menteuoir ie ne sçay quoy del'ancienneté de la France, dont il me plaist vous entretenir par la presente, pendant que vous dispencez dans Ferrieres d'entretenir vos pensees avecques vos arbres. Quant est du mot de Chaperon, il est certain que nos anciens en vsoient au lieu de Bonnets qui sont entre nous en vfrage. D'où

*Pourquoy
nous disons
Chaperon.
ner pour
Bôneter:
Et aussi
d'où vient
qu'on fait
quitter la
ceinture à
celuy qui
fait cession
de biens.*

vient que nous disons encores *Chaperonner*, pour *Bonneier*: & que nous auons emprunté de nos ancestres ce vieux adage, *Deux testes en vn chaperon*, quand deux personnes s'entendent. Ainsi l'arrest de Iacques Cœur portoit qu'il feroit amende honorable nuë teste, & sans chaperon. Ce qui se pratique ordinairement contre tous ceux qui souffrent pareille condamnation : mais d'y auoir adiousté *sans ceinture*, ie ne l'ay iamais leu en vn autre arrest, au moins qu'il me souuienne. Pourquoy doncques estimerons-nous que ce mot y fut adiousté ? Le le vous diray, & voyez si ma diuination sera alloüable. Nos anciens estimoyent qu'en la ceinture gisoit la remembrance generale de tous nos biens. Il faut que nous soyons logez, que nous sustentions par alimens nostre corps, que nous ferrions les deniers dont voulons aider le commun cours de nostre vie, que tra-uail lions selon la diuersité des estats ausquels nous sommes appelez, qui d'une espee, s'il fait profession des armes, qui de la plume, s'il est homme de robbe longue. C'est pourquoy nos bons vieux peres considerans ce qui estoit de leur necessité, & non de piasse, portoyent penduës à leurs ceintures les clefs (pour entrer dedans leurs maisons) leurs cousteaux (pour s'en aider à la table) leurs bources ou gibecieres (pour y mettre leur argent) & encores leurs espees ou escrivoires, selon la diuersité de leurs vacations. Et de là vint pareillement que quand vn homme vouloit faire cession de biens il estoit contraint deuant la face

de son Iuge quitter la ceinture (ce qu'encores nous practiquons aujourdhuy) non point pour le noter d'infamie, ains pour denoter par la ceinture la figure de toute la commodité de ses biens. Mon opinion est doncques, quand ont mit *sans ceinture* à Iacques Cœur, que c'estoit pour exprimer d'auantage, qu'õ entédoit le denuër de tous biens. Le mot de confiscatiõ l'emportoit (me direz-vous, avec les grandes & excessiues amandes. Le mesme arrest portoit bien *nue teste*, qui estoit assez expliquer ce qu'on vouloit dire : & toutefois on y adiousta tout de suite, & *sans chaperon*, par vne abondance de paroles, qui sembleroit estre superflüë. Pourquoy n'auroit l'on peu faire le semblable en adioustant ces mots, *sans ceinture*? Et puis dites que ie ne sois pas vn grand faiseur de commentaires. Ie m'asseure que ne demeurerez sans repliques, estant maintenant de grand loisir en vostre maison des champs. Mais ie vous declare que si ne prenez ceste explication pour bon & loyal payement, ie vous abandonneray ma ceinture, & feray pour ce regard cession de biens enuers vous. A Dieu.

A Monsieur de Marilhac, seigneur de Ferrieres.



Vous me faites deuenir grand chasseur: les autres tracassent par les champs, par les bois, par les broissailles, depuis le matin iusques au soir le plus du temps sans rien prendre: & moy pan-

*Il se gausse
par ceste
lettre auëc
le sieur de
Marilhac.*

fant en mon estude chasser seulement à mes liures, vous m'avez fait prendre deux liures, n'estimez pas pour cela en tirer recompense de moy. Encores que ie ne sois de l'ordre des freres Mineurs, si fay ie estat d' en estre quitte pour vn grand mercy. A Dieu.





L E
QVATRIESME
 LIVRE DES LETTRES
 D'ESTIENNE PASQUIER.

A Monsieur de Fossomme.



E vous racontevne Metamor-
 phose fort bizarre. L'empereur
 Charles qui tout le temps de sa
 vie auoit fait vœu & profession
 admirable desarmes, s'est depuis
 quelques mois en ça confiné en vne religion,
 où il meine vie solitaire, s'estant desmis de
 tous ses Royaumes & païs sur le Roy Philippe
 son fils. En contr'eschange, le Pape qui dés
 le temps de sa ieunesse auoit fait contenance
 d'une religion tres-austere, & qui (commel'on
 dit) auoit introduit en l'Italie l'ordre des Thea-
 tins, est deuenue nouveau gendarme soudain
 qu'il a esté appellé à la Papauté. Le Capitaine
 Carafe son neueu a esté par luy fait Cardinal,
 lequel il a enuoyé soudain apres par de ça pour
 apporter au Roy, non les clefs de S. Pierre, à
 fin de nous ouurir la porte de Paradis, ains
 l'espee de saint Paul. Vous estimez que ie me
 mocque. Il a fait voirement au Roy d'une fort

*Commen-
 cement des
 troubles de
 la France.*

riche espée: & quant & quant l'a conuié au recouurement de l'estat de Naples, qui est le ioiet des Papes, & amusoir des Princes estrangers. C'en'est pas cela qui le picque, ains l'en- uie qu'il a de reintegrer les siens dans les biens de Melphe, dont ils ont esté dés pieça spoliez par l'Empereur. Il promet de fournir gens & argent à ceste entreprise. Messieurs de la mai- son de Guise tiénét la main à ceste nouuelle le-

*Voyage du
seigneur de
Guise en I-
talie à la
semonce du
Pape Paul
Theatin.*

gation comme ayans, ce leur semble, part à la querelle. Que vous diray-ie plus? Monsieur de Guise est destiné Lieutenant general du Roy pour ce voyage, toute la fleur de la no- blese de France se prepare à sa suite. Chacun y court à l'enuy: Monsieur le Connestable seul ne s'en peut resoudre, & dit haut & clair, que nous iroins tous à cheual, pour nous en reuenir à pied. On se mocque de sa Philosophie, qui n'est pas peut estre vaine. Par ce que ie ne voy point que l'Italie nous ait seruy d'autre chose que de tombeau, quand nous l'auons voulu enuahir. Ceux qui nous facilitent du com- mencement le chemin pour la commodité de leurs affaires, saignent apres du nez. Ils sont bien aises de mettre les choses en desordre, pour paruenir à vne bonne paix avec ceux qui les affligeoyent. S'ils voyent vn heureux succez en nous, les Potentats se liguent en- semblement, ne voulans pas aisémét permettre qu'un grand Roy de France proche voisin de l'Italie, y mette le pied. Brief tout ce nouveau conseil ne nous promet rien de bon, que celuy qui comme chef de l'Eglise deust estre le

*L'Italie to-
beau des
Francois,
Et pour-
quoy.*

premier pere de la paix, soit le premier autheur & promoteur des guerres entre les Princes Chrestiens. Toutes & quantes-fois qu'el'Eglise S. Pierre a pris le glaive, Dieu a tout aussi tost lasché la bride aux schismes & heresies. Suspendons nostre iugement iusques à ce que nous voyons quelle sera la catastrophe de ce beau jeu. Je ne faudray de vous mander comme les choses se passeront quand j'auray m'esfargé en main. Escribez moy, s'il vous plaist, quel iugement on en faict à Basle: & si ce nouveau remuement de mesnage ne met point la Seigneurie de Berne en ceruelle. A Dieu.

A Monsieur de Fonssomme.



NE le vous auoy-ie pas bien escrit? *Suite du voyage.*
 Iamais prophetie ne fut plus vraye que la mienne. Entendez maintenant quelle issue a eu ce voyage, & quels effets il a produit. Soudain que Monsieur de Guise a passé les monts, ores qu'il pensast que toutes choses luy deussent rire, si est-ce que descheu de son esperance il a trouué le Pape tout refroidy. Tellement qu'ils ont commencé d'entrer en vne raisible desfiance les vns des autres. Cela a esté cause que les affaires ont commencé de se tirer en longueur. Vous entendez par là quelle en a peu estre la suite. Car il n'y a rien qui matte tant le François que la longueur. Ostez luy vne victoire prompté des mains, vous obtenez sans coup ferir la plus grande partie de la vostre. Ce

*Naturel
du François.*

temps pendant le ieune Roy Philippe pour nous reuoquer de ceste entreprife, pratique tout le meſme conſeil que Scipion à l'endroit d'Annibal. Il met le ſiege deuant la ville de S. Quentin, qui eſtoit à nos portes. Monſieur le Conneſtable s'eſtant transporté pour la renforcer de gens, viures & munitions eſt mis en route, & pris le iour de S. Laurent avec Monſieur de Montpenſier & le marſchal de ſainct André. Pluſieurs Princes & grands Seigneurs tuez, meſmes Monſieur d'Anguien. Trois iours apres a eſté deſcouuerte vne aſſemblee qui ſe faiſoit en la rue ſainct Iacques dans Paris viſà viſ du college du Pleſſis, en laquelle y auoit vne infinité de nobles tant hommes que femmes, & autres du menu peuple, faiſans lors leur preſche & prieres, en la maniere de Geneue, dont la plus grande partie a eſté priſe, avec vn grand ſcandale & eſmotion populaire. A la ſuite dequoy l'Eſpagnol ſix ſemaines apres a pris ſainct Quentin, Hen, & le Caſtellet en Picardie. Cela a eſté cauſe de rappeller Monſieur de Guiſe, lequel à ſon arriuee a fait deux exploits fort memorables. Car d'un coſté il a repris Calais, qui auoit eſté occupé par les Anglois dès le regne de Philippes de Valois, & quelque peu apres Tion-ville, quel'on eſtimoit auparauant imprenable. Qui nous a fait regagner beaucoup de la reputation que nous auions perduë par la iournee de ſainct Laurent, que les courtiſants appellēt deſaſtre. Le Roy cependant plus faſché d'auoir perdu la preſence de Monſieur le Conneſtable & du

*Preſches
deſcou-
uertes dans
la ville de
Paris le
iour ſainct
Laurent
1557.*

*Iournee
de ſainct
Quentin.*

*Beaux ſuc-
cez du
Duc de
Guiſe.*

Mareschal de S. André, que de toutes les autres pertes, a brassé vne paix à telle condition que l'Espagnola voulu. Laquelle a esté en fin conclue sous paches grandement desauantageux. Car outre plusieurs particularitez que ie n'ay entrepris de vous escrire, on a par les capitulations rendu à Monsieur de Sauoye ses pays de Piedmont & de Sauoye (fors quatre ou cinq places) au Roy Philipps Mariébourg Montmedy, Yuoy, Donvilliers, Tionville: aux Geneuois l'Isle de Corse. A nous pour toute chose saint Quentin, Hen & le Castellet. Vray qu'au bout de tout cela l'on a conclud deux mariages: l'un de la fille aisnée du Roy avec le Roy Philipps, l'autre de Madame Marguerite sœur du Roy avec le Duc de Sauoye. O à la mienne volonté que nous fussions demourez dans la trefue de cinquante cinq, sans la rōpre, & que ceste espee fatale à nous enuoyée pour mettre tout en combustion fut demeuree en son fourreau dedans la ville de Rome. Ceste paix n'a peu estre bien goustee par plusieurs, qui dient que nous auions fait vn traité, comme si iamais l'on ne deuoit auoir guerre, & que les hommes fussent immortels, ou bié leurs volontez perpetuellement stables. Ayans rendu par vn trait de plume toutes nos conquestes de trente ans. Je vous auois par mes precedentes recité vne metamorphose. Par ceste-cy vous pouuez recueillir les vrais effects d'une Tragicomédie. A Dieu.

*Paix faite
avec l'Es-
pagnol.*

A Monsieur de Fonssomme.

*Mortla-
mentable
du bon Roy
Héry deu-
xième du
nom.*



Este-cy sera maintenant vne vraye tragedie, d'ot ie ne parleray par cœur ou par liure, ains de ce que de mes propres yeux j'ay veu avec vne infinité de tefmoins. La paix ayant esté iuree telle que ie vous ay escrit, l'on a commencé de dresser dedans Paris tous les preparatifs que l'on pouuoit inuenter pour honorer les mariages de si grands Princes & Princesses. Et a esté le Roy Philippe marié par Procureur avec Madame Elizabeth fille aisnee de nostre Roy : & quant au mariage du Duc de Sauoye differé à quelques iours ensui-uans. Pendant ce temps l'on a ouuert le pas à vn tournoy en la rue saint Antoine deuant les Tournelles, avec toutes les magnificences & parades dont l'on s'est peu aduiser : & ce pour autant que le Roy estoit l'un des tenans, suiuy de Messieurs de Ferraré, de Guise & de Nemoux. Ce que plusieurs personnes de bon cerueau trouuoient estrange : disans que la majesté d'un Roy estoit pour estre iuge des coups, & non d'entrer sur les rangs. Mesme que dans les vieux Romans les Roys en tels estours n'auoyent appris de faire actes de simples cheualiers, ains ou se desguisoient, s'ils auoyent enuie d'entrer en la lice, ou bien du tout s'en abstenoyent. Toutesfois telle a esté la mesaduenture du Roy, qu'il a voulu auoir le premier honneur de la iouste. Et croy que

le desir qui luy en prit, fut pour faire paroistre aux estrangers combien il estoit adextre aux armes & duit à bien manier vn cheual. De sorte que ceux qui estoient pres de luy, ne l'oserent destourner de ceste entreprise. Chose quia depuis apporté vn miserable spectacle à la France. Car s'estans deux iours du tournoy passez avec plusieurs allegresses, le troisieme, qui fut le iour & feste sainct Pierre, il a receu vn grand coup de lance dans la visiere, dont il est mort quelques iours apres. Et a esté en cecy le malheur tel que luy mesme enuoya à Montgommery capitaine de ses gardes (pour l'opinion qu'il auoit de luy) la lance dont il a esté feru. Si la ioye s'est tournee en dueil, & si la clameur de tout le peuple a esté grande, ie le vous laisse à penser. Aussi ne lisez vous histoire comme ie pense digne de telle compassion. Bien trouuez vous quelques Roys au milieu de leurs festins, comme vn Philippe de Macedone, auoir esté mis à mort : les autres au milieu des affaires publicques, comme à Rome vn Iules Cesar : mais c'estoit par leurs ennemis : & les autres casuellement, comme nous eusmes vn Philippe, fils de Louys le Gros, qui par la rencontre d'un pourceau tombant de son cheual, se rompit le col. Mais qu'un Roy ait esté meurdry au milieu de tant d'allegresses, fauorisé des siens, mesmes n'ayant lors nul ennemy que la fortune qui s'estoit mise aux embusches, malaisement que l'on le trouue dans les histoires tant anciennes que modernes. Et dit-on que

tout ainsi que Montgommery tua par mesgarde ce pauvre Roy, aussi que le feu Roy François son pere, vn iour des Roys, en la ville de Blois, fut blecé à la tête d'un tizon par le Seigneur de Lorges pere de Montgommery & en grand danger de la personne. Voila comment nostre bon Roy Henry est decedé. Et comme le commun peuple ait naturellement l'œil fiché sur les actions de son Roy, aussi ne s'est pas trouuee ceste mort sans recevoir quelques commentaires & interpretations de quelques vns. Car pour vous compter tout au long comme les choses se sont passées en ceste France, soudain que la paix fust faite, Monsieur le Cardinal de Lorraine, qui en auoit esté l'un des premiers entremetteurs, declara en plein Parlement, que l'opinion du Roy auoit esté de la faire à quelque prix & condition que ce fust, pour de là en auant vacquer plus à son aise à l'extermination & bannissement de l'heresie de Caluin. Et de faict le dixiesme iour de Iuin il se transporta en personne au milieu de son Parlement, pour tirer de chaque Conseiller son aduis sur la punition des Heretiques. Surquoy fut par plusieurs opiné assez librement; quelques-vns estans d'aduis d'en faire sursoir la punition iulques à la decision d'un Concile general qu'ils disoyent estre necessaire. Au moyen dequoy le Roy esmeu d'une grande & iuste colere commanda dès l'instant mesmes à Mōt-gōmery de se saisir de quelques-vns de la compagnie qui auoyent opiné plus librement qu'il ne vouloit. Lesquels furent sur le champ

*La Mer-
curie le te-
nue au
Parlement
deuant le
Roy Hen-
ry, sur la
puniton
des Here-
tiques.*

menez prisonniers dans la Bastille. Parquoy disoyent ces nouueaux commentateurs que ce mal estoit aduenu au Roy, par vn iuste iugement de Dieu pour venger ces emprisonnemens tortionniers. Que les opinions deuoyent estre libres, & non sondees par vn Roy, pour puis apres les ayant ouyes enuoyer les Conseillers en vne prison close. Que Dieu l'auoit chastié par la main de celuy du ministere duquel ils'estoit aydé pour faire ces emprisonnemens. Mesme que tout ainsi que le dixiesme de Iuin il auoit faict ceste honte à la Cour de Parlement, aussi le dixiesme Iuliet ensuyuant, iour pour iour, il estoit allé de vic à trespas. Ainsi deuifoyent les aucuns du peuple selon leurs passions particulieres de ceste mort: ne cognoissans pastoutesfois que les mysteres de Dieu nous sont totalement cachez, & tels que pour l'imbecilité de nos sens nous les rapportons ordinairement plus à nos opinions, qu'à la verité. Mais entre autres, est chose fort digne d'estre remarquee, que tout ainsi que le dixiesme iour de Iuliet mil cinq cens quarante sept, il commença son regne par vn combat de Iarnac & la Chastegneraye, pareillement le dixiesme du mesme mois cinquante neuf il finit de regner par vn duel. Aussi semble-il que long temps auparauant (combien que ie ne sois d'aduis d'adiouster foy à telles illusions & fantasmes) ce malheur luy eust esté taisiblement prognostiqué par Hierosme Cardan, lequel en vn projet qu'il dressa de sa natiuité, luy promettoit toutes choses

aïsees sur l'aduenement de son regne, mais l'asseuroit au declin de sa vie d'une fin assez facheuse, & telle que pour la grandeur d'un Roy il se commande un silence. Aussi a couru un bruit en Cour qu'au retour du dernier voyage d'Italie de Monsieur le Cardinal de Lorraine, luy auoyent esté presentees vnes lettres de la part d'un Iuif de Rome, grandement expert & nourry en ces fantaisques presciences & diuinations, qui l'admonnestoyent soigneusement de se garder d'un combat d'homme à homme. Desquelles missiues, comme illusoires, le Roy apres en auoir ouy la lecture n'en fait compte, ne se pouuant imaginer, veu le grand rang qu'il tenoit, d'entrer iamais en un duel. Ces lettres furent deslors serrees par Monsieur de l'Aubespine, qui depuis la mort de luy les a exhibees à plusieurs Seigneurs, comme l'on dict. Et de faict l'on adioust (ie ne veux pas l'asseurer pour vray) que la Royne memoratiue de ces lettres, & du temps qui luy auoit esté designé, le supplia par plusieurs fois, que puis que les deux iours precedens s'estoient passez à son honneur & contentement, il voulust ce 3. iour se deporter de la iouste pour euiuer à tout inconuenient, & y commettre en son lieu quelque autre Seigneur. A quoy toutes-fois il ne voulut condescendre. Et comme le iour mesme qu'il fut blecé, la Royne luy eust enuoyé de sa loge Gentil-homme expres pour le prier de sa part de se contenter de ce qu'il auoit faict, il luy fait responce qu'il ne courroit

plus que ceste fois la, dont le defastre voulut qu'il fut blecé. Son corps, pour la solemnité que l'on celebre aux obseques de nos Roys, a esté exposé en la sale de parade qu'il auoit fait bastir aux Tournelles pour la magnificence des nopces. Monsieur le Connestable (esloigné de la faueur) commis à la garde d'iceluy, & à bien dire puny de la mesme punition qu'il auoit exercée apres la mort du Roy François à l'endroit du Cardinal de Tournon, Admiral d'Annebault & autres fauoris du Roy François. Quant à Messieurs de Guise, ils possèdent tout à fait nostre ieune Roy, comme celuy qui a espousé la Royne d'Escosse leur niepce, & conséquemment toutes les affaires de France passent maintenant par leurs mains. Au regard de la Royne mere elle est grandement esplorée, & tout le peuple estonné. Je prie Dieu qu'il luy plaise receuoir l'ame de ce bon Roy en son paradis, & auoir pitié par mesme moyen de tous les pauures sujets de la France, qui sont maintenant infiniment suspens & aux escoutes, pour sçauoir quelle traite prendra toute ceste histoire Tragique. A Dieu.

A Monsieur de Fossomme.



N T E N D E Z maintenant ce qui *Aduene-*
est adueni à la suite de ceste la- *ment dis*
mentable mort du Roy Henry. *petit Roy*
Je vousay par mes dernieres es- *François*
crit que soudain apres son de- *à la cour-*
cez toutes les affaires de la France ont com- *ne.*

mençé de passer par les mains de Messieurs de Guise: les obseques du defunct estans faites avec les magnificences & grandeurs à ce requises & accoustumées, la premiere chose que ces seigneurs ont eu en recommandation a esté de faire retourner Monsieur le Chancelier Oliuier en l'exercice de son estat, & d'oster les seaux au Cardinal Bertrand qui en auoit en la garde sous le regne du Roy Henry. Deslors on a commencé de poursuiure à toute pointe l'expedition du procez de Monsieur de Bourg Conseillier au Parlement. Pour le vous faire court, il a esté condamné par arrest, à mort, & depuis executé en la place de Greue deuant l'hostel de ville. A l'instant mesmes sont sur-

*Monsieur
de Bourg
Conseiller
brulé.*

*Edicts pour
mettre or-
dre contre
les heresies
qui pullu-
loyent en
la France.*

uenus plusieurs Edicts portans inhibitions & defences de faire assemblees clandestines, sur peine de rasement des maisons. Cela est pour reprimer la hardiesse de ceux qui se disent pour le iourd'huy de faire presches à la guise de la ville de Geneue. Mais pour vous dire ce qui est, ces Edicts non seulement ne les destournent de leur opinion, mais qui plus est leur accroist la volonté de faire pis. Car des lors ils ont commencé à ourdir nouveaux desseins, & tous autres qu'ils ne s'estoient iamais aduisez. D'autant qu'au lieu qu'auparauant ils obeissoient au magistrat, estimans que les feux que l'on allumoit encontre eux, fussent autant de flammeches aux cœurs de leurs compagnons, ils ont puis nagueres pensé que le temps estoit venu pour

eux, de les assoupir. Mais ie crains qu'en voulans estaindre les petits, ils en allument vn plus grand & vniuersel. L'on fait icy courir vn bruit que dans la ville de Geneue a esté conclud par vn Concil, qu'en matiere de religion, il estoit loisible au sujet d'auoir recours aux armes pour garentir ses freres du supplice. L'on adioute cest apentis, specialement quád vn Prince souuerain n'estant en aage de maiorité, dependoit del'autorité d'autres seigneurs, que de la sienne. C'est vne pierre iet-tee au iardin de Messieurs de Guise. Ceste resolution enuoyee sous main de deçà, l'on dit que depuis a esté faite vne assemblée au village de Vaugirard pres Paris, où se sont trouuez plusieurs personages d'estoffe : & que là il a esté arresté de s'emparer du Roy à quelque prix que ce fust. Que pour directeur de ceste entreprise a esté commis vn Gentilhomme nommé la Renauldie, homme d'esprit, remuant qui par cy deuant a esprouué diuerses fortunes. Cestuy a couru par tout le Royaume, & traffiqué le cœur de plusieurs. Le point de l'exécution venu, ils ont tous conflué de toutes parts en la ville d'Amboise, en laquelle le Roy seiournoit. Il n'y a rien si malaisé en vne republique que de mener à fin vne coniuration contre l'Estat. Car ou vous la communiquez à peu de gens, & en ce cas vos forces vous manquent pour l'exécuter ; ou à plusieurs, & lors il est bien difficile que la mine ne s'esuète, & par consequent se tourne en fumee. D'ailleurs ou vous la voulez mettre à effect prompt-

*Premiere
assemblée
où fut faite
la résolu-
tion de pré-
dre les ar-
mes pour
la religion.*

tement; & il est malaisé qu'en peu de temps vous ayez en main les forces requises: ou vous le trainez en longueur, & adoncques ce seroit vn vray miracle si vos affaires ne venoyent en la cognoissance de ceux contre lesquels vous voulez vous adresser. Ainsi en est-il pris à ceux-cy. Par ce que pendant que la Renauldie faisoit la ronde par la France pour se forger des partizans, meslant l'estat avec la religion, des Auenelles Aduocat, qui auoit esté de ceste partie, aduertit Monsieur le Cardinal de Lorraine de ceste conspiration. Il en auoit desia entendu quelques bruitsfourds. Et s'en estant rendu asseuré, il fut aisé d'y remedier. La Renauldie & les siens ne sçachans leur entreprise estre descouuerte, se vindrét eux mesmes enfermer. La premiere fortune est tombee sur le seigneur de Castelnau, qui venoit accompagné du capitaine Mazere & quelques autres Gentils-hommes, lesquels passans par la ville de Tours ont esté cheualez par Monsieur de Santerre auquel auoit esté commise la garde de la ville. Et depuis furent pris par soupçon au chasteau de Noisé appartenât à vn Gentil-homme Tourageois nommé Ranné, où estoit leur rendez-vous, en attendant leurs compagnons. Ceux-cy furent decapitez dedans la ville d'Amboise. Plusieurs de leurs complices noyez, autres pendus aux creneaux des murailles, & quant à la Renauldie, tué & depuis son corps mis en quatre quartiers. On a commencé de donner à tout le nouveau monde de ceste faction le nom & tiltre de

Huguenaux. D'autant que la premiere des
couuerte que l'on en a faite a esté en la ville
de Tours, où ilsont opinion qu'il y avn
rabast qui reuient de nuit qu'ils appellent le
Roy Hugon, & y appelle l'on dés pieça Hu-
guenaux tous ceux qui sont de la secte de Cal-
uin, pour faire leurs assemblees & conuenti-
cules de nuit, comme si en cecy ils fussent
disciples & sectateurs de cest esprit. Quand
ie vous escriuy ceste lettre, les choses n'e-
stoyent passées plus outre. Qui fait que ie met-
tray aussi fin à la presente, vous priant m'es-
crire ce que l'on dit à Basle. Car il n'est pas que
ne soyez mieux informé que nous, de toutes
les deliberations qui se sont passées dans Gene-
ue, premiere source & seminaire de tous nos
maux. A Dieu.

A Monsieur de Fonssomme.

LA conspiration dont ie vousay escrit
a bien eu plus longue queue que ie
ne pensois. C'est vn fuzeau bien mes-
lé, qui sera fort à deuider. Les choses s'estans
passées dedans la ville d'Amboise de la façon
que ie vous ay aduertiy, le Roy depuis a fait
minuter vne abolition generale, par laquelle
ont esté les prisons ouuertes à tous ceux qui
estoyent prisonniers pour la parole. C'est le
terme dont nous vsons au lieu de dire la reli-
gion. Mot certainement lequel fort à propos
a peu estre accommodé à plusieurs qui sont
par cy deuant morts à credit pour trop par-

*Suite de
troubles
d'Amboise.*

ler. Au mesme temps le Roy pour plus grande assurance de sa personne a introduit pres desoy vne garde de harquebuziers François outre les anciens. Et par mesme moyen a commencé de faire rechercher contre les chefs de ceste faction. L'on a constitué prisonnier le Vidame de Chartres en la Bastille, sans que l'on en sçache la cause. On iette l'œil sur monsieur le Prince de condé, qui s'est retiré vers le Roy de Nauarre son frere. On informe diligemment contre les auteurs sans nommer qui, & fortifie l'on les auenuës d'Amboise & Orleans de toutes parts, de gendarmes. Le Roy s'est aduisé de deux choses : premiere-ment pour se fortifier par nouuelle obligation, de plusieurs capitaines, & grands seigneurs: il a fait à la saint Michel dernier dix-sept Cheualiers de son ordre, estimant que celuy seront autant de seruiteurs, auxquels il aura creance contre ceux que l'on voit sourdement fauoriser autre religion que la sienne. C'est à mon iugement vn premier desordre que l'on apporte à cest ordre. Car comme vous sçauiez l'on n'auoit auparauant accoustumé que d'en faire vn ou deux pour le plus, & encores bien rarement. Quelque temps apres il a fait assembler tous les gouuerneurs de ses Prouinces avec les Cheualiers de son ordre, tant anciens que nouveaux, à Fontaine-bleau pour deliberer sur les remedes que l'on estimeroit necessaires pour obuier à la confusion des religions. Histoire vrayement digne de vous estre racomptee plus que nulle autre.

*Premier
desbord
des Cheua-
liers de l'or-
dre de S.
Michel.*

*Assemblée
à Fontaine-
bleau sur
la police de
la France.*

Monsieur le Chancelier de l'Hospital a ouvert le pas, & la parole apres luy, prise par plusieurs autres seigneurs. Apres lesquels Monsieur l'Admiral s'est mis sur pieds, & a presenté vne requeste pour & au nō des protestans de la France, requerans par icelle le Roy qu'il luy pleust de leur permettre auoir temples pour exercer leur religion. Ceste requeste a despleu à Monsieur de Guise, qui a dit qu'elle n'estoit signee de nul homme. A quoy luy a esté respondu par l'Admiral qu'il la feroit signer par dix mille. Sur ce Monsieur de Guise replique qu'il feroit signer le contraire par cent mille personnes de leur propre sang, dont il feroit le capitaine. Cecy nous est vn certain prognostic que l'vn & l'autre (l'vn grand Prince, l'autre grand seigneur) seront quelque iour conducteurs de deux contraires partis, qui ne sont encores formez. Ainsi s'est departie l'assemblée sans conclusion; s'estât neâtmoins le Roy par là esclarcy des consciences de chacun. Maintenant commencent à courir parmy le peuple plusieurs liures, ou, pour mieux dire, libelles diffamatoires, tant d'vne part que d'autre: & aussi se sont insinuez entre nous deux miserables mots de faction de Huguenot & Papiste, que ie crains nous apporter au long aller les mesmes calamitez & miseres, que les Guelfes & Gibellins dans l'Italie, & la Rose blanche & rouge dedans l'Angleterre. A Dieu.

Vray & premier prognostic des malheurs qui depuis sont aduenus en la France.

A Monsieur de Fossomme.

*Voyage du
petit Roy
François
à Orleans.
en delibe-
ration d'ex-
terminer
l'heresie.*



LE Fontaine-bleau le Roy est ar-
riué à Paris, où il a fait venir par
deuers soy le Preuost des mar-
chands & Escheuins, leur re-
monstrant que toute son inten-
tion estoit de perdre ceux qui se trouueroyét
de ceste nouuelle opinion. Pareilles remon-
strances a-il fait au Clergé, l'exhortant d'ap-
porter semblable deuotion à son entreprise,
comme estant vne chose qui le concernoit
principalement. Sur ce il a pris le chemin
d'Orleans, tant pour estre preique exposé au
milieu de son Royaume, que aussi pour autant
qu'il a descouuert que la plus part des riches
marchands de ceste ville là ontourny argent
à la coniuration d'Amboise. Et y estant arriué
il a commencé à descourir de pleine bouche
que c'estoit contre ceste ville qu'estoit dressée
la vengeance. D'un autre costé la populace de
la France voyant que le Roy s'armoit contre
les Huguenots, a commencé de les abhorrer
à mort. A cause de quoy à son de trompe &
cry public il a esté deffendu dans Paris à peine
de la hard de n'appeller nul homme Hugue-
not. Toutesfois ces deffenses n'ont peu rien
obtenir sur le peuple : estant le temps disposé à
vne rume. Le Roy estant dans Orleans enui-
ronné de la gendarmerie, a escrit par plusieurs
fois au Roy de Nauarre & Prince de Condé
qu'ils eussent à le venir trouuer. Ils sont

contraints de s'exposer en chemin. On faict le semblable à l'endroit des Conneſtable & Admiral. Tout cecy c'eſt vn ieu couuert: par ce que ſuiuant la reſolution priſe à l'aſſemblée de Fontaine-bleau, le Roy faict contenance de vouloir conuoquer ſes trois Eſtats dedans Orleans. Ceux qui ont plus de ſentiment, iugent que c'eſt pour y attraper les minons. Car Ioudain qu'il eſt entré dans la ville, il a mis garde aux portes, s'eſt faiſi de toutes leurs armes, meſmes a fait conſtituer priſonniers le Bailly, & le Preuoſt, & pluſieurs notables marchands. Le Roy de Nauarre & ſon frere ſont arriuez, leſquels dès la ville de Poitiers ont eu aduertifſement du mal-talent que le Roy auoit encôtre eux. Le Mareſchal de Termes eſtoit là avec vn troupe de gendarmes pour les empescher de rebrouſſier chemin. Arriuez qu'ils ont eſté, ils ont receu tel viſage du Roy qu'ils s'eſtoient promis. A l'inſtant meſme l'on a baillé à Monſieur le Prince ſa maiſon pour priſon avecques gardes. Le Roy de Nauarre peu reſpecté. L'un eſt pour bien dire gardé, & l'autre regardé de telle ſorte qu'il luy ſeroit malaiſé d'euader quand il l'auroit entrepris. On a enuoyé querir Monſieur le Preſident de Thou pour faire le proceſ au Prince. Toutesſois ſagement il ne veut reſpondre deuant luy, diſant qu'il n'appartient qu'à la Cour de Parlement de faire le proceſ à vn Prince du ſang. Je ne ſçay qui luy a mis ceſte exception fuyarde en la bouche. Mais iamais homme ne fut mieux conſeillé. Par ce qu'en toute priſon d'eſtat comme ceſte-cy,

*Proceſ en-
commencé
à faire au
Prince de
Condé.*

*Maine,
Touraine
& Anjou
erigez en
gouverne-
ment.*

celuy qui a moyen de tirer les choses en longueur, y gaigne. Voyla qui se faict dedans Orleans. D'un autre costé le Roy ne voulant executer son entreprise à demy, a erigé en nouveau gouvernement le pais de Maine, Touraine & Anjou, qu'il a baillé à Monsieur de Montpensier, ennemy capital de ceste nouvelle secte, dont l'on disoit plusieurs de la noblesse estre infectez en ces lieux là. Dés sa premiere arriuee il a faict raser plusieurs Chasteaux. Monsieur de Termes est delegué pour faire le semblable en Perigord. On a aussi estably garnison tant en la ville de Roüen que de Dieppe. Plusieurs se resiouissent de ce mesnage, estimans que par ce moyen on donnera ordre à l'extirpation de l'erreur. Les autres qui preuoyent la tempeste deuoir tomber sur leur teste, s'en affligent. Mais ceux qui ont plus de nez, preuoyent que toutes ces nouveautez que l'on introduit pour exterminer vne autre nouveauté, sont vrayement les preparatifs d'une calamité generale, dont nul de la France ne sera exempt. A Dieu.

A Monsieur de Fonsomme.

E I T E S vous oncques muta- *Mort du*
 tion plus inopinée & estrange *petit Roy*
 que ceste cy? L'on vouloit *François.*
 proceder à l'instruction du
 procez de Monsieur le Prince
 à toute reste: luy comme ie

vous ay mandé ne vouloit respondre: & mes-
 mement pour se donner plus longue haleine
 appella du decret de prise de corps qui auoit e-
 sté decerné contre luy par le conseil priué: re-
 iettant sa cause en tout & par tout sur vn Par-
 lement, Cour des Pairs & Princes du sang.
 Nonobstant toutes ces remonstrances, Mon-
 sieur le President de Tou ordonne qu'il passe-
 ra outre: que tel estoit le vouloir & comman-
 dement expres du Roy, seul distributeur & or-
 dinateur de sa Iustice. Iamais pauvre Prince
 n'eut occasion de se voir plus estonné. Comme
 l'on y procedoit sans discontinuation & entre-
 cesse, il aduient sur ces entrefaites, que le Roy
 deliberant d'aller en la ville d'Amboise, & estat
 sur le point de partir, commence de se trouuer
 mal. Quoy plus? En moins de quatre ou cinq
 iours il decede, lors que toutes choses estoient
 disposees à la ruine tant du Prince que de ceux
 de sa Religion. O changemēt esmerueillable,
 & digne d'estre corné aux oreilles de nostre
 posterité! Ce ieune Roy estoit né en l'an 543.
 sur le poinct de ceste grande eclipse qui appa-
 rut cest an la. Qui fut cause que quelques ba-

*Discours
 sur la na-
 ture du
 petit Roy
 François.*

boüins courtisans, pésans flater sa fortune, luy baillerent par vne inepte rencontre pour deuise, *Inter eclipses exorior*: figurant en image le Soleil d'un costé, & la Lune de l'autre, & vn lis au milieu des deux: ne s'aduifans pas toutesfois que s'il faut adiouter foy à ces vains discours des Astrologues iudiciaires, il n'y a natiuité qui soit tant à craindre que de celuy qui naist durant vne eclipse, comme estant vn certain presage d'une fortune sinistre. routesfois sans s'arrester à telles sorties, ains à l'histoire, tout ainsi que ce ieune Roy nasquit au milieu des eclipses, aussi fut il marié au milieu d'une aigre & violente guerre que nous auions avec l'Espagnol, en l'an 558. en temps du tout esloigné des mariages: & de mesme suite mourut au milieu de plusieurs & diuers supplices qu'il alloit preparer par la France, si la mort n'eust preueni sa deliberation. Estant sa mort en cecy diuerse de celle du Roy Henry son pere, qui mourut au milieu d'une allegresse de la France, & cestuy au milieu de plusieurs troubles sôbres & mornes, en cecy toutesfois communs, qu'au Roy Henry la sale qui auoit esté preparee pour faire les festins des nopces, seruit de repôsoir à son corps: & celle qui auoit esté destinee dans Orleans pour faire le procez à plusieurs, seruit de pareil repôsoir au petit Roy François son fils. Mais pour ne m'esloigner de ma route, iamais entreprise n'auoit esté conduite plus hardiment ny de plus haute luite que ceste-cy. Car ce qui auoit esté attété par le Roy Héry, estoit vrayement quelque chose, de s'attacher à quelques

*Opinions
des hōmes
rēuersees
mesperé-
ment.*

particuliers Seigneurs du Parlement. Icy la poursuite estoit contre vn Prince du sang. En l'autre s'il ne fust decedé, on y eust besongné par l'autorité de la Cour de Parlement. Icy par l'aduis des trois estats, que l'on n'a point accoustumé d'assembler, sinon lors qu'il s'agit de l'Estat general de la France. Toutesfois en vn clin d'œil par ceste dernière mort toutes choses ont changé de face : on delaisse Messieurs de Guise, lesquels durant ce regne court, ont eu tout le gouuernement de la France entre mains. La Royne commence de manier les affaires à meilleures enseignes qu'elle n'auoit faict, le Roy de Nauarre est suiuy. Les Iuges du Prince de Condé s'en retournent sans passer plus outre. On luy veut ouurir les prisons. Luy qui auparauant delayoit, demande que son procez luy soit faict & parfait, mais pardeuant Iuges competens. Il ne se trouue ny Iuge ny partie: ils ont tous esté enseuelis dans le cercueil du petit Roy François: & non content de cela, brauant ceux qu'il pensoit luy auoir pourchassé ceste prison, il se constitue demandeur en declaration d'innocence: chose qui n'auoit iamais esté veüe ny ouye en ceste France. Le Conestable qui auparauant mādé venoit à fort petites iournees, ne sçachant à quelle fin on l'auoit enuoyé querir, soudain qu'il est aduertuy de ceste mort, commence de presser ses pas, & dès son arriuee cōme chef des armes veut casser tous ces nouueaux gardes quel'on auoit mis pres du Roy. Ceux de la Religion nouuelle (qu'ils appellent maintenant Reformee)

commencent de leuer les crestes, vray qu'avec quelque sobriété, attendant l'issuë du procez de Monsieur le Prince, duquel ie vous escriray plus amplement par mes premieres. Grande chose & digne d'estre remarquee, pour monstrier combien Dieu se ioüe maintenant de la fortune de nos Princes. L'on auoit fait expres venir le Roy de Nauarre & son frere, avec vn ferme propos de les ruiner, comme on en voyoit ja voler les esclats: & leur venuë a esté le fondement principal de la grandeur de ce Roy. Car pour bien dire ceux qui discourent sur ses actions, se font accroire que si on ne l'eust faict venir par force, à peine que iamais il s'y fust acheminé puis apres: & pendant son absence, en ceste mutation de regne il eust esté fort ailé aux Princes qui estoient presens de faire passer les choses tout autrement qu'elles n'ont faict. A Dieu.

*A Monsieur de Fonssomme, Gentilhomme
Vermandois.*

*Arrest donné en fa-
ueur du
Prince de
Condé de-
mandeur
en declara-
tion de in-
nocence.*



LE N est aduenü tout ainsi que ie le pensois. Le procez de Monsieur le Prince demandeur en declaratiõ d'innocence a esté iugé en plein Parlement. L'arrest prononcé par Monsieur le President Baillet en robes rouges toutes les Chambres assemblees, & s'y sont trouuez le Roy de Nauarre, les Cardinaux de Bourbon, Lorraine, Guise, Chastillon, les Seigneurs de Montpensier, la Roche sur-yon,

de Guise, Connestable & Admiral. Et a esté par cest arrest le Prince déclaré innocent, & auecluy la dame de Roye la belle mere, & le Seigneur de la Haye, Conseiller au Parlement l'un de ses plus fideles seruiteurs. Vous ne veites iamaistel spectacle. Chacun couroit auparavant pour le condamner, maintenant chacun, non pas pour l'absoudre, car ceste parole eust sonné mal, veu que nul ne l'accusoit, & l'absolution presuppse l'accusation, ains pour le declarer (tel qu'il se desiroit) innocent: n'ayât lors, si ainsi le faut dire, autre partie que soy-mesme, & estant demandeur & defendeur tout ensemble. Ce Prince estant, ce luy semble, au dessus du vent, se ressent de sa prison, & ne se peut taire du tort qu'il dit luy auoir esté procuré. Brief il en reiette le fait sur Monsieur de Guise. Chacun a de grands amis & partizans. Car encore que Monsieur de Guise ne tienne tel rang qu'il tenoit souz le petit Roy François, si ne se rabat-il en rien de ce qu'il est. La Royne craint que l'on n'en vienne aux prises, & pourchasse vne reconciliation entre eux. Monsieur de Guise condescend à toute cōposition, moyennant que son honneur n'y soit engagé. Il a esté arresté qu'en la presence du Roy & des Seigneurs de son Conseil, Monsieur le Prince proposeroit ce qu'il vouloit dire, & luy en a esté le formulaire prescrit. Il a dit & proposé, que celuy qui auoit esté cause & motif de sa prison estoit meschant. Monsieur de Guise luy a fait respōse, qu'il le croyoit, & au surplus que ceste parole ne le cōcernoit en rié. Sur cela ces

deux Seigneurs se sont embrassez comme reconciliez. Monsieur le Prince comme estant satisfait, & Monsieur de Guise comme ne s'estant preiudicié. Ceux qui portent cestuy-là, se persuadent que Monsieur de Guise luy a fait quelque reparation : par ce qu'ils le pensent auoir esté cause de ceste prison. Ceux qui fauorisent cestuy, dient qu'il a tres-sagement respondu : comme celuy qui vouloit dire qu'il n'y auoit nul autre qui eust esté cause de cest emprisonnement, que celuy mesme que l'on disoit auoir commis le peché. Cela regarde le particulier de ces deux Princes, quant au general de la France, on donne ordre d'assembler à la file les Estats dans la ville d'Orleans, suiuant ce qui auoit esté resolu sous le feu Roy. A Dieu.

*A Monsieur de Fonssomme, Gentil-homme
Vermandois.*

*Assemblée
des Estats
dans Or-
leans.*



En fin les Estats ont esté tenus dedás la ville d'Orleans: mais considerez, ie vous prie, combien Dieu se iouë de nous, pour suiuians les arrhemés de la lettre que receustes dernièrement de moy. Celuy qui premier mit en aduât cest aduis de tenir les Estats, fut messire Charles de marilhac Archeuesque de Viëne, persónage qui auoit esté employé à plusieurs grandes legations pour son bon sens & suffisance, & dont Monsieur le Cardinal de Lorraine faisoit grand estat. Cestuy en l'assemblée de Fontainebleau.

bleau (fust ou pour ce que les affaires de France ne se gouuernoient à son desir, ou pour quelque autre occasion) par vne belle boutée de nature fit vne forte remonstrence, par laquelle apres auoir promené toutes sortes d'aduis en son esprit, il dict qu'il ne trouuoit remede plus prompt au mal qui se presentoit que de conuoyer les Estats. C'est vne vieille folie qui court en l'esprit des plus sages Francois, qu'il n'y a rien qui puisse tant ioulager le peuple que telles assemblees. Au contraire il n'y a rien qui luy procure plus de tort, pour vne infinité de raisons, que si ie vous deduisois, ie passerois les termes & bornes d'une missiue. Ceste opinion du commencement arresta vn peu Monsieur le Cardinal de Lorraine, qui craignoit que par ce moyen on ne voulust bailler vne bride au Roy, & oster l'autorité que Monsieur de Guise & luy auoyent lors sur le gouuernement pendant la minorité du ieune Roy leur nepueu. Et de fait depuis ce temps-là il ne vit iamais de bon œil cest Archeuesque, lequel se bannit volontairement de la Cour. Toutesfois apres auoir examiné avec ses seruiteurs de quelle consequence pouuoit estre ceste conuocation des Estats, & qu'elle ne pouuoit apporter aucun preiudice au Roy, que luy & son frere auoyent rendu le plus fort, non seulement il ne reietta, ains treserostroitement embrassa ceste opinion, voire estima que ce luy estoit vne planche pour exterminer avec plus d'assurance & solennité tous les Protestans de la France. De sorte que

*Quel fruit
apporte en
France l'as-
semblée des
Estats.*

pendant quel'on faisoit le procez à Monsieur le Prince dedans la ville d'Orleans, il choisit le mesme lieu pour faire l'assemblée des Estats. En laquelle il y auoit grand danger que tout d'une main il n'y allast de la condamnation du Prince & de tous les adherans de ceste nouuelle secte. Sous ceste esperance se tramoit lors ceste assemblée : toutesfois Dieu dissipe en vn instant comme vn estourbillon ces conseils par le decez d'un ieune Roy que l'on disoit auparauant ne seruir que de masque. Tellement qu'il est aduenu qu'en ces Estats ceux que l'on vouloit chasser y ont tenu les premiers lieux, & (si ainsi me permettez de le dire) donné la loy, par leurs pratiques & menees. C'est la où ils se font faits grands, & ont commencé depuis les Ministres & Predicans se monstrier en iour à face descouuerte. La Regence a esté lors accordée tant à la Roynemere qu'au Roy de Nauarre comme plus proche Prince du sang. Mais leurs charges aucunement diuisees : par ce qu'il a esté aduisé que la Roynepourueroit aux choses tant Ecclesiastiques que seculieres qui prouenoient de la nue libéralité du Roy. Le tout toutes-fois sous le nom du Roy ; & pareillement qu'elle ordonneroit des finances. Et quant au roy de Nauarre il auroit la charge sur tous gens de guerre, pourueroit aux villes frontieres avec le nom & titre de Lieutenant general du roy par toute la France. Il y a eu plusieurs autres articles qui sont passez pour reestablier la France en son ancienne dignité, tant au fait Eccle-

fiaſtique que de la Juſtice, & autres ordres. Mais
 pour general refrain on a accordé pour cinq
 ans au Roy vn ſubſide de cinq ſols pour cha- *Contention*
 que muiſ de vin entrant dedans les villes clo- *entre la*
 ſes. C'eſt preſque le but & concluſion de telles *Cour de*
 aſſemblees, de tirer argent du peuple par vne *Parlement*
 honneſte ſtipulation du Roy avec ſes trois E- *& la Cour*
 ſtats. Et ne trouue rien qui me plaiſe tant en *des Gene-*
 tout cecy qu'une honneſte contétion qui s'eſt *raux des*
 trouuee entre la Cour de Parlement & celle *Aides ſur*
 des Generaux de la Juſtice ſur le faiſt des Aides. *la publica-*
 Car eſtant l'Edict del'impoſition de ces cinq *tion de l'E-*
 ſols apporté au Parlement pour l'emologuer, *dit de l'im-*
 il le refuſa tout à fait, comme regardant les *poſition des*
 ſubſides qui ne ſont de ſa cognoiſſance. Et *cinq ſols*
 quant aux Generaux ils diſoyent que com- *pour mui-*
 bien que ce fuſt vn ſubſide, toutes-fois il pro-
 cedoit del'aduiſ des trois Eſtats, partant fal-
 loit auoir recours au Parlement. Eſtant ceſt
 Edict ainſi promené d'une Cour à autre,
 par l'eſpace de ſept ou huit mois ſans ſortir
 effect, en fin il a eſté publié par les Generaux
 vaincus des longues importunitéz de ceux qui
 commandent. S'ils ne l'euffent point du tout
 publié, quelques mutins dient qu'ils euſ-
 ſent eſté non Generaux, ains Genereux. A
 Dieu.

*A Monsieur de Fonssomme, Gentil-homme
Vermandois.*

*Edict du
vingt-cin-
quiesme
Iuliet*

*1561 sur la
souffrance
de la reli-
gion nou-
uelle*



Le ne faut plus appeller Hugue-
nots ceux qui vacquēt à l'exer-
cice de la religion pretendue
reformee, si ce nom leur est
donné par ce qu'ils exerçoient
nuitamment leurs prieres: maintenant ils pres-
chent en plusieurs endroits à huis ouuert.
Pour le moins depuis mes dernieres ont ils
presenté requeste au Roy à fin qu'il leur fust
permis faire vne Eglise séparée de la nostre.
Le Roy a renuoyé ceste requeste au Parle-
ment pour avec les seigneurs de son Conseil y
aduiser. Là il a esté opiné fort librement d'une
part & d'autre. Les vns pour le party Catho-
lic, les autres pour ceux de la religion. Le Ca-
tholice emporté le dessus de trois voix, estant
sa resolution qu'il falloit ou suiure l'Eglise Ro-
maine comme nos ancestres, ou vuidier le
royaume avec permission de vendre ses biés.
Quand c'est venu à la relection des voix, le
murmure n'a pas esté petit: par ce que les au-
tres soustenoyent qu'en matiere de telle im-
portance, n'estoit pas la raison qu'à l'appetit
de trois voix toute la France entraist en com-
bustion. Comme estant ce bannissement im-
possible à executer, & au surplus que demeu-
rans dans la France, de les reduire à la religiō
Romaine contre leur conscience, il y auoit en
cecy tresgrande absurdité qui valloit autant

qu'une impossibilité. L'Admiral & quelques autres seigneurs ne s'en peuvent taire. Monsieur de Guise à l'opposite, bien que le temps semble combattre contre son intention, déclarera haut & clair que puis qu'il auoit esté ainsi conclud, il falloit passer par ceste determination, & que son espee ne tiendoit iamais au fourreau quand il seroit question de faire sortir effect à cest arresté. Les choses en cest estrif se sont passées sans conclusion. Mais grandement est louable ce qui a esté fait par la Roynie mere. D'autant qu'elle s'est fait apporter le scrutin des voix, & sans vouloir sçauoir les opinions des vns & des autres, les a fait brusler en sa presence : à fin que la liberté dont quelques vns auoyent usé en opinant, ne leur peust estre en vn changement de regne preiudiciable. Chose qui se conforme à ce que fait Pompee apres qu'il eut defait Sertorius, & encores plus au conseil de Constantin le grand apres la conclusion du Concil de Nice. Depuis pour contenter les vns & les autres par forme de neutralité, l'on a fait publier vn Edict au mois de Iuillet dernier, dont la substance est telle. Que defences sont faites à toutes personnes de faire assemblees publiques ou priuees, ni d'administrer les saincts sacremens d'autre façon que l'on a fait de toute ancienneté par la France. Mais en contr'-eschange il est aussi prohibé à tout homme de s'enquerir ou informer de ce que l'on fera en la maison de son voisin : semblablement de ne se mesfaire ou mesdire pour le fait de la religion, le tout sur

peine de la hard. Au demeurant qu'aucune irrotulation ne sera faite de la conscience d'autrui. Ce dernier article par expres adiousté: par ce que peu auparauant le Preuost des marchands & Escheuins de ceste ville auoyent présenté requeste au Roy, à fin d'aller par les maisons pour s'enquerir de la foy de chacun & en faire roolles. Et porte d'auantage l'Edict que tout cecy se fait par prouision, en attendant qu'autrement en soit décidé au prochain Colloque, qui se doit tenir entre les Prelats & les Ministres. Les francs Catholiques se plaignent de cest Edict, & dient que ceux de la religion nouuelle ou pretendue reformee ne pouuans estre recherchez en leurs maisons, c'est en bon langage rendre le premier article de l'Edit illusoire, & neantmoins les affranchir de la puissance du Magistrat: qui leur donnera puis apres occasion de vouloir secoier tout à fait le ioug de leur teste. Certainement ces affranchissemens graduels, & par lesquels on faulte d'un degré à l'autre, *Nescio quid monstri alunt.* A Dieu.

A Monsieur de Fonssomme.

*Colloque de
Poissy de
grand' pa-
rade & de
pers d'es-
pect.*



LA suite de ce que ie vous ay par cy deuant mandé, les Prelats se sont assemblez de toutes parts en la ville de Poissy, lieu destiné pour conferer avec les Ministres. Monsieur le Cardinal de Tournon vieux routier en affaires d'Etat ne pouuoit nullement gou-

ster ce dessein, & disoit que le plus grand mal que l'on pouuoit pourchasser à la France estoit l'ouuerture de ce Colloque. En quoy l'on ne se pouuoit excuser de double faulte : l'vne de reuoquer en doubte & ramener en dispute les articles de foy qu'il falloit tenir pour tout arrestez : l'autre d'apparier à foy les Ministres que l'on sçauoit n'auoir par succession de la primitiue Eglise, l'imposition de la main. Toutesfois Monsieur le Cardinal de Lorraine, que l'on auoit esleu pour porter la parole, s'en fait croire. Theodore de Beze a proposé pour le contraire parti, le tout en la presence du Roy, de la Royne sa mere, & plusieurs grands Princes & seigneurs & autres gens du commun peuple. Quelle issuë a pris ce concert ie ne le vous oze escrire. Les vns & les autres s'en sont retournez aussi sages & edifiez comme ils y estoient arriuez. Mais depuis les Ministres pensans auoir eu cest aduantage d'auoir esté ouys en public, se pensans par cela aucunement authorisez, parlent plus haut qu'ils n'auoyent fait. Car au lieu où auparavant ils demandoyent seulement qu'il leur fust permis de faire assemblees, ils adioustent maintenant qu'avec ce on leur baille des temples pour l'exercice de leur religion : & desia eux-mesmes s'en sont donnez en quelques villes de leur priuee autorité, sans attendre la permission du Roy. Ceux du grand marché de Meaux y ont donné la premiere ouuerture : à leur exemple ceux de Blois se sont saisis de l'Eglise de sainte Souberenne;

Commencement d'exercice à porte ouverte, de la nouvelle religion.

ceux d'Orleans des Carmes ; & dit on qu'à Montauban l'on a fait le semblable. Monsieur le Prince de Condé & l'Admiral portent en toutes choses ce party-là : Monsieur de Guise & le Cardinal son frere le contraire. Le Roy de Navarre se rend moitoyen & comme reconciliateur des deux. C'est rat en paille, chacun veut estre diuerfement le maistre, qui deçà, qui delà. Je vous mandois par l'une de mes lettres que le feu Roy auoit faict dix & sept Cheualiers de l'ordre. Ceux qui commandent maintenant se persuadent que ce sont autant d'obligez à la maison de Guise. Pour ceste cause à la saint Michel dernière soixante vn on en a fait dix & huit ou vingt autres à la poursuite & instigation du Roy de Navarre, pour faire contrecarre aux premiers. Ce mesme iour la Royne de Navarre à la veüe de tout le peuple a fait solemniser à l'usage de Geneue le mariage d'entre le ieune Rohan & la Brabançon niepce de Madame d'Estampes au Bourg d'Argentueil par Beze. Là se sont trouuez Messieurs les Prince de Condé & l'Admiral. Cest acte ainsi faict presque aux portes de Paris & de saint Germain en Laye, où le Roy sejournoit n'ayât esté controulé, a grandement accroüe le cœur des Ministres. Et de fait au mois d'Octobre ensuiuant ils ont presché hors des murs de la ville de Paris ioignant le monastere S. Antoine des champs, assistez de huit à neuf mille personnes. A leur retour s'est excitée vne sedition populaire, qui a esté aisément estachée sous l'autorité du Roy de Navarre. Ils ont de-

*Mariage du
ieune Ro-
han à Ar-
gentueil a-
uec la Bra-
bançon.*

puis passé plus outre. Car la veille de la Toussaint fut faicte vne autre assemblée deuant les yeux de tout le monde dans le logis de la Comtesse de Senigan, qui fut rempree de la preséce des Preuosts des Mareschaux & de leurs archers, pour empescher qu'il n'y eust émotion du peuple. Peu de iours apres sans se remettre aux Edicts du Roy, & enfraignans celuy de Iuillet ils ont entrepris de faire deux presches alternatifs, l'un aux Faux-bourgs de S. Marcel au lieu dict le Patriarche, l'autre hors la porte S. Antoine au lieu appellé Popincourt. Il seroit incroyable de dire quelle affluéce de peuple se trouue à ces nouvelles deuotions. A quoy Gabaston cheualier du Guet & ses archers fait escorte. A Popincourt preschent l'Aulnay & l'Estang: au Patriarche Malo & Viret. Voyans les seigneurs Catholiques qu'il leur est de necessité caller la voile à la tempeste, Monsieur de Guise tout courroucé s'est retiré en sa maison de Nantueil, le Cardinal de Lorraine en son Archeuesché de Reims, Monsieur de Nemoux en Sauoye, le Connestable à Chantilly, le Mareschal de S. André s'estoit quelque peu auparavant absenté de la Cour, pour quelques paroles d'argu qu'il auoit eu avec le Roy de Nauarre. Le bruit court que Mōsieur de Nemoux quelque peu auparauāt son partemēt auoit sollicité sous main Mōsieur le duc d'Anjou frere du Roy de s'en venir avecques luy. La Royne mere, le Roy de nauarre, Mōsieur le prince, Messieurs de Montpensier & de la Roche-sur-yon freres sont demeurez en la Cour. Monsieur le Chan-

*Mesconten-
temens des
Princes &
seigneurs
Catholicks.*

celier & Monsieur l'Admiral manient presque toutes les affaires. Cestuy-la sage politic, cestuy fauteur & promoteur de la nouvelle religion. Tout cela pour vous dire en vn mot, n'est qu'un acheminement à nouveaux troubles. A Dieu.

A Monsieur de Fossomme.

*Presches
des Hu-
guenots co-
mencent de
prouigner
impunément
par la
France.*



*Mutations
diuerses de
la vie de
Carracioli
Euesque de
Troye.*

E vous veux dire derechef que vous ne croiriez pas aisement combien de gens vont à ces presches, les aucuns par deuotion, autres par esprit de contradictiō, autres par curiosité, autres pour la nouueauté: & eux tous (si ie l'ose dire) par vne fatalité qui semble non seulement disposer, ains pousser bon gré mal gré nostre Estat à vne proche ruine. La ville de Paris domtee de la façon que ie vous ay escrit, à seruy de miroier aux autres villes, desquelles il y en a peu qui n'ayent aujourd'huy deux formes d'Eglises, l'ancienne & la nouuelle. Geneue est la seminaire dont on tire les Ministres. Ceux qui s'estoyent retirez en ceste ville la depuis xviiij. ou xx. ans pour fuir les feux, ont fait ce pendant fonds & magasin de ceste marchandise qu'ils nous estalent & debitent maintenant par la France. Sur tout ie vous veux reciter entre les signalez exemples de changement de conscience, celui d'Antoine Carracioli extrait de la famille des Melfes, lequel a quitté son Euesché de Troye pour se faire

Ministre. Mais escoutez, vous ne trouuerez pas ceste mutation trop estrange, quand vous entendrez tous les autres deportemens. D'autant que sur ces premiers ans il feit profession des armes, depuis se rendit religieux à sainct Victor, où il seruit quelque temps aux autres d'exemple d'austerité. Mais soudain qu'il fut faict Abbé, il mena vie fort dissoluë; & pour se diuersifier en toutes les façons comme vn Polype, en l'an cinq cens quarante quatre, lors que l'on craignoit dans Paris la venue de l'Empereur Charles cinquiesme, il se feit capitaine, & feit sonner le tåbour par la ville pour leuer gës: puis estant Euesque de Troyes il abandonna ceste dignité pour se reuestir de celle de Ministre. Conbien que les Catholicks ne püssent resister à la violence du temps, noz Prescheurs toutesfois ne se taisent dans leurs chaires, ains animent le peuple par leurs sermons à prendre les armes, puisque les plus grands conuiuent. Il y a vn petit religieux de l'ordre des freres Minimes nommé frere Iean de Hans (il est natif de vostre ville de S. Quentin) lequel semble seul faire teste à tous les Ministres. Car il n'y a iour qu'il n'ait presché deux fois pendant les Aduents, d'une grande facilité de langue & d'esprit, n'oubliant rien de ce qui faict à nostre cause. Il n'est pas qu'un Bachelier en Theologie n'ait entre autres articles de ses positions mis cestuy en sa tentative, Sçauoir s'il estoit en la puissance du Pape d'excommunier vn Roy, & donner son Royaume en proye, & d'affranchir ses sujets du serment

*Frere Iean
de Hans
Minime
fait teste
aux Mini-
stres.*

*Proposition
soustenuë
par vn Ba-
chelier de
Theologie.*

de fidelité qu'ils ont en luy, quand d'ailleurs il se trouue qu'il fauorise les heretiques. Ceste position extraordinaire tombee és mains de Monsieur de la Roche-sur-yon Gouverneur de Paris, il en a faict plainte à la Cour de Parlement, laquelle par son arrest du quatriesme Decembre soixante & vn, declara ceste proposition seditieuse. Et pour ce que ce Bachelier n'a peu estre pris au corps, pour auoir gagné le deuant, il a esté ordonné que le bedeau de la Sorbonne habillé d'une chappe rouge, en presence de l'un des Presidens de la Cour & de quatre Conseillers, & des principaux de la faculté de Sorbonne, declareroit que follement & temerairement ceste proposition auoit esté soustenuë: & au demeurant qu'en haine d'icelle l'on ne disputeroit publiquement de la Theologie quatre ans ensuiuans au college de Harcourt, où ceste question auoit esté debatüe. Quelque cas qu'il y ait, ceste grande Cour retient toujours sa dignité en quelque temps que ce soit, & la retenant il seroit impossible de dire combien cela sert à la manutention de la grandeur de nos Roys. A Dieu.

A Monsieur de Fonsomme.

Eschiez vous iamais en vostre Le Mini-
 ieunesse estimé veoir quelque-^{me mené}
 fois en ceste Frâce telle desbau-^{prisonnier}
 che? Que dans vne mesme ville^{au Roy,}
 il y eust exercice de deux diuer-^{retourne}
 ses religions? Mesmes dans la^{dans Pa-}
 ville capitale de France, & non seulement dans^{ris avec}
 icelle, mais que ce soit celle où l'on y ait faict la
 premiere bresche? Oyez comme les choses se
 passent encores. Je vous auois n'agueres mādē
 que frere Ieā de Hans faisoit rage de mal traiter
 nos Reformez. Rouge-aureille Preuost des
 mareschaux de l'Isle de Frâce, l'enleue vn grād
 matin, & par cōmandement de ceux qui gou-
 uernēt, le meine lié & garoté à S. Germain en
 Laye, pour aucir presché trop licentieusement
 encōtre eux. Plusieurs notables bourgeois irri-
 tez de ceste indignité se transportent en grāde
 troupe à S. Germain, demādent que leur Pres-
 cheur leur soit rendu, ce qu'ils ont obtenu. Que
 voulez-vous plus? Ce religieux est rentré dedās
 nostre ville avec tel applaudissement & cōpa-
 gnie de gens de pied & de cheual, cōme si c'eust
 esté vn grand Prince. Et le lendemain de son
 retour a esté faite vne grande procession en l'E-
 glise S. Barthelemy pour louer Dieu en sa fa-
 ueur. Cestuy, si ie ne m'abuse, n'est pas vn petit
 heurt encontre ceux de la religion. Grande
 pitié que i'vse maintenant de ce mot pour
 dire ceux de la ligue. Ce frere faict tous les

iours en ses sermons plusieurs grands trophées de sa prison. Donne à entendre fortement que ceux qui commandent ne sont si zelateurs des autres comme l'on se persuadoit : qu'il ne faut doubter de leur faire teste. Nul des autres ne s'en ose plus remuer, voyant que leur premier project non seulement n'a porté aucun coup, mais s'estoit tourné à leur honte & confusion. Or comme le temps semble se disposer à nouvelles calamitez, il me plaist de vous raconter cecy. Les Ministres n'auoyent encore eu permission de prescher sinõ les iours ouurables, craignant que si aux iours de festes ils preschoyent pendant que le peuple chommoit, ce n'eust esté faire ouuerture à nouvelle sedition. Il n'y a homme d'entendement qui ne die que ceste ordonnance estoit fort sage & politique, veu la necessité du temps. Toutes-fois les Ministres impatiens de nostre repos, commencent à crier aux aureilles des grands, que la moitié de leurs oüailles estoit affamee de la parole de Dieu, c'estoyent les pauvres maneuures qui ne pouuoient aux iours ouuriers exercer la manufacture dont ils viuoient, & frequenter leurs sermons. Monsieur de la Roche-sur-yon sage Prince, preuoyant les inconueniens qui en pouuoient s'ensuyure, leur resiste fortement : en fin voyant qu'il ne pouuoit auoir du meilleur, il quitte volontairement son Gouvernement de Paris, & le remet entre les mains de Monsieur le Marechal de Montmorency. Qui le reprend comme Gouverneur de l'Isle de France avec

*Commencement dās
Paris de la
ruine des
Hugue-
nots.*

*Journee S.
Medard.*

de grandes prerogatiues : mesmes avecques gardes, tant pour la seurte de sa personne, que pour garentir la ville de seditions. Et pour ceste mesme raison a esté estably dans Paris vn Guet perpetuel de soixante archers à gages de soixante liures par an: ausquels commande Gabaston, vaillant soldat de sa personne. Lequel pour sembler vn peu fauoriser l'autre party, acquiert de iour à autre grandement la haine du peuple. Leur requeste leur a esté enterinee, vers les festes de Noel: pendant lesquelles les Ministres voulans vacquer à l'exercice de leur religion, le lendemain du iour de Noel, voicy l'argument d'vn nouveau tumulte qui sourdit inopinément. Assez pres du Patriarche estoit l'Eglise S. Medard, en laquelle pour la solemnité du iour on carrillonne pendant que Malo preschoit. Les protestans estimans que cela se fait de propos deliberé, pour empescher que leur Ministre ne fust entendu, commencent à s'esmouuoir : & y enuoyent quelqu'vn d'entr'eux pour les prier de faire taire leurs cloches. Ne voulans cesser, on s'eschauffe. On viét aux mains dans l'Eglise S. Medard. Ceux de la religion estoient assistez du Guet & des Preuosts des Mareschaux, pour garder qu'on ne leur mesfeit, ceux-cy se mettent de la partie. Le tumulte a esté estrange. Plusieurs hommes qui naurez, qui tuez, l'Eglise saint Medard rompue, les vitres brisces, images iettees bas. I'ay horreur de vous raconter tout au long toutes les particularitez que l'on dict y auoir passé. Cela n'estoit point encores aduenu

en nos Eglises. Il y a pis. : car le battu a payé l'amende. Les gens de Gabaston & Rougeaureille ont mené par troupes prisonniers les Catholics, comme auteurs de ceste sedition, nuls des autres. Les Bourgeois de Paris en criét, disans quel'on les a taillez pour payer les gages de ce nouveau guet à leur ruine. Presentent requeste à la Cour de Parlement, à fin de leur estre faict droict sur les meurdres, emprisonnemens, vols de chappes, calices & ornemens de l'Eglise. La Cour bien empeschée de ce faict, commet deux des Conseillers, Monsieur Gayant Catholic, & Monsieur Fumée de la religion, pour en informer conjointement. Sur ces entrefaictes on a pris au corps deux de la religion nouvelle nommez les Cagers, pere & fils. En ceste confusion il est advenu que les Catholics recusent par autre requeste tous les Conseillers Huguenots : au contraire les Huguenots recusent tous les Catholics, i'vseray désormais de ces deux mots pour estre plus court, & par ce que ie voy desia les deux partis formez à la ruine de nostre France. Pour obuier au scandale, la Cour a sagement ordonné que l'une & l'autre requeste seroit lacceree, en la presence de ceux qui l'auoyent presentee. L'Eglise S. Medard comme auourd'huy sans que l'on y face le seruice diuin, comme ayant esté profanée : pour euitier à pareil inconuenient on a enioint aux Ministres de se choisir autre lieu que le Patriarche. Voila quant à la ville de Paris : mais pour le regard du general de la France, pour autant que

l'Edict

*Preparatifs pour
l'Edict du
mois de
Januier
1561.*

l'edict du mois de Iuillet estoit seulement provisional, le Roy à l'instigation de ceux quiluy assistent maintenant de conseil, a enuoyé mandemens par tous les Parlemens, a fin qu'ils eussent à enuoyer en Cour trois ou quatre des plus suffisans de leurs compagnies, pour donner leur aduis sur la closture & resolution finale du total. A ceste assemblée se sont trouuez les Connestable, Marechal de saint André, & Cardinal de Tournon, qui s'estoyent peu auparauant absentez. Ils se sont assemblez le troisieme Ianuier. Et là Monsieur le Chancelier del'Hospital a remonstré comme ceste nouvelle religion auoit petit à petit prouigné, les Edicts par le grād Roy François, par Henry son fils, par François second, pour la supprimer: toutesfois que nul de ces trois Princes n'y auoit sceu paruenir, quelques punitions exemplaires qu'ils eussent faites contre ceux qui la suiuyent. Que pour ces causes nostre ieune Roy desiroit trouuer les moyens comment il pourroit tranquilliter toutes choses: & que chacun d'eux deuoit estimer qu'il estoit venu en celieu pour establir vne republique, & non vne religion. Estant le vouloir & intention du Roy de passer toutes choses quoyement: & que l'on ouurist les moyens de bannir ceste nouvelle religion sans troubles, ou bien que les vns vesquissent avec les autres sous vn mesme Prince en amitié & fraternité. C'estoit vne proposition fort malaisée à resoudre. Toutesfois apres plusieurs & diuers discours, il a esté en fin arresté que ceux de ceste

religion quis'estoyent emparez des Eglises les rendroyent, & aussi vuideroyent des maisons, biens, & reuenus appartenans aux gens d'Eglise: pourroyent faire assemblees hors les villes tant seulement pour exercer leur religion, avec defences toutesfois de bastir temples. A la charge que toutes & quantesfois que les Officiers du Roy voudront aller à ces assemblees, pour voir quelle doctrine y seroit annoncée, qu'ils y seroyent receus & respectez selon la dignité de leurs charges. Que aucuns Synodes ou Consistoires ne seront faits linon en la presence ou par le congé de ces Officiers, ni semblablement aucuns magistrats crez, ni loix, statuts ou ordonnances par eux faites. Mais que s'ils estiment chose necessaire de constituer entr'eux quelques reiglemens pour l'exercice de leur religion, qu'ils les communiquent aux Officiers du Roy, qui les autoriseront s'ils voyent qu'il se puisse & doieue faire raisonnablement, sinon en aduertiront le Roy pour en auoir de luy congé. Ne pourrôt faire aucuns enrroulemens, soit ou pour se fortifier, ou aider les vns aux autres, ou pour offenser autrui, ne pareillement impositions, cueillettes & leuées de deniers sur eux. Et quât à leurs charitez & aumosnes, elles se feront non par cotization & imposition, ains volontairement. Qu'ils seront tenus de garder les loix politiques, mesmes celles qui estoyent receuës en l'Eglise Catholique Romaine, en fait de festes & iours chommables, & de mariages pour les degrez de consanguinité & affinité, à

*Edict de
Iannier de
4. 1561.*

fin d'euitier aux débats & procez qui s'é pour-
royent ensuiure. Aussi seront tenus les Mini-
stres se retirer par deüers les Officiers du Roy
pou iurer entre leurs mains l'obseruation de
l'Edict, & promettre de ne prescher doctrine
qui contre-vienne à la pure parole de Dieu,
selon qu'il est contenu au Symbole du Concile
de Nice, & és liures canoniques du vieil &
nouveau Testament. Leur enioignant de ne
proceder par conuices en leurs presches con-
tre la Messe, & les ceremonies receuës en no-
stre Eglise Catholique, & de n'aller de lieu à
autre, & de village en village pour y prescher
contre le gré & consentement des Seigneurs,
Curex, Vicaires, & Marguilliers: & en sem-
blable à tous Prescheurs de n'vser en leurs ser-
mons d'iniures contre les Ministres, & ceux de
leur suite. Cest Edict a esté arresté & conclud
le dixseptiesme Ianuier dernier passé: & de-
puis enuoyé par tous les Parlemens, qui l'ont
tous vnanimement receu & publiés, hormis
deux, celuy de Paris & de Prouence. Ceux or-
dinairement qui pensent bien discourir sur le
fait d'vne Republique, sont d'aduis que tout
ainsi que le fondement general d'icelle de-
pend principalement de l'establissement de la
Religion, par la crainte & reuerence de la-
quelle tout sujet est autant & plus retenu que
par la presence du Prince: aussi qu'il faut sur
toutes choses que le Magistrat empesche, ou
mutation de religion, ou diuersité sous vn
mesme Estat. Comme ainsi soit que cela ap-
porte partialitez & discordes intestines, qui

*Qu'il ne
faut vise-
ment re-
muer la re-
ligion sta-
bienne.*

se tournent en guerres ciuiles, lesquelles apportent les fins & periodes des Republicques. Si oncques ceste proposition fut brauement disputee, certainement ç'a esté lors quel'on a en-

*Difficultez
que le Par-
lement de
Paris fait
à la recep-
tion de l'E-
dict de l'a-
uiuer.*

uoyé cest Edict au Parlement de Paris: Aidé mesmes en cecy du priuilege de l'ancienneté de nostre religion, qui auoit esté continuee de main en main depuis onze ou douze cens ans en çà, de la mesme forme comme nous l'obseruons par tout ce Royaume. Sous ces persuasions & plusieurs autres, là Cour n'a voulu verifïer cest Edict. Et à ceste fin pour en faire remonstrances au Roy, ont esté deputez Monsieur le President de Tou, & Monsieur Faye Conseillers: lesquels ayant deduit particulierement deuant le Roy tout ce qui induisoit le Parlement à ne receuoir cest Edict, Monsieur le Chancelier, pour la dignité de son estat & basaage de nostre Roy, a pris la parole, leur disant: qu'il ne doubtoit point que toutes les raisons par eux representees ne fussent de grande efficace: mais qu'il les prioit de penser qu'elles n'auoyent esté oubliées en ce grand Consistoire de S. Germain: que la question qui se presentoit estoit du nombre de celles en laquelle y auoit à penser de quelque façon qu'on voulust tourner son esprit: & à vray dire, qu'en la resolution d'icelle y auoit lieu pour excuser le Magistrat de sa faute soustenant ou l'un ou l'autre party. Accordoit que le fondement d'une Repub. estoit de n'y auoir qu'une religion: mais quand les choses estoient arriuees à tel desbord, comme on les voyoit

*Remonstrances
du Chancelier
de l'Hospital
aux depu-
tez de la
Cour de
Parlemēt.*

lors par la France, qui n'admettoit cest Edict, il falloit de deux choses l'une : Ou faire passer tous les adherans de la nouvelle Religion par le fil de l'espee, ou les exterminer tout à fait, avec permission de se desfaire de leurs biens. Le premier poinct ne pouuoit estre executé pour estre ce party trop fort tant en chefs, qu'en partisans : & ores qu'il le peust estre, de fouiller la ieunesse du Roy dedans le sang de tant de ses sujets, par aduenture que deuenu grand & en aage de cognoissance il les redemanderoit à ses Gouverneurs. Et au regard du second il estoit aussi peu faisable : & quand bien il succederoit selon nostre intention, c'estoit bastir par ce Conseil autant d'ennemis desesperez que de bannis. Et quant à l'Edict de Iuillet, ores qu'il eust quelque beau pretexte, c'estoit induire les gens à vn atheisme, en leur permettant de ne frequenter les Eglises Catholiques, & neantmoins leurs tollissant l'exercice de leur religion. Parquoy pour obuier à tous ces defaux il auoit esté trouué bon d'establir en France deux Eglises, iusques à ce que Dieu nous eust reuinis en mesmes volontez : & qu'ainsi auoit esté autre-fois practiqué par Galere Maximian & Constance Empereurs, pour composer les diuisions qui estoient entre les Chrestiens & Ethniques, leur remonstrant & priant de caller la voile à la necessité presente : brieuf de tolerer ce scandale pour euitier vn plus grand : & que si en cecy on faillloit, c'estoit à l'imitation des nations circonuoisines, lesquelles en pareille necessité

*Perseuerē-
ce du Par-
lement cō-
tre l'Edict
de lxi,*

auoyent esté contraintes de faire le semblable. Ceste responce rapportee au Parlement, & les Châbres de rechef assëmbles, on ne change toutesfois d'aduis, & qui est chose à remarquer, combien qu'en l'Edict de Iuillet le party Catholien'eust passé que de trois voix, en ceste derniere deliberation il passa de xxiiij. S'estans, à mon iugement, faits sages par les nouueaux deportemens & insolences des autres, combien il importoit au public de ne relascher rien de l'ancienne religion. Cela a apporté nouuelle rumeur entre les seigneurs de Cour. Par ce que le Roy de nauarre bien qu'il ne tienné auioird'huy le gouuernement que par la faction de ceux de la religion, si semble il auoir tourné sa robbe & fauoriser l'ancienne religion. Le Prince de Condé luy fait teste ouuerte pour la nouuelle. D'un autre costé les Parisiens sont arriuez à S. Germain en Laye partialisez en deux ligues, les vns pour l'vne, les autres pour l'autre religion l'on peut dire que c'est à beau jeu beau retour. Finalement par la pluralité des voix encores il passé pour l'Edict. Et a esté commise le Prince de la Roche-sur-yon pour le faire publier au Parlemēt, avec commandement expres que là où l'on seroit refusant ou delayant de ce faire, il le feroit publier sans forme iudiciaire, assisté seulement de quelques particuliers Conseillers tels qu'il pourroit choisir. Ceste commission estoit violente: mais luy sage Prince l'a executée fort doucement, remonstrant que l'intention du Roy estoit fondee sur la necessite du temps

que la Cour de Parlement pouuoit bien connoistre ce qui se passoit deuant ses yeux en vne ville de Paris, mais n'estoit informee des plaintes qui venoyent de toutes pars du Royaume iournellement aux oreilles du Roy & de son Conseil, la priant d'aduiser sommairement & sans aucun long discours du Ouy ou du Nenny qu'elle auoit à respondre. Sur cela il a esté par commun accord aduisé que tous ceux qui auoyent assisté au conseil de Saint Germain auroyent voix deliberatiue en ce fait cy comme les autres: tellement qu'en fin il a esté ordonné que l'Edict passeroit. Vray qu'en l'exécution ils ont bien monstré que c'estoit par vn consentement forcé. Par ce que le Vendredy vingt sixiesme de Mars, iour extraordinaire de plaidoyerie, il a esté emologué avec toutes les demonstrations de contraintes. D'autant qu'avec l'Edict ont esté aussi publiees toutes les iussions du Roy. Ce que l'on n'a pas appris de faire en telles publications. D'auantage le Procureur general n'a rien requis publiquement, ains déclaré qu'il auoit baillé ses conclusions par escrit. Au moy en dequoy il a esté ordonné par la Cour que sur le reply des lettres il seroit mis qu'elles auoyent esté leuës, publiees & enregistrees, oüy le Procureur general du Roy, sans approbation toutesfois de la nouuelle Religion, le tout par maniere de prouision, & iusques à ce que par le Roy en eust esté autrement ordonné. Ainsi s'est passé cest Edict dans Paris. Car quant au Parlement de Prouence Monsieur

d'Vzez y auoit esté quelques mois auparauât enuoyé avec commission tres-ample pour le contraindre de le publier. Il y a du commencement trouué quelque obstacle par le moyé d'un Gentil-homme nommé Clichan, assisté d'un Cordelier : mais en fin tout cela s'est esuanouï en fumée, & y est l'Edict publié. Les Huguenots ont par ce moyen tout ce qu'ils demandent : & deuant qu'ils l'eussent, ils s'en estoient fait croire. Car eux-mesmes s'estoyét donné la loy de prescher aux faubourgs de Paris en deux endroits, & presque par toutes les villes de France, auparauant que d'en auoir permission par Edict. Si les Catholiques sont autant contens, ie m'en rapporte à ce qui en est. Le temps peut estre nous fera sages, mais ce sera à nos propres cousts & despens. A Dieu.

A Monsieur de Fossomme.

*Changemēt
de la volō-
té du Roy de
Navarre
contre les
Huguenots
Et pour-
quoy.*



EST-il iamais histoire qui portast de si estranges regards que ceste-cy? Mon Dieu que ie souhaiterois maintenant entre nous quelque Tite Liue Chrestien, qui d'une plume bien hardie nous enseignast cōme Dieu a voulu manifester les effects de sa puissance cachée, contre toute la prudence des hōmes! Car ainsi que les affaires se passent entre nous, vous trouuerez dans vn abyſme & confusion de toutes choses, tous les Princes auoir pour soustenement de leurs partis apporté tout ce que l'ō pouuoit souhaiter de la sagesse humaine, & au bout de cela que lors qu'ils

ont pensé estre arriuez à chef de leurs desseins, toutes leurs esperances se sont tournees à néant. Mesmes que ce sur quoy ils auoyét estably leur grandeur, a esté le fondement de leur ruine. Y eut-il oncques embusche mieux dressée que celle qui fut faicte souz le regne du Roy Henry au Parlement de Paris, ou quel'autre d'Orleans sous le petit Roy François, pour chasser & bannir ceste religiõ nouuelle, quel'õ voyoit prendre trop longues racines entre nous? Toutesfois lors que les entrepreneurs d'icelles penserent estre au comble de toutes leurs affaires, il se trouuerent tout aussi tost supplantés par les morts inopinees & casuelles de ces deux Roys. Et en ceste derniere nommément, ce quel'on estimoit deuoir estre la ruine du Roy de Nauarre, fut sa grandeur. Car si (comme ie vous ay escript) à la mort du petit Roy François il ne se fust trouué à point nommé dedans la ville d'Orleans, i'ay opinion qu'il n'eust esté appellé à ceste grandeur en laquelle nous le voyons, encores qu'ellé luy soit deuë à iuste tiltre. Voire que les trois Estats quel'on auoit delibéré lors d'assembler à la confusion & ruine des Huguenots, leur fut apres le decez du petit Roy François vn instrument de leur assurance. Or voyez maintenant comme la chance est tournée. Les Huguenots auoyent toute leur confiance sur luy. Permettez moy encores derechef vne fois pour toutes, & pour abregement de langage que i'vse enuers vous de ce mot au lieu de ceux de la religion nouuelle, ou de la religion pretenduë reformée. Ic

*Comme
Dieu a di-
uersement
rendus il-
lusaires les
conseils des
princes en
ce nouveau
remuement
de religion.*

fuis deuenu auaricieux en paroles, & les plus courtes me sont les meilleures. Ce seroit perte d'ancre & de papier de mettre trois mots pour vn seul. Doreinauât les Huguenots & Catholicks feront les termes de nos lettres, discourans entre nous deux les calamitez de ce temps. Sâs que pour cela entendions blasonner les vns ou les autres. Ils auoyent (di-je) toute leur confiance sur ce Roy, comme sur celuy, qu'ils auoyent porté sur les espaules, & entre les mains duquel ils auoyent faict tomber le gouuernement de la France par leurs brigues & menees en l'assemblée des trois Estats. Et de faict en recognoissance de ce, il auoit permis par vne cōniuece bien grande que les presches fussent faits à huis ouuert, non seulement dans Paris, ains dans la Cour mesme du Roy à saint Germain en Laye. Aussi estoit-il fort malaisé qu'il se maintint en sa grandeur, sinon par le moyen de ceux lesquels au reciproque auoient à se soustenir par l'appuy & faueur de luy-mesme. Toutesfois changeant de propos il fut le premier outil par lequel les Catholicks s'armèrent encontre les autres. Mais par ce que ce sont lettres closes à plusieurs, & que peut estre n'auetz entendu comme ces practiques se sont menees, sçachez que le Pape voyant le remuemēt de mesnage qui se faisoit entre nous, a enuoyé Monsieur le Cardinal de Ferrare, oncle de Madame de Guise, Legat en France, avec tres-amples facultez. Cela par vn tres-sage conseil, à fin que si quelques-vns vouloyēt deuenir pareilleux d'aller à Rome en ceste

Quels furent les motifs pour lesquels le Roy de Nauarre changea d'opinion contre les Huguenots.

nouvelle face d'affaires de la religion, il y eust vn Prelat entre nous, lequel pourroit supleer par la facilité & de la presence, & de sa faueur, l'absence de sa Saincteté. Aussi auons nous par deça le Seigneur de Charantonneau fils du feu Chancelier Grauelle. Cestuy Ambassadeur du Roy Philippe est, ainsi que l'on dict, gaigné par quelques grands Princes des nostres, ausquels ne plaisoit ceste diuersité de religions. Luy suiuant la capitulation prise entr'eux, se transporte trois ou quatre fois en habillement desguisé pardeuers le Roy de Nauarre: l'asseurant de la part de son maistre, que là où il voudroit prendre la protection de l'Eglise Romaine, il luy rendroit son Royaume de Nauarre, ou bié l'equiualét en assiette de païs souuerains, aussi riches & plantureux. Ceste tresme cōmençât d'estre tissüe, le Legat se met aussi de la partie: luy promettât de la part du S. Siege le Côté de Venisse, & encores luy moyenner enuers le Roy Catholic le païs de Sardaigne que le pape erigeroit en royaume là & au cas qu'il ne luy voulust rēdre le païs Nauarrois. On dit qu'à toutes ces promesses Mōsieur le Connestable & Marechal de S. André tenoyent la main pour les luy faire gouster. Que cela soit veritable comme l'Euangile, ie ne suis pas si osé de le vous mander. Mais tant y a que le bruiet commun estoit tel. Bien vous puis-ie dire qu'en vn instant on a veu & son vilage & sa volenté s'estre eschangee à l'endroit des huguenots. Car il defendit aux Ministres de plus prescher au chasteau, cōme ils s'estoyēt dōnez

loy & permission de ce faire cinq ou six mois auparavant. Mesmes en l'assemblée de S. Germain, où furent concluës les deux Eglises, il s'y opposa tant qu'il peut : mais le Prince de Condé, l'Admiral, & autres, qui lors ne tenoyent pas des derniers grades pres du Roy, luy firent contre-carre, & l'emporterent pour le regard de la publication de l'Edict. Vray qu'il n'a pas esté si tost publié, que dès sa naissance il est mort, estant (si ainsi voulez que ie le die) vn vray auorton de la France, mais qui par sa mort produira plusieurs tranches dans les entrailles de celle qui l'a produit. Le Roy de Navarre assisté de Monsieur le Connestable & du mareschal de Saint André, a mandé Monsieur de Guise, qui est pour le iourd'huy à Ioinville, pour se venir ioindre avec eux, & faire casser tout ce qui s'estoit fait au preiudice de l'Edict du mois de Juillet. Sur ces mescontentemens, la Cour du Roy, qui auoit l'espace de six ou 7. mois seiourné à saint germain, s'est rompuë pour prendre la route de Fontaine-bleau. Les vns ioyeux, les autres fachez de ce nouveau remuëment, & tous les sages grandement estonnez, pour ne sçauoir sur qui en cest orage public tombera le tonnerre. A Dieu.

*A Monsieur de Fonssomme, Gentilhomme
Vermandois.*

MONSIEUR de Guise apres *Monsieur de Guise*
auoir receu les lettres du Roy de *retourne*
Nauarre, a rebroullé son chemin *en Cour, li.*
en Cour, & à son retour passant *gué avec*
par la ville de Vassy les siens pre- *le Conne-*
tendans auoir receu quelque iniure par les *stable &*
autres, ont fait passer plusieurs au fil de l'espee, *Mareschal*
lors qu'ils vacquoyent à l'exercice de leur reli- *de S. An-*
gion. Beze en a voulu faire instance: mais *dré.*
silence luy a esté imposé par le Roy de Nauarre.
Quelques iours apres Monsieur de Guise est
arriué dans Paris, costoyé des Connestable &
Mareschal de saint André, avec vne grande
troupe de gend'armes. Il a esté receu magnifi-
quement, & avec vn grand appareil par les
Parisiens. Le Preuost des Marchands & Es-
cheuins sont allez au deuant de luy pour le
bien-veigner. Ce mesme iour le Prince de
Condé, qui estoit en la ville, est allé au Presche
avec grande compagnie en vne maison des
faux-bourgs saint Iacques, que l'on appelle
Ierusalem. Deux iours apres est arriué le
Roy de Nauarre, & le lendemain iour de
Pasques fleuries a esté faite vn procession
generale; où il estoit. Qui a donné quelque
assurance au peuple de voir restablir les cho-
ses en leur ancien estat. Pour cela les Mini-
stres ne laissent de prescher. C'est vn vray
chaos & confusion. Toutes sortes de gens tant

de l'un que de l'autre party s'assemblēt dans la ville, leurs chefs & principaux capitaines y estans. Les coups de pistolets & canons nous seruent de carillon. Les armes nous ont esté rendues, lesquelles peu auparauant auoient esté portees en l'hostel de ville par le commandement du Prince de la Roche-sur-yon. Quelque peu apres il a esté capitulé entre ces seigneurs que le Prince de Condé vuideroit le premier de la ville pour euitier aux seditions, & que le lendemain de son partement le Roy de Nauarre & les partisans feroient le semblable. Le Prince s'est retiré à Meaux, où apres auoir faict la Cene il a faict vn grand amas de gens. Le semblable ont faict l'Admiral, les sieurs d'Andelot, la Roche-foucault. Grammont remue toute la Guyenne, & Montgommery la Normandie. Quelques vns auoient conseillé à la Roynne mere de se retirer de Fontaine-bleau dans la ville d'Orleans avec le Roy & Messieurs ses freres, & là se tenir close & couuerte contre tous, iusques à ce que ils fussent entrez en quelque bonne reconciliation. Elle n'y a voulu ou osé entendre. Tellement que le Roy de Nauarre l'a retrouvée à Fontaine-bleau. Lequel aduertty que le Prince de Condé estoit passé le Lundy de Pasques au rez des murailles de Paris avec quinze cens cheuaux, & s'estoit logé à saint Denis, prit resolution de retourner dans Paris, encores que l'opiniō de la Roynne ne fust telle. Le Prince de Condé prend de la argument & pretexte de son entreprise: disant que le Roy estât detenu

prisonnier par les autres, il a chargé les armes pour le deliurer de ceste captiuité. S'il m'estoit permis de iuger des coups, ie vous dirois que c'est le commencement d'une tragedie qui se iouera au milieu de nous à nos despens, & Dieu vueille qu'il n'y aille que de nos bourses. Mais tout ainsi que tous les spectateurs cognoissent aisément les bien ou mal seances de ceux qui iouent, aussi si i'osois bonnement iuger des coups entre vous & moy, ie dirois volontiers que Monsieur le Prince a fait icy plusieurs fautes. Je ne vous diray point d'auoir changé de religion, & moins encores d'auoir prins les armes: ce sont fautes qui sont trop lourdes. Mais puis qu'il luy estoit aduenue de franchir le Rubicon, il ne deuoit desemparer, ny la ville de Paris, ny la presence de son Roy. Car celuy qui demeurera en possession de l'un ou de l'autre, aura de grands aduantages sur son ennemy. Le premier pas de Clerc que feit Pöpee en la guerre ciuile qu'il eut contre Cesar, fut quand il quitta la ville de Rome pour la laisser à son ennemy. Le Prince recognoist aucunement qu'il s'est en cecy mespris, & pour y donner ordre a surpris la ville d'Orleans, dans laquelle il pourra fort aisément assembler ses forces: ville vraiment à luy fatale, en ce que peu auparauant ils'y estoit presque veu au dessous de toutes affaires, & maintenant il y tient rang de souuerain. Cela a estonné aucunement les Princes & sieurs Catholiques. Qui a esté cause que le Roy estant à Melun, ils ont resolu de l'amener dans Paris. Monsieur le

Fautes commises par le Prince de Condé au commencement des troubles.

Connestable y est arriué le premier à basse noise, & le lendemain de son arriuee, qui a esté le quatriesme Aupil cinq cens lxij. il a faict faire monstre aux citoyens avec vne bien grâ-deioye & allegresses de tous, *Dulce bellum in-expertis*. Ce mesme iour il a fait brusler tous les bâcs, sieges & chaires de Popincourt & Ierusalem. En cet tumulte la maison de Popincourt mesmes a esté bruslee. Et deslors ont cessé les Presches des Huguenots dans la ville de Paris. Le tout non sans grandement affliger ceux de la religion l'espace de quatre ou 5. iours: pendant lesquels le Roy est entré dâs Paris sans forme d'entree royale, par ce que les affaires presentes ne le portoyent pas. On ne parle plus que de guerre. Chacun fourbit son harnois. Monsieur le Chancelier s'en contrist. Tous les autres y prennent plaisir. Quand il en a voulu parler, Monsieur le Connestable luy a dict que ce n'estoit à gens de robe longue d'opiner sur le faict de la guerre. Mais il luy a respondu, que combié que telles gens ne sceussent conduire les armes, si ne laissoient ils de cognoistre quand il en falloit vser. Responce qui ne me semble pas moins vraye, que hardie. Car il n'y a rien tant à craindre en vne Repub. qu'une guerre ciuile, ny entre les guerres ciuiles, que celle qui se faict souz le voile de la religion: mesmement pendant qu'un Roy pour sô basaage n'a puissance de commander absoluëment. Il y a trois choses que l'on doit craindre infiniment en toute principauté, immensité de debtes, minorité d'un Roy, & remuement de reli-

Combié les guerres ciuiles sont d'ageresses, & mesmes pour la religion.

de religion. Car il n'y a celle de ces trois qui ne puisse particulièrement apporter mutation d'un Estat. Combien doncques ces trois se trouués auourd'huy cōcurrer ensemble, nous doiuent elles apprestier de peur? Ie scay bien que tous ceux qui ont pris en main la defense du party Catholic, n'apportent en ceste cause qu'une sincere deuotion, toutesfois en tels accidens de guerres ciuiles on doit craindre de tous costés les euenemens d'une victoire absolüe. Celuy qui obtient une bataille soit pour ou contre son Roy, en affoiblissant son ennemy, gaigne de grâdes auctoritez & prerogatiues, non seulement sur tout le peuple, ains sur son maistre mesmes. Et c'estoit la raison pour laquelle ce bon citoyen Caton d'Utique, apres auoir fait tout ce qu'il peut pour rompre les troubles d'entre Pompee & Cesar, & n'y ayant sceu attaindre, s'estant par jeu forcé rendu partizan de Pompee, qui soustenoit l'autorité du Senat de Rome, toutes-fois il redoubtoit autant que Pompee vint au dessus de Cesar, comme Cesar de Pompee. Preuoyât que de quelque costé que fust la victoire, c'estoit non seulement la desolation & ruine de la Repub. de Rome, mais aussi le preparatif de nouvelle tyrannie à celuy qui seroit le victorieux. Ie croy que ces mesmes considerations font que Monsieur le Châcelier ne peut trouuer bon que l'on prenne maintenant les armes. Mais il ne considere pas, que quand il s'agit de la mutation d'une religion ancienne, chacun y court comme au feu, pour empes-

Que le Prince mineur doit tout craindre pendants une guerre ciuile.

cher la nouvelle : l'on estime que c'est pecher contre le saint Esprit de vouloir en cecy mesnager toutes les propositions politiques, & qu'il faut hazarder l'estat pour le garentir d'un plus grand hazard, qui frappe au corps & à l'ame, & à peu dire que c'est vne vraye folie, d'y vouloir apporter attrempance. Certainement lors que tels malheurs nous aduiennent, c'est là où les plus sage-mondains perdent le pied. Aussi ne les voyons-nous iamais que quand il plaist à Dieu de nous toucher visuellement pour nos pechez. Au demeurant ceux qui conduisent entre nous principalement le party Catholique, sont le Roy de Nauarre, les seigneurs de Guise, Conestable, & Marechal de saint André : & pour le parti Huguenot, Monsieur le Prince, l'Admiral, les seigneurs d'Andelot, & de la Roche-foucaut. Et combien que tout se face de deça sous le nom, ou du Roy, ou bien du Roy de Nauarre, toutesfois Monsieur de Guise a la plus grande part au gasteau. Comme en cas semblable de delà, l'Admiral, ores que Monsieur le Prince soit le chef. Ce sont en somme deux grands Princes du sang, freres, dont les autres (chacun en son endroit) se tergent pour paruenir au dessus de leurs intentions. A Dieu. 1561.

*A Monsieur de Fossomme Gentilhomme
Vermandois.*

MAINTENANT ce ne sont que car- ^{Feu des}
tels. Chacun pour pallier son entre- ^{troubles}
prise, & donner le tort à son enne- ^{de lxi. al-}
my, enuoye des declarations telles qu'il veut. ^{lumé gene-}
Monsieur le Prince declare qu'il auoit esté ^{ralement}
contraint de prendre les armes, non pour ^{par la Frâ-}
le soustenement de sa religion, ains pour de- ^{ce.}
liurer le Roy, & la Royne sa mere de la
captiuité en laquelle ils estoient. Les Catho-
lics d'un autre costé ont fait publier vne de-
claration enuoyee par le Roy à son Parle-
ment, par laquelle il déclaroit qu'il aduoüoit
tout ce qui estoit fait par les Princes & sei-
gneurs qui l'environnoient, tant s'en faut
qu'il soit par eux detenu en captiuité: & qui
plus est pour mettre ceux d'Orleans en leur
tort, du iour au lendemain, on a publié autres
lettres, par lesquelles le Roy veut & entend
que l'Edict de Ianuier sorte effect par tout
son Royaume, fors en la ville & banlieue de
Paris, & es autres villes où il n'y a eu exercice
de ceste religion. Le Prince de Condé a pro-
testé au contraire, & fait courir vn ample
manifeste, par lequel il declare que ce n'est
aucune passion particuliere qui le pousse, ains
la seule consideration de ce qu'il doit à Dieu,
& à la couronne de France sous le gouuer-
nement de la Royne. Sous laquelle opinion
il s'estoit voüé de remettre en pleine liberté

le Roy, & maintenir l'obſervation de ſes Edicts ſans aucune diſſimulation, meſmement celuy de Ianuier. Proteſtant que tant & ſi longuement que ceux qui s'eſtoient emparez du Roy ſeroient en ſa Cour, il ne reputoit aucunes lettres, mandemens ou depeſches venir de luy, quelque emprunt que l'on feit de ſon nom: qu'il n'entend toutesfois comprendre ſous ceſte generalité le Roy de Navarre. Et l'vnzième iour d'Auril les Huguenots ont paſſé vne aſſociation enſemble (ils ne l'ont pas voulu nommer ligue) par laquelle ils ont promis viure & mourir enſemblement iuſques en l'aage de la pleine maiorité du Roy, permettoient aux ſeigneurs du conſeil priué d'y entrer, fors à ceux leſquels pour aſſervir le Roy, auoyent nouuellement pris les armes, qu'ils reputoyent crimineux de leze Maieſté, s'il ne les deſpouilloient promptement. Ceſte declaration & aſſociation apportee à Paris, il y en auoit quelques-vns qui eſtoient d'aduis que Monsieur de Guiſe, le Conneſtable & Mareſchal ſainct André s'eſlongnaſſent de la Cour. Mais ils ne les ont voulu croire, eſtimans que celuy qui laiſſe la partie, la perd. Contre ceſte declaration ceux de deçà ont couché d'vne proteſtation plus hardie que leur premiere, par ce qu'ils dient qu'ils ſeroient à l'auenir declarez deſerteurs de l'honneur de Dieu, infideles à leur Roy, & ennemy de leur patrie, ſi par eux n'eſtoit donné prompt remede aux inuaſions & entrepriſes de ces nouveaux Chreſtiens & libera-

teurs de leur Roy. Parquoy estimoyét nécessaire non seulement pour l'aquit de leurs consciences, ains de celle du Roy, suiuant le serment qu'il auoit fait à son sacre, & pour ne confondre tout ordre diuin & humain, dont s'ensuiuroit apres la fin du Royaume, que le Roy ne deuoit authoriser diuersité de religion par la France, ains la seule Eglise Catholique Apostolique, Romaine, receüe de tous ses predecesseurs & de luy. Qu'il falloit que tous officiers & beneficiers tinssent la mesme religion, & en feissent expresse profession. Et pareillement que ceux qui auoyent chargé les armes sans l'expres consentement du Roy, & du Roy de Nauarre, representant sa personne par tout le Royaume, les deposassent, à peine d'estre declarez rebelles, Que les forces assemblees par le Roy de Nauarre seroyét entretenues pour quelque temps, dans lequel on esperoit trouuer le fruit de tout ce que dessus. Et ce fait & accomply ils estoient prests de se retirer non seulement dedans leurs maisons, ains se confiner au bout du monde si besoin estoit, apres auoir donné ce contentement à leurs ames d'auoir rendu à Dieu, au Roy, à leur patrie, & à leurs consciences, l'honneur le seruice, l'vnion, charité, & tout autre fidele office qu'ils leur deuoyent en si euident peril & nécessité. Pour auquel obuier ils estoient prests de sacrifier leurs vies & tout ce qu'ils auoyent de plus precieux en ce monde. Voila comme les vns & les autres ioüent leurs roolles, & à vray dire c'est à beau jeu beau retour

La Royne cependant ne s'endort pour pacifier toutes choses. Mais elle n'y peut attaindre. Par ce que le Prince s'est fermé en ces trois points, en l'observation de l'Edict de Januier sans restriction : que les sieurs de Guise, Connestable & Mareschal, qui ont premiers pris les armes, les quittent aussi les premiers : & finalement qu'ils desemparent la presence du Roy. Chose que feroit en cas semblable le Prince, pour ce fait estre par le Roy & la Royne rappelez ceux qu'il leur plairoit. Il est impossible de les accorder. Car qui accorderoit le premier article, ce seroit offenser la ville de Paris, à laquelle on ne veut desplaire. De quitter les premiers les armes, c'est se mettre en la miséricorde & mercy de son ennemy. Aussi que le Connestable & Mareschal dient, qu'estans constituez aux premières dignitez de la France, il n'y auoit nul propos, ni apparence que premiers ils posassent les armes. Et quant à l'ellongnement, Monsieur de Guise ioustenoit que ses offices de grand Maistre & grand Chambellan luy commandoyent d'estre pres du Roy. Mais pour apporter quelque moyen entre ces deux extremitez ils offrent que tous delaissent les armes & qu'elles demeurent és mains du Roy de Nauarre frere aisné du Prince de Condé & Lieutenant general du Roy. Pour ce fait estre resolu qui auoit du tort, non par la Cour de Parlement suspecte aux Huguenots, ains par la resolution & decret des trois Estats de la France. Le Prince de Condé n'a pas

voulu accepter ces offres. Il a opinion
 qu'on le veut tromper. Les autres font
 pareil iugement de luy, & parauanture
 ne font en cecy les vns ny les autres trom-
 pez. L'on depesche commissiions de tous
 costez pour leuer gens. En celles du ban
 & arriereban l'on dōne à entendre à la nobles-
 se que c'est pour deliurer Monsieur le Prince
 de Condé qui est detenu captif par quelques
 ames seditieuses. C'est à bien parler, troc pour
 troc, & payer les autres en mesme monnoye.
 Le Roy de Nauarre a enioint aux Preuosts des
 Marchands & Escheuins de Paris de nous
 faire assembler en chaque dizaine pour
 eslire vn Capitaine & vn Lieutenant, sous
 le commandement desquels nous serons
 tenus de garder les portes. Celuy qui a
 esté autheur de ceste discipline, est le sei-
 gneur de Brissac Mareschal de France, au-
 iourduy Lieutenant general pour le Roy de-
 dans Paris. Et par ce que les Ministres gai-
 gnoyent auparauant le peuple par presches &
 exhortations, aussi Monsieur le Cardinal de
 Lorraine a voulu faire le semblable entre nous. Il
 a premierement presché en l'Eglise nostre
 Dame, ouy d'une incredible affluence d'au-
 diteurs. Et depuis en l'Eglise saint Germain de
 l'Auxerrois toutes les feries & octaues de la
 feste Dieu par entresuite de iournees, luy
 preschant vn iour, & le lendemain le Mini-
 me dont ie vous ay cy dessus escrit : admonne-
 stant sur toute chose le peuple qu'il falloit plu-

stost mourir , & se laisser espuiser iusques à la derniere goutte du sang, que de permettre contre l'honneur de Dieu & de son Eglise qu'autre religion eust cours en la France que celle que nos ancestres auoyent si estroitement & religieusement obseruee. Ce m'a esté chose aussi nouuelle de veoir prescher vn Cardinal, comme peu auparauant vn Ministre. Il a excité grandement le peuple aux armes: Il n'est pas que les plumes mesmes des Poëtes ne s'en meslent. Brief on ne corne autre chose que feux, guerres, meurdres & saccagemens. Si Dieu ne nous regarde d'un œil de pitié, nous sommes taillez de voir bien tost cruellement iouïr des cousteaux. A Dieu.

A Monsieur de Fossomme.

Ruines
publiques
par la Frâ.
ce, sous le
pretexte
de la reli-
gion.



GRANDE & esmerueillable pitié! Nul ne couche que de la religion de dieu, du seruice de son Roy, de l'amour & pieté enuers sa patrie: & ie n'en voy vn tout seul qui sous ces beaux pretextes ne ruine totalement le Royaume de fonds en comble. Tout est en trouble & cōfusiō. Plusieurs villes se sōt prises d'elles mesmes en faueur des Huguenots, Tours, Blois, Angers, Saulmur, le mäs, Poitiers, Bourges, Meaux, Roüë, Lyon, mascō, le Haure de grace, Valéce, montauban; mesmes en la ville de tholose a esté fait vn cruel estour entre le Catholic & Huguenot, toutesfois le dessus nous est demeuré. Il seroit impossible de vous dire quelles cruantez barbaresques sont cōmises d'une part & d'autre. Où le Huguenot

est le maistre, il ruine toutes les images (ancien retenail du commun peuple en la pieté) demolit les sepulchres & tombeaux, mesmes passant par Clery il n'a pas pardonné à celuy du Roy Louys vnzieſme; enleue tous les biens sacrez & vouiez aux Eglises. En contr'eschange de ce, le Catholic tue, meurdrit, noye tous ceux qu'il cognoist de ceste secte, & en regorgent les riuieres. Il n'est pas que parmi cela quelques-vns n'excutent leurs vengeance priuees sur leurs ennemis aux despens de la querelle publique. Et combien que les chefs facent contenance de n'approuuer tels deportemens, si les passent ils par conniuece & dissimulation. La paix vaut mieux que la guerre. Celle qui est faicte contre l'ennemy estranger est beaucoup plus tolerable, que l'autre qui se faict de citoyen à citoyen. Mais entre les guerres ciuiles il n'y en a point de si aiguë, & qui apporte tant de maux, que celle qui est entreprise pour la religion, comme ie vous escriuois par mes dernieres. Il y a deux grands camps par la France. On s'est assemblé à Baujency, pour voir s'il y auroit moyen de pacifier ces troubles. Mais ceux qui s'en sont meslez s'en sont reuenus aussi peu resoluſ comme ils y estoient allez. Il est bien malaisé en telles affaires de pouoir asseurer ceux qui craignent tout. Apres la routure de ce pour-parler, tout ainsi que plusieurs villes s'estoient facilement diuerties de l'obeissance du Roy, aussi y ont elles esté puis apres d'une mesme facilité reduites. La ville de Blois a esté reprise. Monsieur de Montpensier a remis

és mains du Roy, Tours, le Mans, Angers & Saulmur. Le Marechal de S. André celle de Poitiers, & peu apres Bourges, où ila trouué plus de destourbier & resistance. Au pays de Lyonnois, Masconnois & Beaujoulois, le Baron des Adrés Huguenot commet toutes sortes de cruautéz contre les Catholics. Qui ne luy donne pas petit aduantage pour l'exécution de ses entreprises. Montbrun & Mouuant de la mesme religion font plusieurs grands exploits d'armes en Daulphiné. La Cour de Parlement par son arrest du vingt-sixiesme iour de Iuin dernier passé, a déclaré tous les Huguenots portans armes, rebelles & crimineux de leze majesté diuine & humaine. Contre cest arrest les Huguenots crient & protestent que ceux qui possèdent le Roy ont forcé la Cour de ce faire. Et en disant cela, ils cognoissent qu'ils ont esté enuoyez à l'escole, quand ayant pris les armes ils ne se ioignirent au Roy lors qu'il estoit à Fontaine-bleau donnans le loisir à leurs ennemis de le faire. On s'est depuis acheminé au siege de la ville de Roüen, dans laquelle Montgommery commandoit pour le Prince. Ceste ville a esté prise d'assaut, par le bon conseil & magnanimité du seigneur de Guise (à tout le moins le bruit commun luy en baille l'honneur.) Le Roy de Navarre y est mort d'un coup de balle, qui n'est regreté des vns ny des autres. Ceste mort a augmenté l'autorité de Mōsieur de Guise, lequel a en peu de temps gagné telle vogue & credit entre les Catholics, qu'il peut soustenir sa que-

relle de soy-mesme sans l'interposition du nom d'un Prince du sang, dont il auoit fait iusques alors pretexte. Il fait contenance d'obeir aux commandemens du Cōestable premieremēt, puis du Marechal de S. André, pour estre leurs estats affectez aux armes, mais pour en dire ce qui en est, il leur commande. Vous attendrez plus amples nouuelles de moy selon que les affaires se passeront, & que le temps m'apportera plus amples instructions & memoires. A Dieu.

A Monsieur de Fossomme.



Depuis mes dernieres le Marechal *Siege de*
de Hes Allemand a amené grande *uant Paris*
quantité de Reistres au Prince de *par les Ha-*
Condé; lequel se voyant augmen- *guenois.*
té de forces a pris son chemin vers Paris. Vray
qu'auparauant que d'y arriuer il a assiégué la
ville de Corbeil, dans laquelle il a trouué le
Marechal de saint André, qui luy a faict te-
ste. Au moyen dequoy contrainct de leuer le
siege, il s'est venu camper deuant Paris, où il a
trouué Monsieur de Guise & tous les autres
seigneurs qui l'ont receu en bonne deuotiō d'e-
stre protecteur de la ville. On s'est moqué de
ceste entreprise; que luy qui auoit failly de pré-
dre Corbeil, se vint a heurter contre Paris. Et
pour ceste cause court maintenant vn commū
prouerbe, prendre Paris pour Corbeil, quand
apres n'auoir peu venir à chef d'une petite
entreprise on se promet de paruenir à vne

grande. Le siège y a esté mis le premier iour de Decembre. Les huguenots campez aux villages de Lai, Hercueil, Cachant, Gentilly & autres des enuiron. On a remis sus plusieurs propos de paix, mais pour neant. Pédant tous ces pour-parlers les Gascôs & Espaignols sont venus au secours des Catholics. L'Anglois est arriué en Normandie pour les Huguenots, qui luy ont liuré pour gages & assurance le Haire de grace. Depuis les Huguenots ont leué le siege en deliberatiô d'aller recueillir les Anglois & les ioindre à eux. Monsieur de Guise ne les a voulu perdre de veuë, ains les a suiuy à la trace. Le dix-neufiesme de Decembre se trouuans les deux armées proches, ils se sont baillez vne bataille fort cruelle pres de la ville de Dreux. En laquelle d'entree les Huguenots voyans que nostre artillerie iouïoit, & qu'en peu de temps elle les pourroit mettre en desordre, le Seigneur de Mouy accompagné de soixante cheuaux s'est debandé de ses esquadrons, & avec vne esmerueillable resolution s'est venu ietter pesle mesle, non dans l'auantgarde, ains droit à la bataille où commandoit Monsieur le Conestable: qui a faict cesser l'artillerie. Ce que voyant le Cōestable, & que tout le fort de la cauallerie le venoit charger, il s'aduança avec grâde hardiesse pour les recevoir, mais la charge a esté si furieuse, que quelque deuoir de vaillant capitaine qu'il y ait apporté, son cheual a esté tué, luy blelé & pris, & le seigneur de Beauuais avecques luy. Le seigneur de Montberon, son quatriesme fils, le seigneur

*Bataille de
Dreux.*

Duc de Neuers, le seigneur de Giury tuez, Monsieur d'Aumale porté par terre & fort froissé, l'artillerie prise. Toutes les troupes de la bataille tant de cheual, que de piéd mises en route, mesmes les dēux regimens de Monsieur d'Aumale & du Marechal d'Ampville. Les Huguenots enorgueillis de cest heureux succez poursuiuent leur victoire iusques aux logis de quelques Catholics fuyards, & pillent le bagage. Quelques-vns dient que la vaisselle de Monsieur de Guise y a esté perduë, mais ie n'en sçay rien au vray. De là ils rechargent le bataillon des Suisses, qui s'estoient ralliez. Cela donne occasion à Monsieur de Guise (qui commandoit à l'auant-garde, & qui pour ne mettre ses gens en desordre les auoit tenus quois & serrez en rang de bataille) de debusquer de furie contre les Huguenots, où la charge a esté si à propos, qu'ils ont esté rompus & le Prince de Condé pris par Monsieur le Marechal d'Ampville. Ses Lansquenets estonnez, qui estoient en nombre de deux mille, se sont rendus à la merci de Monsieur de Guise, lesquels s'estoient peu auparauant retirez en vne cour entourée de murailles. En quoy est allé tant de temps, que la caualerie des Huguenots a eu quelque loisir de se rallier & de recharger leurs pistoles dedans vn vallon couuert d'vn petit taillis. Et ayant esté rapporté à Monsieur de Guise qu'ils pouuoient estre de quatre ou cinq cens, il delibera de les aller rompre avec le marechal de saint André. Mais comme ils marchoient ils voyent sortir beaucoup plus grand

*Mort du
Mareschal
de S. An-
dré.*

nombre montants de quinze à seize cents chevaux en deux troupes. Qui sont viement sostenus. Mesmes nos harquebuziers Catholiques arriuent tout à point pour les recueillir. En ceste rencontre ont esté tuez plusieurs grands seigneurs d'une part & d'autre: le seigneur de la Brosse vieux capitaine bien aimé de Monsieur de Guise: dauantage le Mareschal de saint André, qui auoit apporté à ceste iournee-là de tresgrands deuoirs, y a esté pris puis mis à mort de sang froid. Le malheur a voulu qu'il soit tombé entre les mains d'un Gentilhomme duquel il s'estoit pendant sa grand vogue fait donner la confiscation pour un homicide commis: & combien que ce don ne luy eust reüssy pour les empeschemens qui s'y trouuerent, toutesfois ce Gentilhomme couuât de longuemain dans sa poitrine vne vangeance, Dieu a permis que ce grand seigneur soit tombé lors à point nommé entre les mains de son ennemy, qui l'a traité de ceste façon que ie vous escriis. Qui est vne belle leçon aux grands de n'abuser de leur credit contre les petits, lors qu'ils ont le vent en poupe. Que voulez plus? L'obstination du combat a duré par diuerses charges & recharges avec variables & douteux succez, depuis midy iusques presque à la nuict close, quand les Huguenots quittans du tout la campagne avec la perte de leur chef & de leur artillerie, & laissant plus de huit mil des leurs, que morts, que pris, que blessez sur la place: ceux qui restoyent se sont retirez à deux lieues de là, ne permettant l'obscurité que

Monsieur de Guise les ait peu pourfuiure. Ni pour cela. L'Admiral ne perd le cœur, ains met (comme l'on dit) le lendemain en deliberation de retourner au combat. Mais les Reistres qui viennent en France pour s'enrichir, & nō pour mourir, n'y ont voulu entendre. Occasīō pour laquelle ils ont repris le chemin d'Orleans. Or voyez ie vous prie combien chacun est auourd'hui aheurté à sa propre ruine. tout ainsi que les Catholics se sont fait accroire d'auoir eu le dessus de leurs ennemis; aussi les Huguenots se flattent d'une mesme opinion de victoire: disant que si le Prince de Cōdé leur chef a esté pris, le semblable en est aduenu à Monsieur le Connestable chef des Catholics. Et en outre que Monsieur le Marechal de S. André est demeuré sur la place avec plusieurs autres grands seigneurs. Parquoy tout ainsi que les Catholics ont fait procession generale. dedans la ville de Paris, aussi ont faict les Huguenots dans Orleans prieres publiques, rendans actiō de graces à Dieu de ce qui leur estoit aduenu. Toutesfois s'il y a aucun qui ait rapporté quelque victoire, i'estime en ma consciēce que c'ait esté Monsieur de Guise en deux sortes, tant par la prise de Monsieur le Connestable sien amy, que de Monsieur le Prince son ennemy. I'adiousteray encores, si voulez, par la mort de Mōsieur le Marechal de S. André, par ce qu'il n'aura deormais aucun compaignon & personnier de ses victoires. A Dieu.

A Monsieur de Fonssomme.

*Achemi-
nement au
siegé d'Or-
leans.*



LE Duc de Guise est retourné victorieux dedans Paris avec vn applaudissement general de tout le peuple. Iamais Prince n'y fut accueilly de meilleur œil qu'il a esté. Il ne s'endort pas cependant sur ceste heureuse defaïcte. Mais voyant qu'il auoit maintenant derriere soy le Prince de Condé, & qu'il estimoit que la seule presence & autorité de l'Admiral ne seroit assez forte pour retenir ceux de sa suite, il a faict dresser vn Edit, par lequel le Roy rappelleroit à soy tous ses subiets, baillant la main à tout le peuple qui l'auoit laissé avec vne promesse d'impunité & de fauorable traitement. Mais pour cela il y en a peu qui ayent pris occasion de retour. Chacun a estimé que c'estoit vn artifice pour les attrapper. Tellement que la seule peur ou doute les a retenus. L'Admiral qui a cela de peculier de ne se redre iamais aux aduersitez; reprend ses premieres brisees de Normãdie pour se ioinde avec l'Anglois, duquel il doit receuoir argent pour soudoyer ses Reistres & gens de guerre. Monsieur de Guise, qui a esleué ses esprits plus haut qu'auparauant, voyant que l'impunité proposée aux autres ne les excitoit au retour, delibere de pousser de sa reste: & par ce que la principale ressource & magasin des forces de ses ennemis est en la ville d'Orleans, où l'Admiral a laissé Monsieur d'Andelot son frere pour y commander, il delibere

il delibere d'y mettre le siege. L'on fait grands preparatifs pour cela. Et croy que vous ne receurez pas si tost de mes lettres que ce sera fait ou failly. A Dieu

A Monsieur de Fonssomme.



AD MIRABLE changemēt & mutatiō de fortune! Celuy dont ie vous ay tant escrit, sur lequel le peuple fichtoit principalement les yeux, ce guerrier inexpugnable est mort, & a esté tué le plus poltronnement que l'on scauroit dire par vn portāt le nom de Poltrot. Mais entēdez ie vous prie comme tout ce malheur s'est passé. Voyant que les forces de ses ennemis estoient diuisees, vne partie estant allee avec l'Admiral en Normandie, & l'autre demeurée avec Monsieur d'Andelot pour la garde d'Orleans, il met le siege deuant la ville, où les choses luy succederent si à propos qu'il prit d'emblee le fauxbourg du Portereau, qui estoit vn hebergement fort commode pour ses gens, par le moyen duquel il preschoit grandement le seigneur d'Andelot, quoy qu'il fust tres-vaillant Capitaine. Quant à luy il estoit logé au village de S. Mesmin. Or voicy vn nouveau dessein que l'on brasse encontre luy. Dedans la ville de Lyon commandoit sous l'autorité du Prince, Monsieur de Soubize, qui auoit à sa suite vn Gentilhomme Angoulmois, natif d'Aubeterre, nommé Iean Poltrot seigneur de Meré. Cestuy

*Mort de
Monsieur
de Guise.*

auoit de longue main precogité la vengeance generale de tout son party, laquelle il n'estimoit pouuoir accomplir que par la mort du seigneur de Guise. Ils'en descouurit à son maistre, qui l'enuoya vers l'Admiral avec lettres de creance. Si cela est vray ou non, ie m'en rapporte à ce qui en est. Mais pour le moins le bruit commun est tel: dont l'Admiral ne s'est pas eslongné grandement, encores que par vn Manifeste il s'en soit voulu depuis excuser. Ayant communiqué avec luy, & le conseil pris entre eux, Poltrot vint trouuer deuant Orleans Monsieur de Guise: & luy ayant fait vne reuerence profonde luy dit que mal conseillé il auoit suiuy Monsieur le Prince; Mais que meü d'vne iuste repentance il se venoit rendre à luy, avec vn ferme propos de faire vn bon seruice au Roy. Monsieur de Guise estimant que ceste parole vinst du fond du cœur, le recueillit d'vn œil fauorable, & mesmes luy donna tel accez en sa maison, que souuentesfois il beuuoit & mangeoit à sa table. L'õ dit (ie ne l'asseure pas pour vray) que la debonnaireté de ce Prince eut tant de puissâce sur l'autre, que pour ce premier coup il perdit le cœur, & retourna tout court deuers l'Admiral beaucoup moins resolu que deuant, mesmes en deliberation d'en oublier le retour, n'eust esté qu'il fut redressé par vn Ministre plein d'entendement & de persüasion. Sous la parole duquel apres qu'on luy eut fait present d'vn bon cheual d'Espaigne, & de cent escus, & d'vne bonne pistole, il reprit le che-

min d'Orleans, où, pour le faire court, il sceut si dextrement iouer son personnage, que ce pauvre Prince retournant du Portereau apres auoir passé la riuere du Loiret, accompagné du seigneur de Rostaing, il le choisit si à propos par derriere au lieu le moins armé, à la iointure de l'espaule, que ce vaillant Prince tombant de son cheual fut emporté grandement nauré à son logis, où Madame de Guise sa femme estoit. Poltrot iusques là estoit demuré en ceruelle, mais soudain qu'il eut fait le coup se trouua tellement esperdu, qu'ayant pris la garite pour se sauuer, quelque tracastement qu'il feit toute la nuit, qui fut de plus de dix lieuës, il se trouua le matin au milieu du camp des Suisses, où s'estant bloti l'espace de trois iours entiers en vne cassine d'un pauvre vigneron dans les vignes, le Seurre secretaire du seigneur de Guise, qui s'estoit mis en queste, le prit par vn soupçon violent, tant pour l'auoir veu souuent au logis de son maistre, que pour le trouuer vestu d'une mandille de couleur perse, telle que le seigneur de Rostaing auoit figuree celle du meurrier. Cependant ce pauvre seigneur blessé à la mort est allé de vie à trespas, apres que la Royne a recherché tous moyens pour le garantir. Mourant il a fait plusieurs belles remonstrances & exhortations au Seigneur Prince de Ioin-ville son fils aîné. Son corps apporté dans Paris avec grandes lamentations au mois de Mars cinq cens lxij. à vne iournee pres de celle qu'il y estoit l'annee precedente entré

tres-glorieusement, on luy a fait vne grande pompe funebre. Son corps porté à Ioin-ville tombeau ancien de ses predecesseurs: & pour recognoissance des biens-faits qu'il auoit procurez à l'Eglise, les Doyens, Chanoines & Chapitre de l'Eglise nostre Dame luy ont ordonné pour trophée vn obit annuel qui se celebrera tous les ans le septiesme iour de Mars, qui fut le iour de son decez. Ainsi est mort ce grand capitaine & guerrier aimé & hay d'vns & autres d'vne mesme balâce, accompli certes de plusieurs grandes parties tant de la fortune que de sa valeur. Car quant à la fortune, il me semble qu'il eut en tout le cours & teneur de sa vie vn heur qui l'accôpagna iusques au dernier soupir. Par ce qu'estant appelé aux plus grandes affaires du Royaume sous le Roy Héry second, iamais il n'en entreprit vne qu'il n'e retournast avec son honneur. Quelques ans apres l'aduenement de ce bon Roy à la couronne, il luy conserua la ville de Mets contre vn long & obstiné siege de l'Empereur Charles cinquiesme, acculant toutes ses victoires de telle façon que honteux d'auoir failly à vne promesse qu'il auoit faite en vne diette aux Princes d'Allemagne de ne leuer iamais le siege qu'il n'eust pris la ville, il se despouilla des ornements & ioyaux del'Empire, choisissant vne vie solitaire & priuee. Depuis ayant esté par le mesme Roy commis pour le voyage d'Italie, ores qu'il n'en rapportast tel fruit, comme il esperoit, si ramena-il son armee saine & sauue. Ce qui n'estoit auparauât aduenu

à autre François que luy: estant l'Italie vn pays qui alleche les François à sa conqueste, pour puis leur seruir de cimetiere. A son retour il reduisit sous l'obeissance du Roy, Calais, ville auparauant estimee inexpugnable. tout d'vne suite prit Tion-ville, que l'on estimoit aussi imprenable: monstrant qu'il ne luy estoit rien impossible. Puis pendant nos guerres ciuiles reprit les villes de Bourges & Roüen, combien que ses ennemis eussent estably en l'vne & l'autre l'vn des principaux magasins de leurs forces. Gaigna la iournee de Dreux, qui luy vint si à propos, que d'vne mesme défaite il eut victoire de deux; ne luy estant pas la prise de Monsieur le Connestable, corruial de ses loianges, moins aduantageuse que celle de Monsieur le Prince, contre lequel il faisoit profession d'hostilité toute ouuerte. Et au bout de tout cecy comblé de toutes ces victoires il mourut d'vn coup de bale proditoirement, ne l'ayant ni son ennemy, ni la fortune osé tuer de bonne guerre. Car mesmes au recouurement de Bolongne contre l'Anglois il receut vn coup de lance entre le front & le nez, qui luy outreperça le chef, dont toutes fois il eschappa. A fin ce pendant que ie n'oublie que ce ne fut pas peu d'heur pour lui de mourir en ce periode, lors qu'il estoit au dessus du vent, & que la fortune iournaliere ne luy auoit encores ioüié aucun tour dont elle scait escorner les plus braues. Et s'il eut vn heur qui luy feit perpetuelle compagnie en toutes ses actions, encores l'en auoit nature

rendu plus digne. Car il fut seigneur fort debonnaire, bien emparlé tant en particulier qu'en public, vaillant & magnanime, prompt à la main, quand le besoing le requeroit, ne sçachant que c'estoit de crainte, & neantmoins si attrempé en toutes ses actions que iamais la temerité ne luy feit outrepasser les bornes de ce qu'il deuoit. Comme de fait il en feit preuue tres-ample en la prise de Roïen: mais beaucoup plus en la iournee de Dreux, en laquelle il se donna le loisir de voir mettre ses ennemis en desordre d'eux mesmes, en pourchassant la victoire qu'ils auoyent du commencement obtenue. Lesquels il chargea de telle furie, quand il veit son appoint, que le champ de bataille luy demeura. Et qui est vn point de prudence admirable, sçachant que c'estoit contre luy que les Huguenots iettoient principalement leur visée, & qu'il ne faisoit nulle doubte que son armee ne fust pleine d'espions, le soir de deuant la bataille, il declara en plein soupper sur quel cheual il vouloit monter, & de quelles armes & appareil il seroit le lendemain. Toutesfois auant que de venir au ioindre, il resigna & le cheual & l'accoustrement dont il auoit parlé à son escuyer. Dont bien luy prit. Car son escuyer fut tué, & quant à luy il reschappa pour ce coup. Au surplus Prince qui sçauoit choisir & vser de ses occasions à propos, ne les laissant aisément escouler quand il les auoit en main. Comme il monstra bien lors qu'il maria la Roïne d'Escoce sa niepce au Roy Daulphin,

& quand il vint saluer le Roy à Fontaine-bleau au commencement de ces troubles. Toutes lesquelles parties le feirent infiniment reluire entre les princes & grâds seigneurs. Or encores qu'il fust tel, si ne se peut-il pas garétir des mesdisances de ses ennemis. D'autant qu'ils luy improperoyent que le voyage d'Italie par luy brassé auoit esté le commencement ; & son dernier retour en la Cour du Roy, l'accomplissement de nos maux : disans que tout ainsi que sa venuë nous auoit apporté les troubles, aussi sa mort nous auoit tout aussi tost moyené vne paix. Mais ceux qui sans exception & reserve vouloyent faire trouuer ses œuvres loüables, disoyent que pour le regard du voyage d'Italie, il n'en auoit esté l'auteur, ains le Pape, & qu'il n'auoit esté que l'exécuteur en cecy des commandemens du Roy. Et quant à ses deportemens derniers, ceux qui en faisoient mal leur profit, ne consideroyent pas que si par vne nouvelle liberté de leur conscience, ils s'estoyent dispensés d'exercer à huis ouuert par tout le Royaume leur religion, auparauât qu'il y eust Edict qui leur en donnast la permission, & cōtre les inhibitions expresses de celuy du mois de Iuliet, il ne falloit pas trouuer estrange que ce Prince pour la manutention de l'ancienn'en'eut rien oublié en arriere. Mais pour laisser les particularitez qui le concernoyent, m'estant sans y penser mis à l'effor, l'on a fait le procez à Poltrot, lequel par arrest a esté condamné à estre tiré à quatre cheuaux en la Greue. Aussi quelque peu apres le decez

du Sieur de Guise on a mis en deliberation de faire vne paix, pour à laquelle paruenir il n'y a pas eu grande resistance. Par ce que Monsieur le Prince & Monsieur le Connestable prisonniers n'apprehendoyent point tant la querelle du public, que leur liberté ne leur fust plus chere. La paix a esté faite dans la ville d'Amboise le dixneuuesme de Mars cinq cens soixante & deux, verifiée au Parlement le vingtseptiesme, par laquelle toutes les iniures prouenans des troubles sont remises & pardonnees, tous arrests & iugemens donnez contre ceux de la religion cassez, chacun d'eux remis en ses biens, prerogatiues & dignitez. Le Prince de Condé, l'Admiral, & autres seigneurs de leur association tenus pour bons & loyaux sujets du Roy : & tous les deniers par eux leuez pour le deffroy de la guerre alloüez. Qu'ils remettroyent és mains du Roy toutes les villes par eux prises, esquelles toutesfois il leur seroit loisible d'exercer leur religion, & quant aux autres leur seroit assigné en chaque siege Presidial vne ville pour l'exercice d'icelle : fors & excepté dans la ville, Preuosté & Viconté de Paris, en laquelle neant-moins nul ne pourroit estre recherché de sa conscience pour le fait de la religion. Pourroyent les Barons, Chastelains, hauts Iusticiers, & seigneurs tenans plein fief de Hautbert exercer leur religiõ en leurs maisons avec leurs sujets, quilibrement & sans contrainte s'y voudroyent trouuer, & autres seigneurs ayans simples fiefs, pour eux & leurs familles

seulement. Defenses à ceux de la religion de ne troubler les Ecclesiastiques en leurs benefices, ny en leur seruice diuin. Et prend le Roy les vns & les autres d'une mesme balance en sa protection & sauuegarde, comme les vrayz & loyaux sùjets. Cest Edict de Pacification publié, on a diuersement delegué par les Prouinces vns & autres Conseillers du Parlement, iusques au nombre de deux en chacune, pour l'executer promptement sur les plaintes qui se pouuoient presenter des particuliers, pour lesquelles vn Parlement seul n'eust pas esté suffisant, qui eust voulu tirer les choses au train ordinaire de Iustice. Et par mesme moyen ont esté remis en pleine liberté, Messieurs le Prince de Condé & Connestable, ensemble les prisons ouuertes à tous autres prisonniers. Et tous d'un commun accord tant d'une que d'autre religion se sont acheminez à la recouffé de la ville du Haure de grace occupee par les Anglois, laquelle leur a esté quelque peu apres rendue. A Dieu.

A Monsieur de Fonssomme.



Ncores ne me puis-ie estächer, & faut que ie discoure derechef avec vous de quelle façon Dieu se ioüe entre nous des pensees de nos Princes & gräds seigneurs. Si i'ay bonne memoire, ie pense vous auoir par l'une des mien-
 nes discouru qu'apres la mort du petit Roy

*Comme
Dieu s'est
diuersemēt
ioüé tant
des Catho-
liques que
Hugue-
nots.*

François les Huguenots auoyent fiché toute leur esperance dessus le Roy de Nauarre, lequellors pour plusieurs raisons estoit en mauuais mesnage avec Monsieur de Guise leur ennemy iuré, toutesfois au mesme point qu'ils pensoyent auoir obtenu tout ce qu'ils desiroyent, ie veux dire que leur religion auoit esté authorisée par l'Edict du mois de Ianuier, Dieu permit que le Roy de Nauarre changeât d'opinion s'vnist avec Monsieur de Guise, & que ce fut le premier pretexte pour les affliger. Maintenant c'est toute autre histoire, qui prouient toutesfois d'un mesme mystere. Par ce que les Catholics (qui auoient apres Dieu toute leur fiance sur monsieur de Guise) pensoient auparauant que les Huguenots fussent en peu de temps abyfmez, maintenant leur protecteur a esté meurdry, & par sa mort se sôt anichilez tous les desseins qui estoient prests de sortir effect encontre les autres. Dieu n'a pas permis que la ville d'Orleans fust prise, pour ne reduire les Huguenots au dessous de toutes affaires. Il a encores hebeté les sens de Poltrot apres auoir faict sa tasche, à fin qu'il contrast des choses à ses iuges lesquelles continueront (comme il est vray-semblable) la querelle de pere à fils. A peu dire nous ne sommes au bout de nos maux. Madame de Guise accompagnée de Messieurs ses enfans & de plusieurs liens parens s'est prosternée deuant le Roy, à fin que iustice, luy fust faite encontre Monsieur l'Admiral, qu'elle disoit auoir esté auteur de ceste proditoire mort. Et a encore

*Madame
de Guise
demande
iustice de
l'assassin
commis en
son
marry.*

présenté requête à la Cour de Parlement à *Si l'assassin*
mesme fin. Chacun s'y trouue bien empesché. *commis en*
Comme nulle cause n'est presque sans Aduo- *la personne*
cat. Ceux qui portent le party Huguenot, *de son en-*
soustiennent que cela est effacé par l'Edict de *usmy est*
Pacification : & qu'il n'y a rien d'insolent, & *excusable,*
qui ne soit faisable contre son ennemy. Qu'ain- *doublé opé-*
si fut Cesar assassiné à l'impourueu par Caius *mon.*
& Brutus, ainsi entre nous, le Roy Sigibert
dans Soissons par la pratique & menée de la
Royne Fredegonde sa belle sœur : ainsi Holo-
fernes par Iudith, meurdre toutesfois tant ho-
noré dedans le vieil testament. Sôme que quād
on est constitué en termes de desespoir, on ne
dispute pluss'il faut vaincre par vertu, ou par
tromperie. Les autres disent à l'opposite, que
cest exéple est indigne d'un cœur genereux, &
se preualent de la responce d'Aristides deuant
le peuple d'Athenes contre le conseil de The-
mistocles, de celle de Sexte Pompee à son pilo-
te, lors qu'il auoit Auguste & Marc Antoine
en sa deuotion dedans les nauires : de la ma-
gnanimité de Fabricius contre le medecin du
Roy Pyrrhus, de celle de Camillus quand il
chastia la trahison du pedagogue des enfans de
bonne maison des Faleriens qu'il tenoit assie-
gez, & d'une infinité d'autres exemples. Et
à peu dire renuoyent ceux qui font profes-
sion de religion à la lecture des Offices de
sainct Ambroise, pour apprendre combien
tels actes sont mal agreables à Dieu & au mô-
de. Monsieur l'Admiral, sur lequel on veut
faire tomber ceste reparation, a enuoyé vn

Manifeste en Cour, par lequel il n'aduouë pas franchement auoir consenty à ceste mort, mais aussis'en defend-il si froidement que ceux qui luy veulent bien, souhaiteroyent, ou que du tout il se fust teu, ou qu'il se fust mieux defendu. De luy faire son procez, le rang qu'il tient auiourd'huy, & l'Edict semblent y resister : de passer aussiles choses par conuiuece, il semble que le sang & les merites du defunct l'empeschent. Si n'en sera-il pour ceste heure autre chose : parce que le temps n'est disposé à en auoir reparation, A Dieu.

A Monsieur de Fonssomme.

Cōme toutes choses rroyēt aux Huguenots soudain apres la mort du Duc de Guise.



L semble que toutes choses fauorisent maintenant ceux de la religion pretendue reformee, leur fort & puillāt ennemy tué : l'Edict de Pacificatiō faict à leur aduantage : le Prince de Condé & l'Admiral demeurez sur pieds : la generale surintēdāce des affaires de Frāce sans cōtrole demeuree par deuers la Royne, qui ne demāde que la paix ; nul ennemy qui sēble à face descouuerte s'opposer à leur entreprise. Car encores que quelques seigneurs de poix ne puissent gouster cest Edit, si est-ce que les calamitez de treize ou quatorze mois les tiennent aucunement retenus. Et quant au Connestable bien qu'il n'approuue ce party-là, toutesfois son infortune derniere ne le rend si eschauffé comme auparauāt. Ioint que le malheur de la guerre luy a osté ses allo-

ciez, & voit que les chefs de l'autre costé sont ou ses parens, ou ses alliez. Les villes ont esté renduës, les presches diuersement establis au vouloir & intention de l'Edict, le Prince de Condé chery & honoré en Cour, les gens de guerre licentiez, le peuple condamné à les destrayer, les cinq Presidens de la Cour de Parlement de Paris ont esté faicts Conseillers du conseil priué, à fin de ne s'eslongner tant des affaires d'Estat, comme ils faisoient auparauant. Tous les Estats de Monsieur de Guise distribuez aux siens : au Prince de Ioinville son fils aîné, l'Estat de grand Maistre : à Monsieur de Mayenne son second, celui de grand Chambellan : à Monsieur d'Aumale son frere l'office de grand Veneur. Pour reparer la bresche faite par les troubles, & fournir au defroy de la guerre, on faict vne autre nouvelle bresche. L'on vend, par Edict, du domaine du bien de l'Eglise iusques à trois millions de liures. chose à quoy dix ans auparauant on n'eüst seulement osé penser. Le Parlement en a faict plusieurs refus : en fin il a esté publié. Ce n'est pas vn autre petit aduantage pour les Huguenots, lesquels estiment qu'en affoiblissant le Clergé, leur causes'en fortifie. La pluspart d'entr'eux court à l'enuy aux acquisitions de ce bien. Le Cardinal de Lorraine ce temps pendant ne dort pas en la ville de Trente, où le Concil general a esté en fin clos & arresté par sa diligence. Le bruit est qu'il sollicite le Pape, le Roy d'Espaigne, & les Venitiens à la ruine des Huguenots. Entre nous le peuple, qui ne peut aisémēt

*Premier
Edict sur
l'alienatiō
du bien de
l'Eglise.*

tolerer deux religions, se remue en quelques endroits. Il y a eu quelques seditions au Mans & à Troye : spécialement dans Creuant petite ville de Bourgongne il y a eu quelques Huguenots tuez & noyez. En ce mesme pays de Bourgongne quelques-vns ont faict contenâce de se liguier sous le nom de la confrairie du S. Esprit. L'Edict de Pacification estoit en plusieurs endroits de la France enfreint. On s'est assemblée dans Paris pour y donner ordre en presence de Monsieur le Prince, & pour donner auis sur l'interpretation de l'Edit. Finalement il a esté arresté, que nul seigneur ne pourroit faire exercice de la religion nouvelle es terres qu'il auoit de nouuel acquises de l'Eglise, ny pareillement en celles qui tenoyent & mouuoient d'elle. D'auantage combien qu'il eust esté dict en pacifiant les troubles que nul ne pourroit estre recherché en sa conscience, toutesfois l'on n'auoit entendu sous cest article comprendre les Moines ou Nonnains, qui pendant ou depuis les troubles s'estoyent defroquez. Auxquels est enioint sur peine de punition corporelle de retourner en leurs monasteres, ou vuidier de la France. Que nul ne pourra estre Ministre en ce Royaume, s'il n'est naturel François. Ceste declaration a apporté quelques nouveaux tintouins en la teste des Huguenots. Le Prince toutesfois y consent, auquel la Royne gratifie par toutes sortes d'aggreables faueurs. Quoy faisant elle y gagne plus que feu Montieur de Guise par les armes. Voila quant au fait de la religion.

*Restriction
sur l'exer-
cice de la
religion
nouuelle.*

Au regard de la police commune de la France, on s'est aduisé de plusieurs noualitez pour trouuer deniers. On faict l'Edict des hosteliers, celuy de la subuention des procez est passé, qui est que pour chaque procez, dont la demande excède cent liures, on paye cent sols, & au dessous de cent liures, quarante sols. Le Roy a decerné sa commission à quelques Conseillers du Parlement, maistres de la Chambre des Comptes, & Generaux de la Iustice, pour faire le procez aux Financiers, lesquels, apres l'execution à mort de quelques-vns, pour se redimer ont obtenu vne abolition generale du Roy (quel'on appelle composition) moyennât quatre cés mille liures qu'il leur a esté permis d'asseoir au sol la liure sur tous ceux qui auoyent manié les Finances dans le temps de la recherche de ceste commission. La cognoissance de cecy est renuoyee aux Generaux des Aydes. On vouloit que l'innocent fut cottisable, aussi bien que celuy qui se sentoit coupable. Il a passé par les arrests que nul ne seroit cottisé, sinon qu'il se voulut ayder du benefice de l'Edict. Les Ecclesiastiques offensez du desordre qui auoit esté apporté en la premiere alienation de leur domaine, ont obtenu nouuelle permission de reuendre leurs terres les moins incommodes, pour racheter celles qui auoient esté vendues sur eux, avec vne bien grande desbauche. On auoit permis par le premier Edict d'acheter d'eux toutes sortes de terres, fors leurs chefs lieux. En quoy aucunes Eglises se trouuoient foulees à la charge des

*L'Edict de
la subuen-
tion des
procez*

autres. Il leur a esté permis proceder par également au feu & pro rata du reuenu des Eglises. Ils ont à cesté fin créé des Syndics Generaux du Clergé pour proceder à l'exécution de l'Edict par tout le Royaume, & des particuliers en chasque Euesché. C'est à bien parler l'establissement d'une belle police pour obuier à vn mal present : laquelle continuant, leur seruira à la longue de ruine vniuerselle. Cuidans sortir d'un mal passager, il y a danger qu'ils n'engaigent eux & leur posterité à iamais, & facilitent la voye aux grands, pour proceder à telles alienations dangereuses. C'est ce que ie vous puis debiter pour le present en bloc & en tasche. Vn autre plus riche marchand, vous pourra avec plus de parade estaller ceste marchandise tout de son long. Encores penserez-vous en vous mesmes que ie sois plein de bien grand loisir, d'auoir peu remarquer toutes ces particularitez pour les vous escrire. A Dieu.

A Monsieur de Fonssomme.

*Voyage du
Roy Char-
les neuief-
me par la
France.*



OMME les affaires de France estoient mesnagees de la façon que ie vous ay escrit par mes dernieres, le Roy ayant les aureilles infiniment rabatuës des plaintes que luy faisoit tantost le Catholic, tantost le Huguenot à son tour, delibera de se promener par toute la France, & voir mes Dames ses deux sœurs. Il est allé premierement en la Lorraine,

Lorraine, où il a tenu vn sien nepueu sur les fons. De là il a rebrouillé vers le Lyonnais, Dauphiné, Prouence, Languedoc. Sa resolution est de se trouuer à Bayonne avec le Roy Catholique, ou la Roynes sa femme. L'on donne ordre de demanteler la plus part des villes qui auoyent esté occupées par les huguenots, mesmement celle d'Orleans, en laquelle on a fait eriger vne Citadelle, & en la ville de Lyon, pour par ce moyen contenir le peuple en crainte, & obuier à tous nouveaux enuahissèmens. Mais ie crains qu'à la longue ceste inuention se tourne au dommage de ceux pour lesquels elle a esté mise sus. D'ailleurs pour asséurer le Roy on a destiné à sa suite vn regiment de gens de pied, contenant huit compagnies sous la conduite du Capitaine Charier. Le voy de iour à autre rongner les ongles à ceux de la religion. Defenses leur ont esté faites de faire presches aux villes es- quelles le Roy seiourneroit. Par autre Edict fait à Roussillon, le Roy pour la seconde fois apportant explication à celuy de Pacificatiō, a déclaré auoir entendu permettre aux Gentilshommes Huguenots exercer leur religion en leurs maisons pour eux, leurs familles & sujets seulement. Defences à eux d'y admettre aucuns estrangers, & aussi de leuer deniers, & aux Ministres d'assembler Synodes. Veut & ordonne que tous Religieux & Prestres qui s'estoyent durant les troubles mariez, retournent à leur ancien estat dans deux mois, abandonnans celles avec lesquelles ils s'estoiēt

*Nouvelles
polices par
la France
pour assen-
rer l'Estat
du Roy.*

*Retranche-
ment des
presches
des Hugue-
nons.*

conioints par mariages, sur peine de punition corporelle. Pour cela ils ne laissent de suivre leur trace, & se persuadent qu'il n'est en la puissance du Magistrat de leur prescrire & limiter temps ni lieu où ils doyent seulement vaquer à leurs prieres, & pour ceste cause preschent mesmement dans Paris, vray que c'est en cachette. En fin le Roy est arriué à Bayonne, où il a esté visité par la Royne d'Espaigne sa sœur, où l'on a exercé d'une part & d'autre plusieurs grandes magnificences. Les Huguenots se persuadent que ceste veüe ne se fait qu'en leur ruine, & pour iurer vne ligue Catholique entre ces deux Roys. Si cela est vray l'on peut dire que Bayonne fut la dernière des villes de la France, qui fut des mains des Anglois reduite sous l'obeissance de Charles vij. & la première maintenant dans laquelle se renouïeront les guerres ciuiles, qui pourrôt apporter la desolation de l'Estat sous Charles ix. Toutesfois à l'issuë de là, ni le Roy, ni la Royne, n'ont fait aucune demonstration de nouveau dessein à leurs subiects. Au contraire par toutes les voyes à eux possibles se sont estudiez à la reconciliation de la maison de Guise, avec celle de l'Admiral : & à cest effect a esté tenuë vne assemblee generale dedans la ville de Moulins, où apres auoir donné reglement sur quelques poincts de la Iustice, l'Admiral a esté déclaré innocent de la mort de Monsieur de Guise, & enioint aux deux familles des'entr'aimer. Monsieur le Chancelier fait ce qu'il peut, & non ce qu'il desireroit. Par

*La ville de
Bayonne
fatale à
l'Estat.*

ce qu'il souhaiteroit que toutes choses s'entre-
tinissent de mesme balance à bon escient &
sans dissimulation, entre ces sourdes diuisions,
à fin de n'exciter nouueaux troubles. Je croy
que son opinion ne sera suiuiue. A Dieu.

A Monsieur de Fonssomme.



VOUS auez entendu le voya-
ge du Roy par la France, du-
quel Monsieur le Prince n'a e-
té de la partie: entendez main-
tenant ce qui s'est passé pendât
iceluy dans Paris. Il y a eu vne nouuelle dispu-
te meüe entre l'Vniuersité de Paris, & des re-
ligieux, qui depuis quelques ans passez ont
pris le tiltre de Iesuites, ou de la Société du
nom de Iesus. Mais d'autant que parauenture
ayant ouy parler d'eux, vous ignorez leur in-
stitution & progres, & que j'ay fait bõne part
de ceste cause, ie croy que par faute d'autre
sujet, vous ne ferez marri que ie vous en escri-
ue deux mots. Ignace fut vn gentilhomme
Nauarrois, qui tout le temps de sa vie auoit
suiuy les armes. Il fut nauré en la ville de Pam-
pelune. Pendant quel'on le pensoit, il s'adui-
se de lire les vies des Peres, sur le patron des-
quelles il luy prit opinion de former toute la
teneur de sa vie. Il s'accoste de quelques-vns
& entre autres de Maistre Pasquier Brouës,
de la bouche duquel j'ay appris le commence-
ment de ceste histoire estant à Croix-Fontai-
ne, en la maison de Maistre Ange Congnet,

*La cause
entre l'V-
niuersité
& les Ie-
suites trai-
tée au par-
lement.*

*Institution
& progres
de l'ordre
des Iesui-
tes.*

personnage d'honneur que i'honore, respecte & aime comme vn venerable simulacre de la preud'homie de nos anciens. Tous ceux cy iurerent vne societé ensemble, & estant Ignace guery, ils feirent quelques voyages à Paris, Rome, & Hierusalem. Finalement se retirerēt dans Venise, où ils hebergerent quelques ans, & se voyans suiuis de plusieurs, se transporterent à Rome, où ils commencerent de faire profession publique de leur ordre. Promettans entre autres articles deux choses : l'une, que leur principal but estoit de prescher aux payens l'Euangile, pour les conuertir à nostre foy : l'autre d'eseigner gratuitement les bonnes lettres aux Chrestiens. Et pour accommoder leur nom à leur deuotion, ils s'appellerent religieux de la societé du nom de Iesus. Ils se presentent au Pape Paule troisieme de la maison de Farnese vers l'an mil cinq cens quarante. C'estoit lors que l'Allemagne commençoit de s'armer pour le remuement de la religion Catholique : & parce que l'une des principales disputes des Allemans estoit sur la puissance du Pape, que Martin Luther auoit voulu terrasser, ceux cy d'une profession toute contraire remonstre-
rent que le premier vœu qu'ils faisoient estoit de recognoistre le Pape par dessus toutes les puissances terriennes, voire par dessus le Concil general & vniuersel de l'Eglise. Le Pape qui du commencement auoit fait doubte de les approuuer, & depuis leur auoit permis de se pouoir nommer religieux, mais à la char-

ge qu'ils ne pourroyent estre plus de soixante en nombre, commença à ceste promesse, de leuer l'aureille, & leur ouurir pleine porte à leur deuotion: & apres luy, Iules troisieme: iusque à ce que le Pape Paule quatrieme (dit le Theatin) qui a esté des premiers promoteurs de cest ordre, les a autorisez de tout poinct avec toutes sortes de priuileges. Or comme leurs affaires se manioient en ceste sorte, il aduiuent quel'Euesque de Clairmont enfant naturel du Chancelier du Prat, les prit en affection, & eut enuie de planter cest ordre dedans Paris, où il emmena Pasquier Brouës avec trois ou quatre autres. Pasquier Brouës (vous dy-ie) qui a esté le premier supérieur des Iesuites en nostre ville. Ceux-cy sur leur aduenement se logerent & sans grand bruit en vne chambre du college des Lombards, & depuis establirent leur habitation en l'hostel de Clairmont, rue de la Harpe, par la souffrance de celuy qui les auoit le premier introduit entre nous, celebrans leurs Messes & prieres ésiours de Dimanches & festes, en vne chapelle qui est à l'entree des Chartreux. Et voyans que leurs affaires leur succedoyent à propos, se presenterent par plusieurs fois à la Cour de Parlement, à fin que leur ordre fut autorisé par icelle. mais feu Monsieur le Procureur general Brulart s'opposa à toutes leurs requestes. Non qu'il ne fauorist entre tous les autres grandement la religion Catholique, ains par ce qu'il redoubtoit sur toutes choses & craignoit les nouveautez, comme meres de plusieurs erreurs,

mesmes en la religion. Parquoy leur remonstroit que s'ils auoyent le cœur totalement eslongné du monde, ils pouuoient sans introduire nouuel ordre se cōfiner sous les religiōs anciennes de S. Benoit, Clugny, Cisteaux, Grāmōnt, Premonstré, & autres approuuees par plusieurs Concils, ou sous les quatre mendians. La Cour non contente de ces remonstrances ne s'en voulut pas croire toute seule, ains eust recours à la faculté de Theologie: laquelle par son decret les censura, partie pour autant que quelques vnes de leurs propositions dérogeoyent aux priuileges de l'Eglise Gallicane, partie que se qualifiāns religieux, ils n'en portoyent l'habit, ni ne se confinoient comme les autres dans des cloistres. Censure qui les eslongna aucunement de leur projet. Quelques ans apres deceda l'Euesque de Clairmont, lequell leur legua par son testamēt plusieurs grands biens. Ce legs par eux recueilly, suruiennent les troubles, au commencement desquels fut assemblee l'Eglise Gallicane dans Poissy. Deslors ils commencerent d'interrompre leur long silence, & presenterent de rechef requeste à la Cour de Parlemēt pour estre receus & approuuez, sinon en forme de religion, pour le moins de simple college. Le Parlement estima que cela regardoit les superieurs de l'Eglise. Au moyen dequoy il les renuoya à l'assemblée de Poissy, où presidoit Monsieur le Cardinal de Tournon comme plus ancien Prelat. Lequel dedans la ville de Tournon auoit ja fondé vne compagnie de

leur nō. Par l'intercession d'iceluy ils obtindrent d'estre receus en forme de societé & college tant seulement. A la charge qu'ils seroyēt tenus de prendre autre tiltre que de Iesuites, & se cōformer en tout & par tout à la disposition canonique, sans entreprendre chose aucune, ni au temporel, ni spirituel, sur les ordinaires, & qu'au prealable ils renonceroient par exprez aux priuileges portés par leurs bulles. Autrement qu'à faute de ce faire, ou que pour l'aduenir ils n'en obtinssent d'autres, ceste approbation seroit nulle. Ce decret leur est emologué par la Cour mot apres mot, & selō sa forme & teneur. Peu de temps apres ils achetēt vn hostel assis en ceste ville de Paris, ruē saint Iacques, que l'on appelloit la Cour de Langres, lequel ils diuiserent en deux demeures, l'vne pour les religieux, l'autre pour les escholiers. En ceste compagnie y auoit lors plusieurs personnages doctes, entre autres frere Esmond Auger & Maldonnat, celuy là grand predicateur, & cestuy versé & nourry en toutes sortes de langues & de disciplines, grand theologien, & Philosophe. Ceux-cy enuoyez par deçà pour annoncer leur doctrine furent tres-fauorablement accueillis, & attirerent vne infinité d'escholiers à soy. Et se voyans auoir vent en poupe, presenterent requeste au Recteur de Paris, à fin d'estre vnis & incorporez au corps de l'Vniuersité. Lors fut fait congregation solemnelle aux Mathurins, par laquelle fut conclud qu'ils declareroient auant

que de passer plus outre s'ils prenoient qualité de Reguliers ou Seculiers. Qui estoit les reduire en vne grande perplexité. Car de nier qu'ils fussent Reguliers, c'estoit dementir leur vœu. De dire aussi qu'ils le fussent, c'eust esté contreuenir à ce qu'il leur auoit esté enioint à Poissy. Pour ceste cause ne prenans qualité precise, l'Vniuersité les debouta de leur requeste. Ils ne se rendent pas pour cela, ains ont recours au Parlemēt, à fin de gagner par cōtraite sur l'Vniuersité, ce qu'ils n'auoient sceu obtenir de gré. Il fut dit que les parties viendroyēt au premier iour plaider. L'Vniuersité me feit cest hōneur de me choisir pour son Ad-uocat. La cause fut plaidee par deux matinees avec telle contention que la grandeur requeroit. Maistre Pierre Verforis plaidant pour les Iesuites, & moy pour l'Vniuersité. En fin les parties appointees au Conseil, & ordonné qu'elles demeureroient en tel estat qu'elles estoient. C'estoit vn coup fourré. Car ils ne furent pas incorporez au corps de l'Vniuersité, comme ils requeroient, mais aussi estans en possession de faire lectures publiques, ils y furent continuez. Combien que ceste cōpagnie porte le tiltre de religieux, si ne charge elle le froc, ains marche en habit de seculier, si ne se relogue à perpetuité dans les cloistres, comme les autres. Elle est composee de deux manieres de gens, dont les vns se disent, comme de la grande Obseruance, & les autres de la petite. Les Premiers sont obligēz à quatre vœux. Car outre les trois ordinaires

de Chasteté, Pauvreté, & Obeissance, ils y entrelaissent le quatriesme qui est de l'obeissance particuliere du Pape, telle que ie vous ay cy-dessus dite. Les seconds sont seulement adstrains à deux vœux. L'un regarde la fidelité qu'ils promettent au Pape, & l'autre, l'obeissance enuers le general de leur ordre. Ceux-cy ne voient pas pauvreté, ains leur est loisible tenir benefices, offices, succeder à leurs peres, meres & parens, acquerir terres & possessions, comme s'ils ne fussent obligez à aucun vœu de religion. De sorte que le Iesuite peut estre espandu par toute vne ville sans scandale. Et gist l'exercice de leur profession en deux poincts : en l'administration de la parole de Dieu, & des saincts Sacremens, tant de l'Autel, que de Penitence : & en apres d'enseigner les Arts liberaux. Ils ont doubles hebergemens qui s'attouchent : l'un destiné pour leurs prestres, l'autre pour leurs escholiers. Il seroit mal aisé de vous dire combien ils s'accroissent de iour à autre, & combien les troubles ont seruy à leur accroissement. Car ayans par leurs ceremonies apporté reformation à la dissolution de l'ordre Ecclesiastic, & s'estés directement voüez à maintenir l'autorité du saint Siege encontre les Caluinistes, qui font profession expresse de le terrasser, ceux qui sont francs Catholiques, voyans que de leur boutique sortoit & la religion, & l'erudition tout ensemble, leur ont aumosné de grands biens, mesmes on leur a donné plusieurs maisons pour instituer la ieunesse qu'ils appellent aujourd'huy Seminaires, vou-

lans sous ce mot donner à entendre que ce sont
 pepinieres de la Religion Catholique. Crois-
 lans par ce moyen en partie par leurs merites,
 mais plus par la haine que l'on porte aux Hu-
 guenots. Quant à moy ie n'estime point que
 les Huguenots ayent de petits aduersaires en
 ceux-cy : comme ainsi soit qu'entre toutes les
 religions, la Chrestienne se doiue gagner par
 prieres, exemples, bonnes mœurs, & saintes
 exhortations, & non par le trenchant de l'es-
 pee. A Dieu.





L E
C I N Q V I E S M E
L I V R E D E S L E T T R E S
D'ESTIENNE PASQUIER.

*A Monsieur de Querquifinen Seigneur
d'Ardinilliers.*

NOUS estimiez parauentüre que les Flamens ne deullent contribuer cōmenous aux calamitez & miseres de cetéps. Ils y ont mesme part que nous. *Commen-
cement des
troubles de
la Flandre.* Apres la conclusion du Concil de Trente, qui fut en l'an mil cinq cens soixante & quatre, le Roy d'Espagne voulut establir l'Inquisition, & y apporta tous les preparatifs à ce requis: estimant par ceste extremité de seruitude de conscience, obuier à l'autre extremité, en laquelle les François par vne relasche trop grande de liberté estoient tombez. Ceci ne pouuant estre bonnement digeré par plusieurs du pays (car la religion nouuelle y auoit desia pris grand pied) le Comte d'Aiguemont fat delegué par la Duchesse de Parme par deuers le Roy pour luy

remonstrer l'inconuenient qui en pouuoit aduenir. Lequel rapporta bõ visage de son Prince, auec promesse de passer toutes choses doucement & en surseance, en attendant vne resolution générale de ce qu'il auoit à faire. Toutesfois par quelque mot du guet qui couroit auec la Duchesse, elle ne laissa de tenir la main à la rigueur du nouueau mise fus. Chose qui a occasionné vne partie de la noblesse de prendre les armes, & se liguer dedàs la ville de Bruxelles: & comme s'ils ne faisoient que se iouer, ils se sont appelez Gueux. D'autant qu'il estoit adueni aux principaux chefs & ministres du Roy Catholic de dire en cholere, qu'il ne se falloit estonner de ce nouueau remuement. par ce que ceux qui embrassoyent ceste querelle n'estoyent que Gueuz. Ce qui ne tomba pas à terre. Car les autres se mocquans de ceux qui les auoyent ainsi nommez, prindrent ce mesme nom. Et quelques-vns mesmes des plus signalez d'entr'eux s'habillerent de couleur grise conuenable à l'epithete qu'ils se donnoyent. Disans en leurs festins & banquets par forme de gaufferie: *Vinèt les Gueux*. Mot certes de tres-finistre presage, & qui ne prognostique autre chose que la ruine des pays bas, & qu'à la longue ceste faction les mettra tous à la besace. Cela arresta vn peu la Duchesse, & leur permit de n'estre recherchez en leurs consciences: mais pour cela elle n'a pas empesché que ils ne se soyent donnez des presches publics. Qui a esté cause que ceste Dame feignant ob-

*Le mot de
Gueux
entre les
factieux de
Flandre.*

tenir de gré, ce qui luy estoit jeu forcé, leur a par l'aduis des plus sages en Aoust cinq cens lxvj. accordé presches hors les villes, à la charge qu'ils n'entreprendroyent rien sur les Eglises Catholiques. Ce que venu à la cognoissance du Roy Catholic, il a deuesché le Duc d'Alue pour se rendre le plus fort. Lequel à son arriuee a pris la charge & gouuernement du pays, restably l'inquisition, desarmé le peuple, surpris quelques-vns des principaux, faignât de les festoyer, mesme le Duc d'Orne, & le Comte d'Aiguemont, par la sage conduite duquelle Roy son maistre auoit faict de si braues exploits contre nous. Il leur a fait couper la teste. Et autant en eust il faict au Prince d'Orange, s'il ne se fut plus par hazard, que par conseil euadé. Le mesme Duc d'Alue s'est emparé de tous les forts & principales villes où il a disposé garnisons à sa deuotion. Comme Espagnol il se persuade par tels moyens extraordinaires de raquoiser toutes choses en vn clin d'œil: & de faict il a veu quelque esclair de son esperance en ce premier & inopiné estourdissement de chacun: mais ie me doute qu'à la longue il mettra son maistre au hazard de perdre tout l'Estat de Flandres. Si nous estions bien aduisez il y auroit maintenant maniere de le reünir au nostre, pendant ces diuisions. Mais la folie de ceux qui pensent estre les plus sages, ne le permet pas. Nous le recognoissons estre de l'ancien eltoc & domaine de nostre couronne: il est, si ainsi me permettez de le dire, aux portes de nostre ville de Paris, &

*La Flādre
pays fatal
n'estre
remis sous
l'obeissance
des François.*

par maniere de dire vn faux-bourg, toutesfois iamaïs ne s'est preparee occasiõ pour la recouurer, que nous ne l'ayons laissée eschapper, pendant que par discours fantasques nous amusons à la conqueste d'Italie, que nature a separee d'auec nous, de mœurs, de langues & d'un haut entrejet de montaignes. A Dieu.

*A Monsieur de Querquifinen seigneur
d'Ardinilliers.*

*Comme
toutes choses
se retournerent au
desauantage
des Huguenots
contre leur
opinion.*



Es cartes sont bien maintenant autrement brouillees que ceux de la religiõ ne se promettoient apres la mort de Monsieur de Guise. Ils estimoyent que ceste mort les auoit mis au dessus du vent, & que toutes choses leur retourneroyent de là en auant à souhait, toutesfois ils se sont trouuez grandement esloignez de leur compte. Par ce que pendant vne paix on leur a plus rongné les ongles par Edits doux & non violens, que Monsieur de Guise n'auoit faict avec vne grande puissance d'Armes. Et neâtmoins encores s'est à la parfin l'apostume creuee. Le voyage de Bayonne auoit tousiours esté suspect aux Huguenots. L'arriuee du Duc d'Alues en la Flandres les en a presque totement esclarcis. Car soudain qu'il a esté arriué avec ses forces, au lieu de nous rendre spectateurs de ceste tragedie, comme peut estre il eust esté tres-expedient, nous sommes voulus entrer sur l'eschafaut pour

ioüier nostre roolle, ainsi que nos voisins. Et de faict le Roy a constitué des centeniers dans la ville de Paris (ce sont Capitaines Generaux de chasque quartier tirez du corps des Bourgeois) il a fait des nouvelles compagnies Françoises, remply les anciennes non complètes, & en outre a fait vne leuee de six mille Suisses pour le venir ioindre: donnant à entendre que c'est pour n'estre surpris de l'Espagnol, ancien ennemy de la France. Chose que les Huguenots ne veulent pas croire, estimans que tout cecy se brasse à leur ruine, comme dès pieça ils disent en auoir quelques sentimens, par les modifications de l'Edict de Pacification, demantellement des villes par eux possédées durant les troubles, edification des Roques & Citadelles, & pour parler faict à Bayonne. De sorte que depuis ce temps là ils estoient tousiours demeurez en ceruelle, quelque beau semblant qu'on leur fait, ou qu'ils feissent. Pour ceste cause voyans ceste leuee de Suisses, ils despescherent lettres en cachette à leurs assemblees (qu'ils nomment comme nous, Eglises) à ce que chacun eust à se tenir prest au iour & feste saint Michel dernier passé enuiro vn mois, depuis l'erection des Centeniers. Tout cecy s'est faict à ieu couuert. Bien couroyent quelques bruits sourds du changement de volonte. Quia occasionné le Roy de despescher par deuers l'Admiral quelques seigneurs, mesmes Monsieur de Toré son cousin, pour le semondre de venir en Cour, à fin de dōner ordre aux affaires qui se presentoiēt.

*Comment-
cement des
troubles de
lxviij.*

*En quel
estat fut
trouué
l'Admiral
par le sei-
gneur de
Toré.*

Le conte est beau, & qui merite de vous estre escrit. Il le trouue habillé en mesnagier deux ou troisiours deuant la feste saint Michel, faisant ses vendanges. L'Admiral apres auoir entendu le motif de la legation de Monsieur de Toré, luy fait responce en deux mots, que la France ne portoit point des Comtes d'Aiguemont & Ducs d'Orne, dont la memoire estoit encore toute sanglante. Il vouloit dire en termes de pratique, qu'il se garderoit de mesprendre. Quand nostre heure n'est pas venue, dieu permet que nous soyons sages & retenus pour resister aux embusches, qui nous peuuent estre preparees: mais quâd elle est arriuee, nous mesmes de nos propres volonteiz nous exposons dans les pieges, quelques fois plustost que ne pensoient ceux qui nous les auoient dressez. C'est en quoy l'on peut considerer les admirables effectz des secrets de Dieu. Le Roy estoit lors à Monceaux accompagné de Messieurs le Cardinal de Lorraine, Duc de Nemours, & Cōnestable: Monsieur le Prince à Valery, où Monsieur d'Andelot & quelques autres seigneurs le vindrent trouuer. Ainsi qu'il auoit esté conclu par ceux de la religion (grande pitié que ie sois contraint d'vser de ce mot, pour dire ceux de la ligue ou faction) ainsi a il esté executé, & au mesme iour de saint Michel, toute la France s'est trouuee couuerte de gendarmes & compagnies Huguenotes. Et en ce changement inopiné ils se sont emparez diuersement de plusieurs villes. Les seigneurs qui sont pres du Roy, bien qu'ils eussent quelques aduis de ces nou-

ces nouveaux troubles, si ne les pensoient ils, si proches. Monsieur le Prince suiuy de quatre ou cinq cens cheuaux dedans la ville de Rozoy en Brie se promettoit de surprendre le Roy, mais il a esté esuenté. On a mis en deliberation dans Monceaux quelle part le Roy se deuoit retraire. Monsieur le Connestable a esté d'aduis que ce fust dedans Meaux, comme plus voisine, & distante seulement de deux lieues. L'opinion de Monsieur de Nemoux a preualu, soustenant qu'il estoit non seulement expedient, ains necessaire au Roy pour l'assurance de luy & de son Estat, de se retirer dans sa bonne ville de Paris, avec laquelle les Roys de France auoyent perpetuellement vnis leur fortune. Suiuant ceste resolution on a troussé promptement bagage dès les quatre heures du matin. Iamais conseil ne fut donné plus à propos à son Prince, que cestuy-cy, comme aussi le Roy l'a depuis reconnu par plusieurs fois. Cela s'est fait sur le point que les Suisses sont arriuez, lesquels se sont mis en bataille, & les nostres pareillement avec telles armes qu'ils ont peu recouurer. Parmi tout cela, vn grand attirail de Dames, qui ne rendoit la partie ni plus forte ni plus assée. Toutesfois pour ce coup la crainte a esté plus grande que le mal. Monsieur le Prince a faict contenance de les cheualer, mais il ne les a osé affronter. Le Roy sur les quatre heures du soir est arriué dans Paris grandement harassé de la faim & de la longue traite : receu avec toutes allegresses

de son peuple de Paris. Ioye toutes-fois qui n'a pas longuement duré. Par ce que la nuit ensuyuant quelques enfans perdus Huguenots ont brulé plusieurs moulins vers la porte de sainct Denis. Qui a esleué vn chaud allarme dedans la ville. Les premiers qui s'en sont aperceus ont commencé de crier, aux armes: Auquel cry chacun s'esueillant en sursaut (en ce feu trel luissant dans l'obscurité de la nuit) ceux qui estoient à l'autre bout de la ville estimoyent que les ennemis eussent surpris l'autre costé. Ie vous laisse à penser que la esté l'effroy. Le lendemain chacun accouru aux armes, a chargé la croix blanche sur son chapeau, en danger à celuy qui se trouuoit sans, d'estre tué. Les portes gardées par les Bourgeois & nouueaux Capitaines sur eux esleus, suyuant la police de l'an cinq cens soixante & deux. Les Huguenots ne s'endorment pas ce pendant, ains s'inuestissent de la ville de S: Denis: laquelle pour estre voisine de Paris a tousiours seruy de retraite pendant les guerres ciuiles à ceux qui nous ont voulu guerroyer. Monsieur le Prince dit qu'il vient pour presenter requeste au Roy pour ceux de sa religion. Les autres luy respondent que ce n'est la forme, qu'un subiect vienne armé presenter requeste à son Roy desarmé, si ce n'est en intention de luy vouloir donner la loy. Depuis le Roy a enuoyé par deuers luy Messieurs le Chancelier & de Moruilliers pour entendre le motif de son mescontentement. Il leur a fait response qu'il requeroit

trois choses, l'entretenement de l'Edict de Pacification sans aucune reserue ou limitatiō, que le Roy n'aduançast plus aux honneurs gens nouueaux & de nulle recommandation, & qu'il retranchast les charges extraordinaires du peuple. Le premier appartient à sa cause, mais les deux & troisieme à l'Estat. Dont le Roy a fort bien sceu faire son profit enuers les Princes & Potentats estrangers. Car encores que ceux qui fauorisent leur parti, soyent d'aduis que le Prince ne peut empescher la liberté de nos consciences en ce qui cōcerne le seruice de Dieu (qui est vne proposition fort chatouilleuse, & qui produit de tres-dangereux effects) si ne veulent ils qu'en ce faisant le subiect bride la volonté de son Roy, ne qu'il remue rien de ce qui est d'ailleurs de sa souueraineté. Voila en quel point nous sommes auiourd'huy, autant eslongnez du repos, comme les Huguenots de leur esperance. Je ne faudray de vous mander la suite de toute ceste miserable & calamiteuse tragedie. A Dieu.

*A Monsieur du Faur seigneur de Pibrac,
Aduocat du Roy au Parlement de Paris.*

*Ceste lettre
escrite a-
pres les
grands
iours de
Poitiers
1567.*



E vous supplie n'estimer que ç'ait esté par oubliance de mon deuoir que n'ayez depuis mon partement de Poitiers receu aucunes lettres de moy. Car l'occasion de ce defaut est prouenuë, ou que du


tout ie n'ay eu meſſagers en main, ou bien que lors que i'en ay eu, ils m'ont failly de promeſſe, pour eſtre partis ſans prendre mes lettres. Eſtant maintenant tref-ioyeux d'auoir receu de vos nouuelles, & d'auoir le moyen de vous faire participant des noſtres. La preſente ſera pour vous aduertir que graces à Dieu il n'y a nul de vos amis qui ne ſe porte bien de deçà ſelon la portee du temps, i'entens pour le regard des perſonnes. Car quant aux biens des champs, ie me puis vanter auoir eu bonne part à la calamité commune. Mais pour autant que ie fais peu de compte du bié, ie me deporteray de vous en eſcrire, pour vous aduertir que ſoudain apres mon arriuee, ſuyuant la reſolution que nous auions pris enſemble, ie feis la reuerence à Monſieur le Chancelier, que ie gouuernay teſte à teſte enuiron vne bonne heure. Lequel receut vne infinité de plaſir du recit que ie luy feis de ce qui s'eſtoit paſſé aux grands iours, & par ſpecial du deuoir & contentement que vous auiez rendu à chacun. Pluſieurs autres propos ſe paſſerent entre nous deux, & entre autre il eſtoit d'aduis que ſortant de Poitiers pour aller à Tholoſe priſſiez la meſme route que i'ay depuis cogneu par vos lettres auoir eſté priſe de vous meſmes. Or quant eſt du retour dont m'eſcriuez, i'ay ce iourd'huy veu Monſieur le premier Preſident, & diſné avec Monſieur l'Aduocat du Meſnil (car pour le regard de Monſieur le Preſident Baillet il n'eſt encores de retour) & leur ay preſenté vos recomman-

dations. Je vous assure que Monsieur le premier President les a receuës de fort bonne chere, & ay cogneu à sa façon vne amitié & bien-vueillance particuliere qu'il a en vous. Je luy ay fait sommaire recit de vostre faict. Comme vous auiez esté surpris quand les nouvelles vindrent des troubles, n'ayant aucuns cheuaux, & que d'ailleurs voyant les passages bouchez deçà, mesmes des postes, auiez esté contraint de prendre le chemin de Tholose, par ce que la voye des postes y estoit ouuerte: avec vne grande perplexité toutesfois, pour la crainte qu'auiez de faire faute à vostre deuoir, spécialement à l'ouuerture du Parlement. Au moyen dequoy vous le priez de me dire son aduis sur ce qu'auiez à resouldre, sur le tost, ou le tard de vostre retour. Surquoy il m'a faict responce que puis qu'estiez maintenant en lieu seur, vous ne deuiez auoir haste de vous exposer au hazard & danger des chemins, & qu'il vous conseilloit de choisir vos bons points & aïsemens. Et l'ayant plus auant sondé vers quel temps il estimoit que pouuiez commodement reuenir, il me l'a limité à Noel. Au regard de Monsieur du Mesnil il est d'opinion d'une courte absence (comme pourrez mesmement entendre par les lettres qu'il vous escrit) & neantmoins comme luy-mesmes s'explique, il pense que ne deuiez estre en ceste ville que vers le temps de Noel. De sorte qu'estàs de parole diuers en opiniõs, l'un pour la retardation, l'autre pour l'acceleration, ils s'accordent neantmoins par effect:

Et n'y voy nulle diuersité, sinon que le dernier estime que vostre absence importe à vostre dignité, & l'autre non. A quoy s'il vous plaist que i'y adiousté du mien, ie vous prie estimer que la resolution de cecy ne se peut bonnement faire à l'œil, encores qu'estimiez le contraire par vos lettres, estans toutes choses si turbulentes, confuses & variables, qu'aujour-d'huy le plus sage iugera d'un en son fait particulier, d'autant qu'il estimera le commun cours du marché estre tel, & demain il luy en escherra d'un autre. Tantost vne legere esperance de temps calme, puis tout soudain un orage. Maintenant un aduis d'une sorte, maintenant d'une autre: & sur tout un murmure general de tout le peuple contre la paix, assisté de la faueur des plus grands. De maniere qu'en ceste grande instabilité de toutes choses, on ne peut determiner à l'œil autre conclusion & arrest, sinon vne desolation totale de nostre France. Que si nous commencions seulement à venir, ie serois d'aduis de nous retirer en pays estrange par forme de parenthese, & suiure l'ordonnance des Medecins encontre la peste, tost, loin, & tard. Mais puis que chacun de nous a passé plus de la moitié de son aage, mesmes que vous depuis dix & sept ou dix & huit ans en çà auez esté appelé aux plus belles charges de nostre robbe, il me semble qu'il nous faut resouldre de viure & mourir, comme bons citoyens, avec nostre Estat. Partant ie seray plus hardy, ni que Monsieur le premier President, ni Monsieur l'Ad-

uocat du Mesnil. Je suis d'aduis que deuez, sans aucun delay retourner à toute bride en ceste ville, pour contribuer avec nous tous à la commune calamité de ce temps.

*A Monsieur de Querquifinen seigneur
d'Ardinilliers.*



'APOSTVME est en fin creuee: *Recit de
l'estat des
troubles
de lxxij.*

& tout ainsi comme la riuiera se desbonde en vn torrent & precipice, quand elle a fait voye à la chaulsee qui luy barroit le cours de son eau, ainsi le peuple François ayant donné quelque air aux desdains & rancunes muettes qu'il couuoit dans son estomach par le heurt & rencontre de deux religions, s'est esclaté tout en vn coup, avec vne fureur indicible. Les Huguenots se sont iettez deuant Paris, disposé les gens qui leur venoyent de toutes parts, dedans sainct Denis, sainct Ouin, Auber-villiers, Buzen-val, pris Argentueil d'assaut, puis le Pont de Charenton. Ils pensent qu'il n'y a point moyen plus prompt pour ruiner Paris, que de l'estraindre par les mamelles. Leurs chefs principaux sont le Prince de Condé, l'Admiral, d'Andelot, la Rochefoucault, Montgommery, Genly, Mouy, le Vidame de Chartres, lesquels font arriuer à la file de iour à autre, gens & forces de tous costez. Et en ceste inesperee desbauche leurs partizans ont surpris les villes de Valence, Viëne, Romans, Montauban, Nismes, Môtpe-

*L'insensio
des citadel.
les plus per-
nicieuses
que profi-
tables à
l'Estat.*

lier, Mascon, Soissons, Lusignen, la Charité, Auxerre, Montereau, la Rochelle, quileur est vne forte roque, & par special la ville d'Orleãs, nonobstant la citadelle qui y auoit esté bastie. Qui doit apprédre à nos Roys (ie vous diray cecy en passant) que les villes qui sont au milieu d'un royaume, ne se contiennét point par ces voyes extraordinaires que l'Espagnol nous a enseignées, ains par la fidelle deuotio des subiects & bon traitement de leur Prince. La ville de Lyon a failly de tomber en leur mercy, & pendât que les Huguenots veulent apporter quelque attrempance à vne si brusque folie, où la prôpte main est plus desirée qu'un long examen de conseil, les Catholiques leur ont fauché l'herbe sous les pieds: qui depuis ont fait grâd rauage des autres, & bruslé deux temples par eux construits pour l'exercice de leur nouuelle religiô. En cōtr'eschange de quoy les huguenots d'as Orleans ont razé à fleur de terre ceste ancienne & venerable eglise de S. Croix. C'est à beau ieu, pl^r beau retour. Sur ce general desbord le bruit a couru en plusieurs endroits que le Roy auoit esté pris, és autres qu'il auoit failly de l'estre, & s'estoit sauué de vitesse d'as Paris, où les huguenots le tenoyét estroitement assiégué. Il n'y a Prince en tout l'uniuers (côme vous scauez trop mieux) qui soit tant aimé de sa noblesse comme le nostre. Car tout ainsi côme elle est d'une nature prôpte, gaillarde & sans fiel, aussi quelque traual ou souffrette qu'elle ait enduré pour son Roy, vne accollade, un bē œil, un visage riât &

debonnaire, est vne douce boisson qui luy faict oublier tous les maux passez : S'estimant condignement satisfaite quand elle cognoist son seruice auoir esté agreable à son Prince. Qui est vne leçon que nos Roys ne doiuent pas negliger : car à mon iugement le plus grand secret qu'eurent iadis les Maires du Palais pour s'impatronizer de l'Estat (soit que cela aduint ou par hazard ou par discours) fut d'accoustumer nos Roys de ne familiariser doucement avec leurs principaux sujets : ains par vne inepte reputation se communiquer en hault appareil à leur peuple vne fois l'antant seulement. Mais pour retourner à mon subiect, soudain que ce bruiet a esté espars par tout ce Royaume, il n'y a eu seigneur ou gentilhomme de bonne part qui n'ait pris la route de Paris pour le secours du Roy, avec telle suite & vasselage qu'ils s'est peu pourchasser, les aucuns mandez, les autres de leur propre instinct. Si qu'en peu de temps Paris s'est trouué remply de gen darmes, & a esté l'infanterie logee aux faubourgs pour la defense des trenchees, & la c aualerie dans la ville, & au milieu des deux le bourgeois, qui sous l'enseigne de son Capitaine en chasque dizaine a esté commis à la garde des portes. Le chef principal pour le Roy, c'est Monsieur le Conestable, assisté des seigneurs de Nemoux, Aumale, Martigues, & des Mareschaux de Montmorency, d'Ampville & Cossé, & d'une infinité d'autres grands Cheualiers & Capitaines. Pour subuenir au defroy de ceste guerre a esté la suppression des

*Rentes
constituees
sur les de-
cimes.*

offices reuouee, & tous estats remis sus, qui auoyent esté esteins par mort, depuis l'Edit fait en la ville d'Orleans, en l'an mil cinq cens soixante & vn, autres nouueaux inuentez, autres rendus alternatifs. Dieu sçait comme cependant les affaires de la iustice iront desormais : Car c'est vn priuilege du droict de nature, de reuendre en destail ce que nous auons acheté en gros. D'une mesme main le party de l'hostel de ville a esté ouuert, & permis à chacun d'y apporter argent, dont on luy feroit profit au denier douze. Et parce que cest hostel est infiniment surchargé, pour seurté de ces rentes nouuelles, & pour les payer on a obligé les Decimes : & à ceste fin on a créé vn receueur general du Clergé à grands gages, lequel a ses commis diuersement establis par les Prouinces, pour en faire venir les deniers à la recepte generale. Chacun en ceste necessité est liberal en inuentions, & non chiche à ouurir sa bourse. Mais entendez vn heur & malheur qui nous est aduenu tout ensemble. Comme les affaires se negocioyent en ceste façon dans Paris, les Huguenots de leur costé ne dormoyent, auxquels venoit ayde & secours de toutes parts en intention d'affamer la ville. Et à cest effect furent encores enuoyez par eux, les seigneurs d'Andelot, & de Montgommercy pour se saisir de la ville de Poissy, qui est sur la riuiera de Seine, afin de nous retrancher les viures. Chose qu'ils executerent fort aisément. Mais ceste prise leur a esté cher vendue : car Monsieur le Connestable estant ad-

uerty qu'ils auoient passé la riuere, commanda dès l'instant mesmes de s'armer en diligence, & feit sortir son artillerie & ses gens en bonne ordonnance la veille de saint Martin. Nous auons esté recueillis par les Huguenots entre la ville de saint Denis & le village de la Chappelle. Là a esté donné vne bataille fort cruelle, où sont morts d'une part & d'autre plusieurs grands Capitaines & guerriers. Entre ceux des Huguenots l'on remarque les sieurs de Piquigny, de Saux, de S. André, de Suze, & Cany : Ils n'en pouoyent si peu perdre, qu'ils n'en perdissent beaucoup. Des nostres le Comte de Chaulne : & sur tous fut grièvement nauré Monsieur le Connestable par Stuart Escossois, & en ce piteux equipage rapporté par les siens dedans Paris. Toutesfoi afin qu'entendiez en peu comme ceste mesaduenture luy aduint, l'on dict que Stuart le trouuant vn peu à l'escart, donnant ordre à ses gens, le somma de se rendre : & qu'à ceste parole ce preux vieillard luy donna du plumbeau de son espee tel horion sur les machoires, qu'il luy feit sortir deux dents de la bouche. L'Escossois irrité de ce coup, luy perce les reins d'un coup de pistole, & luy baille quelques coups d'espee, dont peu de iours apres il mourut. Le champ nous demoura, & le gardasmes iusques vers la minuit. Cepédant d'Andelot aduerty de cest estour, rebrouste chemin à grands pas, mais estant reuenu trop tard, le lendemain à la pointe du iour, l'ennemy se presente au mesme lieu, faisant contenance

*Bataille de
S. Denis
donne la
veille S.
Martin
1567.*

*Blessure de
Monsieur le
Connestable.*

de nous prouoquer au combat, comme ne se tenant pour vaincu. Il fut trouué bon au conseil du Roy de ne rien hazarder d'auantage. Grand pitié! à l'issuë de ce luctueux spectacle, chacun en se flattant, s'est donné diuersement la victoire tout ainsi qu'à la bataille de Dreux. Les Catholiques pour autant que le champ leur estoit demouré: les Huguenots parce que le Lieutenant general de nostre armée auoit esté emporté nauré à mort, & que le lendemain ils s'estoient mis sus les rangs pour faire seconde esprouue de la fortune. Voulez vous que ie vous die en vn mot? Il n'y a chose au monde où il soit tant aisé d'apporter de masque & hypocrisie, qu'entre gens de guerre. Si les vns & les autres se sont donnez cest aduantage pour se conseruer en reputation, c'est sagement fait à eux. Si du fons de leur conscience, malheur inestimable pour la France, qu'en ceste perte publique, nuls d'eux ne pensassent que le Roy en y gagnant, seul y perdoit. Toutesfois si l'opinion du Roy Louys vnzième est vraye, que celuy a l'honneur d'une bataille, qui en rapporte le profit, il y a grande apparence d'estimer que le Catholique est demeuré victorieux, non pour luy estre demouré le champ, ains parce que l'euenement de ceste bataille a esté cause que quatre ou cinq iours apres, le Huguenot changeant d'opinion a leué le siege: qui estoit le principal but à quoy nous visions. Quelques iours apres est decedé Monsieur le Connestable. commandee à la posterité: car comme vous sca-

*Combien
d'hypocrisie
il y a en
matiere des
armes.*

*Mort heu-
reuse de
Monsieur le
Connestable.*

uez il estoit né & baptizé au bourg de Montmorency, situé au Parisis. Tellement qu'à bonne raison il pouuoit estre nommé Parisien, infiniment aimé & chery du Roy Henry second de ce nom, par la beneuolence duquel il acquit vne infinité de grands biens & honneurs, feit plusieurs exploits d'armes tant qu'il vesquit, & en fin aagé de quatre-vingts ans ou enuiron, estant Lieutenant general du Roy au milieu d'une armee, il fut tué combatant pour sa foy, & pour son Roy, deliurant le lieu dont il auoit pris naissance d'un long siege. Recherchez telles histoires qu'il vous plaira, vous ne trouuerez Capitaine qui avec tant de belles remarques ait couronné sa vie d'une si illustre fin. La Royne mere voulant honorer d'un mesme trait, & la memoire du Roy son mary, & les seruices de ce seigneur, luy a faict faire obseques de Roy. Ce qui n'aduient encores iamais à nul seigneur de la France. Parce qu'en son conuoy a esté portee son effigie portant sur le visage la remembrance des playes qu'il auoit receuës. Son corps & son effigie demeurerēt à la Royale vne nuit dans l'Eglise, nostre Dame: & le lendemain se trouuerent toutes les parroisses & Eglises pour accompagner le conuoy: & encores toutes les dizaines en armes, souz leurs enseignes, pour honorer la memoire d'un si grand guerrier. Son cœur a esté enseuely pres de celuy du Roy Henry son bon maistre, & son corps au sepulchre de ses ancestres en la ville de Montmorency. Plusieurs poëtes se sont vouëz, à dresser des epitaphes &

*Obseques
du Conne-
stable.*

tombeaux en sa louange. Moy-mesme y ay voulu auoir part. Ie vous enuoye celuy que i'ay fait. Vous me manderez ce qu'il vous en semble. A Dieu.

Tombeau de Messire Anne de Montmorency Pair & Connestable de France.



*'VNE tremblante main, & d'un œil
plein de larmes,
Il faut qu'à mon esprit ie dresse mille
allarmes,*

*Ne pouuant descouvrir sans ineffable dueil,
La perte de haut pris qui couure ce cercueil:
Ce grand Montmorency, quel'impiteuse guerre
Nous a ialousement ravy de ceste terre:
Montmorency auquel & la vertu, & l'heur,
Jusqu'au dernier soupir ont voulu faire bon-
neur.*

*Car si (Passant) en peu de sçauoir as enuie,
En priuè ou public tout le cours de sa vie,
Jamais France ne veit François peut estre né,
Pour estre à si grand heur que cestuy destiné.*

*En premier s'il te plaist repasser son mesnage,
Quarante ans l'ont lié à une Dame sage,
Sage s'il en fut oncq, dont il eut douze enfans,
Deux Mareschaux de France, & les dix triom-
phans*

*Tant en biens, qu'en honneurs, encores pleins de vie,
Fors deux qui deuant luy sont morts pour leur patrie:
L'un gendre, & l'autre fils: Heureux vrayement re-
mords*

Tans des dix suruiuans, que des deux qui sont morts.

Et si de son priué au public tu veux tendre,
Encor trouueras tu dès sa ieunesse tendre,
Que sa fortune, ainçois sa vertu, de prin-sault
Le poussa entre nous au degré le plus hault:
L'ayant ensemble fait Connestable & grand Maistre,
A fin de faire à tous d'un mesme fil parestre
Par ces deux, qu'il estoit tout aussi bon ouurier
Des affaires de paix, comme braue guerrier.

Or que ceste grandeur en luy fust bien logee,
Huit fois il combatit en bataillerangée,
Faisant assez sentir aux Princes plus puissans,
Quels estoyent ses efforts, quel estoit son bon sens.

De cinq Rois seruiteur, aux quatre il feit seruire,
Et au dernier il feit de son corps sacrifice,
Sur son octantiesme an : honoré & chery
De chaque en son endroit, mais sur tous de Henry.

Donc cest heureux Seigneur paraisant sa carriere
N'eut oncq en ses desseins la chance trauersiere?

Donc ce gentil cerueau, par vn sage discours.

Sans desastre passa de sa vie le cours ?

Non: il estoit né homme, & iamaïs la fortune

Ne se feit aux humains à tousiours opportune.

De l'enuie il sentit vn coup le desarroy,
S'absentant pour vn temps de la Cour de son Roy,
Et le hazard encor qu'il les plus hant trebuche,
Ialoux de son honneur luy liura double embusche,
L'une au iour S. Laurent, & l'autre deuant Dreux,
Car bien qu'il combatit, comme vaillant & preux,
Si fut-il pourtant pris : mais toutes ces alteres
N'amoindrirent de rien ses fortunes prosperes.

Celuy fut vn malheur qu'une absence de Cour,
Mais son heur luy braissoit vn plus heureux retour,

*Et pour dire le vray, ce que malheur on pense,
Le feit à son retour, le premier de la France.*

*Ce luy fut vn malheur qu'une double prison,
Mais luy qui oncq ne fut pris que de la raison,
Monstra que ce malheur n'auoit point sur luy
prise,*

*Ourdissant prisonnier tousiours quelque entrepri-
se.*

*Ainsi fit-il deux paix en ce double danger,
L'une entre les subiets, l'autre avec l'estranger:
Estant par tout le cours de sa vie si brave,
Que mesme la fortune il fit sous luy esclau.
Estant pour son pays si heureusement né,
Qu'au profit de nous tous, son danger s'est tourné.
Aussi n'eut-il oncq rien plus cher en sa pensée,
Que voir sa nation sur toute autre auancee.*

A tant iusques icy tu as sa vie appris.

Or entends maintenant quelle fin il a pris.

*Dedans Paris estoit le Roy & son armee,
Et la religion quel'on dit reformee,*

Au moins ses partizans estoient campez deuant:

Montmorency sema maints propos en auant

De paix, pour rallier le suiet à son Prince,

A fin de garentir de degast la Prouince,

*Craignant (comme plusieurs) qu'un plus piteux
destin*

Ne nous eust apporté ce discord intestin:

Plusieurs fois il ietta, mais en vain ceste pierre,

*Car & l'air, & le ciel, ne souffloyent qu'une guer-
re:*

Les Astres, les deuins cornoyent de tous costez,

*Carnages, meurdres, morts, sacs, feu & cruau-
tez.*

Parquoy

Parquoy voyant la France estre pleine de rage,
 L'Estat bouleuersé d'un forcené courage,
 La iustice, le bien, l'honneur, le droit banny,
 Que par le vice estoit le vertueux honny,
 Que le pere à l'enfant, & l'enfant à son pere,
 Sous le masque de Dieu dressoit un impropere,
 Et que chacun pippe d'un espoir mensonger,
 Contre son propre sang appelloit l'estranger,
 Pour courir à la fin qui nous est preparee,
 Ainsi que le Veneur se trouue à la curee,
 Brief que le tout estoit en ce pays renclos,
 Pesle mesle dedans un abisme & chaos,
 Sans espoir de concorde. Adonc, dist-il, Encore
 Faut-il qu'à ceste fois ma memoire i'honore,
 Et qu'on sçache à iamais que tout d'un mesme
 poix

Montmorency sceut faire, & la guerre, & la
 paix?

Et puis qu'à ceste fois un chacun se machine,
 Par auenglé discours, à l'ennuy sa ruine,
 Je veux vaincre & mourir : ne pouuant voir
 deffait

De ses propres enfans le pays qui m'a fait.

Ce dit, soudain ses gens en bataille il ordonne
 De François à François l'escarmouche se donne:
 Qui nauré, qui tué, l'un tombe, l'autre pris,
 Le ciel mesme eut horreur des lamentables cris.

O François genereux, vous pouuiez vaincre ensem-
 ble,

Tout ce que le Leuant iusqu'au Ponant assem-
 ble.

Là ce noble vieillard monstra d'un cœur hardy,
 Qu'il n'auoit lors le bras vieillement engourdy.

Enfonçant esquadrons, or' d'estoc or' de taille,
 Etia certain estoit du gain de la bataille,
 La du sang ennemy le champ estoit baigné,
 Quand son heur qui tousiours l'auoit accompai-
 gné,

En ce malheur public qui vugnoit par la France,
 Luy voulut faire encor à ce coup assistance.

Car aussi que pouuoit mieux eschoir à cœur frâc,
 Tel qu'estoit cestuy-cy, que sceller de son sang
 Sa foy, sa prend' hommie, & tcsmoigner l'enuie
 Qu'il auoit d'exposer pour son Prince sa vie?

D'un coup de coutelas il eut le chef blessé,
 Et d'un coup de pistole il eut le dos percé.
 Il cheut, mais luy craignant que ceste grande chen-
 te

N'apportast à ses gens quelque douteuse esmente,
 S'enquist premierement de SanZay, si le champ
 (Encor qu'il fust blessé) demeuroid à son camp:
 Comme il l'eust assuré que l'issuë estoit telle,
 Il commanda qu'on meit dessus son corps un voile,
 A fin de n'estonner par sa blesseure ceux
 Qui de vaincre & tuer n'estoyent lors paresseux.

Puis dist: A toy Seigneur, ô mon Dieu, ie rends
 gloire,

Decouronner ma fin d'une telle victoire,
 Beni sois-tu Seigneur, de quoy si à propos
 Je mets & mon bon Roy, & Paris en repos:
 Si non repos total d'une guerre ciuile,
 Faisant au moins leuer le siege de la ville.

Sur ce mot on l'enleue, & comme on l'emportoit
 Vngendarme passant demande qui c'estoit.
 Montmorency (dit vn) mais luy de forte haine,
 Tu ments, Montmorency combat en ceste plaine.

*Ainsi fut ce guerrier dans Paris apporté,
Où de ses mal veillans mesme il fut regreté:
Ainsi deux iours apres il termina sa vie,
Vainqueur de l'ennemy, & vainqueur del'enuie.*

*Heureux Seigneur, heureux tant que tu as vescu,
Plus heureux que mourant tout contraire as vaincu.*

*Comme si le Daimon qui garde nostre France,
Eust fait avec le tien eternelle alliance,
Et que pour tout iamaïs par compromis iuré,
Le tien se fust de luy, luy du tien assuré,
Tant que la France s'est heureusement trouuee,
Et fortune de toy a esté conseruee,
Et tant que ton bonheur t'a aussi conserué,
De la France l'Estat s'est tres-heureux trouué,
Comme si par commun entrelas, la fortune
De la France & la tienne, eust esté de deux, vne.*

*Et ores que les cieux par un iuste courroux,
Se sont ireusement liguez encontre nous,
Tu es mort, & mourant, tout va de telle sorte
Que nostre France aussi avecques toy est morte.*

*La France florissant tu ne pouuois mourir,
Et la France, toy vif, point ne pouuoit perir.
Tel estoit le destin, que d'une mesme course,
La sienne estoit en toy, en elle ta ressource.*

*Parquoy pour tout tombeau (Passant) sçache,
qu' I C Y*

*GIST LA FRANCE ESTENDVE
AVEC MONTMORENCY.*

*A Monsieur de Querquifinen seigneur
d'Ardinilliers.*

*Monsieur le
Duc d'An-
jou frere
du Roy
faict Lieu-
tenant gene-
ral de
France.*



PRES la mort de Monsieur le Con-
nestable on a estimé son estat estre
de telle consequence pour les trou-
bles où nous sommes exposez, qu'il
valoit mieux le tenir en surseance que d'en
pourvoir nul des Princes & grands seigneurs.
Au lieu de cela, le Roy a mis toute l'intendan-
ce generale des guerres & des affaires de Fran-
ce sous Monsieur le Duc d'Anjou son frere.
Vous sçavez qu'il est encores fort ieune, & bié
qu'il soit accompagné de plusieurs belles pro-
messes de nature, si n'a-il l'experience. Ce de-
faut luy sera suppléé par les sages seigneurs qui
luy assistent. Mais ie souhaiterois qu'il y en
eüst vn entr'eux qui eut sous l'autorité de ce
ieune Prince vn controle general sur tous les
autres. Cela a aucunement fortifié l'ennemy,
qui a pris la route de Châpaigne pour accueil-
lir ses Reistres, en deliberation de nous mal
traiter. Toutes-fois Dieu nous a regardez d'un
œil de pitié. La paix a esté faite & concluë en-
tre les subiects du Roy. L'edict publié le vingt-
septiesme de Mars tout ainsi que le vingt-sep-
tiesme Septembre precedent les troubles a-
uoient repris leur commencement. Ceux de
la religion remis en leurs biens, dignitez &
prerogatiues, tant en general que particulier:
nonobstant quelques arrests ou iugemens cō-
tre eux donnez. En contr'eschange de quoy

*L'Edict de
Pacification
en Mars
1598.*

ils ont rendu au Roy toutes les villes qu'ils auoyent surprises, hormis vne ou deux. Ce n'est pas vn petit trait pour le Roy d'auoir, en espargnant la peau d'une infinité de ses subiects, regaigné par vne peau de parchemin toutes les villes dont les autres s'estoyent emparez. A Dieu.

*A Monsieur de Querquifin seigneur
d'Ardinilliers*

DE temps n'est encores disposé à vne paix bien fermee. Car combien que les Huguenots se soyent despouilleez de leurs forces, & retirez chacun en leur chancune, le Roy depuis la publication de la paix n'a point licentié ses gens de guerre. Et qui plus est il a fait mettre garnisons par tous les ponts & passages pour empescher les aduenues. Ie ne sçay à quelle fin cecy se fait. Mais les plus clair-voyans se persuadent que c'est pour empescher les Huguenots de se reünir. S'il y a en ceci quelque embusche (que ie ne croy) certainement ils seront au dessous de toutes affaires & sans esperance de ressource. Par ce que ie voy aujourd'huy le Prince de Condé en Bourgogne dans sa maison de Noyers, Monsieur d'Andelot en Bretagne, Monsieur de la Roche-Foucault en Angoulmois, Monsieur d'Acier en Languedoc, les Vicomtes de Monglar & Berniquet en Gascongne, les seigneurs de Genly & Mouy en Picardie, le Comte de Montgommery en

*Deportés de nous
autres François,
pendant la
courte paix
de 1568.*

Normandie. Ce n'est pas vn petit conseil de les auoir en ceste façon escartez les vns des autres. Croyez qu'ils auront prou d'affaires de se r'allier qui les pourfuiura chaudement. A Dieu.

A Monsieur d'Ardinilliers.

*Suite du
mesme dis-
cours.*



E ne veux pas dire que ce conseil fut bon ou mauuais. Ia à Dieu ne plaife que i'interpose mon iugement sur affaires d'estat. Bien vous diray-ie que s'il a esté tel que l'on le publie, & qu'il eust esté pourfuiuy sans relasche, iamais les Huguenots ne furent en tel desarroy, comme ils se fussent trouuez : mais comme il aduiant ordinairement que les affaires de la France ne se font iamais qu'à demy, le malheur a voulu que nous ayons mis trop vilstement des gardes aux ponts & passages, pour puis laisser froidement ralentir nostre entreprise. Et afin que vous entendiez comme les choses sont passées, toutes les villes n'estoyent pas encores rendues, quand les Huguenots s'apperceurent que l'on fermoit ainsi les passages. Au moyen dequoy les villes de Montauban & Sanxerre ne voulurent obeïr à l'Edict. Et quant aux Rochellois bien qu'ils ayent donné entree dans leur ville au seigneur de Iarnac leur ancien gouuerneur, si n'ont-ils voulu receuoir les garnisons que le Roy y vouloit mettre, encores qu'il ait depesché le Marechal de Vieille-ville (seigneur trespolic) pour les induire de receuoir ses

*Faute grā
de d'auoir
rompu la
paix de 68.
ou de n'a-
uoir mieux
executé la
roupture.*

commandemens. Cependant il a couru vn
sourd bruit que l'ô vouloit inuestir les Hugue-
nots. Qui a esté cause que l'Admiral, qui s'e-
stoit retiré à Tanlay (comme homme fin & aui-
sé) est venu trouuer le Prince à Noyers suiuy
de cinquante cheuaux : luy remonstrant que
desceiourner plus longuement en ce lieu, c'e-
stoit attendre leur ruine. Vrayemét ie ne trou-
ue point traict de nostre histoire si esmerueil-
lable que cestuy. Il sembloit que les Hugue-
nots ainsi espars çà & là, & les passages clos,
comme ie vous ay escrit, qu'il leur seroit im-
possible de se r'allier. Or voyez comme Dieu
a dissipé en cecy nos conseils. Monsieur le
Prince & l'Admiral partent de Noyers le xxi.
iour d'Aoust, accompagnez de leurs familles
& de telle escorte qu'ils s'estoyent peu inopi-
nement pourchasser. Les vns montez à che-
ual, les autres dans des chariots: accueillans
nouuel aide, à mesure qu'ils gaignoyent pais.
Et parce que les passages des ponts leur e-
stoyent bouchez, estans arriuez à Bony sur
Loire, ils ont trouué la riuiere gayable pres
1568.

*Lors que
les Hugue-
nots pense-
rent estre
au dessous
de toutes
choses,
leurs affai-
res leur re-
ussirent
à souhait
en l'an
1568.*

Sanxerre; & l'ayant trauessee, ont commen-
cé de reprendre leurs esprits, & de marcher
avec plus d'asseurance qu'auparauant. Ie ne
puis péser que ceux qui tiennét la clef des affai-
res de France pensassent en fermant les ponts,
enfraindre l'Edict de la paix: ou si telle estoit
leur intention, il me semble qu'ils ont fait vn
pas de clerc, d'auoir donné le loisir aux autres
d'euader. Mais entendez le surplus: Comme
il aduient ordinairement qu'apres auoir failly

*Le hazard
seruit de di-
cours aux
Huguenots
sans y pen-
ser.*

aux occasiōs, nous auons accoustumé de nous chatouiller par quelques nouuelles excuses, aussi ceux qui se donnoient la loy de iuger des coups, disoyent qu'il les falloit laisser aller & qu'eux mesmes s'alloyét mettre dans les filets, s'eslongnans de l'Allemagne, leur secours ordinaire, & allans fondre en vn arriere-coing de la Guienne, d'où malaisemēt ils pourroyent sortir. Mais il leur en a pris tout autrement: Par ce que iamais les affaires ne leur vindrent tant à souhait, comme ils firent lors sur vne premiere entree, plus par hazard, que par discours. Car comme le Prince de Condé auancoit ainsi chemin sans estre suiuy, l'on despescha quelques gens pour surprendre le Cardinal de Chastillon, qui lors estoit à Beauuais, & pareillement autres pour se saisir des Seigneurs de Genly, Mouy, & Moruilliers: tous lesquels toutesfois se sauuerent de vistesse. Le Cardinal presque reduit en termes de desesperoir s'embarque au Tresport, & fait voile en Angleterre, où il est surgy à port de salut. Les trois autres apres s'estre quelque temps cachez, se sont mis à costoyer la frontiere de Picardie, amassans petit à petit gens, lesquels pour la necessité du temps sont fort ioyeux de se retirer sous leurs enseignes. Infortunee inesperee qui leur est retournée à plus grand profit, que si avec vn profond discours ils eussent conduit leurs affaires. Car ces trois seigneurs ont seruy puis apres d'escorte pour introduire les Reistres qui sont venus à leur secours, & les conduire, comme à

la main par toute la France. Et le Cardinal estant pres de la Royne d'Angleterre a seruy d'Ambassadeur aux siens pour moyenner enuers ceste Princeſſe argent. Le malheur des Huguenots leur fait à ce coup coucher de leur reste : Parce que les seigneurs d'Andelot, Môtgommery, la Noüe, Lauerdin, & autres de leurs partizans, apres auoir faiët quelques es-fais de fortune se sont ioints avec le Prince; comme aussi a faiët la Royne de Nauarre, sui-
 uie de grande noblesse. Ceste premiere glace rompue, il est impossible de vous dire combien en peu de temps leurs affaires leur ont reüssi à souhait, tout au rebours de ce que l'on s'estoit promis d'eux. Leur premier rendez-vous a esté à la Rochelle: Et depuis ils se sont faits mai-
 stres des villes de Congnac, Fontenay, Meslay, Partenay, Niort, Saint Mexant, Chastelle-
 raut, Angoulesme, Saint Iean d'Angely, Pôs, & Blaye, des vnes sans coup ferir, des aucunes par force, & des autres ou par intelligences, ou par composition. Ils semblent qu'ils aillent avec la croye marquer seulement les logis, & atten-
 dent de iour à autre nouvelles forces de Lan-
 guedoc, sous la conduite du seigneur d'Acier. Et qui est chose que ie ne veux oublier de vous escrire, combien qu'ils prennent les armes sous le pretexte de Religion, si ont-ils donné à leur entreprise nouveau tiltre, l'appellant *La Cause*. Mot qui s'est insinué entr'eux par vne forme de Republique populaire, pour monstrier qu'ë ceste querelle chacun deuoit contribuer, comme y ayant le petit en son endroit pareille part

que le plus grand, & à peu dire que c'est la cause commune d'eux tous, tant en general qu'en particulier. Je ne sçay quelle sera l'issuë de ceste grande tragedie. Encores que ie m'asseure que Dieu ne permettra pas à la longue que le subjet triomphe de son seigneur souuerain, si est-ce que ie souhaite que ceux qui manient l'Estat, bannissent d'eux la dissimulation & hypocrisie. Et ne veis iamais aduenir grand fruit à celuy qui fauce sa parole: specialement quād les choses se sont passees sous le formulaire de la foy publique. A Dieu.

*A Monsieur de Querquifinen seigneur
d'Arduilliers.*

*Mort de
Monsieur
le Prince
de Condé.*

LEs nouuelles sont arriuees en ceste ville, de la mort de Monsieur le Prince : Chacun s'é esioiuit depuis le plus grand iulques au plus petit; moy seul, au milieu de ceste ioye publique, ie ne m'en puis resoudre. Je suis doncques deuenu Huguenot depuis que ne m'auez veu. Dieu m'éuoye plustost la mort. Le mestier n'en vault rien, ny pour celuy qui l'exerce, ny pour celuy contre lequel il est exercé. Il ne nous a apporté que la ruine generale & vniuerselle de nostre estat: mais ie vous prie vous ramenteuoir comme les choses se sont cydeuant passees. Lors que les troubles commencerent en l'an 1561. il y eust deux grands capitaines, Monsieur de Guise pour les Catholiques, l'Admiral pour les Huguenots: L'un & l'autre pour s'autoriser, se procurerent deux Princes

du sang : celuy-là, le Roy de Nauarre, cestuy-cy le Prince de Condé son frere. Car vous sçauiez quel rang tiennent les Princes du sang entre nous, & par special pendant les minoritez de nos Roys. Sous ces deux grandes bannieres, chacun donna air à ses entreprises, gagnant credit petit à petit sur ceux qui estoient de la suite. Mesmes feu Monsieur de Guise, sur lequel toute la noblesse Catholique auoit l'œil fiché, ores que tous les mandemens emanassent sous le nom & autorité du Roy de Nauarre : Lequel il pleut à Dieu d'appeler à soy au siege de Roüen. Et lors ie voyois plusieurs personnes qui s'en lamentoyent, comme si nostre cause en fust grandement affoiblie : auxquels par vn contraire aduisie disois, qu'il ne s'en falloit point affliger. Car si du commencement il fust mort, il eust esté mal aisé à Monsieur de Guise, de s'en faire croire, mais la querelle estant depuis esbranlee, & ayant sous le nom du Roy de Nauarre empieté l'autorité, il pouuoit de là en auant sans lanterne marcher luy seul par la Frâce au milieu de nos tenebres. Comme ie le predy, il aduint : Parce qu'il y besongna de sorte, n'estant plus controulé d'aucun, que s'il n'eut esté assassiné deuant la ville d'Orleans, ie m'assure que la race des Huguenots fust ores totalement extirpee. Ie fais presque pareil iugement en l'accident de nouuel aduenue en Monsieur le Prince. Il falloit du commencement que l'Admiral conduisit toutes ses affaires, sous le nom d'un grand Patron; autrement il fust demouré lousche. La vigilance,

l'esprit, & le temps, luy ont depuis apporté auctorité sur ses troupes. Et neantmoins ne pensez pas que le Prince, qui estoit genereux, magnanime, & dont les actions residoient principalement au cœur, condescendit en tout & par tout aux volontez de l'Admiral. Tellement que c'estoit par aventure vne espine au pied de luy, qui l'empeschoit le plus du temps d'aller où il destinoit: Laquelle luy estât maintenant ostee, il vsera desormais de ses conseils absolument souz le nom des ieunes Princes, qui pour l'impuissance de leurs aages ne le pourrôt controuler. Vous iugerez par là si par ceste nouvelle mort, nous en demeurons grandement aduantagez. Et pour vous dire en vn mot, s'il y a chose pour laquelle ie m'en doie resioüir, c'est que ie remarque en l'Admiral vne fortune trauersiere, laquelle depuis tous ces troubles estoit soustenuë de celle de Monsieur le Prince. Et y a grande apparence qu'avecques la fortune de l'vn, celle de l'autre ne commence d'ores en auant à decliner: encores peut estre que par ceste mort il pense donner plus prompter ressource à ses opinions. A Dieu.

*A Monsieur de Marillhac seigneur de
Ferrieres controulleur general de
l'Espagne.*



E balançois entre l'ouy & le né-
ny : non que ie ne fusse assuré
de nostre victoire, mais ie crai-
gnois que la renommee venant
pardeçà ne luy eust augmēté les
aïlles, quād vos lettres m'en ont rendu du tout
certain. Comment? que chacun soit venu aux
prises, ait combatu de main à main, de rang en
rang, soit demouré en ceruelle, & qu'il y ait
eu telle defaite de l'ennemy, & si peu de perte
des nostres? Qui est celuy qui ne voye que dieu
s'est mis pour nous de la partie? C'est doncques
à nous maintenant de le loüer & magnifier en
ses œuures, si par le passé nous auons esté pa-
resseux de ce faire: & sur tout bannir de nos
esprits l'insolence, ie veux dire apprendre à ne
contemner nostre ennemy: estant cela cause
que des grandes victoires procedēt puis apres
les grandes routes. Or de ma partie me pro-
mets que tout ira de bien en mieux, non seule-
ment pour en voir desia voler les esclats à bon-
nes enseignes, mais aussi que ie fais estat, que
tout ainsi, que le desir de guerroyer seiourne
ordinairement plus en vn esprit ieune & gail-
lard, aussi plus sōmes nous vieux, & plus l'heur
& fortune de la guerre s'eslongne de nous, ores
que pensions estre plus pratics & experimētez
en ce subyet. Tellement que ie ne voy gueres de

*tournee de
Montcon-
tour, où la
fortune
tourne vi-
sage aux
Huguenots.*

*Que les
vieux Ca-
pitaines
qui ont
couru gran-
de fortune,
doivent
craindre de
s'abourter
aux ieunes.*

vieillesse, quoy qu'elle ait esté longuement aguerrie, qui en telles affaires ne se trouue en fin supplantée par vne ieunesse gaillarde. Ainsi se veit cest heureux Cræsus, maistre de tant de victoires, mené à la raison par vn ieune Roy Cyrus. Ainsi le vieil Darius, par Alexandre, n'ayant encores vingt & huit ou vingt & neuf ans. Et s'il vous plaist que sans mendier exemples estrangers, nous demourions dans les bornes de nostre Royaume, & de nostre temps: en ceste façon veismes nous ce grand Empereur Charles cinquiesme sur son vieil aage auoir en tout cedé la place à la fortune du Roy Henry deuxiesme, pere de nostre Roy: & le Marquis du Gast, ancien capitaine, defait à la iournée de Cerizoles par Monsieur Danguien ieune Prince. Voire que si sans nous flatter nous voulons mettre en ligne de compte nos peres, ainsi furent Monsieur le Connestable à la iournée de saint Laurent, & apres luy Monsieur le Marechal de Termes, tous deux tres-anciens capitaines, defaits par vn ieune Prince de Sauoye. Brief c'estoit ce que disoit Pompee encores ieune à ce grand & vieil Dictateur Sylla, qui estoit venu à fin de tant d'affaires, que plus de nations adoroyent le Soleil leuant, que le couchant. Et c'est ce que luy-mesme esprouua depuis, enflé d'une infinité de victoires, quand il voulut heurter sa vieillesse, cōtre la nouuelle fortune de Iules Cesar: & de mesme façon Marc Antoine vieux & experimenté capitaine contre le ieune Octauien. Ceste proposition a tant d'exemples particuliers, que ie ne

douteray iamais d'alambiquer de toutes ces particularitez vne propolitiō vniuerselle, pour soustenir qu'il n'y a chose que le vieil guerrier doiue tant craindre que de s'attacher à celuy auquel la fortune commence de poindre. Le *Heureuse* vous escriis cecy nommément, par ce qu'il n'y *fortune qui* en a point plus bel exemple que du sujet que *s'est rencō-* nous traittons. Nostre France auoit produit *tree en no-* quatre grands chefs & capitaines, Monsieur de *stre Roy* Guise, Monsieur le Connestable, Monsieur le *portāt iors* Prince, & l'Admiral: les deux premiers qui a- *le tiltre de* uoyent esté employez en grandes charges sous *Duc d'An-* le defunct Roy Henry, & les deux autres qui *jou.* s'autoriserent & feirent grands par le remue- ment de la religion. Nous auons eu aussi qua- tre grandes iournees les vns encōtre les autres: celle de Dreux, de S. Denis, de Chasteau-neuf, & encores celle de Montcontour dont m'escriuez. La premiere sous la conduite des feigneurs de Guise & Connestable: la seconde, sous celle du Connestable seulement. Et combien que nous nous feissions accroire que la victoire estoit nostre en l'vne & l'autre de ces iournees, & que pour ceste cause nous feissions plusieurs demonstrations d'allegresse au milieu d'vne ruine & calamité publique, si est-ce que ceux de la religion n'en faisoient pas moins de leur costé: donnans à entendre à chacun, que si en la premiere bataille le Prince de Cō- dé leur chef auoit esté pris, le semblable estoit-il aduenue à Monsieur le Cōnestable, & qu'ou- tre ce y auoit esté tué Monsieur le Marschal de saint André, qui n'estoit pas vn petit arc-

boutant de nostre party:& quant à la seconde, que le mesme Conneftable en auoit esté rapporté tellement nauré, qu'il en auoit rendu quelques iours apres l'ame à Dieu. Mais depuis que M^oseigneur frere du Roy est entré en jeu, la chance s'est tournée de tout point. Car en la iournee de Chasteau-neuf, non seulement les autres ont esté mis en route, mais qui plus est Monsieur le Prince est demeuré sur le champ: & en celle de Montcontour y a eu vne si grande boucherie des leurs, & si peu de perte des nostres, comme m'escruez, que quelque hypocrisie quel'on apporte en telles affaires de guerre, l'Admiral est contraint, & de parole, & d'effet, de recognoistre que la victoire nous est pleinement acquise. Je ne puis presque mieux comparer ceste histoire, qu'aux guerres de ce braue Carthaginien Annibal, lequels'estât dès son enfance opiniastré à la ruine de Rome, se fit quelques anneés voye partoutel'Italie, sâs trouuer resistance à propos:& combien qu'on luy eut diuerfement opposé, tantost vn Marcellus grand guerrier, tantost vn sage Fabius, si n'en peurét ny l'vn ny l'autre venir à chef, ains fut la grandeur de sa fortune bouclée en celle du ieune Scipiô, avecques vne fin fort luctueuse & tragique. Autant en est-il pris à l'Admiral grand & signalé capitaine en son malheur. Car tout ce que les seigneurs de Guise & Conneftable (deux des premiers capitaines de nostre siecle, & nostre Frâce) n'ont peu obtenir sur luy, a esté reserué à la ieunesse de nostre ieune Duc d'Anjou, & à tant ie me persuade que par luy se termi-

se termineront tous nos troubles , tout ainsi que par l'entremise de Scipion finit le fort de la guerre des Afriquains encontre les Romains. Je m'estendrois plus amplement sur ce sujet, mais il me semble que ie voy delia tout autour de vous vne infinité d'importuns qui me maudissent du tēps qu'ils perdēt pendant que vous vous amusez à lire la presente. Toutesfois il est aisé d'y remedier. Car tout ainsi que ie la pouuois faire plus courte, si i'eusse voulu, aussi vous pouuez-vous dispenser de la lire toute. Parquoy pour contenter vn chacun il vaut mieux que ie sonne la retraite. toutesfois auāt que de me fermer, ie vous remercieray humblement de l'honneste offre que me faites pour ma maison de Mainxe , ie voulois dire la vostre. Si vostre chemin s'y addonne , vous y trouuerez vn fermier tres-homme de bien, lequel à mon iugement aura eu bonne part à la calamité du temps. Si vous le garentissez de plus grande perte, ce sera vn nouuel accroissement d'obligation que i'auray en vous. D'une autre chose vous veux-ie prier : dedans la ville de Cōgnac ma femme a vne maison bien meublee, dont les meubles luy appartiennent (c'estoit le seiour de son ayeule paternelle) ie me doute que les Huguenōts aurent faict vn bel inuentaire de tous ses meubles. - Je vous prie que sous vostre authorité le demeurant me soit conserué. Je suis grandement ioyeux du contentement que vous rend vostre fils aîné, mais marry que ne m'ayez faict part de l'anagramme qu'il a faict. Cela vous doit occasionner

de tenir, vn peu plus que ne faites, vostre corps & esprit en espargne, pendant que maniez toutes les affaires de l'Espargne. Ces vins nouueaux dont m'escriuez; ces chasses, ces tra-uaux des champs, & ces veilles continuës que supportez, me font craindre de vostre personne, comme nous craignons tout en celuy que nous aymons. Quant à vos petits mignons, ils se portent bien. Vray que Louys a eu quelque petit assaut de fieure. Mais il a esté si bien secouru par Monsieur le Grand, que graces à Dieu il est sain & dru. A Dieu.

*A Monsieur de Querquifin seigneur
d'Ardinilliers.*

*Edict de la
Pacificatio
de l'an
1570.*



N fin la paix a esté concludë & publiée en nostre Cour de Parlement le dixiesme d'Aoust dernier passé. C'est finir par où nous deuions commencer, si nous eussions esté bien

sages. Mais en telles affaires il nous en prend comme des procez, ausquels il ne faut iamais parler d'accord, que nous n'ayons premiere-ment espuisé le fonds de nos bources. Aussi en ces calamitez publiques il est impossible de nous pacifier, que lors que nous-nous voyons au dessous de toutes affaires. A la mienne volonté que nous n'eussions les yeux esbloüis. Vray Dieu que nous verrions de changemens aduenus par le moyen de chaques troubles. Les premiers que l'on appelle d'Amboise nous apor-terent la cōniuece du Magistrat aux presches

*Combië de
nouualitez
ont esté in-
troduites
en France
à l'occasio
des trou-
bles.*

& exercice de la nouuelle religion, l'erection en gouuernement de quelques Prouinces assises au cœur de la France: les seconds furent cause qu'il n'y eut presque ville où l'on ne creast vn Gouverneur particulier pour faire teste aux Huguenots: & ce qui fut lors introduit par vne iuste semonce du temps, s'est depuis tourne en police iusques à huy à la grande foule & oppression du peuple. D'auantage combien qu'auparauant il n'y eust que le Roy qui eust gardes autour de soy, toutesfois chaque Gouverneur general de Prouince pour l'asseurance de sa personne & estat, commence sous l'autorité du Roy, d'auoir gardes aux despens de nous. Ce qui s'est continué, nonobstant quelque Pacification qui ait esté faicte. S'augmentans par ce moyen les frais & leuees extraordinaires, à mesure que le moyen defailloit au peuple d'y fournir. L'adiouste qu'apres la paix faite, le Roy erigea Roques & Citadelles en quelques principales villes du Royaume, pour euer de là en auant aux surprises. Et en outre furent adoptez au Conseil priué les cinq premiers Presidens de nostre Cour. Et pour comble de malheur fut par autorité publique vendu du bien de l'Eglise. Toutes ces choses sont incogneues à nos ancestres. Et ces derniers troubles de lxvij. iusques en lxx. nous apportèrent vne confusion & meslange des premiers ordres de la Frâce. Par ce que le Roy n'ayant argent à suffire pour recompenser tous les Gentils-hommes importuns qui se presentoyent deuant luy, on trouua double

expedient de les recognoistre en parade. Estés les aucuns faits Conseillers au Conseil priué, aux honneurs tant seulement : & aux autres donné l'ordre de saint Michel. A maniere que pour le nombre effrené des vns & autres qui furent lors creéz, ces deux colleges tomberent presque au mespris & contemnemēt d'un chacun. Je remarque encores vn poinct, que pendant que nous faisons contenance de combattre pour l'Eglise de Dieu, on s'est accoustumé de recompenser les Capitaines & Gentilshommes en Eueschez & Abbayes, qu'ils tiennent sous le nom de leurs Custodinos & depositaires. Et qui est encores vne chose pleine de pitié (qui monstre vn grand changement & renuersement de l'Estat) au lieu où par les paix precedentes on se contentoit de la foy publique du Roy, & de l'emologation faite aux Cours souueraines de France: en ces derniers troubles, comme si on eust negocié avec vn Prince estranger, on demanda certaines villes par forme d'ostage & de post. C'est le fruit que nous apporta la petite Paix de soixante huit. Or en quelque façon que les choses se soyent passées, ie loue Dieu de nous auoir renuoyé le repos. I'aime mieux vne fièvre intermittente, que continuë. Et quant à moy ie prieray tousiours Dieu avec l'Eglise, qu'il luy plaise nous donner sa paix *In diebus nostris*. Nos enfans prieront pour eux en leur saison. A Dieu.

A Monsieur Loysel Aduocat.

Royez que la partie est malfaiçte,
toutes & quantes-fois que nous-
nous iouïssions à nos Maistres. Ie ne
voy point que tost ou tard il ne

*Mort de
l'Admiral
de Chastil-
lon.*

nous en prenne mal. Telsmoing ce grand Con-
nestable de Luxembourg du temps du Roy
Louys vnziesme. Vous souuient-il que quand
l'Admiral arriua en ceste ville avec vn si grand
appareil, receu & bien-veigné de tous, ie vous
dis lors qu'il eust esté, tres-heureux s'il fust mort
en ce periode, le voyant, aprestant de trauer-
ses, embrassé d'vn si fauorable accueil de son
Prince? Il sembloit que ie preueisse ce qui luy

est depuis aduenu. Mais voyez, ie vous prie,
comme quand nostre heure est venuë, nous ne
la pouuons euer. Sur le commencement des
troubles de lxxij. Monsieur de Toré ayant esté
enuoyé par deuers luy de la part du Roy, pour
l'attirer en Cour, on dit qu'il luy respôdit qu'il
n'y auoit point de Comte d'Aiguemôt en Frâ-

*Côme nous
ne pouuons
fuir nostre
malheur
quand no-
stre heure
est venue.*

ce. Voulant dire qu'il donneroit si bonne po-
lice à son fait, qu'il ne seroit point surpris côme
le Comte d'Aiguemont, pour en faire vn exé-
ple public. Depuis ayant passé tât de destours,
apres que la paix de lxx. fut faicte, il fut propo-
sé en vn conseil solemnel tenu à la Rochelle,
sçauoir si luy & les siens se deuoyent achemi-
ner par deçà avec le Roy de Nauarre, à la so-
lemnization de son mariage. Auquel lieu il
fut soustenu par toute la compagnie, que nul

des principaux de la ligue ne s'y deuoit trouuer pour vne infinité de raisons qui furent lors amplement deduites. toutesfois luy seul, las par-
 auenture & receu des longues guerres ciuiles, fut de contraire opinion : disant, que si n'estās en bon mesnage avec le Roy, ils auoyent eu de grands aduantages sur leurs ennemis, il ne falloit point douter, qu'estans près de luy avec vne estincelle de la faueur, ils viendroyent aisément à fin de tous leurs projets. Les priant pour ceste cause tres-instamment, que tout ainsi que plusieurs fois il estoit passé par leurs opinions, orcs que son aduis fust autre, aussi maintenant vne fois pour toutes, ils luy rendissent la pareille, & le voulussent croire, iacoit qu'ils fussent de contraire opinion. Le scay d'homme de marque, qui estoit lors de la partie, que pour luy faire plaisir il fut fuiuy. Vous scauez ce qui luy est depuis aduenü, & comme le tout s'est passé. Grande chose, & qui montre bien qu'il y a vn merueilleux & espouuentable iugement de Dieu, qui court contre nous, que tous les premiers chefs de nos premiers troubles sont decedez de morts violentes. Du costé des Catholics, le Roy de Nauarre premierement, puis le mareschal de S. André, apres luy Monsieur de Guise, & finalement Monsieur le Connestable. Du costé des huguenots, Monsieur le Prince de Condé, & fraichement l'Admiral : car quant au Comte de la Roche-foucault, & infinité d'autres Capitaines de nom, ie les escoule de propos deliberé sous silence, par ce que vo' en aués le registre en vostre memoire

*Fatalité
 qui s'est
 trouuee en
 nos trou-
 bles.*

aussi prompt & fidelle que moy. Mais sur tout ie m'estonne d'une chose en ceste derniere execution, comme le cœur ait failly à tant de braues guerriers, qui auoyent veu tomber tât de fois vne gresle de coups de pistoles deuant eux, sans ciller les yeux, & qu'en ce general desarrooy, il n'y en ait eu vn tout seul qui ait faict contenance de se defendre, pour arrester quelque peu, ou amuser le cours du marché. Vn homme de robbe longue seulement, nommé *Braue resolution de Tauerny* Lieutenant de la Mareschaussée à la table de marbre au Palais, accompagné d'un sien seruiteur, a acculé la populace deuant sa maison l'espace de 8. ou 9. heures: Ayant ceste ferme resolution en soy, apres que les balles luy furent faillies, d'vser de poix. Iusques à ce qu'estant destitué de tout aide, il fut tué, cōbatant vaillamment, apres auoir fait sentir à vns & autres, combien son bras estoit pesant. Exemple certes digne d'estre engraué sur le front de la posterité, à fin que l'on cognoisse que la prouesse prouient de nostre fonds, & quel'hâbit ne faict pas le moine. Deux iours apres ceste grande execution le Roy est venu au Parlement, & là seant en son liēt de Iustice, a aduoué tout ce qui s'estoit passé, comme faict par son expres commandement. Il m'entre au cœur de faire icy vne faillie, pour philosopher vn peu sur la vie del'Admiral, puis que ie vous en *Sommaire discours sur la vie & deportemens de l'Admiral.* escriis la mort: car sur moindre sujet prédriions nous biē le loisir de discourir. De ma part i'estime qu'ō ne luy peut oster qu'il n'ait esté grand Capitaine, tres-seuere obseruateur de la dis-

cipline militaire dès sa ieunesse rencontre le soldat mal-gisant, dont encores ne s'esloigna-il pendant les troubles, combien qu'il fust lors malaisé de la maintenir: personnage bien emparlé, & qui mesmes donna vogue à quelques beaux traits François, qui estoient siens, comme nous en vismes plusieurs dans le Manifeste qu'il fit courir, apres la prise de saint Quentin, luy estant prisonnier au pais bas. Au demourant seigneur de sage conduite & de grand sens aux entreprises qu'il brassoit (ie n'entre point en cognoissance de merite ou demerite d'icelles) mais nous le pouuons recognoistre en ce que nous l'auons veu surprendre tant de grandes villes, puis les rendre selon les occurrences des Edicts de Pacification, & rendues, les reprendre sans coup ferir, à la moindre rumeur de nouueaux troubles. D'auantage, qui est celuy qui n'estime grand en luy d'auoir deux fois combattu en bataille rangee, iouant l'artillerie contre luy, & neantmoins que les victoires tombassent en balance, comme celles de Dreux & de saint Denis? Que luy avec vne poignée de gens ait fait teste à la force d'un Roy de France, assisté d'un Pape, & d'un Roy Catholique? Je vous puis adiouster la prudence dont il vfa en l'an 1567. quand au iour saint Michel il fit soufleuer toute la France à poinct nommé, ayant esté son entreprise presque plustost veüe, que sçeuë. Et quãd encores apres la paix de 68. estant (ce sèbloit) reduit au dessous de toutes affaires, il traucrsa de la Champagne, toute la

France, nonobstant les gardes que l'on auoit establis aux ponts, pour luy barrer le passage des riuieres. Mesmes qu'il auoit ceste belle resolution en soy, que combien que la fortune luy eust esté rebourse en la decision d'une bataille, si ne perdoit-il le cœur pour cela, ains estoit aussi prest & prompt de combattre le lendemain, comme le iour precedent: Soit ou que sa deliberation fust telle, ou que ne l'estant, il se voulut par ce moyen maintenir en reputation avecques les siens. Qui ne sont point vrayement traits de petit Capitaine. Mais toutes ces particularitez qui semblēt l'auoir rendu recommandable, furent obscurcies d'un seul poinct. Car quand il fut question de les mettre en œuvre à bonnes enseignes pour la defense de son Roy, iamais riē ne luy re-vssit à propos, ainsi que mesmes nous vismes par la prise de S. Quentin, où il commandoit, qui sont le fondement & source de nostre ruine: & commença lors principalement à reluire quand en vne guerre ciuile il fut question de s'armer encōtre son Roy. Au demourant qu'il n'ait commis de tres-lourdes fautes, il n'en faut faire nulle doubte, quelque sage conduite que l'on die auoir hebergé en luy. Je ne parleray point de la querelle qu'il soustenoit: car comme bon Chrestien, ie seray tousiours pour la religion Catholique, Apostolique, Romaine: & comme bon citoyen i'abhorreray le changement de l'Estat, qui aduient ordinairement par le changement des religions. Mais puis qu'il s'estoit rendu chef du party contraire à nous, j'ay tou-

siours estimé qu'il fit deux tres-grandes fautes dès le commencement des troubles: l'une d'avoir desemparé Paris, l'autre, la presençe du Roy. Celuy qui pendant vne guerre ciuile commande ou dans la ville metropolitaine d'un Royaume, ou qui est assisté de la Maiesté de son Prince, n'a pas de petits aduantages sur son ennemy. Comme Iean Duc de Bourgongne le fit bien sentir aux Orleannois & Armaignacs tous le regne de Charles sixiesme, ores que sa querelle fust la pire, & que le Roy, duquel il se pretextoit, semblaist estre sans commandemēt, pour estre lors mal ordonné de son bon sens. Et n'estoit que ie crains que vous ne pensiez que ie iuge de cecy comme vn aueugle des couleurs, ie vous dirois volontiers que combien que le bon succez des affaires des Huguenots doie beaucoup à la conduite de l'Admiral, si est-ce que la bonne fortune de Monsieur le Prince s'en attribue la plus grande part, comme l'euenement l'a monstré. Car tant que le Prince vesquit, il y eut quelque obscurité aux victoires, pour scauoir qui auoit eu du meilleur: mais soudain apres qu'il fut mort, quelque entreprise que tramast l'Admiral, elle se resolut en rien, voire se tourna à sa perte & confusion. tesmoin le siege de Poitiers, tesmoin la bataille de Montcontour, où deux ieunes Princes l'acculerent. En la bataille de Montcontour, nostre grand Duc d'Anjou: & au siege de Poitiers, Monsieur de Guise fils: l'un & l'autre n'ayans lors attaints à peine l'age de 17. ans. Et pour m'estancher en peu

de paroles, s'il eut quelque heur en ses entreprises, il prouenoit seulement d'un malheur, s'estant rendu Protecteur d'un peuple affligé, lequel pensoit qu'on le voulust exterminer de la France. Qui est vne pointe laquelle ne produit de petits effects en faueur de cèluy qui en entreprend la querelle & protection. Brief son malheur ne peut porter qu'il fust lors de sa mort en bon mesnage avec son Roy & maître, ores qu'il fit demônstratiõ de ne desirer autre chose. Ny pour tout cela iene veux ny ne puis dire, qu'il n'ait esté grãd guerrier. Nostre Frãce pèdant nos troubles porta deux grands chefs de party: Feu mōsieur de Guise pour le Catholic, & l'Admiral, dont nous parlõs, pour le huguenot. tous deux ennemis iurez l'un de l'autre, soit ou que leur naturel, ou la diuersité de leurs religiõs les y cõuiast; tous deux toutes-fois diuersemēt accõplis de grandes parties. Monsieur de Guise Capitaine genereux & sans crainte, & neantmoins si retenu que iamais la temerité ne luy seruit de guide en ses actions: l'Admiral non si preux & hardy, mais si aduisé qu'il faisoit paroistre en ses deportemens n'auoir nulle peur: Cèluy là qui choisissoit ses apoincts, & ne laissoit passer les aduantages que les occasions luy presentoyent, fust en temps de guerre ou de paix: Sous laquelle resolution il se donna de grandes prerogatiues, tant sur ses amis, que ses ennemis. Cestuy-ci lequel les ayant laissè escouler, scauoit toutes-fois radoubier ses fautes si à propos, qu'il sembloit n'auoir rien perdu de l'ocasiõ. Cèluy-là

*Voyés vne
epistre de
troisième
liure, où
il discours
la vie &
la mort de
Monsieur
de Guise.*

qui eut vne fortune fauorable pendant toute la teneur & cours de sa vie. Cestuy-cy qui par vne dexterité d'esprit couuroit son ieu si apoinct, qu'il sembloit commander à son desastre. L'vn grand Prince, l'autre entre les Gentils-hommes grand seigneur. L'vn se targua du commencement de l'authorité du Roy de nauarre, l'autre de celle du Prince de Condé son frere. L'vn de la ville de Paris, l'autre de celle d'Orleans: Celle là ville capitale, ceste-cy non de si grande marque, mais qui sous la premiere lignee de nos Roys au partage des enfans de France, auoit son Roy particulier, aussi bien que nostre Paris. D'ailleurs ville qui est exposée à l'emboucheure de la Celtique & de l'Aquitaine. Le premier besongna sous la puissance ordinaire de France, sous le nom du Roy, & sous son seel; qui n'estoit point vn petit auancement pour l'execution de ses entreprises: Le second sous vn extraordinaire, & pour vn peuple, lequel, comme desaduoué de son Prince, estimoit qu'en ceste querelle il y alloit de son bien, de sa vie, & de son honneur; & en tel accident chacun non seulement bourfille & contribué volontairement au defroy de la guerre, mais encores, comme soldat, s'expose franchement aux dangers, iouant deux personages tout ensemble. Tellement qu'il aduient que le desespoir de telles gens (encores qu'ils soyent moins en nombre) leur donne souuent le dessus. Mais comme Monsieur de Guise naquit d'vne maison beaucoup plus illustre que l'autre, aussi estoit sa fortune plus grande & au-

guste; comme vous pouuez recueillir de toutes ces particularitez. Car il ne couchoit en ses desseings que de la manutention de la religion ancienne, de l'autorité du Roy, de celle du Roy de Nauarré, Lieutenant general de sa maiesté par tout son Royaume, & aîné de la maison de Bourbon, & tout d'une suite de la faueur de la ville de Paris qui auoit apres Dieu mis toute sa fiance en luy: Et quant à l'Admiral, reduit dedans Orleans, il ne s'employoit que pour la promotion d'une nouvelle religion; sous l'assistance d'un Prince qui ne tenoit le chef lieu de sa famille, ains puîné du Roy de Nauarre. Toutes lesquelles rencontres n'ont nul assortissement avec les premieres. Au demourant pour n'oublier rien de ce que ie pense appartenir à ce sujet, il y auoit en monsieur de Guise vne courtoisie & de bonnairété admirable, dont il sçauoit captiuier & rendre à sa deuotion le cœur de ses gens d'armes: Tellement que Poltrot mesmes douta de le tuer la premiere fois, pour le bon & doux accueil qu'il auoit receu de luy: En l'autre vne seuerité austere, telle toutesfois que pour cela le soldat ne prenoit à desplaisir de le suiure: Seuerité dy-ie qui luy fait compagnie iusques au dernier soupir: De façon que Besme venant en sa chambre de propos expres pour le massacrer, l'ayant ouy fortement parler, fut aucunement retenu & espris de ne passer outre, comme il recogneut depuis en quelques endroits. Tous deux sont morts de morts violentes inespérément & de guet apens. Mais en

ceste conformité de morts il y a ceste differ-
 ce, qu'apres le trespas de Mōsieur de Guise on
 luy decerna vn anniuersaire dedans l'Eglise
 nostre Dame de Paris, comme pour vn perpe-
 tuel trophée de ses merites & valeurs: & à
 l'Admiral ce fut tout autre discours. Et pour
 conclusion iamais l'Admiral ne fut heureux
 qu'en son malheur, ny monsieur de Guise mal-
 heureux qu'en son heur. Car ie ne voy point
 que le malheur l'eut accompagné, sinon lors
 que Poltrot l'assassina traistrement: Ce que
 ie mets toutesfois au nombre de ses plus grâds
 heurs. C'est à sçauoir mourant apres vne suite
 de plusieurs belles victoires, & lors qu'il estoit
 au comble de sa fortune, sans auoir senty d'elle
 aucune entorce; & si puis dire que s'ils eussent
 changé de partis, ie croy, veul la diuersité de
 leurs fortunes, que Monsieur de Guise n'eust
 sceu faire ce que fait l'Admiral, ny l'Admiral
 ce que fait monsieur de Guise. A Dieu.

A Monsieur de la Bite Iuge general de Mayenne.

*Achemi-
 nement au
 siege de la
 Rochelle.*



L'issue de ce piteux spectacle, dont
 ie vous ay escrit par mes dernie-
 res, on se delibere, mettre
 le siege deuant la Rochelle, sur le
 commencement de l'hyuer. Dieu vueille que
 l'on nes'y morfode. C'est vne chose fort dou-
 teuse de vouloir non seulement combattre vne
 ville, ains le temps. Il me souuient du siege de
 l'Empercur Charles V. quand suiuy d'Espa-
 gnols & d'Allemãs, qui durent plus au trauail

que nous autres, il se voulut heurter contre la ville de Mets, garny de loges de bois & de cuir, pour temporiser plus longuement contre le froid. Toutesfois pour fin de ce jeu il fut contraint de se retirer avecques sa courte honte. Il y a plus à craindre en nostre entreprise que nous voulons encommencer, non seulement l'oree de l'hyuer, ains contre vne ville qui est d'un costé flanquee de la mer, & presque enuironnee de marests. Puis vous sçauiez quelle est la nature du François, qui veut dès son entree estre seruy d'une gorge chaude: autrement à la lógue il se ralentit ainsi qu'une femme. Je sçay bien qu'il y a beaucoup de circonstances qui nous semonnent à ce prompt voyage. La peur où les Rochelois doiuent estre maintenāt reduis, ayans perdu tous leurs chefs de guerre, qu'il ne leur faut bailler loisir de respirer, ny d'auoir secours de l'estranger, que les poursuiuant à la chaude colle & sans respir, c'est emporter la plus grande part de la victoire. Je considere bien tout cela, mais si les souhaits auoyent lieu; ie desirerois que l'on n'engageast point nostre ieune Duc à ce siege, apres si beaux & heureux succez de guerre qu'il a eu encontre les Huguenots. Les Princes ont à mesnager leur reputation, & pour ce faire, c'est de n'entreprendre chose aucune dont ils ne viennent à chef.

A Dieu.

*A Monsieur de la Bie Inge general
de Mayenne.*

*Siege de la
Rochelle,
& quel
progrès &
evenement
il eut.*



IEV ne veut pas que nous soyons au bout de nos maux. Il y a quelque peché qui court par la France, lequel empesche que nos entreprises ne sortent effect. Seroit ce point que les huguenots ruinent seulement nos images, & que nous qui faisons profession publique d'estre Catholiques, sapons l'Eglise par le pied? Commettans les charges & dignitez Ecclesiastiques à gens indignes & varlets pour les garder, à des femmes, à des Gentils-hommes & capitaines, & autre telle sorte de gens, & que la plus part des Euesques & Abbez font troc & marchandise des benefices qui sont en leur collation? Je ne puis deuiner que c'est. Mais il est aisé de iuger que Dieu est courroucé contre nous. Iamais plus beau camp ne fut que celuy qui a esté deuant la Rochelle. Les plus sages capitaines des nostres à leur partement auoyent promis au Roy qu'ils se feroient voye au milieu de ceste ville pour passer en la Guyenne & Languedoc. Nous-nous y sommes acharnez. L'occasion sembloit estre belle. De tant que toutela confiance qu'ils auoyent en leurs grands capitaines & guerriers estoit estainte par leurs morts. Toutesfois ils nous ont fait teste. Nos principaux tueurs ont esté tuez. Et qui est chose plus admirable, c'est qu'à peine pouuons nous sçauoir qui estoit le chef
qui

qui commandoit dans la ville. En fin le siege a esté leué, mais graces à dieu sous bons gages. Par ce que les nouuelles sont venuës à nostre grand Duc, du Royaume de Polongne que l'on luy auoit deferé en l'assemblée des Estats de ce pais-là. Entre les Appanages de France, celuy d'Anjou a eu cest heur de produire quāt *Chose fatale aux Ducs d'Anjou, d'estre Roys.* & soy des Roys. Le premier qui en fut inuesti, fut Charles Comte d'Anjou frere de S. Louys: auquel le Pape Urbain quatriesme donna les Royaumes de la Pouille & Sicile, dont luy & ses descendans iouirent par plusieurs annees: iusques à ce que l'Estat estant tombé és mains de la Royne Ieanne, elle adopta Louys fils du Roy Iean qui premier porta le nom & tiltre *Le Royaume de Polongne deferé à nostre Roy, estant lors Duc d'Anjou.* de Duc d'Anjou: lequel par le moyen de ceste affiliation s'intitula de là en auant, Roy de Naples, & Comte de Prouence. Le semblable est-il maintenant aduenü à nostre ieune Duc d'Anjou, non par adoption, ains electiō. Et à fin que sçachiez cōme toutes choses se sōt passées; Estant le Royaume de Polongne tombé en quenouille par la mort du Roy Sigismond, & plusieurs Princes de toutes parts ayās illec despesché ambassades pour paruenir à la couronne, il fut aussi trouué bon entre nous d'y enuoyer l'Euesque de Valence, lequel accueilly d'un bon œil, apres auoir dextrement exploité tout ce qui estoit de sa charge, comme personnage de grand sens & suffisance, finalement, au milieu des Estats & d'une infinité de nations, nostre Duc d'Anjou a esté esleu Roy de Polongne par la voye du S. Esprit, le

320 LIV. V. DES. LET. D'EST. ASQ.
propre iour de la Pentecoste, du consentemēt
general & vniuersel de tous les peuples qui là
estoyent : N'ayant lors autre inttigateur de sa
brigue que la renommee de ses paradoxes va-
leurs. Iamais ieune Prince ne receut tant de
benedictions que cestuy : la crainte qu'il a de
Dieu benira (comme ie m'asseure) de plus en
plus ses actions. On dresse maintenant les pre-
paratifs pour l'acheminer en ce pais là, & at-
tend-on avec bonne deuotion les seigneurs
Polonois qui viennent pour luy faire compa-
gnie. A Dieu.





L E

S I X I E S M E

LIVRE DES LETTRES

D'ESTIENNE PASQUIER.

A Monsieur de Sainte-Marthe.

V S S I E Z vous iamaïs estimé *Il racom-*
 que nostre aage eust porté vne *pte quel fut*
 cause toute publique, telle *le motif du*
 que l'on traittoit ancienne- *plaidoyer*
 ment dedans Rome? Il est mal- *qu'il fit en*
 aisé de le croire. Nous en auõs *l'an 1576.*
pour le pais
d'Angou-
leme.

toutef-fois ces iours passez traitee vne avec vn
 merueilleux appareil. Et par ce que cecy vous
 pourra sembler tout nouveau, ie veux que
 vous entendiez & le motif, & le sujet, par
 la presente. La trefue estant concludë entre le
 Roy & Monsieur son frere par l'entremise de
 la Royne, qui y a apporté tous les bons offi-
 ces que l'on peut desirer, non seulement d'v-
 ne bonne mere enuers ses enfans, mais aussi
 d'vne tres-sage Princeesse pour le soulagemēt
 du pauvre peuple, le Roy par ceste capitula-
 tion promettoit donner cinq cens mille liures
 pour le payement des Reistres leuez par Mon-
 sieur le Prince de Condé, pourueu qu'ils se

retiraſſent & ne paſſaſſent au deça du Rhin. Et pour ſeureté tant de ceux de la religion, que de leurs aſſociez Catholicks, il leur donnoit en garde & depoſt les villes d'Angoulême, Bourges, Nyort, Saumur, la Charité, & Mezieres. C'eſt vne nouuelle forme de capitulation, que les ſujets ont introduit avec leur Roy depuis la petite paix delxviij. Ce depoſt fait, toutesfois à la charge que Monſieur & les principaux de ſon party iureroyét rendre ces villes le temps de la treue expiré, fuſt paix ou guerre, en l'eſtat qu'elles leur ſeroient conſignées. Auſſi promettoit il de ſoudoyer pour la garniſon de ces villes, deux mil hommes de pied, tels que Monſieur y mettroit, cent Gentils-hommes, ſa compagnie de gendarmes, cinquante Suyſſes, & cent harquebuziers pour ſa garde. Plus que les armes ſeroient licenciees tant d'une part que d'autre ſi toſt que ces villes auroient eſté deliurees. Pour l'exécution de ceſte trefue le Roy eſcrit à Monſieur de Ruffec gouverneur du païs d'Angoulmois, de conſigner la ville d'Angoulême entre les mains de Monſieur, ou de ſes deputez. Monſieur de Ruffec s'excuſe. En fin Monſieur de Montpenſier y eſt enuoyé par la Royne, qui ſe plaint d'auoir trouué les portes de la ville fermées, & de ce que l'on auoit preſté l'aureille ſourde à ſes ſommattons. Le Roy deſpeſche vn heraut d'armes en Angoulême pour faire commandement à Monſieur de Ruffec & aux habitans d'obeir promptement, & à faute de ce faire de les declarer

rebelles & ennemis : & par mesme moyen la Cour de Parlemēt decerne vn adiournement personnel contre les habitans à la requeste de Monsieur le Procureur general. Pour l'exécution duquel fut commis l'Huissier Rouget, qui leur bailla assignation de comparoir en personnes à certain iour. Ce pendant Monsieur s'achemine avec son armee en la ville de Ruffec à sept lieuës d'Angoulesme. La Roynne mere va à Ciuray deux lieuës pres de Ruffec. Ils parlementēt à michemin. Monsieur Nesmond, Lieutenant general d'Angoulmois y est enuoyé par Monsieur de Ruffec pour leur faire entendre ses excuses. Il est accordé que Monsieur luy bailleroit saufconduit pour aller à la Cour & à Paris faire ses remonstrances. Et que cependant les villes de Cōgnac & sainct Iean d'Angely seroyent consignees au lieu de celle d'Angoulesme. L'on deputē trois personnaiges representans les trois Estats du pais, l'Eglise, la Noblesse & le Tiers estat, pour venir rendre raison de leur fait, & entre autres le Lieutenant Nesmond. On les veut ouyr au conseil priué, comme estant vne cause d'Estat. Ils demandent estre renuoyez au Parlemēt pour la consequēce de la cause, & par ce qu'il s'agissoit icy de l'engagement du domaine du Roy. Ils y sont réuoyez. Ils me font cest honneur de me choisir pour leur Aduocat. Au iour qui leur est donné pour estre ouys à huis clos : on assemble la chambre de la Tournelle avec la grand' chambre. Chose qui se fait rarement. Là ie me presente pour estre ouy, co-

stoyé de ces trois deputez : & comme ie me
veux ouurir, Monsieur l'Aduocat de Thou
pour Monsieur le Procureur general l'empes-
che, & soustient qu'ils sont preuenus de crime
de leze Maiesté, partant qu'ils doiuent respõ-
dre par leur bouche. Monsieur Nesmond
(tres-habile homme, & qui pour sa suffisance
a esté dés pieça employé aux plus grâdes char-
ges du pais) prend la parole, disant que tant
s'en falloit qu'ils pensassent estre crimineux de
leze Majesté, qu'au contraire ils estimoyent
auoir faict vn tres-signalé seruice au Roy : &
que de leur part ils n'auoyent charge de par-
ler que par l'organe d'un Aduocat. Qu'apres
leur declaration ils se remettoyent à la pru-
dence & religion de la Cour d'en ordonner
ainsi que bon luy sembleroit. Sur cela on nous
fait retirer pour en deliberer au conseil : &
quelque peu apres remandez, il est ordonné
que ie plaiderois. Je suis ouy premierement,
puis Monsieur le Procureur general. En fin
les parties sont appointees au conseil, & or-
donné que l'on verroit les chartres & priuile-
ges de la ville. La grandeur, nouueauté, &
solénité de la cause fait que ie vous enuoye mō
plaidoyé à fin d'y auoir part aussi bien que
quelques autres qui me l'ôt demandé, lesquels
n'ont tel commandement sur moy comme
vous. A Dieu.

PLAIDOYE POUR LA VILLE
d'Angoulesme, faict en Parlement
à Paris le 4. Feburier 1576.

MES SIEURS, il a couru vn bruit par la France, qu'au traicté de Trefues, qui s'est passé entre le Roy & Monsieur le Duc son frere, les manans & habitans d'Angoulesme estoient non seulement refractaires à la volonté du Roy, mais rebelles. Or comme ainsi soit qu'entre les plus dangereux accidens, qui puissent aduenir à vne Republique, il n'y en ait point tant à craindre que la des-vnion des subjects avec leur Prince: aussi le plus grand creue-cœur que puisse auoir vn bon subject, c'est d'encourir ceste opinion de rebellion enuers son Roy. Si iamais ville fut obeïssante à son Prince, certainement c'est celle d'Angoulesme, laquelle combien qu'elle ait esté quelque-fois enuahie par ceux de la nouvelle opinion, si est-ce qu'estant depuis remise sous l'obeïssance du Roy, il ne se trouuera aucune remarque, par laquelle il apparroisse qu'elle ait changé, ou de religion enuers Dieu, ou de deuotion enuers le Roy. Et bien qu'elle soit heurtee de toutes parts d'ennemis, si est elle tousiours demeuree ferme & constante en son deuoir, comme vn rocher au milieu des flots. Cela vous apprestera à penser (s'il vous plaist) combien il leur est grief & moleste au milieu de tant d'obsequieux offices, de voir

que ceux, dont elle a triomphé en sa perseuerance, triomphent pour le iourd'huy d'elle. Toutesfois en ceste affliction publique ils se consolent, & estiment ce iour bien heureux auquel ils vous peuuent rendre raison de leur faict : car en vain vous feroient ils ouuerture de leur procez, si par mesme moyen ils ne vous faisoient ouuerture de leurs cœurs. Je dis vous rédre raison de leur faict, non seulement pour l'assignation, qui leur a esté baillee à la requeste de Monsieur le Procureur general du Roy : mais pour ce qu'ils vous estiment les vrais iuges & naturels de ceste cause, pour l'autorité qui vous est donnée de tout temps & ancienneté par nos Roys. Autorité, en laquelle les Roys vous ont conseruez: Autorité par laquelle les Roys mesme se sont seurement conseruez en leur grandeur. Ils vous remercient donc humblement de la fauorable audience, qu'il vous plaist maintenant leur donner. Moy seul portant la parole pour eux me trouue aucunement estonné, pour la grandeur & qualité de la cause. Car m'ayans d'un costé prié de prendre leur clientelle en main, de les esconduire i'eussé aucunement failly à mon deuoir, ayant imprimé ce perpetuel aduertissement en moy de ce grand Senateur de Rome Thraseas, second Caton de son temps, lequel disoit qu'il y a trois sortes de causes quel'Aduocat ne peut refuser. Celle de l'amy, ou del'affligé, ou qui appartient à l'exemple. D'un autre costé aussi si la volonté de nostre bon Roy, si celle de la Royne sa mere,

*En quels
subiets de
causes l'ad-
uocat se doit
principale-
ment ad-
donner.*

à laquelle la France est tant obligée, si celle de Monsieur le Duc, bref si l'opinion commune du temps combat ceste cause contre nous, ainsi qu'on faict courir le bruidt, certainement ils eussent beaucoup faict pour moy de me dispenser de ce plaidoyé. Et neantmoins s'il vous plaist considerer quel est l'air general de la cause, ie le vous diray en deux mots.

Premierement ie proteste qu'en tout le discours de mon plaidoyé ie n'entends nullement toucher à Monsieur le Duc. Il est fils & frere de deux bons Roys, Prince de sa nature tout bon, duquel ie ne puis me promettre que choses bonnes & correspondantes à ses predecesseurs, & ancestres. En ceste diuisiõ publique qui court aujourd'huy par la Frâce; il y en a les vns qui se sont eslongnez du Roy, sous vn pretexte de religion, les autres sous le pretexte du bien public. Si leur zele est excusable ou non, ie m'en rapporte à ce qui en est. nous autres, pour nous vouloir inuiolablement conseruer sous la fidelité du Roy, sommes reputez rebelles, & appelez pardeuant vous comme crimineux de leze Maiesté. I'appporteray donc ce temperamment en ceste cause, que tout ainsi que ceste grande & magnanime Princeesse la Royne mere n'a rien negocié en ce faict, qui ne soit tresdigne d'elle, c'est à dire d'une bonne mere, qui desire voir vne bonne paix, concorde & vniõ entre messieurs ses enfans, d'une tres-vertueuse Princeesse, qui veut moyenner vn bon repos à ce pauvre Royaume tant affligé: aussi n'auons nous rien icy faict qui ne se trouue digne de

nous, ie veux dire de bons, loyaux, & fidelles subjects à leur Roy, & dont le Roy & tous les Princes de France, de quelque qualité qu'ils soyent, ne doiuent receuoir contentement.

Soudain apres le partement de Monsieur le Duc, tout ainsi que ce nouueau changement importoit infiniment à la France, pour le rang & lieu qu'il tient, aussi n'y eut-il celuy qui n'en demourast grandement estonné. Entre autres nous receusmes lettres du Roy le vingt-deuxiesme Septembre dernier, par lesquelles il nous enhortoit de demeurer enuers luy en nostre ancienne fidelité. La premiere chose que Monsieur de Ruffec Gouverneur du pais d'Angoulmois eut en recommandation, apres auoir receu ces lettres, ce fut d'assembler les Estats, & suiuant le mandement du Roy prendre le serment d'eux tous vnaniment, de demeurer perpétuellement en leur fidelité. Le tout enuoyé par deuers le Roy, lequel, comme Prince debonnaire qu'il est, nous fit cest honneur de nous remercier d'une chose que nous luy deuons naturellement.

Toute la guyenne & le Languedoc estoient si opprimez de guerres, que plusieurs gouuerneurs diuersement firent trefues. Nous fusmes sommez de faire le semblable. Toutefois le Seigneur de Ruffec n'y voulut iamais entendre, disant qu'il ne luy appartenoit point de ce faire sans permission expresse du Roy. Depuis ce refus, ceux de la nouuelle opinion commencerent de faire profession plus precise d'inimitié contre nous, qu'ils n'auoyent faict

par le passé, encores qu'ils ne s'y fussent espar-
gnez. Et de faict, nous auons receu lettres
de leurs principaux partizans, par lesquelles
ils se vantoyent, qu'à quelque condition que
ce fust, ils s'empieteroyent de nous : comme
estant nostre ville vn fort & bouleuart perpe-
tuel contre leurs entreprises au milieu de la
Guyenne. Or estant Monsieur le Duc party,
vous-vous souuiendrez (s'il vous plait) que
pour asseurer vn chacun de son inopiné par-
tement, il enuoya vn Manifeste par deça, par
lequel il declaroit quel estoit le motif de son
absence, qui ne tendoit, comme il disoit, à
autre but qu'à remettre les affaires de France
en leur ancienne splendeur, faire que les Cours
de Parlement, & signamment ceste-cy, iouys-
sent de leur dignité, & les trois Estats de la
France de leurs priuileges. Que par ce moyen
il esperoit rendre les subjets du Roy tres-con-
tens, dont aujourd'huy la plus part prennent
titre & qualité de Mal-contens. Ces prôte-
stations apportees par deça, la Roynne mere s'a-
chemine en toute diligéce par deuers luy, pouf-
fec d'vn zele & deuotion trellaincte enuers le
public : comme elle est en toutes ses autres a-
ctions & deportemens. Elle entre en pour-par-
ler de paix, & pour n'y estre les affaires presen-
tes bonnement disposees l'õ fait ouuerture de
Trefues de six mois, par la cõclusion desquelles
pour la seurte des gens de Monsieur le Duc on
leur accorde Mezieres, Bourges, Nyort, Sau-
mur, la Charité, & au bout de tout cela on y

adiouste aussi Angoulesme. Ces promesses & capitulations faictes ainsi , la premiere nouvelle que nous en receuons est par vn nommé la Noue, mot qui offensa du commencement tout le peuple, soit que par hazard ou discours il nous fut enuoyé, & ce pour le lieu & degré que tient le sieur de la Nouë enuers ceux du party contraire. Le sieur de Ruffec fit lors assemblée generale, sur ce qu'il auoit de faire sur la reddition de la ville. Et ce pour autant, que bien que la Trefue fust concludë, si n'estoit-elle verifiee en ceste Cour. Il est resolu premier que de la rendre, de passer par remonstrances. Ce pendant nous sommes aduertis que Langoran rodoit les enuirs de nostre ville, accompagné de huit compagnies, tant de gens de cheual que de pied. Au mesme instant se presentent aux portes de la ville quelques cheuaucheurs, qui se disent estre du train de Monsieur de Montpensier. A la verité il est lors resolu de ne leur ouurir les portes, & de ce la Cour en entendra tantost les occasions. Soudain s'espand vn bruit par la France, que nous auions fermé les portes à Monsieur le Duc de Montpensier. Et comme il aduient ordinairement en telles choses, qu'à mesure que le bruit court, chacun y adiouste du sien, aussi les aucuns enrichissent le compte à nostre aduantage, les autres à nostre desaduantage. Pareillement comme il n'y ait celuy qui ne vueille interposer son iugement sur les affaires d'Estat, aussi trouuent les vns ce refus bon, disans qu'en vn trait de

plume, on en accordoit plus à ceux qui vouloyent reformer l'Estat, qu'ils ne pourroyent esperer dans dix ans avecques toute leur force & puissance. Les autres au contraire, soustenans que ce refus prenoit vne traicte de tres-perilleuse consequence, veu le hazard des estrangers, qui estoient ja sur les frontieres de la France. Voyans ce faux bruit courir contre nous, nous proposons nos excuses, tant enuers la Royne, que Monsieur de Montpensier, qui les trouuent si raisonnables, qu'au lieu de la ville d'Angoulesme, on baille Cognac, & S. Iean d'Angely, dont Monsieur le Duc se contente, & y a faict mettre ses garnisons au dedans. Vous aussi cognoissans d'un autre costé, qu'en matiere d'Estat, le seul soupçon tient lieu de crime, ne voulans point que nostre faute (si faute y auoit) demeurast impunie, despeschez l'Huissier Rouget par deuers nous. Estans aduertis de sa venuë, nous le receuillös comme vn Officier venant de vostre part : luy demandons qu'il nous communique l'Arrest qu'il auoit, en vertu duquel il nous donnoit assignation. Il faict responce qu'il n'auoit qu'un simple extrait d'Arrest, & encores qu'il ne nous en bailleroit coppie. Et combien que ces voyes fussent insolites, toutesfois la premiere chose que nous auons pensé appartenir à nostre deuoir, a esté de vous obeir. Commettre le Lieutenant general Maistre François Nesmond, personnage qui par ses deportemens du passé, vous peut donner tesmoignage quel est l'intérieur de sa conscience, le sieur de la Thibau-

diere, ancien Gentilhomme, qui commandoit n'agueres dans la ville de Congnac, où il s'est si fagement & dextrement porté, qu'il n'en est venu nul reproche; & Maistre Jean Garassius, Chantre del'Eglise d'Angoulesme, homme recommandé de plusieurs bonnes qualitez, le tout pour vous esclaircir de leur innocence.

En effect voyla l'histoire generale de nostre faict, en laquelle par ce qu'il s'agist de la reddition de nostre ville és mains de Monsieur le Duc, à ce que i'ay peu recueillir des obiections communes, qui courent contre nous, l'on nous obiecte trois choses. En premier lieu vne irreuerence à l'endroit de Monsieur le Duc de Montpensier; & qu'arrogamment nous luy auons fermé les portes, venât de la part du Roy. Secondement, que quand bien ce faict seroit excusable, toutesfois ce n'est au sujet de disputer contre la volonté de son Prince. Que c'est au Roy de declarer son commandement, & à nous d'apporter nostre obeïssance. Et finalement que quand bien nous serions receuables, ce neantmoins nous n'auons aucune raison, pour laquelle nous puissions particulierement nous dispenser de rendre nostre ville. Le premier poinct regarde le passé pour nos defences & excuses. Le second & le tiers, le futur: Sçauoir ce qu'il vous plaira ordonner sur ceste reddition apres nous auoir pleinement entendus en nos defences.

Pour le regard du premier poinct, ie reconnoistray que grande est l'accusation, auoir fermé les portes à Monsieur de Montpensier,

Car qui doute que la seule qualité de ce bon Prince ne porte quand & soy son sauf-conduit general par la France ? Non seulement pour estre Prince du sang , mais qui plus est , vn Prince du sang accomply de toutes les bonnes parties que l'on sçauroit souhaiter à vn Prince. Prince (dy-ie) auquel la France est grandement redevable. D'ailleurs quand sa qualité n'y seroit , qui est celuy qui ne sçait, que venant de la part du Roy , les portes ne luy deussent estre ouuertes ? Et vrayement nous sommes tous d'accord , & cognoissons que si les portes luy ont esté fermées, nostre faute est inexcusable , quelque feinte & palliation que nous puissions apporter. Mais nous denions qu'elles luy ayent esté fermées. Nous soustenons (& est vray) qu'il nes'approcha iamais de trois quarts de lieus de la ville. Nous soustenons auoir deu passer les choses ainsi que nous l'auons faict , & qu'elles se sont passées sans offence du Roy , & de Monsieur de Montpensier. Je vous ay dict qu'il se presenta vn train deuant les portes de la ville , soy renommant de Monsieur de Montpensier. Je vous ay dict que lors Langoran estoit aux enuiron de la ville avec les compagnies. Nous auons fermé nos portes. A qui ? Non à autre qu'à Langoran , craignans que sous vn nom emprunté de train , il voulust surprendre nostre ville. Iene voy donc point (sauf vos reuerences) de quoy l'on nous puisse accuser de tout ce faict-cy, sinõ d'auoir apporté prudence, pour la conseruatiõ

de nous tous, & fidelité enuers nostre Roy. N'auons-nous vne infinité d'anciennes histoires, qui nous enseignent comme les villes ont esté surprises ? Au recit desquelles, si nous nous voulions amuser, le temps nous defauidroit plustost que la parole. Il n'est point besoin fouiller dans l'ancienneté. Quelles autres histoires voulons-nous que celles de ce temps ? Vous-vous pouuez souuenir comme la ville d'Orleans fut prise en l'an cinq cens soixante sept par le seigneur de la Noüe & les siens, faisant sèblant de se venir loger dans la ville pour leurs affaires: comme celle de Castres puis n'aguères a esté surprise, par l'artifice d'un citoyé, qui mit le feu dans vne maison. Et ainsi que ceux de dedans s'amusoient à estaindre le feu, d'un autre costé les autres, qui auoyent intelligence avec quelques-vns de la ville, eurent loisir de s'en inuestir. Mais pourquoy cherchons-nous exemples si loing, veu que nous auons à nos portes la ville de Perigueux, laquelle on sçait auoir esté surprise par le mesme Langoran, ayant attiré quelques siens soldats desguisez en marchands reuendeurs, lesquels s'estans emparez de l'une des portes, furent puis apres aidez de la venuë de leur Capitaine ? Que pouuions nous donc moins faire, ayans cest exemple si frais & si proche de nous, que de nous tenir clos & couuerts, pour euitier à mesme surprise que celle qui estoit recente ? De ma part, ie m'asseure que Monsieur de Montpensier est si sage Prince, & tant zelateur du public, qu'entendant nostre
intention

intention, iamais il ne la trouuera mauuaïse. Nous ne luy auons pensé fermer nos portes, ains à celuy qui fait profession de surprendre les villes par ruses & stratagemes. C'est le sieur de Langorá. Et si le bon Prince se fust présenté, nous les luy eussions ouuertes. En voulez vous plus prompt & euident tesmoignage que celuy que nous auons negocié avec l'huissier? Il est venu non point avec l'espee, ains avec la simple baguette, non point avec vn Arrest en forme, ains extraict d'Arrest. Luy auons nous fermé les portes? Ne l'auons nous embrassé & recueilly comme Officier du Roy & Ministre de ceste grande Cour? Nous les luy auons ouuertes, & nous les eussions fermées à vn Prince? Et encores à vn Monsieur de Montpensier venant de la part du Roy; Tout sens commun y resiste. S'il y fust venu en personne, nous l'eussions honoré, sinon comme sa grandeur meritoit, pour le moins de tous fauorables accueils. Et à la mienne volonté qu'il y fust venu, assuré que nous luy eussions faict remonstrances si pertinentes, que nous ne serions reduicts en la peine en laquelle nous sommes maintenant. Nous luy eussions remonstré, que les choses estoient disposées en tel estat, que nullement nous ne deuions lors faire ouuerture de nostre ville, telle que l'on demandoit. Qu'il estoit question de l'exécution d'une trefue, qui trainoit vne grande queuë quand & soy. Qu'aux autres on se contentoit d'une mutuelle foy, & en tout euenement d'ostages. En ceste-cy on confignoit vne ville des

plus importantes de la France. Que l'ancien ordre de ceste Monarchie portoit, que iamais trefue de telle importance, & iamais paix n'auoit esté executée qu'au preallable elle ne fust verifiée & emologuée en ceste Cour, avec grande maturité de conseil. Que ceste-cyne l'ayât esté, nous auions iuste occasion de nous excuser, & dispenser de l'ouuerture quel'on demandoit. Ceste exception estoit elle bonne & vallable? Quant à moy ie n'en feray iamais nul doubte. Vos Registres en font foy. L'usage est tel, & la loy generale de la France. Laiflons vos Registres à part : Quel plus grand iugement voulez-vous de cecy que de nos Roys, & entre autres des plus sages & aduisez? Philippe de Commines nous atteste que le Roy Louys onzième ayant conclud la paix avec le Duc de Bourgogne, tint toute chose en surseance sur la reddition des villes de la riuere de Somme dont estoit question, iusques à ce que le tout eust esté emologué par la Cour. Par ce que c'estoit la coustume de France (dit il) d'y publier tous accords, autrement seroyét de nulle valeur

Celieu m'admoneste, auant que de passer plus outre, de faire ce brief discours deuant vous. Ceux qui ont sagement discouru du fait de toute Republicque bien ordonnée, en ont voulu faire trois especes. La Royale, qui depend du gouuernement d'un seul Prince : la Seigneurie, qui regarde l'administration de plusieurs personages d'estoffe : & l'Estat populaire, quand par l'aduis & entremise du

*Des trois
especes de
Repub. Et
d'une qua-
triesme qui
participe
des deux
ou des trois*

commun peuple les affaires publiques se manient. Chacune desquelles, bien que diuersement recoiue sa perfection en son particulier, si est-ce que ceux qui à meilleures enseignes voulurent repasser ce poinct, furent d'aduis qu'il y en auoit vne quatriesme espee composee, & si ainsi me permettez de le dire, allambiquee des deux ou des trois ensemble, laquelle ils estimerent de tant plus excellente qu'elle participoit de toutes les autres. Entre les Republiques quel'on estime mieux moriginees, l'on couche en ligne de compte, celle de Sparthe, en laquelle y auoit la rencontre de la Majesté de leurs Roys, avec l'autorité des Ephores. La Republique de Rome est infiniment solennisee par nos ancestres. Ceux qui ont voulu rendre raison de sa grandeur, la reiettent sur la conference commune de la Seigneurie qui se gouuernoit par les Consuls, avec l'assemblee du peuple qui se manioit par les Conseruateurs du peuple qu'il appelloyët Tribuns. Voire que les heurts & dissensions des vns & des autres, les rendoyent chacun en son endroit infiniment retenus à ce qui appartenoit au profit & vtilité du public. Celle mesme de Venise recognoissant ceste proposition pour tres-veritable, ores qu'elle soit gouvernee par vn bon nombre de gens d'honneur qu'ils appellent les Magnifiques, si voulut-elle auoir aussi vn magistrat souuerain, qui est le Duc, pour apporter es actions publiques ceste contre-balance qui est requise à tout bon Estat. Si iamais ordre politic fut sainement &

*Discours
sur la Mo-
narchie de
France.*

*L'authori-
té du Par-
lement de
Paris, qui
a fait re-
gner nos
Rois.*

sainctement obserué en quelque Republique que cefoit, ie puis dire franchement, & est vray, que c'est en nostre Monarchie. Car noz anciens recognoissans que combien qu'entre les trois premieres especes de Republique il n'y en ait point de plus digne & excellente que la Royauté, & encores Royauté qui vient par droit succéssif en ligne masculine, & mesmement à l'aîné (toutes particularitez qui se trouuent en nostre Estat) toutesfois par ce qu'il peut quelquefois aduenir que la couronne tombe és mains d'un Prince foible & imbecille, ils establirent vn perpetuel & general Conseil par la France, que l'on appella Parlement, non pour seruir de controlle à nos Roys, ains par les humbles remonstrances duquel se passoyent les confirmations des affaires generales. Et l'establirent non seulement dans Paris ville capitale de France: mais qui plus dans le Palais, seiour ancien de nos Roys, pour monstrier combien les effects de ceste compagnie estoient augustes, sacrez, & venerables: laquelle fut tant estimee & autorisee, que quelque Roy qui viéne à deceder, au milieu des obseques Royales, tous les autres Officiers estans en dueil, elle est reuestuë de ses robes d'escarlate, pour monstrier que la Majesté de la couronne, qui reside en Iustice, ne meurt iamais, ores que nos Roys soyent mortels. De là vient que nous ne voyons nulle loy auoir vogue en France, qu'elle ne soit emologuee par la Cour. Et bien que quelques-vns vueillent dire que les affaires d'Estat n'ayent

rien de commun avec vous, toutesfois iamaï
 paix ou traité d'importance, n'eut autorité
 entre nous, qu'il n'ait esté vérifié par ceste
 Cour. Comme mesmes nous le voyons auoir
 esté obserué de fraische memoire, lors que no-
 stre Roy s'achemina au voyage de Polongne.
 Non que pour cecy nos Roys ayent estimé se
 mettre sous la tutelle d'autrui : mais redui-
 sans par ce moyen leur puissance absoluë sous
 la ciuilité de la loy, ils se font garentis de l'en-
 uie publique, & des importunitéz de ceux
 qui pour leurs faueurs particulieres abusoyét
 de la debonnaireté de leurs Maistres : Se ren-
 dans par ce moyen aimez de leurs sujets sur
 tous les Princes de l'Europe. Chose qui a con-
 serué leur grandeur successiuement depuis
 onze cents ans iusques à huy. Et a produit cela
 tel fruit, que tout ainsi qu'il n'y a eu peuple
 au monde tant obeïssant à son Roy que le
 François par le passé, aussi ne se trouuerent ia-
 mais Princes tant debonnaires & fauorables
 enuers leurs sujets, que nos Roys. N'y ayant
 chose qui les ait tant vnīs en cest entre-las de
 volonte, que ce lien general de la France, ce
 grand & general Parlement : ainsi comme
 mesme sont contrains de confesser les estran-
 gers discourans sur nostre Estat. A quel pro-
 pos donc tout cecy ? Pour vous monstrer que
 ce n'est point sans grande occasion que ce
 peuple d'Angoulesme est entré en quelque
 scrupule, ne voyant ce traité de Tresues veri-
 fié en ceste Cour. Et si l'on me dit que c'est v-
 ne chose nouuelle de verifier vne Tresue qui

est passagere, & que la Cour n'interpose ses parties qu'és choses qui semblét prendre traict à perpetuité. A cecy ie vous responds en vn mot, qu'ils ont pensé (si bien ou mal, vous le iugerez s'il vous plaist) que ceste Trefue n'estoit de moindre consequence qu'un tref-ample traicté de paix. Car par icelle il est permis pendant le temps de la Trefue à ceux de la pretenduë religion nouuelle, d'exercer leur religion à huis ouuert és villes qui leur seront conlignees. Quand il n'y auroit que ce seul poinct, puis qu'il est question d'apporter nouuelle face de religion en vne ville (quelque peu de temps que ce soit) ce faict est de telle importâce que vous n'y sçauriez assez apporter d'autorité publique. Si tant est que la religion soit (comme elle est) fondement de toute Repub. bien ordonnee. Et de faict qu'estoyent tous vos Edicts de Pacification, qui furent passez depuis l'an mil cinq cens soixante, sinon temporels & prouisiõaux? Et neãtmoins l'on n'a iamais reuoqué en doute que ceste prouision temporelle ne deust passer par l'emologation de la Cour. Et ce, à mon iugement, pour autant que vous ne sçauriez si peu heurter au fait de la religion, soit pour le regard d'une ville, soit pour si peu de téps que voudrez, que ce ne soit le haut poinct, pour lequel il faut l'interpositiõ de vostre autorité, ou du tout oster de nos testes, en toutes autres choses, telles verificatiõs. Et toutesfois quand nous lairriõs ce discours à part, & que nous nous attacherions seulement au mesnage general de

*La religion
fondement
de toute
Repub. biẽ
ordonnee.*

ceste France, qui ne voit que par ceste Trefue on aliene les villes du Roy? Alienation qui ne peut estre faite qu'elle ne soit authorisee par la Cour. Mais il y a grande difference (me dira l'on) d'aliener les villes à iamais, ou bien de les bailler en ostages pour certain temps. A quoy ie responds, que toute chose qui se met en main forte pour quelque temps, n'est pas de moins redoubté effect, que celle que l'on aliene perpetuellement en main foible, quand d'ailleurs celuy qui entre pour certain temps en vne possession, s'en peut faire croire puis apres si bon luy semble. D'auantage en matiere d'alienation du domaine de la couronne, soit qu'elle soit perpetuelle ou temporelle, nos loix (mesmes les dernieres & modernes) y requierent cognoissance de cause en ce lieu.

Car par l'edict qui fut fait en l'an 1565. à Mou-
 lins, où estoient tous les Princes & grands
 Seigneurs assemblez, avec vne infinité de
 Presidens & Conseillers des Cours souuerai-
 nes, il est porté par expres, que toutes aliena-
 tions faites ou à faire du domaine serōt nulles,
 sinon en deux cas, sçauoir est, pour appanage
 des puisnez de nos Roys, & pour vendition
 necessaire à deniers contens pour la necessité
 de la guerre: & qu'en ces deux cas lettres pa-
 tentes seront decernees & publiees és Cours
 de Parlement: leur estant tres-expressement
 defendu d'auoir aucun esgard à telles lettres
 pour quelque autre cause & temps que ce soit,
 encore que ce ne fust que pour vn an. Ce sont
 les propres mots de l'Edict, qui monstrent

*Domaine
de la courō-
ne sacro-
sainct.*

assez que l'on doit faire pareil iugement de l'alienation du domaine qui ne se fait qu'à vn an ou demy an, comme de celle qui se fait à perpetuité, laquelle ainsi que nous sçauons quelque perpetuité qu'il y ait, est toutesfois subiette à vn rachapt perpetuel. Toutes ces considerations doncques sont passées par l'esprit des citoyens d'Angoulesme; considerations dy-ie dont ils eussent faict remonstrances s'ils eussent eu cest heur de iouyr dans leur ville de la presence de Monsieur le Duc de Montpensier.

Mais la necessité du temps peut estre ne portoit ceste exception & defence. Et comme disent les Medecins, *Acutis morbis acuta remedia*: Ou comme disoit le Poëte Lucain, *arma tenēr. Omnia dat qui cuncta negat*. Au contraire iamais elle ne deust estre proposee ou c'est en cest affaire. Contre qui la proposons nous? Contre celuy qui (par auenture) veut estre infracteur & perturbateur des anciennes loix de France? Non vraiment: ains contre Monsieur le Duc. Quelle protestation a-il faite? Que son propos & intention estoit de reduire toutes choses en leur bon train, & specialement de maintenir les Cours de Parlement en leurs dignitez & prerogatiues. C'est vn bon Prince qui n'est point menteur, & qui n'apporte nulle hypocrisie en ses actions. Y a il doncques homme ou seigneur apres le Roy qui doie prendre plus de plaisir & contentement en ceste excuse que luy, quand auecque vne honeste liberte nous luy remonstrons qu'estant

ses obeïssans seruiteurs, nous le voulons honnestement combatre de ses propres armes, & le supplier tres-humblement de se souuenir de sa parole & promesse, de laquelle les Princes doiuent estre aussi religieux obseruateurs, cōme de leur propre couronne? Mais peut estre ces excuses bien qu'elles eussent pleu à Monsieur le Duc, n'eussent esté fauorablement acceptees par Monsieur de Montpensier. Nous-nous assurons du contraire. Il est Prince trop amateur de la venerable ancienneté, Conseillier, Pair en ceste Cour par le moyen de son Duché. Conseiller né dés le ventre de Madame sa mere, par le moyen de sa Principauté du sang: Et ne serons iamais desauoüez de luy, quand nous dirons, qu'entre toutes les compagnies de France, il honore, & respecte la vostre.

Vous auez donc entendu iusques icy, que de ce qui s'est passé en nostre ville iusques à huy, il n'y a nulle desobeïssance de nostre part, ains toute submission & humilité: Et ja à Dieu ne plaise, qu'autres pensemens entrent en nos esprits.

Vous me direz parauenture, que vous excusez le passé, moyennant que pour l'aduenir nous donnions ordre de rendre la ville, eu esgard mesmement que la iustice nous estoit à present ouuerte en ceste Cour, il semble que le moyen nous soit clos de la verification de la trefue. Ceste difficulté (comme i'ay dit) depend de deux points: l'un, si le sujet doit estre ouy en telles matieres, s'opposant à la volonté de son Prince. L'autre, si quand bien il seroit

receuable nous auons particulieremēt moyens
pour empescher la reddition de nostre vil-
le.

*Si vn sujet
de France*

*peut par
bonnestes
remonstrā-
ces s'op-
poser quel-
ques fois
aux com-
mandemēs
de son
Prince.*

Entant que touche le premier poinct, grand
est vrayement l'argument. Vostre Roy &
Prince souuerain le vous commande. C'est
doncques à vous d'obeir. Car si vn petit esco-
lier Pythagore auoit en son escolle apporté ce-
ste ordonnance sur ses escolliers, Ill'a dit, vou-
lant par ces mots leur donner à entendre, que
ce n'estoit point à eux de controller son inten-
tion, ains seulement de le croire, combien plus
doit estre ceste proposition fichee en l'esprit
d'un sujet à l'endroit de son Prince? Et c'est la
cause pour laquelle Platon en ses Loix se moc-
quoit du legislateur, qui dedans ses ordonnan-
ces rend raison de sa loy, d'autant que com-
bien qu'elle ne deust estre cōstituee sans raisō,
si est-ce qu'estant establie, le sujet ne deuoit
considerer si bien ou mal elle l'estoit, ains y o-
beir quand elle estoit publiee. Et certes suy-
uant ce sage precepte de ce grand Philosophe,
si la trefne estoit icy publiee, nous nous tairiōs.
Mais laissons encore ceste publication en ar-
riere. Je ne veux point mettre en memoire
toutes ces longues questions des Docteurs du
droit ciuil, quand ils soustiēent, que tout ainsi
qu'il n'est point en la puissance du sujet de s'e-
xempter de l'obeissance de son seigneur, sans
le consentement du seigneur, aussi n'est-il en
celle du seigneur de mettre son sujet en main
estrange, & plus foible que la sienne sans l'ex-
pres consentemēt du sujet, cōme estās choses

relatiues & reciproques. Si ie m'y voulois amuser, le temps me faudroit plustost que la parole. Ceste cause est de trop grande importâce pour y auoir recours aux Docteurs. Mais estant nô François, plaidant pour vn peuple François au premier tribunal de la France, ie dis que nous sommes receuables, non pas à nous opposer, non à disputer, non à controler la volonté de nostre Prince: ains à luy faire nos tres-humbles remonstrances en iustice. Et si pour dire cecy, ie peche, ma faute prouient de la debonnaireté de nos Roys, qui l'ont ainsi de tout tēps & ancienneté toleré. Les anciens voulans nous représenter les Empereurs de Rome leur baillēt l'espee nuë au poin, à nos Roys la main de iustice, pour nous apprédre & enseigner, qu'une bonne partie de la dignité de l'Empire s'entretenoit par la force: au contraire que la Maïesté de nos Roys s'entretenoit par la douceur & humanité de iustice. L'Empereur disoit, *Pour autant que ie le veux il est iuste.* Nos Roys d'une parole plus douce & ciuile, disent, *Pour ce qu'il est iuste nous le voulons.*

*Pourquoy
nos Rois
portent en
leurs i-
mages la
main de
Iustice.*

Et pour ceste cause ouurent la porte à toutes honnestes remonstrances de leurs subjets, lesquelles non seulement ont esté fauorablement par eux reccuës; mais quelque-fois, pour auoir esté suiuiues ont apporté vne infinité de fruiçt à la France. Lors de la guerre du bien public, le Roy Louys xi. pour la closture & conclusion d'icelle, accorda à Mōsieur son frere le Duché de Normâdie pour son appanage. Cest accord fut executé sur quelques villes, les autres s'y

opposèrent, & ne voulurent ouvrir leurs portes à leur Duc destiné par la paix, l'on les veut appeller rebelles. Ouy en l'assemblée des Estats, qui furent tenus à Tours ils gagnent leur cause. Et au lieu de la Normandie, fut Charles Monsieur contraint se contenter de la Guyenne. Au traité de Madric fait pour le repos public, le Roy François premier du nom avoit accordé la restitution totale du pays de Bourgongne. Il estoit grand Roy, & pour ceste cause, par commun consentement, nous l'appellons maintenant le Grand. routes-fois sa grandeur n'empeschap pas que les Estats du pais de Bourgongne ne s'opposassent à la deliurance que l'on avoit promis faire de leur pais. Et fut leur opposition trouuee bonne, iuste & raisonnable. Ces exemples sont-ils veritables? Outre ce que cela s'apprend des Registres de la Cour, ceux mesmes, qui pres de la personne de Monsieur procurent & sollicitent nostre reddition, l'ont fait escrire en vn liure par eux intitulé: *Question politique. S'il est loisible aux sujets de capituler avecque leur Prince.* non toutesfois que nous vueillions tirer ce qu'ils ont fait en exemple: mais à fin qu'ils n'ayent point d'occasion d'irriter contre nous ce bon Prince, & luy faire entendre, que nous pratiquons choses nouvelles de vouloir estre ouys en nos defences. Et à fin que nous ne cherchions point exemples plus loingtains que de nostre temps. A la restitution des villes de Thurin, Chiavas, Quiers, & Ville-neufue d'Ast Monsieur le Marechal de Bourdillon ;

Gouverneur de Piedmont s'y opposa, & fut ouy en son opposition. Et tant s'en faut que pour cela il fut déclaré rebelle, qu'au contraire les villes renduës, s'estant approché de la Cour du Roy, il fut infiniment chery : & en luy principalement eut le feu Roy Charles confiance des principales affaires de France. Mais tant y a que les deux premieres oppositions de Normandie & Bourgongne furent trouuees bonnes, & non seulement trouuees bonnes, mais l'opinia streté iuste & fidele du Normand, & du Bourguignon, conserua l'un & l'autre pais à la couronne. Ainsi ie croy que nul ne doute, que nous ne soyons parties capables pour faire nos remonstrances.

Reste donc de voir s'il plaist à la Cour, si nous auons moyens suffisans, pour empescher que nous ne tombions sous les garnisons de Monsieur le Duc. En quoy nous pensons estre munis & fortifiez de deux poincts. Le premier de nos priuileges. Et quand nous n'aurions priuileges, si estimons nous estre assiste d'une infinité de particularitez, pour lesquelles vous nous en dispenserez s'il vous plaist. Au regard de nos priuileges, ce n'est point d'aujourd'hui, que nous auons apporté zele à la couronne de France, & que pour ceste consideration nous en auons esté recompensez. Il se trouue par anciennes chartres qu'en l'an 1360. estant le Roy Iean prisonnier és mains des Anglois, son fils Charles lors Regent, qui depuis fut Charles cinquieme, par le traicté de Bretigni fut contraint de leur accorder, & ceder entre au-

*Bons offices
prestés par
les citoyens
d'Angou-
lesme à
nos Roys.*

tres la ville d'Angoulesme. La paix confirmée à Calais le 24. Octobre le mesme an: quand il fut question de l'exécuter les habitans d'Angoulesmes'opposèrent formellement alleguât à cest effect leurs raisons & moyens entre les mains des deputez, pour l'exécution de la paix. Opposition, qui prit traict d'un an, pendant le quel les choses demeurèrent en suspens, & fut enuoyé par deuers eux Messire Jacques de Bourbon, leur remonstrant que le Roy leane pouuoit estre deliuré, si la ville d'Angoulesme ne passoit condamnation de cest article. Au moyen dequoy ils aimerét mieux estre perdus és mains des Anglois, que de voir perdre leur Roy. Réduis toutes-fois de corps, ils demeurèrent François de cœur. Et de fait regnant le Roy Charles cinquième en l'an 1336. voyans que le Prince de Galles fils du Roy d'Angleterre, qui iouïssoit de la Guyenne, - vouloit leuer un foïage sur les habitans d'icelle, nos ancestres furent des premiers, qui adhererent avecques les Comtes d'Armaignac, Perigort, Comminges & autres seigneurs à l'appellation par eux interiectée des exactions & nouueaux subsides imposez sur la Guyenne. Et encores dict Froissard au chap. 246. du premier volume, que ceux des basses Marches, de Poitou, Xainctonge, & la Rochelle, s'y fussent accordez, toutes-foist tousiours maintenoient ceux d'Angoulesme que ja n'en payeroient, ny ja en leur terre souffrir ne le pourroyent: & mettoient en auant, qu'ils auoyent ressort en la chambre du

Roy de France. Le Roy demeura long temps à consulter sur la reception de cest appel: En fin fut persuadé d'ouyr & enteriner leurs requestes, & remonstrances à luy faictes, par les seigneurs & habitans des bones villes, qui requeroient ayde & confort de luy, comme de leur souuerain. Et tant insisterent, qu'il fut ordonné que le Prince de Galles seroit adiourné à comparoir à Paris en la chambre des Pairs de France, pour assister à droict, & respondre aux requestes contre luy faictes. Ce sont les propres parolles de l'Autheur, lequel bien qu'en son histoire soit ennemy profez des François, si ne peut-il oublier le deuoir, que les Angoumoisins rendirent à leur Roy. Au demeurant, du remuement des choses susdictes, s'ensuiuit le renouvellement de la guerre, en laquelle le Prince de galles voyant qu'il n'auoit ennemis plus redoutables que nous, il establit son siege quelque téps chez nous, en esperance de nous tenir plus facilement en bride: toutes-fois si ne peut-il si bien faire, que nous ne le chassassions, & nous rendissions Maistres de la ville, laquelle nous remismes depuis sous la main & obeïssance du Roy, sans coup ferir. Les Roys non ingrats enuers leurs subjects, nous octroyerent pour ceste cause, tous pareils priuileges qu'à la ville de la Rochelle. Que nous ne serions tenus de receuoir garnison estrangere dans nostre ville, qu'ils ne nous pourroient aliener sans nostre consentement, & plusieurs autres de mesme marque. Nous auons nos priuileges verifiez en ceste Cour: Priuileges

qui nous sont acquis , non point par vn don gratuit, si ainsi faut que ie le die, ains au prix de nostres âg & de nos vies. Le Roy, s'il luy plaist, nous y maintiendra. Que si l'interest de toute Republique bien ordonnee, est de chastier les mauuais pour seruir d'exemple aux autres , & honorer les bons, pour exciter vn chacun à la vertu, pour laquelle cause fut introduite la confiscation du bien, faisant par icelle tomber la peine de la faute du pere dessus son enfant innocent : & d'vn autre costé la noblesse, qui se perpetuë à nos descendans , encore que par coüardise ils degenerent de la vertu de leurs deuanciers, combien plus doit on nous perpetuer en nos franchises & libertez, veu que nous sommes reputez mesmes corps par la propagation de nos ancestres en nous? Le Roy dôcques encore vn coup nous les conseruera en leur entier, s'il luy plaist.

Ouy, mais on nous dira en cel lieu , que l'intention du Roy n'est pas de nous aliener, ains de nous bailler en garde pendant vne trefue & surseance d'armes, durant lequel temps on fera vne bonne paix. On ne veut point nous aliener : on faict pis : on nous engage en toutes choses, & spécialement en celle où la bõne foy doit exuberer. C'est vne Sophistiquerie exquise de laisser la vraye intention des parties, pour s'attacher à l'escorce & superficie des paroles. Quand l'on a disputé en droit, si celuy qui est prohibé de donner peut vendre, ceux qui ont decidé ceste question n'y ont assis aucune certitude de iugement , parce qu'il se trouue par
fois

fois certains, où celuy qui est prohibé de donner peut neantmoins vendre : & quelquefois est permis à aucuns de donner, non de vendre selon la diuersité des rencontres. Et la raison de telles diuersitez prouient, d'autant qu'en telles matieres il faut singulierement peser & considerer le fonds de l'intention de celuy qui fait telles prohibitions. Je vous laisse icy à part que l'engagement equipolle à vne alienation. Considerons seulement, quelle fut l'intentiõ des roys qui promirent de n'aliener nostre ville. Non autre certainement, sinon à fin que ceste ville demeurant perpetuellement sous la puissance de nos Roys, elle seroit vray semblablement mieux traictee, & par mesme moyé eslongnee de toutes oppressions, vexations & molestes. Quel traitement pouuons nous au cas de present esperer, qui ne soit pire, & plus fascheux que si l'õ nous alienoit de tout point? Car nous alienant à Monsieur le Duc, il nous traicteroit comme siens: mais icy nous demeurons comme espaues à la mercy du premier occupant. Celuy auquel nous appartenons par droicture ne nous possèdera, & seront es mains des gés de celuy auquel nous n'appartièdrons. Qui est celuy qui ne voye que ceste occurrence de cas est de plus dangereux effect, qu'une alienation totale? L'on ne peut doncques nous obiecter, que ceste capitulation ne porte contrauention à nos priuileges. D'auantage nos priuileges ne sont pas seulement de n'estre point alienez, il y a article expres de ne receuoir garnison d'estrangers contre nostre

gré letout en la mesme forme & maniere que le rochelois. Letraicté de la trefue qui baille nostre ville est pour y receuoir garnisōs, & quitter & deposer nos armes à la deuotion de monsieur le Duc, ainsi que nous voyōs qu'il a disposé par toutes les villes qui luy ont esté accordees. Tellement que quand il n'y auroit que ce seul point, il seroit suffisant pour faire paroistre de nostre interest.

Ie pailleray plus outre & discourray, s'il vous plaist, ceste cause, comme si nous n'estions assistez d'aucuns priuileges. Tout ce quel'on nous met en auant est la necessité presente. Qu'il est besoin qu'un membre endure, pour sauuer tout le reste du corps. Si ceste cause auoit à estre traictée sur les similitudes, que l'on peut tirer des reigles de Medecine, ma cause seroit aisee à gagner. Car i'ay bien souuent ouy dire, que pour sauuer vn membre sain, il faut retrancher le malade : mais que pour sauuer le malade il falle couper ou perdre celuy qui est sain, ie ne l'ouy iamais dire. Laissons ces similitudes, & disputons politiquement. Il faut, me dit-on, que le particulier endure pour le general en matiere de police. Partant ce n'est point chose nouuelle ne inaccoustumee qu'une ville recoiue quelque affliction, pour garantir tout le demeurant du Royaume. I'en seray d'accord avecques tous, mais aussi faut-il que d'une mesme rondeur l'on m'accorde qu'il faut en telles affaires apporter quelque proportion & mesure. Et se faut bien donner garde d'affliger de telle façon vne ville, que

l'on la mette en opinion de desespoir. Vray Dieu n'auons nous eu nulle part aux troubles? La playe est encores toute sanglante. Nous auons enduré le siege, rendus par composition, apres auoir souffert diuers assauts. Depuis nous rachetâmes nos vies, nos biens & nos personnes pour quarante mille liures, qui furent promptement payees. Soudain que le payement en est fait on se saisist particulièrement des principaux de la ville. Maître Iean Arnaud Lieutenant general de la ville, homme plein d'integrité, pour n'auoir voulu adherer à ceste faction, se trouue estranglé miserablement dans sa maison. La vefue du feu Lieutenant criminel, aagée de soixante ans, trainee honteusement par les cheueux au milieu des rues. Deux Cordeliers pendus pour auoir presché la parole de Dieu. Le frere bastard du sieur de Ruffec, qui auoit esté blecé à la defense d'une breche, honteusement pendu. Bref iamais tant de violences, outrages, & inhumanitez ne furent commises, qu'en ce lieu. Non contens de cela, ils s'attachent aux saincts lieux & au tombeau de saint Iean quart-ayeul du Roy : principale remarque de la maison de Vallois. Ils y logent & hebergent leurs cheuaux. Je ne veux point imputer tout cela aux chefs. Ie sçay quelle est l'insolence du soldat, mesme pendant vne guerre ciuile. Au bout de tout cela on nous veut maintenant exposer au hazard d'un pareil naufrage. S'il est question qu'une ville endure pour le demeurant, pourquoy faut-il que ce soit per-

*Clamisez
que la ville
d'Angou-
lesme a
souffertes
pendant nos
troubles.*

pétuellement la nostre? Que ne reiette l'on part & portion de ce mal sur les autres? Auons-nous fait quelque delict pour lequel nous deuions estre couchez deux fois à ceste torture? Quand vne compagnie de gens de guerre auoit failly à son deuoir, les anciens auoyent accoustumé la dismer, ie veux dire faire mourir le dixiesme, sur lequel le sort tomboit, bien que peut estre il fust innocent. Se trouue-il quelque faute en nous, pour laquelle il falle que nous seruions non pas de la dixiesme ville, mais de la cent & deux centiesme deux fois? N'y a il point d'autres villes en France, qui puissent suppleer nostre defaut & contribuer ainsi que nous à ceste perte commune? D'ailleurs, faites vous tort seulement à nostre ville? Non. A qui donc? A toute la noblesse Catholique Angoumoisine, qui n'a autre resourçe de toutes ses afflictions, que dans nostre ville. La moitié du plat pais est occupé par ceux de la nouuelle opinion. Rendez nostre ville, vous rendez tous les Gentilshommes Catholiques vagabons. Et en ce faisant sans aucun leur demerite, les punissez de la punition de Cain. Ou s'ils font estat de resider en leurs maisons, lesquelles seront à la deuotion des autres, il faut qu'ils soyent ou miserables, ou que pour viure en quelque seurté chez eux, ils se reduisent à la mercy & deuotion de ceux auxquels ils n'ont nulle enuie de adherer. La crainte de pauvreté ou misere, la peur d'estre spolié de ses biens, produit de merueilleux effects de persuasion en nous à la

longue, encores que du commencement nous n'apprehendions que le public. La fuite d'ocques de ceste reddition ne va pas tant seulement à la ville, elle concerne tout le plat païs. Etiugeans ceste cause chacun par vous-mesmes en vostre particulier, vous pourrez imaginer s'il est raisonnable que facions part de l'engagement & hostage dont est à present question. D'ailleurs, quelle ville veut on maintenant que nous rendiôs? la ville capitale d'un païs, soit pour la religion, ou iustice, en laquelle est estably le siege Episcopal, pour le fait & exercice de nostre religion Catholique: & encores le Presidial, pour l'administration de la Iustice. tournez vos yeux, s'il vous plaist, aux choses qui se sont cy deuant passees. Au premier Edict de l'alienation du bien d'Eglise, lors que nos esprits n'estoyent encores duits à la police de tel sujet, pour la nouveauté d'ice-luy, encores y apporta l'on d'un commun accord ce respect, que combien que l'on exposast tous les biens de l'Eglise en vente, iusques à la concurrence des deniers que l'on auoit enuie de tirer, sauf à regaler puis apres sur les vns & autres, si est-ce qu'il fut defendu de toucher en aucune façon aux chefs lieux.

N'y a-il point quelque apparence de l'observer au cas de present, sous meilleur tiltre & condition? Veu qu'aux lieux où l'on met garnisons nouvelles, on fait ouuerture des presches au preiudice de nostre religiō ancienne, & prennent ceux que l'on met es villes engagees, plus de dispense & permission, qu'ils n'o-

ferent iamais auparauant esperer. Car si nous voulons nous ramenteuoir comment toutes choses se sont passees pour ce regard. Par le premier Edict, qui fut celuy de Ianuier 1561. bien qu'il leur fust permis prescher par tout, si ne leur fut-il iamais permis de ce faire dans l'enclos & enceinte des villes : ains seulement aux fauxbourgs, & encores fut ceste tolerance par le premier Edict de pacification de l'an 1562. restraincte à certains bourgs & bourgades en chacun Bailliage : iusques à ce que par le dernier du mois d'Aoust 1570 ils se contenterent de deux villetes en chacun gouuernement. Mais que iamais il entraist en opinion à tous les Capitaines de ce party la, de demander villes Episcopales pour y exercer leur religion, vous ne le trouuerez nullement. Comme aussi n'estoit-il raisonnable. Bien accorderay ie que s'ils en reduisoient aucune sous leur puissance, ou par surprise, ou par force, ils luy donnoient telle loy que bon leur sembloit comme les estimans de leur conqueste, & non autrement. Comment doncques peut on maintenant comprendre, qu'on rende nostre ville? Ville (dis-ie) Episcopale, ville (dis-ie) Presidiale, ville chef lieu de tout le pais, en laquelle soudain que l'on sera arriué, l'on fera vn meſlange, & pesse-messe de deux religions ensemble?

Je passeray encore plus outre, voyons : quelle opinion ceux qui conseillent Monsieur le Duc, ont de nous demander nostre ville, avec vne si grande opiniaſtreté. Est-elle exposee aux

passages des riuieres, comme Mezieres, Saurmur & la Charité? Il n'y a celuy qui ne sçache qu'ell'est assise en croupe de montagne: & toutesfois c'est l'vne de leurs principales opinions, pour s'asseurer des passages, qui leur fait demander villes. D'auantage ont-ils faute de villes pour leur retraite en nostre pays & aux enuiron? Ils tiennent en leur possession Boutheuille, Ponts, Perigueux, Bergerac, Castillon, Sainte Foy, Talmont, Royan, & plusieurs autres villes. Ceste consideration n'est pas en la ville de Bourges: car toute la noblesse mal contente, ou ceux de la nouuelle opinion de Berry, ou pays circonuoisins & limitrophes n'ont aucunes villes de retraite à eux: qui est la cause pour laquelle ils peuuent demander, peut estre, ceste ville là. Mais quant à nous, puis qu'ils ont tant de villes, & commoditez pour se retirer, que mesmes on leur a baillé deux villes en contr'eschange de la nostre, celle de Cognac, & Sainct Iean d'Angely, esquelles ils ont ja leurs garnisons establies, pourquoy iettent-ils encores l'œil sur nous? S'ils disent, qu'il y a plus d'assurance de force dans nostre ville. Qui ne sçait que Sainct Iean d'Angely a supporté vn siege aussi fort & redouté que nostre ville? mais Sainct Iean d'Angely ne s'est iamais opposé à l'execution de la Trefue, quand il a esté question de la rendre, me dira l'on. La raison y est toute prôpte. L'vne & l'autre ville ont esté prises par deux diuers sieges: Celle de S. Iean d'Angely remise

entre le mains du Roy, fut traictee comme de son bon & naturel seigneur avecque toutes les douceurs & humanitez que l'on scauroit souhaiter. La nostre mise en puissance estrangere, & non naturelle, receut apres la prinse toutes les indignitez que l'on scauroit excogiter, nonobstant quelque rançon à quoy elle se fust rachetee.

Et c'est la cause pour laquelle facilement l'une a ouuert ses portes, & l'autre a craint de les ouvrir, estant faicte sage à ses propres cousts & despens. Ioinct qu'en matiere de paches & conventions, l'on s'arreste tousiours aux dernieres & puis qu'ils se sont contentez de deux villes, qui les peut induire à quereler derechef la nostre, si ce n'est vn mal talét particulier qu'ils nous portent, ou quelque garde-derriere, que chacun peut diuerſement estimer; comme aussi de ce mal-talent, nous en auons lettres, que nous auons presentées à la Royne mere?

Mais donnons, que toutes les considerations cy dessus deduites fussent courtes, pour paruenir à nostre proiect (combien certes que ie m'asseure qu'estans mises en la balance, elles se trouueront de grand poix contre tout ce que l'on nous peut obiecter) quand nous n'aurions que ceste particularité en nostre cause, qu'ils ont opinion que nous leur auons faict les premiers teste, & resisté à leurs desseins; que pouuons nous esperer quand nous serons sous leur puissance, bien qu'elle ne soit que temporelle & passagere, sinon vne ardeur de vengeance, qu'ils rongent maintenant en

eux, vn cruel traictement, vne ruine generale de nos corps, de nos biens, & de nos familles? Qui est celuy qui ne se resoluë plustost à leur faire place nette, & abandonner la ville, que d'attendre telles inhumanitez qui se voyét estre preparées? Mais ils sont en la puissance d'un bon Duc, qui vous en garentira, direz vous. Dieu vueille que Monsieur le Duc ne soit point en leur puissance. D'ailleurs, combien d'insolences, de meurtres, de massacres extraordinaires, faict-on és guerres ciuiles; que les Capitaines & chefs generaux ne voyét, ou que bien souuent ils ne veulent voir pour le peu de discipline militaire, que contiennent telles desbauches publiques? L'on dict que Iulles Cesar, lors qu'il faisoit guerre contre Pöpee, permettoit toutes choses à ses soldats, voire qu'ils allassent masquez, moyennant que la lascheté fust dehors quand ce viendroît à iouïr des cousteaux. Je me tiens asseuré, que l'intention de Monsieur le Duc n'est pas telle: Mais quand le contraire seroit aduenü, ie ne sçay quelle garentie nous pourrions auoir cötre luy. La capitulation de la Trefue portoit que les Capitaines, qui seroyent misés villes, seroyent Catholiques, & francs de toute suspicion. Si cela a esté obserué, tant mieux pour nous: s'il ne l'a esté, tant pis. Permettez donc, Messieurs, que nous vsions en ceste cause non d'une exception politique, ie dis d'une exception qui soit establie entre nous par discours humain. Permettez-nous vsfer d'une exceptiö de nature, que nous auons de nostre naissance

humee avecque le laiët de nos meres, ne vous estudiez point de bānir de nous ce que l'on ne peut nous oster. Vous avez puissance sur nos vies, & sur nos biens selon la diuersité des rencontres. Il n'est point en vostre puissance de nous oster la crainte d'estre perdus. Crainte non imaginaire, crainte non affectee, crainte fondee sur vne infinité de iustes occasions qui vous ont esté representees. Vous voyez en quel estat sont les affaires de France. Anciennement toustant que nous sommes, n'estions qu'un peuple viuant vnanimement sous l'obeïssance de nostre Roy. Depuis quinze ou seize ans en çà, d'un peuple, on en a faict deux: de deux, on en a fait trois: de trois maintenant on en veut faire quatre. Nous estions vnis en vn Roy, vne Foy, vne Loy: on nous vient battre premierement d'une liberté de conscience, & avecque ceste liberté, l'esprit de diuision se mit de la partie. Dés lors nous commençâmes à estre diuisez en deux, par vne estrange malediction, & de deux noms misérables de faction, partialité & diuision, les vns appelez Papistes, & les autres Huguenots, cōbien que nous n'ayons autre qualité que celle de Chrestien, qui nous est emprainte par le saint Sacrement, & caractere de Baptisme. En ce malheur nous auons vesçu plusieurs ans. Depuis il en est venu vn tiers de Malcontens, qui meslent en leur querelle l'Estat. Restoit vne poignée de subjects, deuots sans dissimulation ou hypocrisie à leur Roy, il en faut faire vne quatriesme espee, il les

*Diuisions
de la Frâce,
sous diuer-
sité de nōs
partiaux.*

faut declarer rebelles, parce qu'ils sont trop religieux et affectionnez à leur Prince. Quel nom leur donnerons-nous? Ils feront les desesperer. Helas! il n'y a que trop d'ennemis volontaires, pour Dieu n'en faisons de nouveaux par force. Que nous peut-on imputer en tout ce fait cy? D'auoir requis suspension de la Tresue pour nostre regard, iusques à ce qu'elle fust verifiee en ceste Cour, avec cognoissance de cause, & nous ouys. Que demandons nous? d'estre maintenus en nos priuileges. Mais peut-estre sont nos priuileges irreguliers, & apprehendent vne licence effrenee contre l'Estat. Au contraire, de ne sortir de l'obeissance de nostre Seigneur naturel, & legitime. Quoy plus? de ne tomber en la misericorde de ceux que nous scauons nous estre ennemis: de ceux de la nouuelle opinion. Mais peut-estre à tort le craignons-nous. Leurs lettres, leurs menaces, leurs deportemens du passé, nous rendent asseurez de l'aduenir. Que si toutes ces circonstances ne vous esmeuent, en nostre fait, à compassion & pitié: si vous estimez nos remonstrances de peu d'effect, pour le moins representez-vous, que de nostre ville est issuë ceste grande & heureuse lignee de Valois, qui regne aujourd'huy en la France. Je ne suis point si superstitieux, que ie vueille aisément tirer à religion les accidens extérieurs. Aussi ne suis-ie si irreligieux, que ie les vueille mettre en non-chaloir. Il me souuient auoir leu, que la femme d'Auguste recueillit des serres d'un Aigle,

Laurier qui estoit dans Rome prognostic de la grandeur & ruine de la posterité d'Auguste. vne branche de Laurier, de laquelle (par elle plantee) en sourdit au long aller vne pepiniere de Lauriers, dont les Empereurs prenoyēt leurs couronnes quand ils triomphoyent. Ce bois fut de telle nature, qu'à mesure que l'un de la lignee d'Auguste mouroit, aussi mouroit vne parcelle de ce bois, iusques à ce que Neron mourant, qui fut le dernier de ceste famille, mourut aussi tout le bocage. Tant qu'Angoulesme a prosperé, aussi a par mesme moyé prosperé ceste grande & heureuse lignee. Et maintenant de l'affliger par ceux mesmes qui en sont issus & extraits, ce seroit vne chose de tres-sinistre presage. Si ce sujet ne vous contente, iettez vostre veuë plus haut, & vous souuenez de ce grand Sainct, que nous auons en nostre ville, quart ayeul de nostre bon Roy, & de Monsieur le Duc. Ne permettez point que pour la seconde fois il soit mis à l'abandon, & en proye du soldat indiscret. C'est nostre Sainct tutelaire, c'est l'heur & honneur de la maison de Valois. Nous vous prions, suppliôs, & si voulez, adiurons par les os & reliques de ce grand Sainct, qui reposent chez nous, qu'il vous plaise nous conseruer, & nous affranchir des miseres que nous voyons nous estre preparees, si nostre ville est renduë. Et si apres toutes ces remonstrances que nous vous faisons, avec toute humilité, vous trouuez que nous deuïôs no^r rédre, apres auoir veus nos priuileges, nous ferons tout ce qu'il vous plaira nous commander, asseurez qu'en ceste cause toute publique vous nous garderez la iustice que

La ville d'Angoulesme recepitacle des ancestres de nostre Roy.

l'on garde aux moindres de la France.

*A Monsieur Chopin, Aduocat au Parlement
de Paris.*

L'Edict de Blois a esté en fin paracheué sur les doleances des trois Estats, contenant plusieurs articles pleins de religion & Iustice. Mais entre les autres il n'y en a point qui me plaise tant que celuy par lequel le Roy d'une magnanimité Royale & digne de luy, borne sa puissance absoluë en matiere d'euocations, & ne veut que l'on obeisse à celles qui seront de son propre mouuement. Vray Dieu, que ce Quatrain de Monsieur de Pibrac me plaist.

*De quel
dangereux
effect sont
les Euoca-
tions du
propre
mouuemēt
des Princes,
Et comme
elles ont
pris leur
ply par la
France.*

Je hay ces mots de puissance absoluë,

De plain pouuoir, de propre mouuement :

Aux saincts Decrets ils ont premierement,

Puis à noz loix, la puissance tolluë.

Les Euocations anciennement d'un Parlement à autre, estoient du tout incogneüs à la France : Et les premieres que vous trouuez aux anciens Registres de la Cour, furent du temps de Charles vi. lors qu'un Duc de Bourgogne, qui commandoit à la France, au milieu des diuisions ciuiles, pour gratifier à ses partisans, feit euoquer quelques causes au grand Conseil, qui estoit adonc comme celuy que nous appellons au iourd'huy le Conseil priué. La necessité depuis nous apprit qu'il les falloit par fois obtenir, pour obuier aux ports, faueurs, parentelles, inimitiez & rancunes d'un

Parlement : & pour ceste cause furent faicts les Edits de la Bourdaisiere, & de Châteloup. mais quant aux Euocations du propre mouuement, elles nous estoient du tout incognues : Et du commencement que ie vins au Palais, i'ay veu que si quelqu'un eust esté si ozé de demander la retention d'une cause, en vertu de telles lettres, il en eust esté debouté, & condamné en une amende telle que du fol appel. Les troubles qui depuis suruindrent y ouurirent la porte. Qui fut cause que par l'Edit de Moulins, il fut defendu par expres d'y auoir esgard, si elles n'estoient signees d'un Secretaire d'Estat. Mais maintenant par une consideration trop plus ciuile & politique, on les exterminie tout à fait. Et certainement non sans cause. Car toutes & quantes fois que sous le propre mouuement du Roy on faict changer d'air à une cause, il aduient tout le contraire de ce que pratiquent les bons Medecins en matiere de longues maladies, esquelles ils font changer d'air au patient pour le guerir. Au contraire remuez une bonne cause d'un Parlement à autre, vous la perdez. La diuersité des contrées, & par conséquent des Parlemens, produit diuersité de maximes. Il me souuient auoir leu que les Grecs, tout ainsi comme les Romains auoyent accoustumé, pour toute sepulture, de brusler les corps des morts : & les Indiens estimoyent ne pouuoir trouuer plus honorable tombeau à leurs peres & meres, qu'en eux-mesmes : & pour ceste cause les mangeoient quand ils estoient decedez. Darius

Roy de Perse voulant faire essay combien les coustumes de chasque païs tyrannisoient sur nos esprits, voulut confronter vn Grec à vn Indien. Si luy demanda s'il voudroit manger son pere & sa mere morts: Chose que le Grec abhorra comme eslongnee de toute humanité. De là il adressa sa parole à l'Indien, luy demandant s'il voudroit brusler le corps de son pere mort: Il respondit que pour rien il ne l'entreprendroit, comme chose trop impiteuse & & abominable. Ie ne m'eslongneray des bornes de nostre France. Allez en Dauphiné, Prouence, & Bretagne, vous trouuerez que le regrés en matiere beneficiale a lieu. Es autres contrees non. Les premiers penseroient commettre heresies s'ils le reiettoient, comme estés en païs d'obeissance: les autres simonie, comme viuans sous les priuileges & libertez de l'Eglise Gallicane. Euoquez du Parlement de Dauphiné à celuy de Paris vne cause qui soit fondee en regrés, elles'y perdra. Renuoyez la de Paris à Grenoble, elle s'y gaignera. Ie sçay bien que vous me direz que les Iuges qui iugent en ceste façon ont grand tort: Car combien que la cause change de lieu, si doit elle estre terminee selon les propositions du territoire dont elle est tiree. Mais à cecy ie vous responds, que quand ils auroient entrepris de ce faire, ils ne le pourroyent. Parce que tout ainsi quel'Ourse donne la forme à ses petits à la longue en les leschant, aussi les loix, qui sont quelque-fois brusquement proposees au peuple, reçoient avec le temps polissure,

Quelles tyrannies produisent les coustumes en nos esprits.

*Les loix re-
çoivent pol-
lissure par
le temps.*

à mesure qu'elles sont mises en œuvre. Et c'est pourquoy l'on a dict que le vray truchement de la loy c'estoit l'usage. Le testament est favorable, & pour ceste cause familier en la ville de Thoulouze. Sur ceste proposition l'usage a enté vne infinité de maximes que nous ne reconnoissons à Paris, comme n'y faisans pastel estat des testamens. Au contraire les successions ab intestat nous estans recommandees, le long usage nous apprend que plusieurs choses degenerent en pais coustumier encontre les testamens. Je vous en représenteray icy vn exemple d'otie vous puis porter certain tesmoignage. Par la coustume de Paris il est loisible à tout homme & femme d'entendement, de pouvoir tester de tous ses biens meubles, acquests immeubles, & quint de ses propres. La damoiselle de Chambourcy ayant legué à la damoiselle de Longueil sa fille vne bonne partie de ses meubles & acquests, la legataire demandant deliurance de son legs, à tout le moins par provision en baillant caution, elle luy est denice par les autres enfans. Je plaidois pour elle, & vous assure que ie n'y oubliay rien de ce que ie pensois seruir à la faueur de ma cause. D'un autre costé les autres, apres avoir remonstré combien il estoit fauorable que les enfans partageassent également aux biens de la mere, finalement par arrest nous feusmes appointez au conseil. J'auois la coustume, avec la volonté enix de la mere: mais ie n'auois pas l'air general des Iuges pour moy, lesquels par deçà inclinent naturellement plus à vne pieté naturelle, qu'ils

qu'ils estiment deuoir auoir lieu en faueur d'une égalité arithmetique pour les enfans, qu'à vn iugement d'une mere qui auoit voulu particulièrement gratifier l'une de ses filles plus que les autres. Si on a baillé cest arrest en la cause d'un Parisien au milieu de sa coustume, qu'est ce qu'un thoulousain deura esperer quand sur la dispute & controuersé d'un testament on euoquera sa cause à vn Parlement de Paris? Nous deuons aider nostre Roy de nos biens, selon les occurrences de ses affaires: *Les Roys sont obligez enuers. Dieu de rendre la iustice à leurs subjects.* mais en contr'-eschange il nous est debiteur de la Iustice, & nous la doit administrer es lieux ou nous residons, où là où nos biens sont assis. C'est vne charge fonciere qui est annexée à la couronne: Et ce n'est pas proprement nous la rendre, quand on interuertit nostre bon droit par vn changement de Iuges, & Parlemens. A la mienne volonté que vous schiez vous esbaucher sur ce sujet, comme auiez fait sur la matiere du Domaine de France, sur la Police Ecclesiastique, sur les Priuileges des laboureurs. Assuré que nous enseigneriez plusieurs belles choses, non encores remarquées, mesme d'où sont procedees ces lettres que nous appellons *Du propre mouuemēt.* Qui est, si ie ne m'abuse non vne inuention Françoisse, ains Italienne, que nous deuons aux courtizans de Rome, lors qu'ils se vindrent habituer en la ville d'Auignon, & qu'ils commencerent à mettre toutes les affaires de nostre discipline Ecclesiastique en desordre & confusion. A Dieu.

*A Monsieur Buiffon, Aduocat en
Parlement.*

*Suite du
mesme
propos
qu'en la
lettre pre
cedente.*



*Discours
gaillard
sur les pas
sions de
l'amour.*

T bien : pour vous faire plaisir ie vous accorde que ces lettres estoient vne vraye folie. Mais pour me rendre la pareille, ie veux aussi que vous m'accordiez que c'estoit vne belle folie dont oiseux ie trompois Poissuété de ma ieunesse, par faulte de meilleur sujet. Et afin que ie vous descouure librement ce qui en est, lors que ie les feis imprimer, ie ne mis mon nom sur le frontispice du liure, pour sonder, avecques moins de hazard de ma reputation, quel en seroit le iugement du peuple. Et de fait i'ay long temps depuis estimé que la memoire en fust perdue, toutes-fois puis n'aguères fueilletant quelques liures en la boutique de l'Angelier, ie trouuay qu'on les auoit fait r'imprimer avec celles de Parabosco Italien, & qui plus est que l'on auoit mis, contre ma volonté, mon nom. Qui me fait penser qu'elles auoyent eu meilleur succès que ie ne m'estois promis. Je repasse lors sur aucunes : Je voy là, tantost vn amour, tantost vn desdain, puis tous les deux peslemeslez ensemblement : ores vn amant reblandir gayement sa dame, ores s'en mescontenter : En fin vn homme peu resolu se resouldre de quitter l'amour avec vn profond repentir d'auoir aimé. Je commençay adonc à me moquer de moy-mesme, & faire ce, iugement, que

quãd ie detestois l'amour, ie n'estois pas moins amoureux que quand ie le reblandissois. Car à biẽ dire si i'ay encores quelque rōge & ressetiment de ce mestier là, & que le long temps ne m'en ait du tout osté la memoire, ie suis d'aduís que le desdain fait part & portion de l'amour, & que l'amour ne prend fin & conclusion en nous, que lors que nous tournons sur l'indifferent les opinions que nous auions en nos maistresses. L'on dit que Pline ne lisoit iamais liure, si meschant fut-il, qu'il n'en tirast quelque profit: Aussi ne ly-ie iamais mes ieunes folastries que ie n'en rapporte vn grand fruit. Mais sçauẽz vous quel? C'est qu'en l'Automne auquel ie suis, il me souuiẽt d'auoir esté autresfois ieune. Qui n'est pas vn petit secret pour apprendre à excuser les ieuneslles de ceux qui nous appartiennent. Ce que plusieurs peres ne font, pour auoir perdu ce beau souuenir. A Dieu.

*Le desdain
fait part
del'a-
mour.*

A Monsieur Nesmond Lieutenant general au siege Presidial d'Angoulmois.



E n'est point chose nouuelle qu'il y ait quelques mois ou iours fatalement heureux ou malheureux à vns & autres. Le bon homme Chassanee dit en ses Commentaires sur la coustume de Bourgogne, que le mois d'Aoust luy auoit esté heureux, comme celui auquel il estoit né, auoit eu tonfure, e-

*De quel-
ques iours
& mois
qui ont esté
fatalement
heureux ou
malheu-
reux à vns
& autres*

sté fait docteur és Droicts, Conseiller en nostre Cour de Parlement, & finalement President au Parlement de Prouence. Et sans m'eslongner de nostre temps, ni de nostre France, l'on ne peut dire qu'il n'y ait eu quelque fatalité au mois de Mars pour nos troubles : Car dans cestuy fut descouuert en l'an cinq cens soixante, la coniuration de la Renauldie à Amboise, & en l'annee ensuiuante furent prises les armes pour la Religion ; & en lxxij. & lxxviij. deux Edicts de pacification publiez. En cas semblable pour les troubles qui se renouvelerent en lxxvij. se trouue le mois d'Aoust auoir esté grandement fatal, auquel en l'an cinq cens soixante neuf le Roy Charles seant en son liét de iustice declara ceux de la religion nouvelle rebelles & crimineux de leze Majesté diuine & humaine ; & l'annee ensuiuâte, au mesme mois, fut verifié autre Edict de pacification, & en l'an lxxij, fut faite l'exécution generale telle que chacun scait. Car quant aux iours les Romains remarquoyent en leurs Annales, qu'à mesme iour que les trois cens Fabiens estoient passez au fil de l'espee à vn pres, aussi furent ils depuis descõfits par les gaulois, apres plusieurs reuolutions d'annees. Au contraire les Thebains solemnizoyent le troisieme iour de Iuin, auquel à deux diuerses foys, ils auoyent obtenu deux victoires, par lesquelles la Grece auoit esté réstablíe en ses anciènes franchises & libertez. Nous pourrions de mesme façon celebrer le xxvij. de mars, auquel és annees lxxij. & lxxviij. casuellement & sans y penser furent publiees

au Parlement de Paris deux paix entre les sub-
jets du Roy. Il n'y a celuy de nous qui ne sçache
que le iour saint Mathias fut fauorable à
l'Empereur Charles cinquiesme, comme ce-
luy auquel il fut couronné Roy des Romains,
sacré Empereur, & obtint victoire de nous en
la iournee de Pauie, où nostre grand Roy
François fut pris. Tout cela ce sont remarques
dont les historiographes se peuuent diuerse-
ment iouer, non toutesfois malaises à se ren-
côtrer pour les mois: & quât aux iours il ne faut
point trop s'esbahir qu'entre plusieurs suites
d'annees, ils se trouuent quelques iours qui se
conforment en heurs ou malheurs. Mais sur
tout en ce subyet y a vne chose digne d'estre
recommandee à la posterité par ceux qui d'v-
ne plume bien taillee voudront entreprendre
l'histoire de nostre temps. Par ce que nous
trouuons le iour de la Pentecoste auoir esté
deux fois fatal à nostre Roy. Car tout ainsi qu'il
fut esleu Roy de Polongne ce iour là en l'an
cinq cens lxxiij. aussi l'an d'apres, à mesme
iour, recueillit-il ce Royaume de France, par
le decez du Roy Charles son frere. Luy ayant
ceste grande feste apporté deux grandes cou-
ronnes, l'une par le moyen de sa vertu, l'autre
par vn droit de nature. Repassez toutes les
histoires qu'il vous plaira, vous ne trouuerez
vn iour si grand & solemnel que cestuy auoir
par double succez bien-heuré la fortune d'un
Prince. Ce priuilege a esté particulièrement
reserué à nostre Roy, & encores d'un an im-
mediat à l'autre. Cela a esté cause qu'estant de

*Iour de la
Pentecoste
fatal à no-
stre Roy.*

*Institution
de l'ordre
des Cheua-
liers du S.
Esprit*

retour de deçà, apres auoir appaisé avec vne pouruoyance admirable les troubles, il a voulu particulierement honorer la memoire de ceste benedictiõ par vn nouuel ordre de Cheualerie qu'il a voué au S. Esprit, l'accõpagnant de plusieurs belles & sainctes ordonnances en l'honneur de l'Eglise Catholique, Apostolique, & Romaine. Et vrayement tout ainsi qu'en la particularité des iours qui nous sont fauorables, il a le dessus de tous autres Princes, aussi puis-ie dire que iamais nul ordre de Prince ne se trouua de telle recommandation & merite que cestuy-cy. Car la pluspart des autres furent fondez, les aucuns sur amourettes, les autres sur vne vaine ambition, mais cestuy sur vne foy & hõmage qu'il a voulu rendre à Dieu des faueurs qu'il auoit receües de luy. En quoy l'on ne peut que l'on ne loüe, outre sa deuotion, infiniment sa prudence. Pour autant que voyant son Royaume partializé en ligues, pour la diuersité des Religions, & cognoissant qu'il n'y a plus bel objet sur lequel le peuple desire de mouler ses actions, que sur les mœurs de son Roy & des seigneurs qui luy assistent, il a voulu non seulement demourer ferme & stable en la foy de ses ancestres, comme vn roc entre les vagues, mais aussi a institué ce beau vœu au milieu de sa noblesse, qui est vn grand lien pour la contenir en la Religion ancienne. Il y a plusieurs priuileges qui sont donnez aux Cheualiers de cest ordre, & plusieurs belles & sainctes ordonnances, faites par le Roy. Soudain qu'elles

courront par nos mains, ie ne faudray de vous en faire part. Je vous prie me mander de vos nouuelles, & me tenir tousiours au nombre de vos meilleurs amis. A Dieu.

A Madame de Ferrieres, vefue de messire Guillaume de Marillac, en son viuant Conseiller d'Etat, & Intendant & Controlleur general des Finances.



E ne voy point d'occasiõ pour laquelle il fust besoing de me remercier par vos lettres des plaisirs que dictes auoir receus de moy, sinon pour m'exciter à bien faire pour l'aduenir, si i'ay peu faict par le passé. Telle commemoration pour bien dire ne procede d'aucun mien merite, ains d'une honnesteté nee avecques vous, qui vous fera compagnie tant que viurez. N'estimant de ma part que l'on acquiere obligation sur autrui, quand l'on s'acquite de son deuoir. Vous mettrez d'õcques s'il vous plaist desormais tels remerciemēs hors ligne de compte, & les tournerez en commandemens sur moy, qui ne me laisseray iamais de m'employer pour vous & les vostres: Induit à ce faire tant par l'ancienne amitié & obligation que i'auois à feu Monsieur de Ferrieres, vostre mary, duquel ie faisois fõds & estat, comme de moy-mesme, que pour dix mille autres particularitez, au recit desquelles i'abuserois & du temps, & du papier. Et parce que me mandez (en riant comme ie croy) que

*Ceste lettre
ne gist qu'en
curialité.*

craignez m'estre ennuyeuse, veu mes grandes occupations, car ainsi le dites vous: le plus grād empeschement que i'auray, sera quand ie ne seray empesché pour vous, si l'occasion se presente qu'en ayez affaire, & que ne me commādiez. Desirant de vous combattre en cest endroit sinon de courtoisie, pōur le moins de bonne volonté. De laquelle ie vous prie, Madame, vous asseurer de la part de celuy, qui desire infiniment demourer en vos bonnes graces. A Dieu.

A Monsieur Pithou sieur de Sauoye, Aduocat en la Cour de Parlement de Paris.

Il escrit à Monsieur Pithou quel a esté le motif de faire le Poeme de la Pulce, auquel plusieurs nobles esprits s'employeroient en l'ā 1579 les grands iours sans à Poitiers.



LE changement d'air m'a fait pres-
que redeuenir ieune, comme i'e-
stois il y a vingt & quatre & vingt
& cinq ans, mais d'une fort belle
ieunelle, & dont ie vous veux faire part pour
refueiller vos esprits, pendant que remuez les
vieux liures pour en rapporter quelque noble
ancienneté, & la departir à la France. A peine
estions-nous arriuez, Monsieur Loyfel & moy
à Poitiers, que ie luy donnay aduis, pour ne
demeurer oïseux (car nos grands Iours n'e-
stoyent encores ouuerts) d'aller voir mes da-
mes des Roches mere & fille, honneurs vraye-
ment, & de la ville de Potiers, & de nostre lie-
cle. Ce conseil trouué bon par luy, nous nous
acheminasmes en leur maison, où apres auoir
fait entēdre que i'estois à la porte, parce qu'elles
auoyent quelque cognoissance de mon nom,

elles viennent au deuant de nous, & seroit impossible de vous dire avec combien de courtoisie l'une & l'autre nous accueillit. De ce pas entrons dans la sale, où Monsieur Loisel commence de gouverner la mere, moy la fille, que ie vous puis dire estre l'une des plus accôplies, tant de corps que d'esprit, que ie vey iamais. Car afin que ie vous die cecy en passant, la mere pour auoir esté studieuse a beaucoup leu de bons liures, qu'elle sçait fort bien mesnager avec ceux qui la gouernent, mais la fille est les liures mesmes, elle a vn esprit si naïf & abondant de belles fleurs, qu'il ne faut point qu'elle aille mandier des auteurs anciens leurs autoritez & sentences pour supplier le default de ses propos. Estant doncques là avecques elles, ie commençay à m'en escrimer au moins mal qu'il me fut possible. Et croyez qu'à beau jeu, beau retour. Cela s'appelle vne heure & demie pour le moins. Et comme nous estions en ces discours, mon bon heur voulut que i'aperceusse vne Pulce qui s'estoit parquee au beau milieu de son sein. Je vous dy par expres mon bon heur : car peut estre eusse-ie esté bien empesché à poursuiure ma premiere route, apres vn si long entretien, sans ce nouveau sujet. Tellement que ie m'en sens fort redeuable à ceste petite bestiole. Ayant donc ce nouuel object deuant moy, ie dis à Madame des Roches, par forme de cocq à l'asne, que i'estimois ceste Pulce la plus prudente & hardie que l'on eust sceu desirer. Prudente d'auoir entre toutes les parties de ceste Dame

choisi ce bel hebergement, & tres-hardie de s'estre mise en vn si beau iour. Parce que si ie me mutinois, ie me donneroie assez tost la loy del'oster, & en estre le meurtrier pour la voir prendre la hardiesse de se loger en si haut lieu. Et comme ce propos fut reietté d'une bouche à autre, par vne contention mignarde, finalement ie luy dis que puis que ceste Pulce auoit receu tant d'honneur de se repaistre du sang d'elle, & d'estre aussi honoree de nos propos, elle meritoit encore d'estre enchalée dans nos papiers, & que volontiers ie m'y employerois, si ceste dame vouloit faire le semblable. Ce qu'elle m'accorda liberalement. I'auois du commencement proferé ceste parole à coup perdu, toutesfois soigneusement recueillie par nous deux, nous meismes la main à la plume en mesme temps, pensant chacun à part nous, que son compagnon eust mis en oubly ou nonchaloir sa promesse, paracheuâmes nostre dessein en mesme heure, tombans mesmement en quelques rencontres de mots les plus signalez pour le sujet: & outre ce, pensans nous surprendre l'un l'autre, nous entr'-enuoyâmes ce que nous auions composé. Mais en cecy ie fus surpris: parce qu'en vn mesme instant, luy ayant enuoyé d'une main ce qui estoit de ma façon, ie fus d'une autre main salué par ceste dame, de ce qui estoit de la sienne. Heureuse, certes, rencontre & iouissance de deux esprits, & qui passe d'un long entre-jet toutes ces autres opinions vulgaires & folastres d'amour. Or voyez, ie vous prie, quel fruit nous a pro-

duit ceste belle contention, ou, pour mieux dire, honneste symbolization de deux ames. Ces deux petits jeux ont commencé à courir par les mains de plusieurs, & se sont trouvez si agreables, qu'à l'exemple de ceux-cy, quelques autres personnages se sont voulu mettre de la partie, & s'employer sur ce mesme sujet, à qui mieux mieux, les vns en Latin, les autres en François, quelques-vns en l'une & en l'autre langue, ayant chacun si bien exploité en son endroit, qu'à chacun, si i'en estois iuge, i'en ordonnerois la victoire. Le premier qui, comme vaillant guerrier, entra en lisse, fut monsieur l'Aduocat Brisson, lequel se donna le loisir d'affaisonner ses grandes & serieuses occupations de ceste gayeté: Ayant par ses doctes vers Latins grandement honoré les nostres. Le pas estant par luy ouuert, quelques-vns de nostre college ont aussi voulu, comme luy, rompre leur bois, mesmement Messieurs Chopin, Loisel, Mangot, Tournebu, & Binet. Il n'est pas que Monsieur de Lescale n'ait pareillement voulu faire voler des esclats: & avec luy les seigneurs Rapin, la Couldrave, Machefer, & plusieurs autres. On dira que nous sômes de grand loisir, au contraire nous ne fûmes iamais plus empeschez. Et par ce que Monsieur l'Aduocat Brisson (auquel rien n'est impossible es choses qui depêdent de son esprit) a preueu que quelques-vns, qui pour ne pouuoir rié faire de bô, ne seruent d'autre chose que de mesdire, pourroyent mal faire leur profit de nos Poëmes, il les a voulu preuenir par cest Epigramme:

Nauole non dubito quin nostra hac dente maligno

Carmina mordebis. ceu minus apta foro.

Has nugas fingi, Picta ridebis in vrbe,

Deesseque clamabis Caussidicis quod agant.

Hac sibi qui scribunt, aliis scribuntque, cauentque,

Vocereostrepidos, consilioque iuuant.

Contrà, muta foro lingua est tibi, denique habes nil

Quod scribas, dicas, Nauole nec quod agas.

Vous pourrez recenoir à nostre retour ce qui a esté fait par les autres. Ce pédant pour vous apprestre à rire, ie vous enuoye les deux Pulces, celle de madame des Roches, & la mienne : esquelles si me permettez d'interposer mô iugement, ie croy qu'en l'une vous trouuerez les discours d'une sage fille, en l'autre, d'un homme qui n'est pas trop sot. Ayât chacun de nous par une bien-seance de nos sexes, ioué tels rolles que nous deuions. A Dieu.

La Pulce de Catherine des Roches.

PETITE Pulce fretillarde,
 Qui d'une bouchette mignarde,
 Succotte le sang incarnat
 Qui colore un sein delicat,
 Vous pourroit on dire friande
 Pour desirer telle viande
 Vraiment nenny : car ce n'est point
 La friandise qui vous poingt :

*Et si n'allez à l'aventure
Pour chercher vostre nourriture,
Ains pleine de discretion,
D'une plus sage affection
Vous choisissiez place honorable,
Pour prendre un repas agreable.
Ce repas seulement est pris
Du sang, le siege des esprits.
Car desirant estre subtile,
Vive, gaye, prompte & agile,
Vous prenez d'un seul aliment
Nourriture & enseignement.
On le voit par vostre allegresse,
Et vos petits tours de finesse,
Quand vous sautelez dans un sein,
Fuyant la rigueur d'une main.*

*Quelque-fois vous faites la morte.
Puis d'une ruse plus accorte,
Vous fraudez le doigt poursuivant,
Qui pour vous ne prend que du vent.
O mon Dieu de quelle maniere
Vous fuyez ceste main meurtriere,
Et vous cachez aux cheueux longs,
Comme Syringue entre les ioncs.
Ah! que ie crains pour vous, Mignonne,
Ceste main cruelle & felonne.
He! pourquoy ne vent-elle pas
Que vous preniez vostre repas?
Vostre blesseure n'est cruelle,
Vostre peinture n'est mortelle:
Car en blessant pour vous guerir,
Vous ne tuez pour vous nourrir.
Vous estes de petite vie,*

*Mais aimant la geometrie
En ceux que vous auez espoint,
Vous tracez seulement un point,
Où les lignes se viennent rendre.*

*Encor' auez vous sceu apprendre
Comment en Sparte les plus fins
Ne se laissoient prendre aux larcins,
Vous ne voulez estre surprise:
Quand vous auez fait quelque prise,
Vous vous cachez subtilement
Aux replis de l'acoustrement.*

*Pulce, si ma plume estoit digne
Je descrirois vostre origine,
Et comment le plus grand des Dieux,
Pour la terre, quittant les cieux,
Vous fit naistre, comme il me semble,
Orion & vous tout ensemble.
Mais il faudra que tel escrit
Vienne d'un plus gentil esprit.
De moy ie veux seulement dire
Vos beautez, & le grand martyre
Que Pan souffrit en vous aimant,
Avant qu'on veit ce changement,
Et que vostre face diuine
Prit ceste couleur ebenine,
Et que vos blancs pieds de Thetis
Fussent si gresles & petüs.*

*Pulce quand vous estiez pucelle
Gentille, sage, douce, & belle,
Vous mouuant d'un pied si leger
A sauter & à voltiger,
Que vous eussiez peu d'Atalante
Deuancer la course trop lente,*

Pan voyant voſ perfectionſ,
 Sentit vn feu d'affectionſ,
 Deſirant voſtre mariage.
 Mais quoy? voſtre vierge courage
 Aima mieux vous faire changer
 En Pulce, à fin de l'eſtranger,
 Et que perdant toute eſperance,
 Il perdit ſa perſeuerance.
 Diane ſcent voſtre ſouhait,
 Vous le vouluſtes, il fut fait,
 Elle voila voſtre figure
 Sous vne noire couuerture.
 Depuis fuyant touſiours ce Dieu,
 Petite vous cherchez vn lieu
 Qui vous ſerue de ſauee garde,
 Et craigneſ que Pan vous regarde.
 Bien ſouuent la timidité,
 Fait voir voſtre dextérité
 Vous ſautelez à l'impouruenü,
 Quand vous ſoupçonneſ d'eſtre veü,
 Et de vous ne reſte ſinon
 La crainte, l'addreſſe, & le nom.

La Pulce d'Eſtienne Paſquier.

PULCE quite viens percher
 Deſſus ceſte tendre chair,
 Au milieu de deux mammelles
 De la plus belle des belles,
 Qui la picques, qui la poings,
 Qui la mords à tes bons poincts,
 Qui t'enſurant ſous ſon voile,
 Du ſang, ains du Nectar d'elle,

Chancelles, & fais maint sault
 Du haut en bas, puis en hault:
 O que ie porte d'enuie
 Al'heur fatal de ta vie!

Ainsi que dedans le pré
 D'un verd esmail diapré,
 On voit que la blonde Anette
 Sur les belles fleurs volette,
 Pillant la manne du ciel,
 Dont elle forme son miel:
 Ainsi petite Pucette,
 Ainsi Pulce Pucellette,
 Tu volettes à taston
 Sur l'un & l'autre teton,
 Puis tout à coup te recelles
 Sous l'abri de ses aisselles:
 Or' panchee sur son flanc,
 Humes à longs traicts son sang,
 Or' ayant pris ta pasture,
 Tu t'en viens à l'adventure
 Soudain apres heberger
 Au milieu d'un beau verger,
 Ains d'un Paradis terrestre,
 D'un Paradis qui fait naistre
 Mille fleurs en mes esprits,
 Dont elle emporte le pris,
 Paradis qui me resueille
 Lors que plus elle sommeille:
 Là, prenant ton doux esbat,
 Tu luy liures un combat,
 Combat qui aussi l'esueille
 Lors que plus elle sommeille.
 Las! voulust Dieu que pour moy

Elle fust en tel esmoy ,
Toy seule par ton approche
Fais esmouuoir ceste Roche,
Que mes pleurs, ains mes ruisseaux,
Que mes souspirs à monceaux,
Quelque vœu que ie remuë,
N'ont iamais en elle menü.
Ha meschante ! bien ie voy
Que i'ay ce malheur par toy ;
Car quand, folle, tu te iôies
Maintenant dessus ses iôies,
Puis par vn nouveau dessein
Tu furettes en son sein,
Et quetu la tiens en transe,
Madame en toy seule pense,
Et luy ôstes le loisir
De soigner à son plaisir,
Ou ceste mesauenture,
Pour laquelle tant i'endure.
Ce mal où suis confiné,
Vient d'un astre infortuné,
Qui est entre toy & elle,
Entre la Pulce & Pucelle:
Ayans par un mesme accord,
Toutes deux iuré ma mort.
En toy seule elle se fie
Comme garde de sa vie:
Car si en faisant ses ieux
Tu la picques, & ie veux
Te tuer facheuse Pulce
Au lieu où ta fais tu mussé,
Elle craint, pour ne rien celer
Que c'est la despucler

Et bannir à iamais d'elle

Ce cruel nom de Pucelle.

Ainsi par commun concours

Vous ioinēz en moy vos tours.

Et faut que pour un tel vice

Mon ame à iamais languisse.

Mais toy Pulce cependant

Te vas grasse, respendant

Dessus le ciel de Madame

Et de là tirant ton ame,

Tout autant que tu la poings

Autant tu luy fais de poincts,

Ains granes autant d'estoilles

En la plus belle des belles.

Je ne veux ni du Taureau,

Ni du Cigne blanc oiseau,

Ni d'Amphytrion la forme,

Ni qu'en pluye on me transforme,

Puis que ma Dame se paist

Sans plus de ce qu'il te plaist.

Pleustor' à Dieu que ie puisse

Seulement deuenir Pulce:

Tantost ie prendrois mon vol

Tout au plus beau de ton col,

Ou d'une douce rapine

Ie succerois ta poitrine:

Où lentement pas à pas

Ie me glisserois plus bas:

Là d'un muselin folastre

Ie serois Pulce idolastre,

Pinçetant ie ne sçay quoy

Que i'aime trop plus que moy:

Mais las malheureux Poëte

Que faut-il que ie souhaite?
 C'est eschange affiert à ceux
 Qui font leur seiour aux cieux.
 Et partant Pulce, Pucette,
 Je veux Pulce pucelette,
 Petite Pulce ie veux
 Addresser vers toy mes vœux,
 Quelque chose que ie chante,
 Mignonne tu n'es meschante,
 Et moins facheuse, & ie veux
 Pourtant t'adresser mes vœux.
 Si tu picques les plus belles,
 Si tu as aussi des aïles,
 Tout ainsi que Cupidon,
 Je te requiers un seul don,
 Pour ma pauvre ame alteree,
 O Pulce, ô ma Cytheree,
 C'est que ma Dame par toy
 Se puisse cueïller pour moy,
 Que pour moy elle s'cueille,
 Et ait la Pulce en l'anreille.

*A Monsieur Pithou, seigneur de Sauoye,
 Aduocat en la Cour de Parle-
 ment de Paris.*



N c o r' ne nous pouuôs nous *Il loüe mes*
 estancher. C'est vne Roche *Dames des*
 inexpugnable que celle que ie *Roche me-*
 combats par mes vers. Car ie *re & fille.*
 ne la sçaurois si bien assaillir,
 qu'elle ne se defende trop
 mieux, d'une plume si hardie, que ie douteray

deormais de luy escrire. Non seulement elle ne veut rien deuoir, mais qui plus est paye ses debtes avec vn interest excessif, ni ne demande point de delay pour s'acquiter. Je ne veis iamais esprit si prompt ni si rassis que le sien. C'est vne Dame qui ne manque point de responce: & neantmois il ne sort d'elle aucun propos qui ne soit digne d'une sage fille. Brief ie vous pleuuis sa maison pour vne vraye escole d'honneur. Le matin vous trouuerez la mere & la fille, apres auoir donné ordre à leur mesnage, se mettre sur les liures, puis tantost faire vn sage vers, tantost vne epistre bien dictée. Les apres-disnees & souppees, la porte est ouuerte à tout honneste homme. Là l'on traite diuers discours, ores de Philosophie, ores d'histoire, ou du tēps, ou bien quelques propos gaillards. Et nul n'y entre qui n'en sorte, ou plus sçauāt, ou mieux edifié. Il n'y a qu'une chose qui me desplaise en ceste maison, qu'estant la fille belle en perfection tant de corps que d'esprit, riche de biens comme celle qui doit estre vnique heritiere de sa mere, requise en mariage par vne infinité de personnages d'honneur, toutesfois elle met toutes ces requestes sous pieds: resoluë de viure & mourir avec sa mere. Ne cōsiderant pas qu'elle, par vn priuilege de son aage, doit demeurer la derniere, & cela aduenant elle se trouuera toute seule. Tellement que lors pressée de l'aage, peut-estre souhaitera-elle ce qu'en vain elle a tant de fois contemnē. Mais luy ayant fait ceste remonstrance, encores n'est-elle demeuree sans responce: me disant

qu'elle ne pourra iamais estre seule, ayant ses liures & papiers qui luy feront perpetuelle cōpagnie. Et puis dites que nostre France ne produit point de Philosophes, puis que les femmes le font. A Dieu.

A Madame de Ferrieres.



OMBIEN* que ie sçache assez *Il s'excuse de n'auoir escrit à la Dame de Ferrieres.*
qu'ayez trel-iuste occasion de m'accuser par vos lettres, du peché de paresse, qui m'est assez familier, si est-ce que ie suis tant obstiné en ma faute, que ie

ne m'en puis repentir. Non que les moindres offences que ie commettray contre vous, ne me soyent grandes, ains par ce que le fruit de ma faute est si beau, que ie serois vn grand lourdaud de m'en repentir, ayant eu ce bien en ne vous escriuant de vous occasionner à m'escrire, & ne fust-ce que pour m'accuser. En quoy ie recognoistray franchement prendre l'air de vos lettres à plus grand plaisir en quelque sujet que ce soit, que de n'auoir de vos nouvelles. D'un cas me suis-ie donné peine voyant que vous vous en donniez, de la rouverte du pour-parler qui fut en commencement de deçà: mais au mesme instant consolé, sçachant que iamais vous ne iettastes l'œil sur ce party-la dès le commencement qu'on vous en parla. Voire que vous ne vous y peustes induire, que par vne semonse forcée de vos amis. C'est pourquoy il me semble que n'avez nulle occasion de vous en affliger.

Il n'y a rien qui presse de la part de Mademoiselle vostre fille, de l'aage & nourriture dont elle est, sinon vne amitié interieure que luy portez, à laquelle jaoit que l'on ne puisse mettre frein, li est-ce que la l'aurez sagement composer en attendant les appoints & commoditez sortables, qui se pourrôt entre cy & quelque tēps rencôtrer. Et à la mienne volonté que toutes les actions de quelqu'un de vos meilleurs amis se peussent ainsi composer: du quel ie croy qu'aurez receu des nouvelles de tous ses deportemens, & entre autres comme ayant laissé ses premieres amours, il s'est maintenant mis autre sujet en bute. Lequel veritablement m'aggree plus que le premier, pour l'alliance & les biens, moyennant que la fille soit telle qu'il dit en toutes les autres parties. Et par ce que ie pense que voudrez auoir part à ce nouueau dessein, remettant cela à vostre prochain retour, ie ne vous en parleray plus amplement, pour me recommander en ce lieu à vos bonnes graces. A Dieu.

A Madame de Ferrieres.

*Il accuse
la Dame de
Ferrieres
de ce qu'elle
ne luy es-
crit.*



SI vne longue possession s'estoit en vous tournée en coustume, ie vous accuserois d'auoir laissé venir l'un de vos gens par deçà les mains vuides. Bié vous diray- ie qu'écores que ie fois marry de n'auoir receu de vos lettres, si n'é suis ie point tāt marry pour ce defect que pour autāt que ce m'est vn certā

prognostic que ne projectez encor rien de vostre retour par deçà. D'autant que nous n'receuons iamais de vos lettres, que quand estes sur le poinct de vostre partement pour nous venir reuoir. Or Madame, à fin que ie le vous tranche bien court, ny vos lettres n'augmenteront rien, ny le defaut d'icelles ne diminuera chose aucune de mō deuoir en vostre endroit. Ayant faict ceste resolution stable en moy de vous estre tousiours d'une mesme teneur & façon, ie veux dire vostre bien humble seruiteur & amy. A Dieu.

Lettres de la Dame de Ferrieres à Pasquier.



E suis d'accord que le papier ne rougit iamais, mais que l'on ne rougisse sur le papier, ie dis que si. I'en ay l'experience maintenant, que i'ay mis la main à la plume, & que ie considere qu'il

Elle s'excuse avec un bel artifice de n'auoir escrit.

y a deux mois que ie suis par deçà, & vn que m'avez faict ceste faueur de m'escire, & moy par trop paresseuse à mon deuoir, ay encore à saluër vos bonnes graces. Je vous dirois, si i'osois, les occasions, mais elles sont friuoles & impertinentes aux grands esprits, comme le vostre, qui n'apprehendēt que le public. Toutes-fois ie me fouuiens de quelques-vns de vos traits enuers vos enfans, qui m'enhardira de le vous dire. C'a esté qu'ayant trouué à mon arriuee deux des miens, ce me semble, suffisamment accomplis, pour gagner le cœur d'une

meresotte comme moy , i'ay voulu iouyr du plaisir dont ie m'estois priuee long temps, pour leur bien & profit, & les ay voulu amener avec moy contre l'opinion, & quasi contre la volonté de ma mere: où si tost que ie les ay eus, mon petit Benjamin, & sa nourrice sont deuenus malades, de façon que i'ay esté contraincte de le seurer, & implorer l'aide de celle qui se cognoist mieux que moy à le gouverner, le luy ramenant à plus grand haste que ie ne le lui auois osté. Et croy que sans ce secours ie fullè moy-mesme enleuelie. Car pour auoir esté mon fils dix ou douze nuits sans dormir, & moy aussi peu, ie suis au bout de cela deuenue malade, qui ne fera rien, si Dieu plaist: au moins ie me trouue mieux que ie n'ay faict, graces à Dieu. Voila la plus grand part de mes excuses. Que si elles ne sont suffisantes pour conurir ma faute, ie vous supplie au moins de les auoir pour agreables, & me tenir en vos bonnes graces que ie saluè de mes plus humbles & affectionnees recommandations. A Dieu.

A Madame de Ferrieres.

*Il respond
aux excuses
de la prece-
dente lettre.*



O v s estes si bonne Rhetoricienne, & auez tant de traits de persuasion, quand vous l'auuez entrepris, que lisant vostre lettre, non seulement i'ay pris vos excuses en payement (s'il vous plaist que i'vse de la liberté de ce mot) mais qui plus est, suis entré en cōpassion d'une

mere affligee, de mesme balance, tantost d'un aise infiny de la pretence de ses enfans, tantost du meschef qui est advenu au petit. Car l'une & l'autre appelle-ie affliction. Mais ce qui m'a picqué d'avantage, c'est la maladie, en laquelle estes tombee pour avoir esté trop ententive à secourir vostre enfât. Si i'estois assez sage pour vous conseiller, ie dirois que ce n'est pas ainsi qu'il en faut user. Pour autant que si voulez conseruer ce qui vous est si cher, c'est de vous conseruer vous mesmes; n'y ayant plus grand & seur depost de leur santé que la vostre. Toutesfois ie loüe Dieu que vostre maladie ait esté courte. Quoÿ que soit qu'elle n'ait de rien alteré en vous la beauté de vostre esprit, laquelle se descouure si à propos par vostre lettre, que tant s'en faut que l'on la puisse dire proceder d'un malade, qu'au contraire en un besoin elle seruiroit de recepte pour faire guerir les malades. Ceste-cy sera d'ôcques Madame non pour recevoir vos excuses, ores qu'il vous plaise que ie les recoiue, ains pour vous remercier humblement de la bonne souuenance qu'avez eüe de nous. En laquelle ie vous supplie vouloir continuer celuy qui est prest de recevoir vos commandemens, d'aussi bon cœur, qu'il vous baise humblement les mains. A Dieu,

*A Monsieur de Boileuesque, seigneur de
Saint Liger.*

*Il promet
tous bons
offices au
seigneur de
S. Liger.*



L n'a pas esté dict sans cause que la temperie du ciel produit les esprits de mesme. Ie le dis, par ce que faisant vostre seiour en vn terrouër fertile & abondant, qui paye son laboureur avec vne vsure centesime, le semblable ay-ie esprouué de vostre part par vos lettres. Car vous ayant assailly par cinq ou six lignes, qui estoit le moins que ie deuois faire, vous vous en estes reuengé par tant d'honesteté & de courtoisie, que ie me recognois franchement vaincu. Si aurez vous ceste nouuelle recharge, non de propos d'en rapporter le dessus, ains pour vous asseurer que ce dont vous me priez par la fin de vostre lettre, m'est chose trop recommandée. Ie dis à madame vostre fille auant qu'elle fust mariee avec feu Monsieur de Ferrieres, quand estoit question d'accorder leurs conuentions matrimoniales, que i'estois lors du tout à celuy qu'elle deuoit espouser, mais que soudain qu'ils seroyent mariez, ie diuiserois mon amitié par égalité de partage entr'eux. I'entretiendray ma promesse, & luy garderay vne moitié de ceste amitié, & l'autre aux enfans du defunct, la memoire duquel ie respecteray tant que ie viuray. C'est pourquoy, encores qu'en ce qui se presente i'y apporte plus de bon vouloir que de pouuoir, si ne defaudray-ie à entretenir la paix entre les vns & autres. A laquelle graces à

Dieu ie les voy tous bien disposez. Et ne fais nulle doute que les choses ne se passent au contentement d'eux tous & de leurs amis cōmuns. Vous asseurant que de ma part ie ne m'y esparneray, & sur ce ie saluëray vos bonnes graces. A Dieu.

A Madame de Ferrieres.

SE feroistrop & trop ingrat si ie ne vous remerciois mille fois de l'honneste commemoration qu'il vous a pleu faire de moy en la compagnie que sçauiez. Prenez garde seulement que ne vous rendiez mal à propos caution pour celuy qui pourra faire faillite. Cen'est pas la premiere obligation que i'ay en vous, ny la derniere que i'en espere. S'il y a ce que vous dites, croyez que c'est pour vous faire bien humble seruice, voulant demeurer à tous les autres par emprunt, & à vous en propriété. A Dieu.

*Ceste lettre
gist en re-
merciemēt.*





L E
S E P T I E S M E
L I V R E D E S L E T T R E S
D'ESTIENNE PASQVIER.

*A Monseigneur de Foix, Conseiller du Roy au
Conseil d'Estat, & Ambassadeur au
sainct Siege.*

*Il recom-
mande un
sien fils à
Monsieur
de Foix e
stant lors à
Rome.*



*Les peres
proposent
de leurs
enfans, &
leurs enfans
en disposent,*

Ous ayant tousiours honoré
& respecté entre tous les sei-
gneurs de la France, non seule-
ment pour vos vertus, ains pour
ie ne sçay quelle obligation de
nature qui m'y conuie, ie me fais
aussi accroire que deuez auoir quelque instinct
& inclination naturelle de me bien vouloir.
Cela est cause que plus hardimēt ie me suis in-
geré de vous faire vne requeste que ie vous
prie m'enteriner. Ie suis pere. Quand ie vous
dis pere, vous pouuez tout d'une suite iuger
la tyrannie que nature exerce sur moy en fa-
ueur de mes enfans. Il a pleu à Dieu de m'en
donner cinq masles, dont ie destinois le troi-
siesme à suiure la cour : mais comme il aduient
ordinairement que les peres proposent de la

fortune de leurs enfans, & que les enfans en disposent contre l'opinion de leurs peres, aussi est-il aduenü que celui dont ie vous parle, a mis la plume au vent à mon desceu, prenant son vol en Italie depuis six mois en çà; & est finalement arriué à Rome. Où luy defaillant le moyen, il est reuenu à son mieux penser, & commence de représenter la parabole de l'enfant prodigue enuers son pere: laquelle ie suis tres-aise d'accomplir. Il m'a demandé pardon par lettres, & y a par mesme moyen faict interposer l'autorité d'un mien parent nommé Monsieur Morin, personnage d'honneur, qui s'est habitué dans Rome depuis vingt ans passez. J'entends qu'il vous a faict la reuerence & que l'avez humainement receu, ayant entendu qu'il estoit mon fils. Et certes puis que sa fortune l'a conduit en ce lieu là, ie seray tres-aise, non qu'il voye ces antiquailles de Rome, qui ne me semblent de grande edification, sinon pour enseigner l'incertitude des choses humaines, mais bien qu'il considere les images vifues, dont il pourra rapporter un exemple & modèle de bien viure à l'aduenir. C'est la raison pour laquelle ie vous supplie me faire tant de faueur de le prendre à vostre seruice entre vos domestiques, sans qu'il reçoie de vous aucun priuilege, sinon comme le plus petit. Ce faict vous acquerrez deux seruiteurs tout ensemble, l'un pres de vous dedés Rome, & l'autre dedans Paris pour receuoir vos commandemens. Et s'il vous plaist me faire ce bien, ie souhaiterois qu'il pensast que ce fust

sans aucune mienne priere, ains seulement de vostre debonnaireté, pour le voir aujourd'huy réduit en l'extremité en laquelle à mon iugement il est, quelque bonne mine qu'il face. Il n'y a remede, vous permettrez s'il vous plaist à vn pere faire vn traict de comedie. I'espere que si luy faictes cest honneur qu'il lie sa fortune à vostre suite, estant en vne si bonne eschole, sa desbauche luy retournera à bon-heur. Et neâtmoins quelque chose que ie vous en prie, c'est avecque ce formulaire ancien de Ciceró, *Quod commodo tuo facere possis*. Ie ne fais point de doute qu'il n'y en ait d'autres qui vous font pareilles requestes, mais non qui ayent tant d'enuie de vous faire seruice que moy. A Dieu.

*A Monsieur d'Ossat, en la maison de
Monsieur de Foix.*

*Il recom-
mande à
Monsieur
d'Ossat son
fils.*

L'Obligation nouvelle qu'avez acquies sur moy, est de tel effect & merite, que ie ne seray iamais à mon aise que ie ne m'en sois reuengé. Et suis honteux qu'avez maintenant sur les bras ce mien fils: auquel ie commãde de vous obeir en tout & par tout comme à moy. Vous priant me faire ce bien d'auoir l'œil sur luy, comme si estiez son pere. Ie vous remercie bien fort des habillemés que luy avez fait faire, & de ce qu'avez payé pour luy. Vous l'accommoderez s'il vous plaît du reste del'argent, ainsi que trouuerez estre bon. Car quant à moy ie vous en dône toute bride,
puis

puis qu'il vous plaist en prendre la peine. Dieu me fera la grace de le recognoistre. A Dieu.

A Monsieur Morin.



E vous remercie infiniment des bōs offices qu'il vous a pleu faire à mon fils. Ce n'est pas le premier bien que j'ay receu de vous & des vostres. Le compa-

*Suite de
mesme
propos.*

gnon ne meritoit pas de recevoir ceste faueur pour la faulte qu'il auoit commise. Toutes-
fois vous luy auez esté comme vn Pharos au milieu des tenebres pour le garentir d'vn naufrage auquel il s'alloit, sans vous, submerger. Ie ne sçay quelle en sera l'issuë. Dieu vueille que vostre prognostic sorte effect. I'ay prié Monsieur de Plimpie de communiquer avec-
que vous, & suppleer ensemblement le default de ma presence en exhortations. En quoy ie vous prie le vouloir seconder, ou pour mieux dire, tenir le ieu, pour le priuilege que deuez auoir en cest endroit sur luy. Ie luy ay aussi baillé argent pour mettre vostre cousin en bon equippage. I'ay prié par lettres Monsieur de Foix, de le prendre en sa maison: ie croy qu'il ne m'esconduira de ma requeste. Ie vous puis dire auoir receu vne fascherie tres-
grande de la forme de ce voyage. Dieu peut estre permettra que le tout retournera à bien. Mais pour vous dire ce qui en est, ie trouue qu'il n'y a rien plus veritable que ce que dit Tertullian escriuant à sa femme, que le plaisir


*Quelle sui-
te porte a-
uecque soy
l'amour
des peres
enuers leurs
enfants.*

que nous prenons de nos enfans est plein d'amertume : & que ce n'a point esté sans cause que Saint Ierolme a discouru en vne epistre, sans prendre pied & resolution certaine, lequel des deux estoit le plus expedient, de soy marier ou non marier. Quant à moy i'estime que ceste question se peut clorre par ceste sentence de Martial :

*Nemets trop ton amour, ou ton cœur sur autrui,
Tu en auras moins d'aise, & aussi moins d'ennuy.*

Je croy que celuy qui n'a point d'enfans, ne reçoit tant de plaisir que celuy qui en a ; mais aussi ne sent il pas tant de trauerses & pointures en son esprit, comme l'autre. A Dieu.

*A Monseigneur de Foix, Ambassadeur pour
le Roy à Rome.*

 E loüe Dieu que soyez paruenü à chef de vos affaires, & vous remercie humblement qu'il vous ait pleu me faire part de ces bonnes nouuelles, encores que ne les ayez estallee qu'en gros. Mais la commune renommee nous les auoit debitees par le menu. Estant chose que nous tenons pour tresasseuree, qu'avez esté receu & promeu à vostre Archeuesché de Thoulouse, par ce grand & S. Consistoire, avec tous les fauorables eloges que vous pouuiez souhaiter. En quoy i'estime vostre promotion de tant plus, que d'estre Archeuesque, ce vous est chose commune avecques plusieurs Prelats, mais d'auoir esté appelé avec tant de prefacs d'honneur, mesme

par nostre sainct pere le Pape, cela ne se communique à nul autre. Cecy m'est vn prognostict res certain del'acheminemēt au Chapeau. Feu Monsieur de la Bordaissiere & apres luy Monsieur de Rambouillet, tenans le mesme rang que vous tenez maintenant dans Rome, rapporterent de leur legation ceste recompense, qui ne vous est pas moins deuë qu'à eux. Et cela me fait souhaïter que vostre nouuelle dignité ne vous donne point d'enuie de retourner si tost en France, ains que supersediez quelque temps de delà : asseuré que ferez plus d'ordenauant en vn mois, qu'auparauant en vn an. Chose que ie vous escrips, non pour vous donner aduis, sçachant bien que n'en auez affaire, ains seulement pour vous faire paroistre, que iamais ne ferez si grand que ie desire, & que le meritez. A Dieu.

*A Monsieur de Tou, Conseiller au Conseil d'Estat
& Aduocat du Roy en sa Cour de Parlement de Paris,*

EN C O R E s que ie sçache bien, veu les grandes affaires esquelles estes maintenant plongé: que ce soit grandemēt pecher contre le public de vous en distraire, si est ce que par vn priuilege qui est familier, non à ceux qui sont extraits de Paris, ains à vn Parisien, tel que ie suis, d'estre naturellemēt mal appris, ie vous prie ne trouuer estrange si ayāt plus de consideration & esgard à l'estat de

*Il vir par
ceste lettre
auecque
Monsieur le
President
de Tou lors
Aduocat
du Roy.*

mes affaires, que des vostres, ie me donne maintenant carriere : Ie dy par expres à l'estat de mes affaires. Car estant en pleines vacatiōs, pour estre les affaires de nostre Palais, si non du tout taries, pour le moins diminuees grandement à l'occasion de vos grands Iours de Clairmont, ie penserois faire plus de faulte en me taisant, que rompant mon long silence, vous diuertir de vos plus serieuses pensees. Et toutes-fois ne pensez pas que receuant la presente, vous y trouuiez de grandes nouuelles. Ie cognois aujourd'huy par effect, ce que la seule imagination me faisoit par cy deuant accroire, que les nouuelles naissent dedans nostre Palais auecque la pratique, & qu'elles prennent leur naissance, augmentation, progrès & desinement selon le croist ou descroist d'icelle. Vous penserez parauanture que ie me mocque, mais il est vray. Et n'est peut-estre malaisé d'en rendre la raison, si vous considerez quel'affluence des affaires cause la multitude du peuple, laquelle est non seulement mere des nouuelles, mais outre ce, comme Pourse, en les lechant, ou pour mieux dire, dorlotant, les accommode de toutes les façons que lon y scauroit desirer. De là vient que sur vn Change de Lyon, à la Realte de Venise, à *ibanchi* de Rome, on ne manque iamais de ce sujet. De là que dans nostre Palais on n'en demeure non plus court, que des causes. Voirre que ie puis dire, car il est vray, qu'ce sont choses correlatiues. Et que quand le Palais demeure sans causes, il demeure aussi sans

*Les nouuel.
les croissent
en la sale
des Palais,
& pour-
quoy*

nouvelles, & que plus assuré pied vous ne
 ſçauriez prendre, pour dire qu'il y a peu de
 cauſes, ſi ſon vous y manque de nouvelles. Je
 voy bien que iuſques icy vous-vous eſtiez gar-
 dé de rire, mais que maintenant la patience
 vous eſchappera, & que tout en vn coup eſcla-
 terez, quand conſidererez que celuy qui vous
 eſcrit eſt d'un pauvre malotru Aduocat deu-
 nu inopinément Philoſophe. Et toutes-fois
 ce ne me ſeroit pas petit aduantage : encores
 que ie ſçache que tous ces Philoſophes conté-
 platifs ſoyent ordinairement baguenaudiers.
 Maisma condition eſt bien pire, eſtant depuis
 voſtre partement deuenu vn oïſif, faincant,
 poltron, *Lamedefima dapocagine*, & à peu dire,
 homme qui ne craint & haïſt rien tant que vos
 grands Iours. Craignant qu'à vn beſoin ie fuſſe
 maintenant vray ſujet & proye d'un Preuoſt
 des Mareſchaux. Et n'y a qu'un cas qui m'en ga-
 rentiſt, c'eſt que ie ne ſuis vagabond, ains re-
 duit en la ſolitude de ma maiſon, horsmis quel-
 ques deux heures, dont ie me diſpenſe tous les
 matins au Palais. Je vous en compterois d'auā-
 tage, & me lairrois preſque aller à la mercy de
 ma plume n'eſtoit que ie ne ſuis pas ſi eſperdu
 ni eſgaré en mon priuilege Pariſien, que ie ne
 me reſſouuienne aſſez vous auoir ia trop fait
 perdre de temps : toutesfois ſi ie fais faute,
 vous l'imputerez à voſtre debonnaireté. Vous
 priant prendre iuſques icy ce que ie vous ay eſ-
 crit comme vn aiguillon pour vous deſtour-
 ner de vos empeſchemens & facheries. Quant
 à ce que i'ay à vous eſcrire cy apres, touſtant

de seruiteurs & amis que vous tous, Messieurs auez en ceste ville, qui ne sont pas en petit nombre, non seulement vous souhaitent, ains se promettent vn bon & heureux succez de vostre legation. Vous auez vn grand Achilles avec vous (accompagné de plusieurs braues Capitaines)és actions duquel i'ay dés pieça obserué, que quelque difficulté qui se presente sur son aduenement, la fin luy en est tousiours bonne & agreable. Au regard des affaires de nostre Palais, pour vous en parler à bon esciét, encores que le temps des vacations, & distraction des affaires que soustenez maintenant sur les espauls, comme vn Atlas, le rende plus solitaire que de coustume, si est ce que les esgousts font paroistre combien est grand ce Parlement. Aussi que la plus grande partie de nos compagnons estant dehors, fait iouïr ceux qui sont demeurez, d'vn certain droict d'accroissement. Ce pendant nous attendons vostre retour avec bonne deuotion, & à la charge qu'estant de decà vous serez bien empesché de receuoir les bonnetades & caresses de ceux qui vous accueilliront. A Dieu.

*A Monsieur Molé, seigneur de S. Remy, Con-
seiller en la Cour de Parlement de Paris,*



I'A Y veule les lettres qu'avez en-
uoyees à quelques-vns de vos
amis de deçà, qui m'ont remis
en memoire la forme quel'on
obseruoit anciennement, lors
que l'on ordonnoit des mede-
cines aux malades, esquelles on auoit accou-
stumé de frotter les bords du gobelet de li-
queurs douces & soüefues, pour faire trou-
uer le breuuage moins facheux à prendre: ain-
si les bords de vos missiues m'ont semblé infi-
niement doux & plaisans, ie veux dire le com-
mencement plein d'une bien-vueillance ad-
mirable, & la fin où i'ay veu vostre nom que
ie respecte entre les autres. Mais à mesure que
ie suis entré en matiere, i'ay pensé prendre,
non vne medecine, ains vne poison qui m'a
frappé iusques au cœur Et ce encores de tant
plus que la maladie dont escriuez semble hors
d'esperance de guerison. Car quant à la ville
où faiçtes vostre seiour, ie n'y trouuerien de
de nouveau. Elle ressemble proprement à ceux
qui pour estre sans leurs merites montez à
hauts degrez, se mescognoissent fort aisémēt,
ainsi ayant ceste ville receu vn honneur ines-
peré, vous ne deuez trouuer estrange si elle
s'oublie pareillement. Mais au regard du de-
sordre qu'avez trouué au païs, i'ay tous les re-
grets du monde que ie ne suis maintenant des
vostres, non pour vous y seruir d'autre chose,

*Il discourt
en ceste let-
tre combien
il estoit ma-
laisé lors des
grands
iours de
Clairmont
de reduire
toutes cho-
ses en bon
train, &
rend les
raisons.*

que de cōtribuer à la iuste douleur avec vous que ie vous y vois apporter. Ie ne pensois pas que les affaires fūssēt en tel desordre toutes fois ie ne desespere en rien mō premier prognostic, qui est que la fin vous donnera plus de contentement que le cōmencement. Or combien que ie ne puisse bonnement digerer ce fait, comme ceux qui sont presens, si est-ce que puis que le mal court par tout le país il me sēble que nous deuons au cas qui s'offre ressembler au bō medecin, & considerer la cause de la maladie, puis quelles sont les occasions pour lesquelles les remedes sēblent estre difficiles & obscurs. Si i'ay bien recueilly de vos lettres, le principal desordre qu'avez trouué au país prouient de deux sources. L'une, de l'insolence desordonnee des Gentils-hommes: l'autre de la conuiuence des Iuges. Qui sont deux maux qui fraternisent ensēblement. Car la conuiuence des Iuges peut auoir apporté le desordre qui est en la Noblesse: comme aussi le mesme desordre peut auoir esté causé de la conuiuence des Iuges, qui n'ont peu resister à la force. De ma part il faut que ie vous die librement, que ie ne trouue point estranges (ores que i'en sois tres-marry) les deportemens de ceste Noblesse, quand ie considere la nature du lieu où elle sejourne, qui est en país mōtaignard, esloigné tāt de la lumiere du Roy, que de la Cour de Parlement, ioinct les desbaux qu'ont apporté nos guerres ciuiles depuis xxij. ans en çà, pendant lesquelles les Gentils-hommes ont tousiours eu les armes aux poings, sans

*L'insolence
des Gētils-
hōmes, &
conuiuence
des Iuges
fraternisēt.*

*Parquoy il
estoit fort
aisé à la
noblesse
d'auuer-
gne de s'eli-
cétier extra-
ordinaire-
ment.*

aucune discipline militaire. L'habitude de l'air produit quand& soy les esprits plus doux, ou plus hagards. Et ne voyez les bestes sauvages s'habituer aux campagnes, ains aux montaignes ou forests. D'avantage on dit, que la presence ou absence d'un maistre rend le champ plus gras ou plus maigre. Voulant dire qu'il n'y a point de plus seur controle de noz actions que la veüe de celuy qui a toute intendance sur nous. Et finalement il n'y eut iamais guerre civile qui n'ait produit un Chaos, meslange & dissolution generale de toutes choses. C'est, pour bien dire, rat en paille: chacun y est maistre. Et c'est la cause pour laquelle les plus grands Empereurs furent contrains, en tel desarroy, caler la voile à la tempeste. De sorte que ce grand Auguste, haranguant au milieu de son camp ceux qui estoient à sa suite, il les appelloit, pendant les guerres civiles, ses compagnons: mais quand il en fut dehors, & l'Estat luy estant asseuré, il les nommoit ses soldats. Et tout ainsi qu'un sage Senateur de Rome nommé Alphenus Varus disoit que durant les troubles les gendarmes se donnoient plus de loy & autorité que leurs Capitaines, aussi veulent faire le semblable les Gentils hommes au preiudice des Roys, Princes, & grands Seigneurs. Un Prince iuste n'a pas lors assez de quoy pour fournir à tant d'insatiables cupiditez qui sont es armes. Toutes ces considerations ont (si ie ne m'abuse) causé le desordre de la Noblesse du pais où vous estes. Et si me permettez

*Chacun veut
estre mai-
stre pendant
une guerre
civile.*

de le dire, i'eusse trouué plus esmerueillable qu'en tant d'occurrences de desbauches ils se fussent contenus en leur ancien deuoir. Ceste presupposition estant faicte, il faut encores trouuer moins estrange le peu d'ordre que l'on

Toutes choses prennent fin selon la proportion de leurs progres.

y peut apporter maintenant. Car c'est vne proposition generale de nature, qui se tourne en reigle de droit, que toutes choses prennent fin par mesme proportion, qu'elles ont pris leur accroissement & progres. Le champignon croist, & se ternit en vne nuict; les Ormes qui croissent avec vne grande suite d'annees, prennent aussi fin de mesme balance. Passez en la sensitiue, celuy qui se colere aisémét, est fort aisé à appaiser. Au contraire le melancolic qui est d'une humeur lente & froide, tout ainsi que tardiement il entre en ces alteres, aussi s'estant coléré, tardiement bannit-il le courroux de sa fantasie. Considérez les maladies du corps qui se font acharnees sur nous à petits traits, si vous les pensez guerir tout à coup, c'est perdre par vn mesme moyen, & le patient, & la maladie. Vous pouuez presque recueillir à quel propos ie vous fais ceste induction. C'est pour vous dire que ce seroit vn grand miracle, qu'une seule seance des grands Iours, qui sont, si ainsi voulez que ie le die, passagers & transitoires, peut exterminer tout à faict le desordre, qui a pris ses racines depuis le commencement de nos troubles. Tout ainsi que petit à petit ce mal s'est insinué là où vous estes, aussi faut-il avec quelque traite de temps le resoudre. Pareillement ny plus ny moins

qu'en la medecine, és maladies desesperees & *Certains*
 croniques, il y a certains mois que l'on ordonne *mois ordon-*
 pour les baings, cōme en May & Septēbre, & *nez pour*
 qu'ils ordonneroit en autre saison, ce seroit *les baings*
 perte de tēps: aussi vo^{us} puis-je dire qu'à la gue- *naturels.*
 rison de ce mal qui se presente deuāt vous, tout
 autre temps sembloit estre plus propre que ce-
 stuy-cy. Les troupes qui courent aujour d'huy
 par la France au voyage de Flandres pour Mō-
 sieur le Duc, seruent à tous les mal-gifans de
 fort, comme la touffe de bois au cerf maumené
 des Veneurs. I'adiouste que l'on leur a baillé
 tēps & loisir de penser à leurs cōsciēces depuis
 l'an passé qu'il fut bruit que l'on alloit à Clair-
 mont: & ne les prédrez à l'impourueu comme
 l'ont fit aux grands Iours de Poitiers de l'an
 mil cinq cens soixante-dixneuf. L'Italien, qui
 fait profession de vengeance, & qui est maistre
 ouurier en ce sujet, a vn proverbe qui luy est
 fort familier: *Chele minaccie sono gli armi di ni-*
mici. Plus grāds ennemis n'auoyēt ces messieurs
 dōt escriuez que la Iustice, cōtre laquelle ils se
 sont armez en discours, & ont fait leurs prepa-
 ratifs pour se garantir. Si en telle affaire que ce-
 ste-cy, i'auois quelque voix en chapitre, ia-
 mais on ne feroit ouuerture de grands Iours en
 temps de guerre: la Iustice ne peut estre bon-
 nement ouye au milieu des sons des clairons &
 des trompettes: & mesme contre vne Noblesse
 qui a les armes aux poings. Ie ne dispute pas si
 elles sont aduoüees, ou non, par le Roy; il me
 suffit que la seconde personne de France les ad-
 uoüe, pour auoir par cy apres vne abolition

generale en faueur de ceux qui seront contumacez. Tout le discours que ie vous ay fait, regarde le general de l'affaire: ce que i'entens vous escrire par cy apres, ira, s'il vous plaist, de vous à moy. Ie crains que le zele que vous tousauez, sur vostre aduenement, apporté à la punition des crimes, ait nui à vostre intention: ie veux dire qu'ayans des memoires & instructions des fautes commises par les plus grands, ayez fait demonstration trop ouuerte de vous vouloir attacher à eux. A la verité c'est vn remede souverain en Iustice, voire en toute affaire d'Estat, de s'attacher aux plus grands quand ils le meritent. Car vn seul de ceux là punis, apporte plus de crainte & terreur à tout le demeurant du peuple qu'une infinité de petits. La punition d'un seigneur que ie ne nomme point, estonna plus aux grands Iours delxxix. tout le Poitou, Anjou & Touraine, que tous les autres qui furent executez à mort. Mais ceste regle ne doit pas estre perpetuellement mise en vsage, ains seulement lors que nous tenons ces grands dans noz rets, & que ils ne nous peuuent eschapper. Que si nous ne les tenons, c'est yne chose tres-dangereuse de vouloir mettre en œuvre ceste proposition. D'autant qu'ils ont telle suite & vasselage, que non seulement nous ne pouons mettre en effect en contr'eux ce que nous-nous estions promis, mais qui plus est par conseils sombres & couuerts, ils prennent la cause des plus foibles en main, les accommodent de leurs maisons fortes, pour leur seruir de retraictes : & ainsi le

*En quelle
façon on
doit cha-
ssier les
grands.*

grand y apportant le poix & autorité, & les moindres le nombre, & faifans vne ligue mutuelle entre eux pour se fortifier contre la Iustice, il aduient que noz entreprises ne reüssissent à telle fin que nous-nous estions projetez. Qui eust passé pour quelque temps par quelque dissimulation le fait des plus grands, peut-estre eussent-ils aidé à faire exemple des plus petits. Je sçay bien que vous me direz, qu'en ce faislât c'est exercer vne Iustice courtisane, & non celle que vous-vous estes tous proposez allans par delà Que c'est rendre la loy semblable aux filets de l'araigne, & faire ce que dit Porus au Roy Alexandre estant pris de luy, quel'on pardonnoit aux grands cour- saires, pour prendre punition des petits : mais en vn mot ie vous responds que quand en telles affaires on ne peut ce que l'on veut, il faut vouloir ce quel'on peut. Je crains encores vne autre chose qui me semble estre de grande consideration. Qui est qu'en telle frequency de delicts, qui s'estoyent tournez par long vsage en nature(ayans fait de vice vertu, ou pour le moins chose indifferente) l'on ait voulu rechercher les anciens pechez de ceux qui depuis auoyent vescu quoyement en leurs maisons. Je le vous representteray par exemple. Il se trouuera, peut estre, Gentilhomme qui auoit mesfait selon la licence du temps, il y a dix ou douze ans: depuis il a vescu en sa maison sans estre recherché, au veu & sceu de tout le monde, accompagnant toute la teneur de sa vie de preud'homie : certes encores que

*S'il est ex-
pedient en
abondance
de vices re-
chercher les
anciens pe-
chez.*

iesçache bien que par le formulaire de nos loix, tous delictz ne se prescriuent & effacent que par vingt ans, si est-ce qu'en vne consideration generale du repos de tout vn païs, nous deuons apporter de tresgrands regards auant que de vouloir ressassier ces vieux pechez. De là vindrent les Amnisties & conuies du Magistrat aux fautes passees, quand elles se trouuent generales. Ceste proposition frappe à l'Estat, direz-vous. Et cela mesmes qui se presente à voz yeux y frappe pareillement, puis que le desordre est tel qu'escruez. Mesmement que en ces vieilles recherches il aduient ordinairement que pendant que le bon Magistrat, poulse d'un zele de Iustice, pense faire ce qui est de son deuoir, la vengeance de quelques ennemis cachez se met souuent de la partie. Se vengeanceans par ce moyen sous le masque du public de leurs inimitiez priuees. Les parties ciuiles seront parauenture tombees d'accord, long temps auparauant le bruit des grands Iours. On suscitara sous main vn Procureur du Roy, par deuers lequel reside l'effect de la vindicte publique: contre laquelle patrocinoit & la transaction des parties, & la longueur du temps passé, & la preud'hommie dont depuis s'estoit comporté celuy que l'on veut preuenir en Iustice. Je diray librement ce que i'en pense: la religion des Iuges qui vous enuoyent les instructions de cecy, m'est grandement suspecte. Le mal qui aduient presque en matiere de grands Iours, qui n'y prend garde de pres, est que

ut antea flagitiis, ita tum legibus laboramus. Je

*Qu'il faut
en tous
grands
Iours
craindre
sur toute
chose la ca-
loranie.*

ne dy pas que ces vieilles fautes vous ayent esté ramenteuës: mais si cela est aduenü, ne faites doute qu'il n'ait faict tenir beaucoup de gens sur leurs gardes, qui sentoyent y auoir de l'ordure en leur fait, veu que l'on vouloit faire le procez sur vne vieille faute à celuy qui estoit en reputation d'homme de bien parmy le peuple. Si Dieu m'eust faict ce bien d'estre des vostres (chose que ie regrette infiniment) & que tels objets se fussent presentez, i'eusse volontiers faict comme le nouice, lequel estant au derriere la chaize d'un grand prescheur qu'il seconde, quand il le voit par vne iuste douleur s'exclamer encontre les vices, le tire par le bord de sa robbe, à ce qu'il ne se mette à l'effor, aussi me fusse-ie enhardy de vous prier d'apporter quelque moderation à la iuste rigueur de iustice, & ne mettre point vn espouuantement general au pays, à fin que chacun fust doucement demeuré en haleine. Voyla à mon iugement les obstacles qui naissent dans le corps mesmes de la noblesse. Celly que vous cotez par vos lettres n'est pas moins grâd, qui est la conniuece des Iuges inferieurs. Car quel remede pöuez-vous apporter par vos ordönances & inionctions, si vous ne trouuez ceux qui vous doiuent assister, disposez à vous obeïr? Par auéture que la crainte, aussi tost que la faueur, nous a procuré ce mal. Par ce qu'estans les Iuges (aussi bien que le cömun peuple) asseruis sous la tyrannie des plus forts, ils craignent le retour de matines, lors que vous aurez desemparé le pais. I'adiouste

*Connien-
ces des Ju-
ges du pays*

encores ie ne ſçay quoy qui a peu induire ces Iuges à ne ſe rendre ſi ſouples & diſpoſts à recevoir voz comandemens. Vous ſçauiez que l'ancien ſejour des grands Iours au païs d'Auuergne & de Bourbonnois, eſtoit la ville de Ryon, ou de Moulins. On les a laiſſees, pour vous loger en vn ſiege qui lors de la publication de voz grands Iours, n'eſtoit encores mis entre les Royaux. Il n'y a rien qui apporte tant de deſpit en noz eſprits que le meſpris. Il y a bien plus. Car pour le regard de Ryon, non ſeulement il eſtime eſtre meſpriſé, ains offenſé par le deſmembrement que l'on a fait de ſon ſiege, pour en accommoder celui de Clairmont. Et en ceſte opinion, ie ne trouue pas trop eſtrange qu'ils ſe rendent aucunement lents & refroidis (ſpecialement en ces deux Prouinces) à ce qui eſt de leur deuoir. Le Roy aux grands Iours de Poitiers ſeura ſa puifſſance de toutes abolitions & euocations. Ie ne ſçay ſi en ceux-cy il a faiſt le ſemblable: bien ſçay-ie que l'ouuerture d'une ſeule Euocation ou interdiction de cognoiſſance à vous autres Meſſieurs, eſt vne grande planche & port d'aſſurance pour les autres. Le plus fort & aſſuré rempar pour la conſeruation de l'autorité des grands Iours, eſt quand en ce commun cours de Juſtice, la miſericorde du Prince, ou ſa puifſſance abſoluë n'entre en jeu. Ie me veux doncques maintenant eſtancher, & faire mon profit, ſi ie puis, de tout ce que i'ay deduit cy deſſus: vous auez d'un coſté trouué la Juſtice en deſaut ſoit ou par crainte, ou par faueur

*Qu'en ma-
ſiere de
grands
Iours il
faut crain-
dre ſur
toutes
Euocations
& aboli-
tions,*

faueur : d'un autre costé, la Noblesse non seulement disposée à ne vous donner nul confort & aide, ains estre celle sur laquelle deuoit tomber le principal exemple de vos grands Iours. Et vrayement il est impossible que vous rapportiez tel contentement de vostre entreprise, que souhaitez. La Republique est comme vn horloge, auquel il ne faut que le déreiglemēt d'une seule rouë, pour desbaucher tout le demeurant ; ou bien comme vn basteau, auquel il y en a qui ne seruent que de ioüier des mains, comme ceux qui tirent les aurons, & les autres sont destinez à manier le gouuernail, comme le maistre marinier. Et faut que ces deux parties s'entendent ensemblement, qui voudra faire voguer le vaisseau. Aussi en vain vous autres Messieurs, qui tenez le premier gouuernail de nostre iustice, pouuez vous venir à chef de vostre intention, si vous n'estes secondez par les autres. Et neantmoins quelques discours que nous faisons, encores que pour quelque temps vos desseins demeurent en friche, si est-ce que ie m'asseure que vous estans affermis, vous aurez vn meilleur succez que n'esperez. Le semblable en est il aduenü à Monsieur le President de Harlay aux grands Iours de Poitiers, desquels toutes-fois il sortit avec vne fin si heureuse, qu'il est impossible de plus : lequel estant maintenant encores vostre chef, ne pensez pas que sa fortune luy vueille estre maintenant marastre : la sçachant accompagnée de tout ce que l'on peut desirer de vertu & de conseil en vn homme de bien.

& ben Iuge. A Dieu.

*A Monsieur de Harlay Conseiller d'Estat
& premier President en la Cour
de Parlement de Paris.*

*Il cōgrat-
le à Mon-
sieur le pre-
mier Pre-
sident de
sa promo-
tion de cest
estat.*



E ne fais nulle doute que n'ayez esté d'une meisme voye aduerty, & de la mort de feu Monsieur le premier President, & de vostre promotion en son estat. Qui a causé douleur & ioye tout ensemble. Par ce que d'auoir perdu vn si grand personnage comme le defunct, si aduantageux pour le repos du public, si zelateur des choses bonnes, il n'y a homme de bien qui n'en ait porté vn tres-grand regret dedans sa poitrine. Mesmes que toutes mutations inopinées, telles que celle-là, apportent ordinairement de grandes craintes & deffiances aux esprits des hommes. Mais vous n'avez pas si tost esté nommé en cest estat par le Roy, que tout ainsi que par les rayons du Soleil nous voyons les nuées chassées, aussi chacun à l'instant mesmes a tourné son dueil en vne extreme resioiïssance. Ne pensez point ie vous prie que ie vueille donner cecy à la seruitude que i'ay en vous : si auez esté nommé promptement par le Prince, vous auez aussi la voix commune de tout le peuple pour vous, en ce peu d'entre-jet de temps que nous auons souffert eclipse de cest estat, chacun vous y souhaitoit, & tout ainsi tost a esté le souhait du peuple accompli. Chose qui de tant plus vous

doit apporter de contentement, que les autres pour le iour d'huy pourſuiuât ambitieufemēt les offices, & encores à greffe d'argent, ſans y pouuoir quelquefois attaindre : vous non ſeulement ne le pourſuyuant, mais qui plus eſt abſent & ne le ſçachāt, auez eſté appellé à ce haut degré. Et vrayement vous auiez intereſt tref-grand d'eſtre enuoyé en ceſte legation où vous eſtes (ie dirois preſque relegation pour leſtrauerſes qu'y auez receuës, & mauuais offices que l'on vous y a faits du commencement) & importoit à voſtre dignité que fuſſiez hors de ce païs en ce temps cy, pour recueillir de voſtre abſence vn ſi noble fruit. Car à fin que ie laiſſe à part l'eſtoffe, ie veux dire la grandeur de ceſt eſtat, la façon m'en plaïſt cent & cent fois d'auantage. Parce que quand ie remets deuant mes yeux la bonne volonté du Roy en voſtre endroit, la ſouuenance qu'il a eu de vous, brief que combien que n'ayez iamais fait profeſſion de courtiſer qu'avec dignité, toutes-fois vous ſeul abſent ayez eſté par luy choiſi par deſſus pluſieurs abayans, & meſmes ſans autre plus grande deliberation que d'un demy iour : quād avec ce ie conſidere la congratulation commune non ſeulement des bons, ains generale-ment de tout le peuple, il me ſemble que iamais homme n'eut tant d'occaſion de ſe contenter que vous. Mais encore le plus beau que i'y voye, c'eſt que voſtre fortune ſymboliſe en cecy grandement avec celle de feu Monsieur voſtre pere, lequel fut ſalié de ſon eſtat de Preſident à l'impourueu, & lors que moins il y

*Belle &
heureuſe
promoitiō à
l'eſtat de
premier
Preſident.*

pensoit : Luy dy-ie par le Roy Henry second, & vous par Henry iij. son fils. Ce n'est pas peu que Dieu vous face successeur de ses bonnes aduentures, ainsi que de ses loüables vertus. Qui ne cognoistroit l'honneste liberté dont i'accompagne toute la teneur de ma vie, il penseroit lisant tout cecy que ie me sois proposé faire acte de flaterie : tant s'en faut que mon intention soit telle, qu'au contraire ie ne vous ay ramenteu toutes ces particularitez, sinon pour vous faire aussi souuenir que se trouuant de benedictions de Dieu auoir à coup conflué, comme vn grand torrent de fortune, en vostre faueur, si oncques par le passé vous feustes retenu en vos actiôs, vous deuez maintenant plus que iamais apporter de crainte & circonspection en vos affaires, pour la grande obligation dont toutes ces belles rencontres vous rendent re deuable au public. La memoire des vertueux deportemens de feu Monsieur vostre pere, est encores empreinte au cœur de plusieurs gens de bien: on sçait de quelle prou- d'hômie vous vous estes armé iusques à huy: l'on voit la nouvelle recherche & election qui a esté faite de vostre personne: he vraiment (ie le vous diray comme vostre seruiteur tres-humble, laissant toute hypocrisie en arriere) la reputation qu'avez acquise par le passé, con- iointe avecques l'expectation que l'on s'est im- primee de vous pour l'aduenir, vous doyuent à mon iugement apprestre plus à penser qu'à nul qui se soit présenté deuant vous. Ceux qui discourent exterieurement des affaires de no-

*De quelle
estoffe &
grandeur
est l'estat
de premier
President
de Paris.*

stre France, mettent l'Estat du Chancelier au premier rang, & certainement non sans cause. Mais quant à moy, ores que le vostre ne soit si grand, si ne l'estime-ie pas moins beau; pour estre plus stable & arresté, par ce que le premier est exposé à la mercy des vagues de la Cour du Roy, & n'a autre garent del'enuie que les grands peuuent conceuoir contre luy, que soy-mesmes. Mais vn premier President d'une Cour de Parlement de Paris, tenant tel rang que chacun sçait, peut sagement reietter toutes ses excuses, & par consequent l'enuie, sur vn corps qui ne meurt iamais, comme estât le principal nerf & retenail de nostre Royau-me. Et de là vient qu'un president subsiste tousiours iusques à ce qu'il ait pleu à Dieu l'appeler à soy. Vous viurez doncques en cest hon-neste contentement, & nous au vostre: vous assurant que n'estes pas moins content en vous mesmes, que tous vos seruiteurs & amis sont pour vous, entre lesquels ie vous supplie humblement me garder vn petit coing en vos bonnes graces. A Dieu.

*A Monsieur l'Archer Conseiller au
Parlement de Paris.*

LE bruit commun de ceste ville, dõt aussi i'ay eu quelque sentiment par vos lettres, est que Monsieur le Premier President ne s'est esleué plus haut pour les nouuelles, qu'il a receuës de sa promotion, & qui plus est qu'il fait plusieurs

*Combien il
est bien
seant à un
homme de
ne s'esleuer
plus haut
pour auoir*

*esté appelle
à vn grand
estat.*

*Combien il
est malaisé
de ne se
perdre aux
premieres
nouuelles
d'une bon
ne fortune.
Qu'en
temps
calmeux
un homme
de bien
doit enuier
les grands
Estats.*

consultations avec ses amis, sçauoir s'il doit
accepter ceste charge. Quant au premier point
ie vous asseure que ie fais maintenant plus
d'estat de son bon iugement, que ie n'auois fait
par le passé, ores que i'en fusse trefasseur. Car
il n'y a rien si aisé à nous perdre qu'un grand
flot de bonne fortune, & toutes & quantes
fois qu'en telles occurrences d'affaires, nous ne
sortons point hors de nous, c'est vn miracle, &
chose qui outrepasse non seulement les bornes
du commun vulgaire, ains de ceux mesmes qui
sont en reputation d'estre les plus sages. Et
pour le regard du second, ie vous puis dire que
s'il veut mettre en balance les contentemens de
luy seul, ie ne fais nulle doubte, qu'il ne fit
beaucoup plus pour luy en s'excusant de ceste
charge, quel'acceptant: Voiré qu'en repudiât
cest honneur, il ne s'ë procurast vn autre infiny
non seulement enuers les viuans, ains enuers la
posterité, queluy seul au milieu de ce siecle
peruers eust mis l'ambition sous pieds. Toutes-
fois ayant ce perpetuel but en moy, que tout
citoyen nest né pour soy, ains pour sa patrie, &
que pour l'accommoder en son general, il se
doit incommoder en son particulier, ie le vous
trancheray bien court, comme à l'un de ses
bons amis, mon opinion est qu'il feroit vne
faulte infinie s'il ne l'acceptoit. Cest estat desire
vn homme de bien en tout temps, & specia-
lement en cestuy. Vous sçauiez la belle ambitio
de Caton Uticense, lequel estant aux champs
ayant eu aduertissement qu'un homme corrompu
vouloit briguer l'Estat de Preteur de Rome,

soudain rebroussa chemin en la ville, & se rendit son cōpetiteur, n'espargnant nulles sortes de brigues, encontre son naturel. En quoy les choses luy succederent, si à point, qu'estât *Les grands hommes font les grandes fautes.* fait Preteur, il seroit impossible de dire quel bien il apporta au public. Si pour s'opposer à vn homme corrompu, à plus forte raison pour faire teste à vn siecle corrompu, tout preud'homme doit souhaiter d'estre appellé à l'administration de la chose publique. Il ne faut point qu'il apprehende d'estre successeur d'un grand homme: c'est en ceux-là quelquesfois, ausquels sont les plus signalees fautes: balaçant le plus souuent les affaires aux poix sans plus de leurs opinions, ne se souuenant pas qu'ils sont hommes, c'est à dire, fautifs comme tous les autres, & que la plus sage proposition qu'un chef puisse auoir, c'est de deferer à vne compagnie. Quant à moy ie diray franchement que ie ne vis iamais aduenir, que s'il y *La premiere pointe de nos actions pour bien faire, est la crainte* a beaucoup à dire pour ceux que le commun peuple estime bien grands, qu'il n'y ait aussi beaucoup à redire encontre eux. La seule crainte que Monsieur le premier President apporte en ce nouuel changement, me donne vne assurance trescertaine qu'il ne fera iamais mal. Ie ne vis iamais si mal faire qu'à ceux qui se promettent trop d'eux. Et vous puis dire particulierement de moy, que, si oncques i'ay bien plaidé, ç'a esté la crainte de mal faire, & non l'assurance que i'ay eu de moy, qui m'en a apporté les moyens. Il faut doncques qu'il oste tous ces scrupules, & face

estat qu'il est attendu en ceste ville d'aussi bõne deuotion, que iamais autre seigneur fut. A Dieu.

Il dissuade à un sien amy, de quitter l'estat d'Advocat pour prendre un office de iudicature.



OSTRE gendre present porteur, vous pourra dire en quel estat il m'a trouué, lors qu'il m'est venu semondre de vous escrire. I'estois en mon liect entre sept & huit, donnât

cours à mes pensees. Vray que c'estoit vn iour de Dimanche. A quel propos tout cela? Pour vous ramenteuoir la liberte de nos estats, par le moyen desquels, combien qu'il semble que soyons obligez au public, si ne prenons nous de ceste obligation que tant & si peu qu'il nous plaist, sans estre astraincts à certaines heures, comme sont ceux qui sont appelez aux estats. Je croy que vous pouuez penser pourquoy ie vous escris cecy. Pauvre malheureux que vous estes, quelle opinion nouuelle d'ambition est-ce qui vous a surpris de vouloir quiter ceste belle qualite d'Advocat, en laquelle vous estes Roy en vostre ville: pour entrer sous vn nouueau ioug de seruitude de Iuge? Il y a trente ans & plus que vous tenez l'un des premiers lieux entre ceux de nostre ordre en vostre pais: estant chery & aimé des grands, respecté du commun peuple, viuant en vne honeste liberte sans alteration de vostre

conscience; & maintenant qu'estes arriué sur l'aage, desirez, ainçois ambicieusement pour-
 suiuez d'estre Lieutenant de Prouince. C'est
 pour procurer à ma vieillesse vn repos (dites-
 vous) & aduancer ma famille. O imaginaires
 discours dont nous-nous trompons aisément,
 quand nous chatoüillons nos pensees de quel-
 que vaine ambition! Que vous pensiez que
 voguant au milieu des flots, vous soyiez arriué
 au port! Estant Aduocat du commun, vostre
 fortune depend de vous, & de vostre fonds: es-
 tant appellé à cest estat, vous dependrez desor-
 mais des grands, qui le vous auront octroyé. Et
 si ne satisfaites à leurs opinions, vous perdez à
 vn instant toutes leurs bonnes graces, ainsi que
 nous voyons vn estourbillon estre enleué par le
 vent. Quand ie vous voy tenir ce party, vous
 me faites souuenir du Roy d'Egypte Ptolomee,
 lequel estant aucunement en mauuais mesna-
 ge avecques ses subjets, desira d'aller à Rome
 demander secours: Estimant auoir plusieurs in-
 telligences avec les grands & Potentats, par le
 moyen desquelles il viendrait au dessus de ses
 aduersaires. Lequel se trouuant dans Chypre
 avec Caton, il fut par luy dissuadé de ce faire.
 Luy remontrant que quād il seroit dans la vil-
 le, tel qui le cherissoit par lettres, ne seroit pas
 semblant de le cognoistre, & qu'il y trouueroit
 tant d'espines, qu'en fin il voudroit n'y estre ar-
 riué. Luy conseillant pour ces causes, sans al-
 ler à Rome, de se reconcilier avec ses subjets.
 Toutes-foi's n'ayant voulu croire à ce grand
 persónage, il prit la route de Rome, où il trouua,

mais à tard, que ce qui luy auoit esté predict, luy estoit aduenu. Ie ne suis point vn Caton, mais ie preuoy que si vous sortez de vostre Royaume, il vous aduiendra le semblable. Pour ceste cause ie seray tousiours d'aduis que vous vous reconciliez avec vous mesmes, & repreniez vostre vieille route. Et sur tout estimiez que si vostre estat estoit venal, il y a tel qui en voudroit bailler trois & quatre fois plus d'argent que de l'office que souhaitez. I'adiousterois volontiers que c'est vn estat nouveau, introduit au mescontentement de tous vosiuges de Ryon, & plusieurs autres particularitez, si ma lettre les pouuoit porter, mais ie me suis leué tard, & le messager me presse. Et toutesfois pour vous contenter, i'ay parlé à ceux que ie pensois pouuoir faire pour vous, & dont m'auiez escrit, entre lesquels l'un des premiers seigneurs de nostre Cour, vous y fait de bien bons offices. Quel sera l'euenement, ie ne le puis dire, voyant les obstacles qu'y auez. D'une chose me console-je, parce que de quelque façon que ceste affaire tourne, vous demeurerez le victorieux. Car si vous obtenez selon vostre intention, vous auez victoire de ce que vous desirez. Si au contraire vous en estes esconduit, vous rapporterez vne autre victoire de ce que deuez desirer. Aduertissemēt que ie vous prie prendre de moy vostre ancien amy, comme fait le malade vne medecine, qui luy est amere en la prenant, & luy cause quelque temps des trāchees, mais en apres produit de beaux effects de guarison. Ie seray non seulement vostre me-

decin, mais encores passant plus outre, ie feray icy l'Astrologue. Car voyant que l'on tire les choses en longueur, ie prognostique que l'on trouuera tant d'obscuritez en ce nouuel establissement de siege Presidial de Clairmont, que ceux qui en ont esté les premiers autheurs & promoteurs, trouueront à la longue plus expedient de laisser (comme l'on dict) le moustier où il estoit. Le partage estoit beau entre les trois principales villes de vostre pais. Que la ville de Clairmont reluisist par son Eglise pour y estre estably le siege de l'Euesché, celle de Ryon par le siege Presidial, & qu'à la ville de Montferrât on eust attribué le mesnage & charge des tailles. Au demourant ie suis tres-aïse de la bõne part qu'avez eu en nos grands Iours de Clairmont, & n'en ay esté de rien trompé. Vous remerciant aussi des deniers qu'avez presté à mô fils, que i'ay remplacé suyuant vostre mandement, pour le vostre. A Dieu.

*A Monsieur de la Bite, Iuge general
de Mayenne.*

Vous me demandez quelle a esté la vie & la fin de feu Monsieur le premier President de Tou. Je vous responds, belle, heureuse & honorable: tant en particulier que public, depuis le bers iusques au tombeau, & telle que malaisement pourrez vous trouuer sa semblable. Il estoit fils de maistre Augustin de Tou, qui estoit l'un des quatre Presidents de

*Il fait icy
recit de la
belle vie
& belle
mort de
Monsieur
le premier
President
de Tou.*

la Cour, lequel vesquit dans nostre Palais en tres-grande reputation de preud'homme. Et cōbien que la coustume des plus riches familles de Paris, soit de ne donner le loisir à leurs enfans de se cognoistre, mais dès leur premier retour des Vniuersitez les promouuoir par argent aux offices, spécialement de iudicature, toutes-fois cest homme de biē ne permit que cestuy sien fils ny son second (qui tient auourd'huy lieu de premier Aduocat du Roy entre nous) paruinssent par ceste voye, ains par les degrez de vertu, qui sont fondez sur vne longue patience: & voulut que l'un & l'autre suy- uist le barreau, & signammēt son fils aîné y ar- riuast ieune, qu'à peine auoit il passé l'aage de dix & huit-ans, lors que comme vn autre Iu- risconsulte Nerua, il respondit du droit & plai- da sa premiere cause. Auquel estat il continua par plusieurs annees chery & honoré grande- ment de tous, mesmes de Monsieur Liset lors premier President, lequel en propos cōmuns l'appelloit ordinairement son fils, pour vne a- mitié speciale qu'il auoit en luy entre tous les autres Aduocats. Qui ne luy donna pas petite vogue au Palais, outre ce que de soy-mesmes il estoit assez disposé à se faire grand. D'Aduo- cat, il fut fait Preuost des Marchands de Paris, auquel estat il dōna le premier aduis & dessein des fortifications de la ville, & encores embel- lit le port de la Tournelle saint Bernard d'un quay, afin que l'oree de la riuiera de Seine fust de toute part semblable. Quelque temps apres la Cour de Parlement prenant nouuelle forme

par l'introductiō du Semestre qui fut fait vers l'an 1553. il fut créé par le Roy Henry second lors regnant l'un des huit Presidens de la grād chambre, car il y en auoit quatre à chasque Semestre. Ce temps-là auoit porté quatre fameux Aduocats, Maistres Pierre Segulier, Christofle de Tou, Iacques Aubery, Denis Riant. Lesquels en moins de trois ans furent diuersement appelez aux grands Estats. Segulier & Riant faits Aduocats du Roy, puis Presidens, Aubery Lieutenant ciuil de ceste ville: mais sur tout est chose digne d'estre remarquee que de Tou, de l'estat d'Aduocat priué fut de plein fault fait President de la chambre. Ce qui n'estoit encores aduenü à nul autre que luy. Vous diriez que la fortune fust lors grosse de toutes ces dignitez pour en faire vne si ample & seconde portee, que depuis (comme si elle en eust esté recreüe) le passage en a esté presque clos aux autres. L'on introduisit vers l'an 1553. le Semestre en nostre Parlemēt. L'esprit de cestuy que ie vous pourrais maintenant, estoit tellement né & duit à l'actiō, que voyant qu'il y auoit six mois de l'annee qui le confinoient à sa maison, il s'aduisa d'un beau sujet, pour ne demourer oiseux au public, qui fut de reformer les Coustumes, dont il obtint commissiō, & avec deux notables Conseillers, Faye & Viole, qu'il aggrega avec soy: il entreprit la reformation de la plus grande partie d'icelles, auxquelles il fit inserer plusieurs articles nouveaux extraits du droit commun des Romains. Mesmes la representation en ligne collaterale iusques aux

*Quatre
grāds Ad-
uocats ap-
pellez aux
grands E-
stats pour
leurs ver-
tus.*

*Reduction
des Coustu-
mes par
Monsieur
le premier
President
de Tou.*

*Representa-
tion en
ligne dire-
cte & col-
laterale.*

enfans des freres & sœurs. Ceux qui reforme-
 rent les Coustumes en l'an cinq cens & sept, &
 autres anneés ensuiuantes, bannirent de la Frā-
 ce cest article barbare, qui vouloit que repre-
 sentation n'eust point de lieu en ligne directe.
 Cestuy-cy apporta police en la collaterale fort
 à propos. Et au regard du temps destiné à l'e-
 xercice de son estat, il estoit dernier President
 de son Semestre, & pour ceste cause dedié au
 iugement du criminel. En quoy il apporta tāt
 de diligence à la vuidange des procez, que dès
 lors du premier Semestre, les prisons de la Cō-
 ciergerie se trouuerent vuides de prisonniers.
 Qui fut cause que le Geolier fut contraint de
 demander prouision à la Cour de Parlement,
 pour nourrir ses seruiteurs & payer leurs ga-
 ges; par ce que ses pensionnaires luy failloyent.
 L'Edict du Semestre estant rompu & anichilé,
 & les deux compagnies reünies en vne : pen-
 dant les troubles premiers mourut Monsieur
 le premier President le Maistre. Cest estat est
 conferé à Monsieur de Tou. De vous en ra-
 conter les moyens, ie ne l'ay icy entrepris.
 Bien vous diray-ie qu'il estoit si nouueau &
 escolier à faire brigues & menees (ie me dis-
 penseray de ce mot) qu'il ne s'en mesla que biē
 peu, ains vn sien seruiteur domestique, qui
 depuis est paruenü à grands biens, tant en spi-
 rituel que temporel, sceut si dextrement & fi-
 dellement conduire ceste orne, qu'il emporta
 le dessus de tous les autres pretendans. Quand
 il fut pourueu de cest estat, les troubles estoient
 lors grands par tout le Royaume de France

*Diligence
 admirable
 en ce Pre-
 sident.*

& par especial dans Paris: ausquels l'on n'apportoit pastant de police, que peut estre l'on eust desiré contre ceux que l'on appelloit Huguenots, pour vn zele chaud & ardent que les chefs portoyent à la Religion Catholique: & combien que celuy dont ie parle ne l'eust pas moindre, si y mesla-il dès son aduenement ie ne sçay quoy de modestie & attrempance, par laquelle les massacres commencerent de s'assoupir. Chose qu'il executa fort aisément: car s'il estoit fauorisé du Roy, de la Royne sa mere, & des Princes qui leur assistoyent, encores auoit-il meilleure part en la bonne grace du peuple. Qui fut parauenture l'vne des premieres raisons pourquoy l'estat de premier President se trouuant adonc vacquer, il y fut appelé plus facilement, pour la nécessité que l'on auoit d'vn homme qui maniaist le cœur du peuple. Ainsi dès son arriuee sous ceste belle creance il osta doucemēt des mains de la populace ceste licence effrenée, dont elle abusoit impunément contre la vie d'vns & autres, reiettant le tout sagement à l'autorité & discretion du Magistrat, pour en prendre tel supplice qu'il trouueroit bon de faire: Voila pour le regard du dehors.

Quant à ce qui appartient à l'enclos du Palais, *Police que Monsieur le premier President apporta aux audiences.* la premiere chose qu'il eut en recommandation fut d'y apporter reformation tant au chef que membres. Au chef, par ce qu'il s'imposa vn loy à luy-mesme de n'appeller causes extraordinaiement aux Lundis & Mardis, voulāt que les rolles ordinaires eussēt lors leur

cours sans aucun destourbier ou empeschement: reseruant les placets, que l'on appelle causes des parties presentes, aux Ieudis. loy qu'il obserua inuiolablement. Aux membres, d'autant qu'il osta les excuses de maladies des Aduocats, si elles ne se trouuoient fort bien attestees. La liberte du temps auoit apporté qu'un Aduocat trouuant sa cause mauuaise, se faisoit excuser de maladie pour gaigner le tour du roolle: C'estoit la cause qui estoit malade, & non luy. Ce President se roidit & rendit si rigoureux cōtre ces excuses affectees, qu'en peu de tépsil en fit perdre la coustume. Au moyen dequoy faisant tenir vn chacun sur pieds, par l'expedition des causes, dont les vnes estoient plaidees, & les autres iugees rigoureusement par defaux encontre les contumax, nous commençâmes de voir plus de causes vuidees & terminees en vn an, qu' auparauant en deux ny trois. Il fit encores vn traict hardy & notable: Car estant au precedent loisible à l'Aduocat apres auoir fait sa premiere proposition, d'entrer en Repliques & Dupliques, par lesquelles il consommoit vne bonne partie de l'heure, à la retardation de la Iustice: il les bannit & extermina. Voulant que l'Aduocat ordonnast de telle façon son premier plaidoyer, qu'il se fist entendre tout au long en son fait. Estimant que s'il oubloït quelque chose du droict, il seroit facilement suppléé par les Iuges. Ceste façon de faire du commencement ne se pouuoit bonnement digerer, & de fait l'Aduocat du Roy du Mesnil à quelques ouuertes de Parlement

*Repliques
& Dupliques des
plaidoyers
refrenees
par le premier Presi-
dēt de Tou.*

lement en ayant fait remonstrances, il n'y peut rien gagner sinon pour les causes de poix. En fin le long vsage en fit oublier le mal-talent. Et par ce qu'il estoit homme nourry non seulement en la loy, ains aux bonnes lettres esquelles il prenoit grand plaisir, aussi l'on commença sous luy à entremesler les plaidoyeries de l'un & de l'autre: ce qui ne se faisoit auparavant demourant la commune des Aduocats dedans les bornes du droit escrit. Pour le regard des Procureurs, il n'exerça iamais vne grande severité encontre eux, mais au lieu de ce les fit assembler par certains iours du mois, & que là chacun proposast les surprises des vns & des autres, pour estre vſé d'une forme de Mercuriale & censure encontre celui qui en auroit abusé, & en vn besoin en estre fait raport & plainte à la Cour. Quant à ses mœurs, il estoit homme qui commençoit la premiere entree du Palais par les prieres à Dieu: car au lieu que tous ses predecesseurs Presidens se reseruoient à la Messe generale de dix heures, luy, par vne coustume qui luy fut propre & peculiere, soudain qu'il entroit au Palais oyoit sa Messe. Qui est la vraye Messe des Presidens, & ainsi appelée par nos ancestres. Et de là accommodoit le reste du iour à l'expedition des affaires. Il estoit homme qui ne sceut oncq' faire desplaisir à son escient, tres-prôpt à faire plaisir à ceux qu'il voyoit que l'on vouloit affliger indeuëment Colere de sa nature, mais qui ne vouloit point que sa colere nuisist qu'à soy-mesme: car s'il s'estoit casuellement courroucé contre vn

*Les lettres
humaines
iointes a-
uec la loy*

*Syndicat
entre les
Procureurs*

*Mœurs de
Monsieur le
premier
President
de Tou.*

*Doucenature
de ce
President.*

Aduocat, à la premiere audience d'apres, s'il se presentoit pour plaider, tout son soing & estude estoit de faire paroistre par quelque douce contenance qu'il ne nourrissoit aucune amertume contre luy. Et à ce propos vous veux-je raconter en passant vne chose qui m'aduuint autrefois en l'an mil cinq cens loixante six. Ma belle mere estant decedee, & m'estant transporté vers la Pentecoste à Amboise pour recueillir sa succession, le Ieudy d'apres les festes (que nous appellions le Ieudy des desconfitures, par ce que lors la pluspart des Aduocats n'estans retournez des champs, il ne laissoit toutesfois de tenir l'audience, sans pardonner aisément aux absens.) Ce Ieudy dy-je, vne cause estant appelée, dont i'estois chargé, l'on m'excusa de maladie : Il prit lors, contre sa coustume, ceste excuse en payement. Les autres Procureurs voyans que ceste excuse estoit, ce leur sembloit, pour ce coup passée en forme de chose iugée, commencent tous à me reclamer pour leur Aduocat (ie dy ceux qui n'auoyent point le leur.) Cela le fait courroucer de telle sorte, qu'il enioingnit publiquement & par expres au premier Huissier de sçauoir en ma maison si i'estois malade, & d'en faire son rapport à la Cour. L'Huissier n'y faut, & trouua que ie n'estois vrayement malade, mais que i'estois absent de ceste ville pour iuste cause : Ce qu'il rapporta à la Cour. Le Lundy ensuiuant on appelle vne autre cause dont i'estois encores chargé. Le Procureur n'eut pas si tost ouuert la bouche pour dire

que i'estois l'Aduocat, que ce bon personnage luy couppa la parole tout court, & dist tout haut qu'il ſçauoit bien que i'estois malade. Et à tant luy-mefme m'excufa. Je vous pourrois reciter vne infinité d'autres exemples de mefme eſtoffe, mais ma plume me ſemond à plus haut ſujet, pour vous dire que comme il eſtoit naturellement humain, & qu'il accompagnoit en ſa maiſon toutes ſes actions d'une ſi grande douceur & humanité, que nul ne s'en alloit iamais mal content de luy, auſſi eſtoit-il tres-prompt à ſe reconcilier à ceux qui l'auoyent offenſé quand ils le venoyent reblâdir, & de ce en puis-je porter fidelles témoignage pour l'auoir veu. I'adiouſteray que ie penſe meſprendre quand ie dis reconcilier: Car il ne ſçauoit que c'eſtoit de haïr, eſtant (ſi ainſi voulez que ie le die) ſans fiel. Au commencement qu'il arriua à ceſt eſtat, il y auoit deux grands hommes qui luy ſembloyent faire teſte, & luy à eux: par ce qu'en vne volonté commune que tous trois apportoyent au bien & repos du public, ſi ne ſymboliſoyent-ils en propoſitions. L'on peut dire que cela eſtoit tout ainſi que dans Athenes de Themisto- cles & Ariſtides. Or de vous dire quels eſtoient les plus ſaincts aduiſ, cela n'eſt de ma iuriſdiction ni cognoiſſance: Il y auoit à diſcourir & pour & contre de chaſque coſté. Les deux dont ie parle eſtoient Meſſieurs le Cancelier de l'Hôpital, & Mareſchal de Montmorency. Chacun eſtimoit que Monſieur le Premier Preſident nourriſſoit quelques rancunes ſourdes en ſon

*Monſieur le
premier
Preſident
de Ton ne
ſçauoit qu'
c'eſtoit de
haïr.*

*Monſieur
le Chan-
celier de
l'Hôpital
& Monſieur
le premier
Preſident
de Ton*

*deux grans
personnages
diuers en
propossiōs
polissques.* cœur encontre eux : toutesfois soudain qu'il les vit deffauorisez, iamais homme ne leur fit de meilleurs offices que luy. Estimant que leurs afflictions prouenoient, à l'vn de la misere des troubles, à l'autre de la colere d'un Roy, à laquelle tout hōme sage doit caller la voile, quand il tombe en vn tel orage. Homme au

*Estude de
Mōsieur le
premier
President.* demeurant studieux le possible : car estant en sa maison il se donnoit tous les iours certaines heures pour son estude particuliere, sans exception, s'il n'en estoit distrait par les Princes & grands Seigneurs qui luy venoyent recommander quelques affaires. Vn an 'auparauant son decez, comme i'estois, de sa grace, veu de bon œil par luy, ie le surpris lisant entétieusement les Oraisons de Ciceron contre Verres, ayant d'un costé le liure, & de l'autre ses broüillas, dans lesquels il recueilloit sommairement les passages dont il se vouloit aider. Vne autrefois il me pria de luy donner les trois Tomes des Aduersaires de Tournebus, par ce qu'il ne sçauoit qu'estoyent deuenus ceux que ie luy auois fait autrefois presenter par les enfans de l'auteur, qui luy auoyent, à mon instigation, dedié le

*Esprit in
fatigable
aux affai-
res du Pa-
lais.* troisieme. Ce que ie fis. Mais il ne les eut pas si tost, qu'il les leut tous (comme s'il n'eust eu que vingt & cinq ans) en moins de trois semaines ou vn mois. Chose certainement tres-ésmerueillable, qu'au milieu de tant d'affaires publiques, il se peust desrober ce loisir. Et combien que ceste estude domestique luy fust tres-aggreable, si n'auoit-il rien tant en recommandation que le Palais. Il y entroit le premier, &

en sortoit des derniers, tousiours aussi frais à
 l'issuë des audiences, comme à l'entree. Cela
 faisoit qu'il aimoit grandement ceux qu'il
 voyoit exercer avecques quelque dignité
 leurs estats, tant d'Aduocat, que de Procu-
 reur: & comme il estoit du tout bon, aussi fit-il
 plusieurs Clercs, Procureurs, trouuant mau-
 uais qu'apres auoir vsé leurs ieunesses avecq'
 leurs maistres, & passé par tous les degrez
 de Clercs, on leur voulust fermer la porte à
 l'estat de Procureur. Finalement il eut deux
 choses en quoy il se rendit admirable: L'une
 à bien dresser & prononcer sur le champ vn
 Arrest: Ne s'estant trouué President deuant
 luy qui eust vn plus beau formulaire d'Arrests:
 L'autre en ses opinions. I'ay autrefois appris
 de feu Monsieur le President de Pibrac, per-
 sonnage qui se cognoissoit fort bien en hom-
 mes, que combien qu'il n'eust pas vne eloqué-
 ce si persuasue comme quelques-vns qui le se-
 condoyent & tierçoient, toutesfois il estoit
 accompagné de tel heur, ou bien de telle faci-
 lité d'esprit pour sortir d'un mauuais passage,
 qu'aux affaires de consequence il estoit ordi-
 nairement suiuy. Iusques icy vous auez peu
 entendre quels ont esté ses auancemens, pro-
 grez, & deportemens au public: entendez
 maintenant ce qui concerne son particulier. Il
 espousa vne Damoiselle nommée Iaqueline
 Tulieu, fille vnique, qui luy apporta de grâds
 biens: femme qui se disposa sagement aux
 volonteiz de son mary, lesquelles elle sceut
 avec telle douceur reboucher, qu'elle gaigna

*Formulai-
re d'Ar-
rest.*

Bon sens.

*Mefnage
heureux.*

par vne longue obeïssance ce point sur luy qu'il ne croyoit tant en autre qu'à elle. Et non sans cause : Car comme ainsi fust qu'il eust seulement le cœur, ou au Palais, ou à ses liures, ceste bonne dame prit tout le fait du mesnage en main, mais avec vne telle bonté, qu'elle ne changea iamais de fermiers, ni ne leur appretia grain : estans par ce moyen tous deuenus riches avec elle. Lesquels aux obseques du defunct monstroyent assez combien ils regrettoient sa mort. D'autant qu'ils se presenterent tous deuant le corps habillez en dueil avec les seruiteurs domestiques. Sa table & conuersation ordinaire estoit de gens mediocres, avec lesquels il rioit familièrement, despoüillant soudain qu'il estoit dedans sa maison avec eux tout ce qui estoit de la grandeur de son estat : ayant tant qu'il a vescu apporté ceste reigle de ne soupper hors sa maison, & de se coucher à neuf heures, & se leuer assez matin, le plus du temps sans seruiteur, ains n'ayât autre homme de chambre que soy-mesme, ainsi que i'ay appris de sa bonne partie. Ce qui n'est pas mal-aisé de croire. Car il estoit si peu fastueux, que ie l'ay veu quelquefois retourner seul en sa maison ; quand il sortoit du Palais deuant l'heure. Il ne fut iamais conuié ou de nopces, ou de funerailles de ses amis, encores qu'ils ne fussent de condition grande, que luy ou sa femme n'y allassent, pour n'estre veu les desdaigner ou defaillir à son deuoir. De son mariage il eut six enfans : le seigneur de Bonneil fils aîné Maître des Re-

questes, le sieur de Saint Germain l'un des
grands Maistres & reformateurs generaux
des eaux & forests de la France, & puis Bail-
ly de Melun ; le seigneur d'Emery Conseiller
en nostre Cour de Parlement. Des filles trois,
dont l'aînée fut mariée avec Monsieur le Vi-
conte de Chiuerny Chancelier de France, la
seconde à Monsieur de Harlay, à present pre-
mier President, & la troisieme qui fut rendue
Nonnain voilee, à laquelle il deuoit vne veue
tous les ans par forme de vœu, le iour & feste
Saint Louys, patron du monastere de Poissy
où elle reside. Il a veu en vn mesme temps
deux siens gendres, l'un Chancelier de Fran-
ce, l'autre troisieme President, l'un de ses fre-
res Aduocat general du Roy, l'autre Eues-
que de Chartres, & l'autre Maistre des Re-
questes. Et ses deux derniers masses promeus
aux dignitez que i'ay dit : car quant à son aî-
né il deceda deuant le pere, & neantmoins il
mourut Maistre des Requestes. Et combien
qu'il ne fut brigueur, si est-ce que les digni-
tez le suiuioyent sans qu'il les enuiast. Car lais-
sant à part toutes autres particularitez, ie me
contenteray de vous dire que cinq ans aupara-
uant que deceder, Monsieur le Duc d'A-
lençon, second Prince de France, le pour-
ueut de l'estat de Chancelier de sa maison, au-
quel il est mort. Ceux qui luy estoient plus
seurs amis, eussent souhaité qu'il n'eust accep-
té ceste charge. Il a vescu soixante & quinze
ans sans vser de lunettes, vegete de corps & d'es-

prit, hōme qui apprehendoit de telle façon les affaires, qu'il ne se heurtoit point cōtre les torrens, ce qui luy a augmenté les iours- Son mariage fut son premier & dernier, auquel il vesquit l'espace de quarante neuf ans, vingt neuf ans President, dont il y en a vingt complets en l'estat de premier. Sans que iamais pēdant cest entre-jet de temps nous l'ayons veu malade quatre iours, qu'il ait volontairement discontinué le Palais trois iours. En fin il mourut le premier iour de Nouembre, mil cinq cens quatre-vingts & deux, iour que ie veux annōbrer à vne partie de son heur : par ce que c'estoit le iour de la Toussainct, dōt vne partie de l'apresdinee estoit dediee à la Commemoration solēnelle des morts, regretté generalemēt de tous, & par special de son roy, lequel voulant faire paroistre combien ill'auoit aimé en sa vie, luy ordonna des Obseques les plus celebres qui oncques eussent esté veuës à vn hōme de robe longue : Dont luy-mesme à face ouuerte, se voulut rendre spectateur, avec la Roynes mere & autres grands Princes & Princesses, en l'hostel du Preuost de Paris. L'on prit le chemin des Cordeliers & de là de la ruē de la Harpe on descēdit sur le quay iusques en la ruē des Augustins, pour rendre le corps à l'Eglise Sainct André des Arts, où est le sepulchre ancien de ses ancestres. La suite & procession fut telle qu'il y en auoit encores presque en la maison, quand les autres entroyent en l'Eglise : & iamais ne vit-on les fenestres & boutiques des maisons

*Obseques
de Mon-
sieur le
premier
President.*

tapissées de tant de peuple tout exploré. Le ciel mesme sembla lamenter son decez par plusieurs pluyes qui furent lors, & le Palais auoir celebré ses funerailles. Car comme si avec luy le Parlement fust mort, le hazard du tēps voulut qu'il y eut intermission des audiences quatre mois entiers, pour la difficulté que la Cour faisoit de publier quelques ordonnances : & dauantage vne belle liste de gens de nom tant de la France, qu'Italie, pour derniere closture voulurent rendre son tombeau immortel par plusieurs vers François, Latins, & Grecs. Vne chose me plaist-il remarquer de luy qui est digne d'estre recitée : c'est que tout ainsi que de tous les grands Aduocats de sa volée, dont j'ay parlé au commencement de ma lettre, qui tous monterent aux honneurs, il attaignit au premier degré : aussi par vn priuilege special de sa fortune demeura-il le dernier, les ayans tous suruescu. Repassez toutes les fortunes des hommes illustres, vous n'en trouuerez point vne autre qui ait esté accompagnée de tant de benedictions de Dieu comme ceste-cy, ne qui luy ait faict si longue & fidelle compagnie. Les vns montent par leur vertu aux grands honneurs, mais ils sont extraits de bas lieux, qui est vne tare en l'opinion de ceux qui ne balancent nos actions au poix de la seule vertu : comme les Romains veirent vn Ciceron, auquel ses ennemis obiectoyent à chasque bout de champ, qu'il estoit vn homme nouveau, encores qu'il s'en sceust fort bien defendre. Les autres paruiennent, mais c'est par meschanceté, comme en la

*Le Palais
homme
par ha-
zard lors
de la mort
du premier
President.*

Epitaphes.

*Chose re-
marqua-
ble parti-
culieremēt
en la fortune
de ce
seigneur.*

*Belle &
admirable
fortune de
Monsieur
le premier
President
de tout sēs.*

*Diuersité
des fortune
des
hommes
illustres.*

Sicile Agathocle. Autres qui ont bel aduenemēt & progrès, mais qui se tourne par succez de temps en vne mort honteuse & tragique, comme fut celle de Polycrates Samien, qui se disoit l'heureux des heureux: & d'Anguerrād de Marigny entre nous: autres qui ont eu vne fin belle, mais le commencement tres-honteux, comme en Turquie autre-fois Barbe-rousse, & depuis Dragut Reis, qui de la cadene, où il passa tout le temps de sa ieunesse au milieu des forçats, deuint general des Galeres du grand Seigneur. Autres qui eurent beau commencement & pareille fin, mais le milieu de leur fortune fut trauersier, comme les Romains veirent vn Furius Camillus, & nous vn Anne de Montmorency Connestable de France. Autres qui pour auoir esté heureux, ne receurent iamais si grand heur que d'estre morts ieunes, pour ne donner le loisir à fortune par ce moyen de leur tourner le visage, comme Alexandre: aussi ne sentirent iamais plus grād malheur, & Annibal, & Scipion l'Africain, & Pompee (tous trois tres-grands & heureux Capitaines en leur ieunesse) que par la lōgueur de leur vie. Autres au maniement des affaires publiques eurent des succez tres-heureux, mais en leurs domestiques, vn ver qui leur rongeoit interieurement la poitrine, comme ce grand Empereur Auguste. Bref il n'y a eu homme si grād & heureux ait-il esté, qui ait eu prix pour prix vne fortune si' accomplie en son tout comme cestuy-cy. Estre extrait d'une noble famille, paruenir par les degrez honorables

aux honneurs premierement populaires, puis Royaux, aimé successiuement de tous les Roys qu'il seruit, honoré de tout le peuple, s'estre maintenu en son estat au milieu des troubles aigus qui ont couru par la France, sans auoir receu aucune algarade des vns ny des autres: avec tout cela auoir en sa maison vne femme sage & honneste, miroir de chasteté à toutes les matrones, vne posterité si grande & illustre, vn aage si long sans maladie, vnes funerailles telles que j'ay recitees pour catastrophe de ceste heureuse comedie. He vrayement ie le dis encor vn coup, il n'y eut iamais vne si heureuse vie tant en public que priué, ne qui se trouuaist accomplie, suiue d'une si heureuse mort. Je luy dediy deux ans deuant qu'il mourust mes Epigrammes Latins, maintenant qu'il a pleu à Dieu de faire sa volonté de luy, ie luy consacre d'abondant à sa memoire entre vos doctes mains cest eloge, au bout duquel ie veux que l'on appende ce beau vers du Poëte Aufone,

Talis vita illi, qualia vota tibi.

Ceux qui detractent à ses loüanges, luy impu-
tent les fortificatiôs de Paris qui se font depuis
tournees en vne forme de taille. Mais cest in-
considerément iuger des affaires du mode par
les euenemens, & non par les cōseils. Quelques
autres pour ne demeurer muets diët que sa di-
ligence estoit plus nuisible que profitable au
Palais, comme celuy qui vuidoit les roolles, nō
les causes. Il vuidoit & les roolles & les causes

*Les fautes
qu'on im-
pute au
defunct.*

ensemble. Mais on ne peut apporter si bonne police au public, que les bons n'en patissent de fois à autre avec les mauuais. Et le Medecin donnant air à la veine du malade pour la guérir, ne peut tirer du mauuais sang qu'il n'y en passe aussi du bon. La rigueur qu'il apporta en ce faict-cy, feit de telles operations contre les tergiuerfations des fuyards, qui est vne tres-dangereuse maladie en iustice, que nous apprismes à faire plus diligemment raison aux pauvres parties languissantes quel'on n'auoit iamais faict par le passé. Autres arguent en la facilité de ses mœurs la multitude effreneée de Procureurs à laquelle il ouurit la porte. A quoi ie passe condamnation fort volontaire : car ie seray tousiours du party du peu contre le trop en telles matieres, aussi bié que l'Empereur de Rome qui mourant disoit que la multitude des Medecins qu'il auoit appelez pour sa guari-son, l'auoit mis au liét de la mort. La trop grande multiplicité produit la confusion & desordre, qu'il est malaisé de policer puis apres; mesmes en cest estat de Procureur. Toutes-fois quand ie considere sur quel fondement fut appuyé ce defaut, ie le compare à ces erreurs dont fut autre-fois censuré Tertullian, que i'appelle belles erreurs. Car il n'y eut autre chose qu'un zele ardent enuers Dieu & son Eglise qui l'y conduisit. Aussi veux-je nommer ceste faute au milieu des vertus de nostre President, vne belle faute, qui ne prenoit son origine que d'une humanité nee avec luy, qui l'induisoit d'auoir compassion de tout ce petit peuple. Les

Multiplicité de Procureurs nuisible au public.

derniers iettans leurs pensees plus haut luy impropere, que ceste mesme facilité le feit tomber en vn accessoire de plus dangereuse consequence. Par ce qu'il promettoit aisemēt (comme ils dient) plusieurs choses au Roy, dont se trouuant puis apres mauuais garant, il vouloit aucunement violenter les opinions de sa compagnie, pour ne faillir de promesse.

Si cela est vray ou non, ce me sont lettres closes, bien diray ie qu'il n'y a que ceux qui sont appelez en tel estat que le sien, qui se trouuent empeschez, en la diuersité des propositions qui sont au mesnagement de la Repub. entre les seigneurs de la Cour du Roy & de la Cour de Parlement. Car pendant que les vns semblent estre vn peu trop souples, les autres trop roides, ce sage seigneur, qui par vn long vsage cognoissoit où les choses pouuoient tomber selon la necessité du temps, taschoit entre les deux extremitez d'y apporter vne voye moyenne. Sçachant bien que quelque-fois en voulant conseruer le ciel par opiniastrété, nous perdons ensemblement le ciel & la terre. Somme le fruit que ie rapporte de ces objections est, que ie tourne ma pensee sur la misere de nostre vie, qui est de telle condition qu'il n'y a si homme de bien, qui ne soit sujet au cōtrole, i'ay cuidé dire à la calomnie des langues. Cela fera que pour m'estancher d'un long discours & mettre fin à la presente, vous celebrât ce grand personnage, i'ene le vous pleuiray pas pour le plus parfait (car ce bas estre n'est capable d'aucune perfection) ains pour le

Diuersité de propositions entre les Seigneurs de la Cour du Roy, & du Parlement.

Qu'il n'y a homme si parfait qui n'ait des imperfections.

le moins imparfait de tous ceux que nous ayõs veu de nostre aage. A Dieu.

A Monsieur de Basmaison Aduocat au siege Presidial de Lyon.

*Il se rend
Aduocat
enuers le
sieur de
Basmaison,
de son fils.*



'Ancienne amitié que i'ay en vous dès nos premiers ans, & conséquẽment aux vostres, me commande de vous escrire la presente; pour vous aduertir que Basmaison vostre fils a repris & reprend de iour à autre de bien en mieux le train que desirez de ses estudes. Il se fait beau & grand, non seulement de corps, ains d'esprit. Ie n'en ay pas voulu croire ce qui m'en a esté rapporté par mes enfans, ains moy-mesme l'ay voulu sonder au vif de sa leçon à l'impourueu. Et si le dire des veneurs est vray, qu'on reco- gnoist le cerf par les voyes, ie vous promets qu'en aurez vn contentement tel que souhai- tez. C'a esté vn bon vin qui du commence- ment pour sa force rompoit les cercles de son vaisseau: & maintenant qu'il est rassis, il sera des plus souëfs & delicats. C'est pourquoy ie vous conseille que d'oresnauant (oubliant le passé) vous embrassiez ses actions, comme bon pere. Ce dont ie me suis faict tort, est d'estre caution enuers vous deux: enuers vous, qu'il sera bon fils, qu'il aura le dessus au bien faire sur ses autres freres & sœurs, comme il a l'ad- uantage de l'aage: enuers luy, que le favori- serez desormais, non seulement comme vo- stre aîné, ains comme le mieux aimé. Ce

n'est pas petite victoire à vous de l'auoir dom-
té, & reduit selon vostre volonté aux estudes,
apres auoir quelque temps fuiuy les armes, es-
quelles il sembloit estre naturellement enclin :
aussi n'est-ce autre petite victoire à luy, des'e-
stre vaincu soy-mesmes pour vous obeir. Et
certes vous auiez notable interest qu'il fist ce-
ste faute, pour cognoistre maintenant com-
bien il vous est bon fils. Ceux qui dedans la
saincte Escriture ont esté pecheurs, & sont re-
uenus à vne bonne repentance, n'ont pas esté
moins recommandez enuers Dieu, ains quel-
que-fois dauantage que ceux qui n'auoyent
point peché. A Dieu.

*A Monsieur Loisel Aduocat du Roy en la Cham-
bre de Iustice de Guyenne.*



'Ay receu les remonstrances Que pen-
qu'auiez faictes à l'ouuerture de dant que
vostre seance d'Agen, & par nous met-
mesme moyen vos lettres du 22. tons toute
de Nouembre, escrites non de nostre estu-
vostre main, ains de celle de vostre clerc. Cho- de de pa-
se qui ne m'a point tant esbahy (encores que roistre sca-
par vne courtoisie qui vous est propre, vous- uans dans
vous en soyez excusé) que de la cause de ce noz plai-
changement: ayant entendu que c'est pour vn doyers ou
mal des yeux qui vous est de nouveau surue- harangues,
nu. Car ie crains que pendant que vous met- nous cor-
tez toute vostre estude à la conseruatiō de vo- rompons la
stre honneur, en la charge, en laquelle estes naifueté
maintenant appellé, vous mettiez en oubly le de l'elo-
quence
Françoise.

soing de vostre corps & de vostre santé. Et ce qui me fait craindre dauantage, sont ces belles remonstrances, à la lecture desquelles i'employay deuant hier vne bonne heure. Remonstrances, dy-ie, pleines de doctrine, images d'une longue estude, & par special contenant vn discours du tout conuenable, & au temps & au personnage que representez : & telles que ie m'asseure qu'elles produiront en moy effect du tout contraire à vostre intentiō. D'autant que ie ne doute point que ne les ayez basties, à fin de pourchasser vn repos entre les sujets du Roy, & encores pour les rédre gés de bié. Et quāt à moy ie vous puis dire qu'elles ont apporté vne inquietude en mon esprit, voyant que pendant que faictes de si beaux discours il faut que ie me taise. Vous sçauiez ce que disoit Aristote, quand Isocrate estoit suiuy d'un grād & assidu auditoire. D'ailleurs ie me doute que contre mon naturel elles me feront faulfaire ou larron. Par ce qu'ayant escrit lettres à Mōsieur de Montelon Conseiller, & me chargeant de les luy enuoyer avecques vos remonstrances, il y a grand danger que craignant de perdre l'un, ie ne soustraye vos lettres, ne me voulant frustrer du fruit de vostre beau labour. Ne pensez point que ie presse cecy à nostre amitié, ie suis de vostre opinion, qu'il n'y a rien de comparaison de vostre premiere harangue, avec ceste seconde. Et toutes-fois ie vous prie prendre de bonne part ce que ie vous veux mander maintenant. Vos remonstrances seront cause que i'en enteray d'autres sur elles. Ce que vous

estimez

le plus riche en icelles, est à mon iugement le plus pauvre. Je veux dire tât de passages Grecs & Latins, tant d'allegations d'autheurs, dont vous reparez vostre discours. Je desire que tenant le lieu auquel estes appelé, nous habillions vn Orateur à la Françoisé si proprement & à propos, que nos actions s'ellongnent le plus qu'elles pourront de la poulsiere des escholes, puis qu'il nous les faut représenter en ceste grandelumiere du Soleil. Et vous puis dire de nos remonstrances plaidoyers, & harangues, que nous faisons aujourdhuy ce que l'on dit del'architecture; suiuant laquelle vous trouuez tous les grands bastimens beaux & riches qui furent faits depuis la venue de nos Roys, comme vous pourriez dire dans Paris, vne grande Eglise de nostre Dame, vne sainte Chappelle, le Palais, lesquels le commun peuple estime faicts à l'antique: & neantmoins au iugement des braues architectes, il n'y a rien d'antique en eux, ains sont bastis à la moderne, pour n'auoir rien de tous ces rares traits, dont les anciens Grecs & Romains vsoyent en leurs architectures. Ains peut-on dire vrayement vn Louure auoir esté faict par feu Monsieur de Claigny à l'antique, encores qu'il soit nouveau, dans lequel il a exprimé tout ce qui estoit de beau & digne de l'ancienneté. Je ne sçay comments s'est insinué entre nous ce nouveau genre d'eloquence, par lequel il faut non seulement que nous nommions les autheurs, dont nous empruntos nos embellissemens, mais qui plus est que nous couchions tout au long leurs passages: & ne

péserions estre veus sçauoir ni bien dire, si nous n'accompaignions toute la teneur de nos discours de ceste curiosité. Les Grecs, ni les Romains, lors qu'ils furent en vogue de bien dire, n'en vserent de ceste façõ. Ni ceux-mesmes qui vindrent sur le declin de leur eloquence, entre les Latins, comme nous voyons par leurs Panegyrics. Brief nous seuls entre toutes les autres nations faisons profession de rapiecer, ou pour mieux dire rapetasser nostre eloquence de diuers passages. Rendans (si ainsi le faut dire) les morceaux comme vn estomach cacochyme & mal affecté, ainsi que nous les auons pris. Quoy faisans nous ne considerons pas qu'un corps bien sain tourne ses alimens en nature. Aussi sans rendre les passages comme nous les apprenons, nous pourrions estre veus sçauoir assez, en recitans les histoires, & les approprians à nostre sujet, par forme de marqueterie, au fil commun de nostre langue; tout ainsi que feirent ceux dõt nous espuisons l'eloquence, qui furent en reputation non seulement de bien dire, ains de bien sçauoir. Ceste nouvelle forme de plaider, si ie ne m'abuse, est venue d'une opinion que nous eusmes de contenter feu Monsieur le premier President de Tou, deuant lequel ayans à parler, & voyans son sçauoir estre disposé à telles allegations, nous voulusmes nous accommoder à l'auaille de celuy qui auoit à nous escouter. Tout ainsi comme l'on dit que le bon cuisinier doit appareiller ses viandes au goust de son maistre. Or puis qu'il a pleu à Dieu l'appeller à soy, ie desire

*D'où vient
ceste nou-
uelle forme
d'eloquence
qui gist en
allegations.*

aussi qu'auec luy soit enseuelie ceste nouuelle maniere d'eloquence, en laquelle pendant que nous-nous amusons à alleguer les anciens, nous ne faisons rien d'ancien. Ie m'asseure que si par les premieres remonstrances qu'aurez à faire vous obseruez ceste leçon, vous receurez vne infinité de contétemens : & que tout ainsi que ces secôdes passent d'un entrejet les premieres, aussi les troisiemes auront de grands aduantages sur les deux autres. Ie ne dy pas que par fois au milieu d'un long discours on ne puisse citer vne autorité ou passage, mais il faut que cela ne soit affecté, & que soyons si necessitez de le faire, que l'obmettant nous aurions perdu vne bonne partie des nerfs de nostre intention. Et quât à ceste pluralité d'allegations, il me semble que nous la deuons craindre & fuir, comme le nautonnier vn escueil. Ie sçay bien que vous me direz que Monsieur le President de Pibrac, l'une des lumieres de nostre siecle, en a vsé comme vous faites, estant Aduocat du Roy : ie le vous accorde. Mais en cecy il s'est laissé aller à la mercy de l'infelicité de nostre aage, & de ce que l'on a trouué le plus beau, ores qu'il soit tressaid. Suffise vous que luy Toulousain, ait exercé ceste eloquence en nostre ville de Paris, & que vous Parisien ayez faict le semblable sur les lizieres de son païs. En ce faisant, c'est quitte à quitte. De ma part ie seray toujours du nombre de ceux qui embrasseront ce qu'ils verront auoir esté approuué d'une bié longue ancienneté, ie veux dire les œuures de ceux qui pour leur bien-seance se sont perpe-

tuez iusques à nous. Ne pensez pas que ie ne fois quelque-fois tombé sur ce mesme discours avec Monsieur de Pibrac, non pas si ample que cestuy. Lequel pour toute responce me coucha d'un Plutarque, qui semble faire le semblable. Mais il y a bien grande difference, entre celuy qui enseigne par liures, ou qui harangue en public: entre celuy qui traite la Philosophie, & en baille les preceptes, & celuy qui parle deuant vn Senat: entre celuy (dy-ie) qui veut paroïr lettré deuant le monde, & l'autre qui veut estre veu Orateur. Et neantmoins encorers ne trouueriez vous Plutarque si prodigue en ses allegations comme nous. Ce que ie vous escriis, est par forme de deuis, & non que ie vueille estre creü. Vray que ie souhaiterois qu'en voulussiez faire l'essay. Vous priant me pardonner l'honneste liberté que i'apporte en vostre endroiçt: vsant de vous comme d'un autre moy-mesme. Car tout ainsi qu'estant avec vous, ie ne me lasse iamais, aussi absent auez-vous ceste puissance sur moy, que vous escriuant ie ne me lasse de vous escrire (ores que ie sois fort paresseux en ce sujet, enuers les autres) voire iusques à vous rescrire non vne lettre, ains vn liure si le sujet s'y presentoit. Mais à propos de liure il me faut changer de châce. On a depuis vostre partemēt imprimé nostre Pulce de Poitiers; avec tant de diligence qu'il ne fut rien fait de gaillard à nos grands Iours de Poitiers, que l'on ne l'y ait compris: & en a l'on fait deux liures. L'un où l'on comprend seulement les Blasons faits sur la Pulce, qui nous portera, à

*Le Poeme
fait à Poi-
tiers sur la
Pulce.*

ce que ie voy, sur ses ailes iusques par dessus les nuës ; & en l'autre la diuersité des autres Poësies qui furent faites à mesure que ceste Pulce picquoit diuersemēt nos esprits. Ie ne sçay qui en a esté l'ordinateur (car le Libraire ne me l'a voulu dire) mais ie croy que cela vient de la boutique de mes Dames des Roches. Tant y a que vous ne croiriez pas que cest œuure est biē recueilly, pour auoir esté façonné de tant de nobles entendemens. Quant aux nouuelles de nostre Palais, il est aduenü maintenant le contraire de quelques annees passées, esquelles nous auons veu continuation de Parlement pendant les vacations : & maintenāt nous auōs eu depuis la S. Martin continuation des vacations iusques à huy. Cecy s'est fait par le moyē de l'Edict de consignations des procez que l'on a renouuellé avec clause expresse, que là où vn Procureur aura occupé pour vne partie sans auoir consigné, il sera condamné sans deport en son propre & priué nom par emprisonnement de sa personne, de payer la somme de vingt & deux escus vn tiers. Les Procureurs estimans que ceste clause alloit du tout à leur ruine, ont fait protestation publique en pleine Audiance, de ne vouloir occuper sous ceste charge. La Cour ordonna que les plaidoyeries fussent ouuertes dès le lendemain, & qu'elle en feroit remonstrances au Roy. Nul Procureur ne s'y est voulu trouuer, jaçoit que le premier Huissier ait esté de banc en banc aduertir les Procureurs que si aucun d'eux vouloit audience, il l'auroit. Le Roy d'vn autre costé

*Edict des
consigna-
tions des
procez que
l'on vouloit
renouvel-
ler.*

*Les Pro-
cureurs
protestent
de ne vou-
loir occu-
per.*

demeure fiché en son opinion, & dit que les amendes luy sont acquises; Voire depuis que l'Edict fut publié, qui fut lors qu'il vint en personne au Palais. Vray qu'il n'auoit esté executé à faute de partisans, lesquels se sont trouuez depuis ces dernieres vacations. Vous diriez proprement qu'avec la mort de feu Monsieur le premier President, soyent aussi mortes les plaidoyeries, & que nous en celebrions maintenant les obseques. Aux derniers grands Arrests qui fermerent le Parlement, on publia l'erection du siege Presidial de Clairmont en Auvergne. Aux premiers grands Arrests qui ont esté publiez en robe rouge au Parlement où nous sommes, qui fut à Noël dernier, on a verifié vne autre erection d'un autre siege Presidial dedás la ville de Beauvais. Il y a plusieurs autres Edicts qui sont en bransle sur le bureau, mesme celuy de xvij. mil Sergens, par tout ce Royaume. Je ne pense pas qu'il doie passer: car s'il auoit lieu, il effaceroit la memoire des onze mille diables, dont on parloit du temps de nos bons vieux peres. Ce temps pendant nous attédons avecques grande deuotion Monsieur le premier President, & Monsieur l'Advocat de Tou ce iourd'huy ou demain, pour le plus tard. Je croy que leur opinion est d'arriver precisément aux festes de Noël. Et demeure chacun grandemēt suspens quelle mutatio apportera leur retour. Monsieur le Procureur general a esté surrogé en l'estat de President par la promotion de Monsieur le President de Harlay au premier: & d'une mesme suite Monsieur

*Erection
des sieges
Presidiaux
de Clair-
mont &
Beauvais
1582.*

de la Chault son fils entre en l'exercice actuel de celuy de Procureur general. Le bruit commun court que Monsieur le President de Pi-brac se veut demettre du sien és mains de Monsieur l'Aduocat de Tou. Je croy que vous vous contenterez de toutes ces nouvelles pour le present, desirant mettre fin à la presente, par rencontre tout autre que celle qui est au bout de vos lettres, d'autât que m'escriuez que l'audience du lendemain vous le fait clorre. Et quant à moy le loisir où ie suis plongé, fait que ie ne me puis estancher. A Dieu.





L E

H V I T I E S M E

LIVRE DES LETTRES

D'ESTIENNE PASQUIER.

*A Monsieur Pitou, seigneur de Sauoye,
Procureur general du Roy en
la Chambre de Iustice
de Guyenne.*

*Par ceste
lettre il
discourt
la forme
qu'il a eue
tant
au commun
cours de
ses estudes
que exer-
cice de son
estat.*

P V I s que la pierre en estiettee, elle ne se peut reuoquer. Et quand i'aurois à le refaire, encores feroi-ie le semblable. Non que ie ne sçache bien que n'estes pas seul qui pouuez trouuer mal-seant que i'employe quelques heures à faire des Epigrammes Latins. Car aussi l'auoif-ie dès pieça pressenty. Et de fait par l'Epistre liminaire que i'adressay à feu Monsieur le premier President, ietouchay nommément ceste corde, par forme de preoccupation. Ni pour cela ie n'ay peu oncques me diuertir d'en composer, & moins de les mettre en lumiere, quand i'ay estimé que le liure le meritoit. Ne me prenez pas du nombre de ceux qui avec l'aage vueille changer ce naif que le ciel a influé dans moy. Tout ainsi que les ans ne m'ont, graces à Dieu, apporté furot ni malendre au corps

iufques à huy, auffi ne m'ont ils plus apporté *Les fautes*
ce chagrin qui nous accompagne ordinaire- *de la vieillesse.*
ment fur le declin de nostre aage. Ie ne fuis en-
cores de ceux qui fe voient du tout à louer le
temps de leur ieunesse, au defauantage du pre-
sent. I'excuse fort aisément tout ce qui se faict
par les ieunes gens, me fouuenant auoir esté
autre-fois tel qu'ils font. Ie dirois volontiers
l'estre encor, mais ma barbe m'en dementiroit.
Et quand ces melancoliques discours me vien-
dront assieger l'esprit, pensez que ie seray lors
sur le poinct de trouffer bagage, ores que ie me
trouuasse bien disposé de tous mes membres.
Car i'estimeray adonc mon esprit s'affaïsser, &
par mesme moyen mon corps, pour la corres-
pondance qu'il y a de l'un à l'autre. Mais pour-
quoy, ie vous prie, peut-on trouuer mauuais
que sur mon Automne ie represente des fleurs,
la pluspart desquelles sont nees dás mon Prin-
temps? Nature ne le permet-elle point? Au cō- *Les fleurs*
traire c'est en quoy les fleurs de nos esprits sur- *de nos es-*
passent celles des saisons de l'annee. Car s'il y *prits sur-*
auoit des fleurs qui creussent dans nos iardins *passent cel-*
sur la Prime-verre, & qu'elles peussent conser- *les des sai-*
uer leur naïfue odeur, iufques en l'Automne
ou l'Hiuer, vray Dieu qui seroit celuy qui ne
les cueillist avec grand soing d'une main mi-
gnarde? Quant aux fleurs qui naissent de nos
esprits, plus elles sont gardees, & plus elles se
rendent recommandables, comme celles es-
quelles de iour en iour nous apportons quel-
que odeur. Ce mot de iardin me faict icy res-
souuenir quelle fut ma premiere deliberation

*Conseil que
Pasquier a
suivy en ses
actions.*

lors que i'arriuay au Palais. Car tout ainsi que nous diuersifion snos iardins, de ce costé là d'un parterre & compartiment de fleurs soüefues & odoriferantes, icy d'un plant d'arbres qui rapportent des fruiçts, là d'une potagerie qui regarde la necessité du mesnage, meslans par ce moyen le plaisir avec le profit : aussi ay-ie voulu mesnager mes actions, tantost en ce qui appartenoit à la necessité de mon estat, pour subuenir à moy & aux miens, tantost d'estude serieuse, puis de ioyeuse, me iouant diuersement de mon esprit : sans que le plaisir m'ait iamais faict mettre en oubly ce qui estoit de mon estat, ny que l'exercice de mon estat m'ait faict oublier rien du contentement que ie prens à ces gentilleses & gaillardises d'esprit. Lors que i'arriuay au Palais ne trouuant qui me mist en besongne, & n'estant né pour estre oiseux, ie me mis à faire des liures, mais liures conformes à mon aage, & à l'honneste liberté que ie portois sur le front. Ce furent des dialogues de l'Amour sous le nom du Monophile, lequel ie ne voy point estre vieilly en l'opinion des nostres. Car encores court il aujour-d'hui entre les mains de beaux esprits de la France, comme sur son premier aduenement. De là meurissant mes conceptions avec l'aage, ie me mis à rechercher les anciennetez de nostre France, en quoy ie me fais accroire auoir fait quelque auancement, puis que vous mesmes en auez porté tesmoignage pour moy en vostre traicté des Comtes de Champagne. Bien puis-ie dire que plusieurs à ma suite

*Le Mono-
phile faict
par Pas-
quier estat
fortunate.*

*Recherches
de la France.*

se sont mis à faire le semblable : & croy que vous ferez d'accord qu'il y en a peu qui n'ait pris quelque chose de moy à face ouuerte. Ce que ie n'enuie point à ceux qui liberalement le recognoissent, mais quant aux autres qui le taisent, ie le leur donne sur leur conscience, l'imputant à vn vray larcin. Et à vray dire cela a esté cause que des six liures que i'auois promis, ie n'en ay mis en lumiere que deux. Non que ie n'aye satisfait à ma promesse: car i'ay les quatre derniers par deuers moy, que ie vous ay communiquéez, mesmes celuy qui concerne la discipline Ecclesiastique de France, & les priuileges de nostre Eglise Gallicane, auquel ie pense auoir employé tout ce qui estoit de bon & de beau pour ce sujet. Le temps peu à peu m'appresta tel lieu & auancemēt entre mes compagnons, que ie puis maintenant tenir.. Ni pour toutes ces estudes particulieres, ie n'ay laissé de m'employer aux plus belles causes, quand les occasiōs s'y sont presentees. Tescmoin celle des Iesuites, que ie plaiday pour l'Vniuersité de Paris: tescmoin celle d'Arconville: tescmoin celle de Martigue: tescmoin celle d'Angoulême de l'an cinq cens septante six. Et encores celle que nous plaidasmes par quatre diuers iours pour les Paracelsites, encontre la faculté de medecine. A fin que ie vous en laisse plusieurs autres que ie ne me suis icy proposé, de vous bailler par inuentaire. Et neantmoins ie vous puis dire, qu'au milieu tant de ces causes, que de l'estude que i'ay mise aux anciennetez de nostre France, ie n'ay laissé de faire vn vers,

*Quelques
causes so-
lennelles &
toutes pu-
bliques
plaidées
par Pas-
quier.*

tantost François, tantost Latin, selon que l'objet m'en presentoit l'inuention. Ces vers m'estoyent ce qu'aux autres, vn ieu de prime, de flux, de glic, de renette, de triquetrac, ou de lourche. Voire quelors quel'aage me com-

*Vers quel
temps il se
mit à faire
des Epi-
grammes
Latins.*

Epigrammes Latins, qui me seruoient de reueil-matin au lieu de mes causes. Tellement que si c'est folie de m'estre addonné à ce sujet, encores m'estimerez-vous plus fol quand vous entendrez depuis quel temps. Iamais n'auoit esté depuis mon retour des Vniuersitez que ie

*Monsieur
Sibilet don-
na les pre-
mieres in-
structions
de la Poésie
Françoise à
Pasquier.*

n'eusse aucunement aimé la Poësie. Le premier qui m'y inuita, fut Monsieur Sibilet, nous estans en Italie, quelque temps apres qu'il eut mis en lumiere son liure de l'art Poëtique François. Toutesfois les occupations & affaires qui se presentoyent en mon estat, ne me permettoient pas d'y vacquer à telles enseignes que i'ay depuis faict. En l'an mil cinq cens soixante-quatorze, i'auois en mon logis feu Monsieur de Marilhac, ieune homme (depuis Cōseiller en nostre Cour de Parlement) des estudes duquel i'auois esté controlleur dès sa ieunesse, pour l'amitié qui estoit entre son pere & moy. Par ce que luy estant au college, ie donnois ordre de l'auoir à disner de fois à autre chez moy, comme vn mien enfant, & luy faisois rendre raison de sa leçon, & de ses compositions. Quoy faisant i'acquis à la longue vn tel respect de luy à moy, qu'il m'honoroit cō-

me son pere, & tenoit mes exhortations & remonstrances pour commandemens. Dés lors deses ieunes ans ie luy conseillay de s'addonner sur tout autre Poëte, à la lecture d'Horace, comme le plus moüelleux & sententieux. Ce qui ne tomba pas en aurreille sourde: car ie vous puis dire qu'il le sçauoit & entendoit autant que nul autre de nostre aage. Quand il fut de retour des Vniuersitez, pour tesmoignage plus grand d'amitié que i'auois à sa famille, ie le pris de main souueraine avec moy; encores que M^{rsieur} de Ferrieres son pere y resistast. Craignant que cela ne me tournast à importunité, comme il estoit homme respectueux le possible enuers ses amis. Il seroit mal-aisé de dire combien ce bel esprit apporta de resueillemēt au mien. Il n'y auoit iour qu'il ne me saluast de quelque belle question, ores de droict, ores d'histoire, ou de quelque noble inuention, tantost en vers, tantost en prose, mais vers du tout Horatiens. M'ostant par ce moyen vne partie du rouille que la longue habitude du Palais m'auoit apporté en tel sujet. Sur le moule de son esprit, ie veux patronner le mien. Le malheur voulut que le seigneur de la Mole fust executé à mort en l'an mil cinq cens septante quatre, lequel auoit employé vne bōne partie de sa vie aux delicatesses de la Cour, pres des Princes & grandes Dames. Ie donne aduis à ce ieune homme de faire vn Epitaphe Latin de luy, & de se ioüier sur son nom, qui se rapportoit aucunement à ses mœurs, & qu'il le fist en vers d'onze syllabes (à la Catulliēne) qui sōt les

plus mols. Il met les mains à l'œuvre, faict des vers tels que ie luy auois dict, mais d'un stile d'Horace, qui n'a rien de rencontre avec celuy de Catulle. Au moyen dequoy ie m'aduisay de faire moy-mesme ce que ie luy auois conseillé. Et de faict ie dressay cest Epitaphe, qui est imprimé avec mes autres Epigrammes. I'e fais present à Monsieur de Vouzé Maistre des Requestes, qui le donna à feu Monsieur le premier President, lequel se delectoit de toute chose d'esprit. Il passé d'une main à autre, chacun y trouue dequoy se contenter. Il n'est pas qu'il ne fust enuoyé à Monsieur de Pibrac à Polongne, lequel à son retour me le loüa grâdemment, ne sçachant que ie l'eusse faict. Je commençay lors à me chatoüiller, puis que tant de gens d'honneur me flattoient. Pour le vous faire court, il renaist en moy vn nouveau desir de faire des vers Latins. Je n'en auois encores perdu la veine. Le cœur aguise mon esprit, l'esprit ma main, la main ma plume. S'ils s'offroit le iour quelque nouuelle inuention, la nuict ie la mettois en œuvre, & le matin ie la redigeois par escrit. I'en fais vn recueil & amas avecq' d'autres de ma ieunesse. Qui est en somme ce dont i'ay faict present au public. Dont vrayement ie ne me repens. Car

*Pline se.
cond grand
Orateur de
son temps,
fit des Epi-
grammes.*

pourquoy m'en repentirois-je, si ce gentil Orateur Pline second seruit les siens de telles gail-
lardes inuentions? Ce siecle là, & celuy de de-
uant, & long temps apres, portoit que les E-
pigrammes fussent plus lascifs, que nous ne les
faisons maintenant. Comme nous recueillons

de plusieurs Poëmes de Catulle, Virgile, Martial, Aufone. C'est pourquoy ils eurent tous grande peine d'excuser, chacun en son endroit, les pudeurs & hontes de leurs vers:

*Les anciens
Romains
estoyent
plus lascis
en leurs E-
pigrammes,
quen'ont
esté ceux
qui leur ont
succédé.*

Nam castum esse decet pium Poëtam

Ipsū (disoit Catulle) versiculos nihil necesse est.

Et Martial:

Innocuos censura potest permittere lusus:

Lasciva est nobis pagina, vita proba.

Lequel dernier vers auoit esté premierement trouué par Pline, comme nous atteste Aufonē en ses Idilles. En quoy l'on voit qu'il ne s'y es-
pargna non plus que les autres. Pareille excu-
se trouuez-vous dans le mesme Aufone:

Nostra simul certant variis Epigrammata nugis,

Stoicus has partes, has Epicurus agit.

Salua mihi veterum maneat dum regula morum,

Ludat permissis sobria Musa iocis.

Vray qu'en cecy il s'abusoit : car quelque sage & grand personnage qu'il fust, si luy eschap-
perent de la plume plusieurs traiçts qui eussent
esté aussi bons, & meilleurs teus, qu'escris. La
posterité plus modeste quitta tels Epigrammes
pleins d'ordure. Mais en leur lieu les Poëtes
se mirèrent en bute des dames qu'ils loüoyent &
solennizoyent par leurs vers. Tels furent Ma-
rulle, Politian, Pontan, Sannazare, Iean Se-
cond, Beze, Buccanan, Scaliger & autres. Et
pour ceste cause Marulle au premier de ses E-
pigrammes disoit:

Sit procul à nostris obscœna licentia scriptis,

Ludimus innocua carmina mentis opus.

Vtique nec arma virum, nec magni orientia cœli

*Signa, nec immensum mundi aperimus opus,
Quid pluat, unde homines, qua vis maria inficit
alta,*

*An Deus, an manes, an Phlegethontis aqua:
Sic iuuat in tenui, legem seruare pudoris,*

*Et qua non facimus, dicere facta, pudet.
Sit satis auratos crineis laudare Neera,*

*Sit satis in duram multa queri dominam.
Et facere iratum sauo conuiuia amor,*

Nec nisi de Scythica credere rupe satum.

*Selon Es
Platon ont
escriit des
liures d'a-
mour.*

Ie me suis composé à l'imitatiõ de ces derniers, m'estant donné ne maistresse, pour seruir d'asfortissement au demeurant de mes Epigrammes. En quoy ie ne pense auoir fait folie, non plus que ce grand Petrarque, & Bembe Italiens, & entre les nostres Ronfard, Bellay, & infinité d'autres gens de nom. Au contraire, ie me persuade d'estre d'icy en auât conté pour le huiëtiesme Sage: Car il est certain que Solon ce grand legislateur d'Athenes, que l'on met entre les sept Sages de Grece, escriuit liures d'amourettes en vers: & apres luy ce grãd Philosophe Platon, en prose, avec lesquels i'aimeray mieux estre mis au rang des fols, que estre en opinion de sage au milieu de la populace. A Dieu.

A Mon-

A Monsieur Bigot, seigneur de Tibermenil, President au Parlement de Rouën.

Vand ie vous escriuis dernièrement pour le seigneur quelſcauez, & ses beaux freres, ie ne fis iamais de doute que ma requeste ne fust par vous enterinee; non seulement pour l'amitié qui est dés pieça contractee entre nous, & en l'aage (si ainsi voulez que ie le die) de nostre innocence, qui me semble surpasser d'un long entrejet toutes celles que nous auons depuis embrassees, mais aussi pour la iustice de la cause qui se presentoit deuant vous. Car encores que le fait de soy fust irremissible, pour auoir esté commis de guet apens, à port d'armes, & assemblee illicite, & autres telles circonstances qui engregeoient grandement le meurdre, si est-ce que puis que le priuilege de vostre Fiertré est introduit pour acquerir pardon & oubliance de tels actes, ie croy qu'entre ceux qui se presentent en vostre ville il n'y en eut iamais vn plus excusable que cestuy entre les inexcusables. Parce que selon les loix de la noblesse de France, il sembloit que ceux dont ie vous escriuy, deuoient vne iuste vengeance à la memoire de leur pere, qui auoit esté homicide par celui que depuis ils tuerent. Mais pour vous dire en vn mot, encores que l'aye tracé ceste lettre pour vous remercier de la faueur que leur auez faite en ma faueur, si ne receurez vous de moy vne action de graces planiere &

*je
d'entendre
d'où vient
l'ancienne
té de la fier-
tre de S.
Romain à
Rouën.*

462 LIVRE VIII. DES LETTRES
absoluë, que ne m'ayez auparauant esclarcy
d'où procede ce priuilege, & quelle en a esté
l'ancienneté & continuation. Ne me pouuant
bonnement resoudre comment il se peut faire,
qu'un si homme de bien, comme fut vostre
Saint Romain, produise vn effect contraire à
sa sainteté, ie veux dire que sa sainteté soit
comme vne franchise des meurdres les plus de-
testables. S'il vous plaist me mander comme
cela est arriué en vostre ville, & l'ordre que
vous y tenez, j'en feray vn ambleme en quel-
que endroit de mes Recherches. Et avec ce, ie
souhaiterois aussi grandement de sçauoir d'où
viennent vos jeux de l'Annonciade, esquels
j'entends que faites vn jeu de prix en faueur de
ceux qui ont mieux versifié. Voyez ie vous
prie de quelle façon ie trafique avecques vous.
C'est pis qu'en la maniere des marchands, les-
quels acquitans leurs vieilles obligatiōs, pren-
nent nouuelles marchandises à credit : Car
sans m'acquiter des anciennes ; ie veux que
m'en accroissiez de nouuelles. C'en est pas par
vn priuilege de vostre Fierté, que j'é vse de ce-
ste façon, ains par celui de nostre ville de Paris,
qui est d'estre mal à propos importun. Je sçay
bien que la multitude des affaires dont estes ac-
cablé ne vous baillera peut-estre le loisir de me
l'escrire, mais ce sera fait œuvre grandement
meritoire, & digne d'un bon Chrestien, de le-
uer ce scrupule de ma conscience. A Dieu.

A Mademoiselle de la Herbaudiere.

E ne me sçauois assez reuanger *Il remercie*
 del'honneste obligation que i'ay *la damoi-*
 en vous : prenant la peine à ex- *selle de la*
 citer par vos vers , vn cerueau *Herbaudie*
 alengoury. En quoy pour vous *re de quel-*
 dire la difference qu'il y a entre vos belles in- *ques vers*
 uentions & les miennes , ie recognois les vo- *qu'elle luy*
 stres prouenans d'un esprit gay , & qui est en *auoit en-*
 sa Prime-verre , ressembler à de ces fleurs dia- *noyez, eux*
 prees du Printemps , & les miennes aux fleurs *estans aux*
 Automnales fennees. Parquoy si en ce que *grāds iours*
 ie vous enuoye vous trouuez dequoy con- *de Troye*
 tenter vostre esprit, vous ne me l'imputerez, *1583.*
 ains à vous, qui sçauiez remuer en moy des
 humeurs sourdes & accroupies ; lesquelles
 me commandent dès pieça , mesmes depuis
 que ie suis arriué en ceste ville de Troye.
 Et s'il y a chose mal faicte , vous la reiette-
 rez aussi sur vous pour auoir mieux aimé
 mal faire en vous obeïssant , que du tout
 ne satisfaire à vos commandemens.

A Dieu.

*A Monsieur de Taix Abbé de Basse-fontaine, &
Doyen de l'Eglise de Troye.*

*Il se gauffe
avec Mon-
sieur de
Taix tresdo
cte homme,
auquel il en
uoye quel-
ques vers
qu'il auoit
faits.*



E suis Aduocat le iour, & Poëte
la nuit. C'est pourquoy ayant
ceste nuit produit vn cham-
pignon, ie le vous enuoye, non
pas pour le digerer (car l'vsage
des champignons est defendu
par les Medécins) ains pour le voir tant seule-
ment. Vous y adiousterez telle polissure que
merite vne chose brusque. Mais à la charge
que ie veux en contr'eschange d'une mesme
main vos deux vers, & comme l'on dit, en bail-
lant, baillant : ou ie vous feray paroistre que
n'avez pas affaire avec vn petit creancier, qui
fait l'Aduocat & le Poëte tout ensemble.
A Dieu.

*A Monsieur de Pincé Aduocat au
Parlement de Paris.*

*Pasquier
ayant fait
le premier
des Sonnets
dessusdits,
& le sieur
de Pincé le
second, Pas-
quier re-
charges de
ce troisiè-
me, & de
l'epistre
qu'il le suit.*



I ce n'est vn Enigme, & bien, dymoy
de grace,
Dymoy Pincé que c'est, d'autant que
tout ainsi
Comme tu le voudras, ie le voudray
aussi,
Et gay ie te suyray pas à pas à la trace:
Le Peintre voirement d'une meilleure grace
Connant dans ses desseins quelque plus hant soucy,
Nous fit, non vn Enigme, ains vn miracle icy,

Quela posterité bruira de race en race.

*C'estoit vn Dieu caché qui guidoit son pinceau,
Quand il cacha les mains de Pasquier au tableau,
Pour esclorre de vous ceste celeste enuie,
Qui par vos mains fait viure vne main qui n'est pas,
Qui fait que ceste main, tout d'un mesme compas,
La receuant de vous, donne aux autres la vie.*

En ce mot esclorre, ie vous enuoye ce Sonnet que i'ay esclos ceste nuit, pour respondre à ce-luy qu'il vous auoit pleu de faire, & par lequel respondrez à vn autre que i'auois fait auparauant, où ie parle de la Venus qui auoit esté peinte par Apelle. Je recognoistray que ma responce deuoit estre plus promptement faite. Mais pour ne me faire plus braue que ie ne suis, ie vous aduise que ie ne suis pas maistre de mon esprit, il est mon maistre, & ne fais que ce qu'il luy plaist, & quand les opinions luy en prennent. Aussi que ie sçay que vous estes du nombre de ceux qui vous payez de ceste ancienne monnoye, *Sat cito, si sat bene*. Iusques icy vous & moy auons besongné par demande, defenses, & replique. Je m'assieure que ne faudrez de m'enuoyer bien tost vos dupliques, estant d'un esprit fertile, & abondant en mille belles inuentions plus que nul que i'aye iamais veu de vostre aage. Mais ie vous declare dès à present que ie n'y feray nulle responce. Parce qu'en termes de pratique on ne permet pas aux parties de fournir de Tripliques. Je vous donne le bon iour, & me recommande à vos bonnes graces. A Dieu.

*Lettres de Monsieur Neuelet seigneur
d'Osche à Pasquier.*

I'A y transcrit les Phaleuces que ie vous monstray hier. C'est vn mié enfant que ie vous enuoye plus pour satisfaire à vostre volonté, qu'à la mienne. S'il offense vostre veüe, prenez vous en à vous seul. Ie n'oserois vous prier de l'ageancer plus proprement, & au lieu de sa lourdisse luy apprendre son entregent, craignant que cela fust toucher à l'impossible. Toutes-fois s'il vous plaist ietter seulement l'œil sur luy, j'espere qu'ayant honte de ses imperfections, il apprendra vne contenance plus modeste, & plus asseuree. Mais si vous y mettez tant soit peu la main, ie suis seur que reuenant vers moy ie le mescognoistray. Tout tel qu'il est, ie le vous presente, ne me souciant pas beaucoup du traitement qu'il pourra auoir de vous. Car ie sçay qu'il sera trop hautement recompensé de s'estre offert à vous, si vous daignez seulement le receuoir. L'espreuue que ferez de luy, si tant est qu'en preniez la peine, se trouuera plus certaine, que celle que les habitans au long du Rhin, faisoient de leurs enfans, si tost qu'ils estoient venus au monde. Ie ne m'ose promettre que cestuy soit pour endurer la froideur de l'eau, & remonter au dessus, s'il n'est plongé dans la vostre, c'est à dire, de celle qu'avez puisé dans la fontaine des Muses.

A Dieu.

*A Monsieur Neuelet seigneur d'Osche Aduocat en
la Cour de Parlement de Paris.*

P V I s quem' auez permis de ce faire, ie *En respan-*
vous renuoye vos Phaleuces aucune- *dant à l'a-*
ment accoustrez de maliuree. La pau- *tre lestre s-*
ureté est fort supportable quand' elle ne pro- *lonie la*
cede que d'vne trop grande abondance. Aussi *beauté de*
disent les Medecins, que la maladie est beau- *l'esprit de*
coup plus aisée à guerir, qui procede de nostre *Monsieur*
trop grande repletion, qu' exinanition & vui- *Neuelet.*
dange. Toutesfois voyez si le defect que i'y ay
trouué ne procede plustost de moy, que de
vous : & qu' ayant l'estomach trop foible
pour les digerer tout en coup, i'en aye voulu
faire trois plats. Quant au premier i'y ay ad-
iousté quelques traits, qui passeront derechef
par vostre lime : pour le regard du second, ie
n'y ay rien du tout changé : mais quant au
tiers ie pense auoir faict non seulement acte
d'vn bon Poëte, ains d'vn bon Aduocat : d'a-
uoir non seulement empesché le procez qui
s'alloit encommencer entre l'vn des chefs de
nostre ordre, & vous : mais de vous auoir faict
rencontrer, & si ainsi voulez que ie le die, faict
toucher à la main l'vn de l'autre; Ie vous prie
me pardonner ce que i'en ay faict, & le reietter
sur vous; car ie ne prens pas grand plaisir d'e-
stre ingenteux sur les œuures d'autrui. Et ne
l'eusse entrepris, si ne m'eussiez semonds de ce
faire. A Dieu,

Lettres de Monsieur de Taix Abbé de Bassfontaine à Pasquier.

*Il s'excuse
de ce
qu'ayant
été conneu
par Pas-
quier à dis-
sister, il ne
pouvoit s'y
trouver.*



A religion dont j'vse en l'observa-
tion de la foy que ie donne à ceux
qui m'honnorent de leur amitié,
est cause que ie ne puis ce matin as-
sister à vostre festin, Vous m'en excuserez s'il
vous plaist, & croirez que c'est bien à mon
grand regret. Car par la lettre qu'il vous pleut
hier m'elcrire, ie iuge aisement que ce ban-
quet sera accompli de toutes ses parties. Vous
avez ia encommencé par le choix & nombre
des conuiues, que vous avez fait passer de trois
iusques à neuf : & ne fais doute que les bons
propos & viandes ne suyent de mesme. Si
toutes-fois il faut que *sibi omneis sint βιωφίλεις
& ἀφελμαίνοι*, vous pourrez estre taxé de ser-
uir des aureilles & pieds de pourceau. Mais vn
Medecin Iuis qui se fait Chrestien, pour man-
ger du lard, vous en pourra faire dispenser ai-
sement. Car il se donna au feu Pape Pie iiiiij. &
croy qu'il vit encores. S'il ne le fait, mes deux
bouteilles de vin blanc vous en laueront. Je
prie Dieu que le trouviez bon & meilleur que
le petit Distique que ie vous enuoye. Quant au
vers Grec, ie sçay bien qu'il ne vaut rien, mais
ie suis bien aise de gazouiller ainsi : à fin de vous
faire croire que ie parlerois & chanterois vo-
lontiers mieux en vostre loüange, si ie pou-
vois. Mais vous prendrez en cecy la volonté
pour l'effect. A Dieu.

*Debita Paschasium si quis sibi munera cogat
Sumere, eum centum cogat habere manus*

*A Monsieur de Taix, Abbé de Basse-fontaine,
Doyen de l'Eglise de Troye.*



O v s n'en ferez pas quitte à
si bon marché, que deux bou-
teilles de vin puissent iamais
lauer la faute par vous commi-
se. Nous sommes en vn temps
des grands Iours, où l'on cha-

*Il respond
à la prece-
dente lettre
par forme
de gausse-
rie.*

stie aigrement les v rais contumax, & mesme-
ment par l'aisie & annotation de leurs biens. Ie
sçay bien que vous voudrez vous preualoir du pri-
uilege ancien des clerics, qui defendoit de fai-
sir leurs meubles, mais ceste loy est dés pieça
enseuelie dans le cercueil d'oubliance. Attен-
du mesmement que vostre contumace est tant
affectee, que *ne ipsa quidem salus saluum te faciat.*
Ce n'est point vn Procureur general qui vous
attachera : ce sont ceux mesmes sur lesquels
establisiez plus grands fonds d'amitié. Com-
ment? faillir en vn besoin à son amy, luy denier
son assistance, & puis masquer ce defaut d'une
religion, dont on se vante vser en l'obseruation
de la foy? Vray Dieu quelle impieté, de voiler
vne si grande faute du masque de religion! Et
vrayemét il y a autât & plus de faute en propo-
sant les faits que pésiez seruir à vostre iustifica-
tiō cōme en la faute mesme. Et qui régrege da-
uantage ce mal, c'est que pésiez me charmer par
deux carmes qu'avez faits en malouïange. Et
dauantage, cuidant vous garantir par corrup-
tiōs, vous m'avez enuoyé du vin. Estimant que
par ceste boïssō, cōme par vn nouveau poison,

vous lierez ma langue , estoupperez mes oreilles , assouppirez , comme vn autre Circé, tous mes sens, pour me faire mettre en oubly, & sous pieds, le tort que vous me tenez : Mais il en aduiendra tout au rebours de vostre opinion. Car de ma partie ne dy iamais mieux, qu'à la suite du bon pere qui cultiua premier la vigne,

Fœcundicalices quem non fecere disertum.

Ie vous escriis maintenant vn peu froidement. Mais par ce seul eschantillon vous pourrez vous rendre capable , de quelle force seront mes esprits pour vous assaillir, quand ie les auray rechauffez de ceste sainte vegetatiue, qui fait viure nostre sensitiue. La seule apprehension que i'en ay , donne presque carriere à ma plume, pour taxer iustement vn Taxeus , ou pour mieux dire Saxeus. Toutesfois ie me contenteray maintenant d'vn *Quosego ? sed motos, &c.* Quant au surplus, n'attendez aucun remerciement , & moins encores salutation de celuy qui a iuré vne vengeance contre vous iusques à ce qu'ayez expié la faute. A Dieu.

*A Monsieur Binet Aduocat en la Cour
de Parlement.*

Il enuoye à
Monsieur Bi-
net tât l'A-
pologie que
l'Ode qu'il
auoit faite
sur sa
Main.

E

SSIEZ vous iamais estimé que ma main eust deu seruir de si belle bute , sur laquelle tant de nobles mains eussent voulu décocher leurs fleches? On raconte que Domitian, pour faire paroistre combien il estoit bon archer, se feit

mettre vne main deuant soy , & les doigts
 estâs ouuerts sceut tirer si à poinct entre deux,
 que la main ne fut offensée. Le contraire m'est
 icy aduenu : Car il n'y a celuy qui n'ait dextre-
 ment donné attainte à ma main , & neant-
 moins non seulement elle n'en est demeuree
 offensee, ains grandement ennoblie. Et d'au-
 tant que ie sçay que par vne beauté d'esprit,
 qui est née avecques-vous, prenez plaisir aux
 choses belles, j'espère vous enuoyer par le pre-
 mier vne bonne partie de tout ce qui en a esté
 fait. Ce pendant vous receurez par le pre-
 sent porteur mon Ode , ensemble l'Apolo-
 gie que j'ay faite de la Main. Mais à la charge
 que la lisant vous ne vous mocquerez ; si sous
 le personuage d'un tiers , ie me donne plus
 beau ieu que ie ne deurois : Parce que lors
 que ie l'ay tracée , j'auois l'esprit espris d'une
 verue Poétique. Et vous, qui faites profes-
 sion de Poësie , sçavez combien les Poëtes
 s'en font accroire quand il est question de se
 haut-louer. Au fort si ie ne suis tel que ie dis,
 vous penserez que ie le voudrois bien estre.
 A Dieu.

AVX INGENIEVSES MAINS
 QUI ONT HONORE LA MAIN
 de Pasquier de leurs vers.

LE Peintre qui dans son tableau
 Cacha mes mains sous le rideau,
 Traçant seulement mon visage,
 Bien qu'il ayt appresté à maints
 Subiet de parler de mes mains,
 Ne fit onc un si bel ouvrage.

Il ne m'a pas ain si retrait,
 Pour ne pouuoir par ce pourtrait
 Figurer une main trop rare
 (Comme aucuns ont voulu toucher)
 Moins encor voulut-il cacher
 La pudeur d'une main auare.

Tout cela ce sont vains escrits
 Dont se paissent les beaux esprits
 Au despens de ma pourtraiture.
 A l'un atteindre ie ne puis,
 L'autre noblement ie le fuis
 Comme une detestable ordure.

Mais bien d'un braue iugement
 Ce peintre voila sagement
 Mes mains fioüettes & non dignes,
 Ne les voulant représenter
 A fin de ne les confronter
 Encontre tant de mains diuines.

Ou bien peut estre le hazard
 Mille fois plus sage que l'art
 Le reduisit en ceste faute,
 Pour sur le tableau de vos vers

Faire courir par l'univers
Quelque pourtraiture plus haute.
C'est pourquoy tant de bons esprits
Ainsi comme en un ieu de prix,
Poinçonnez d'une sainte flame,
Voulurent par leurs beaux desseins
Donner à mon pourtrait des mains,
Ainçois à mon pourtrait une ame.

Ainsi l'un se donna la loy
De louer la fieur à pari soy:
Et l'autre d'une plume riche
Peut estre prendre le loisir
De trompeter à son plaisir
Quelques fois une face chiche.

L'autre d'un carme triomphant
Fait d'une mouche un elefant:
Si premier auteur ie ne fusse,
Ie vous raconterois qu'ainsi
Aux grands Iours de Poictiers aussi
On voulut celebrer la Puce.

Ainsi d'un ravissant discours
Voulez honorer nos grand Jours
(De Troye la sainte seance)
Ayant seulement pris en main
Par un non usité chemin
De ma foible main la defence.

Vous tous par un loüable ieu,
Vous tous par un loüable veu,
Attachez à ma main des esles,
Pour luy faire prendre son vol
De l'un iusques à l'autre pol,
Ainsi qu'à vos mains immortelles.
Comme par le heurt de l'acier

Encontre le caillou grossier
 On tire une courie flammèche,
 Laquelle croissant peu à peu
 Esband puis apres un gran feu
 Quand elle tombe en bonne meche.

Heurtans vos delicats esprits
 Encontre le mien mal appris,
 Vous alembiquez des bluettes,
 Dont vos beaux papiers allumez,
 Vos cœurs chaudement enflammez
 Produisent un feu de Poëtes.

Qui d'un meilleur enclin guidez,
 Qui en soy hautement guindez,
 Pendant qu'ils faignent de pourtraire
 La main qui ne l'a merité,
 Grauent dans l'immortalité,
 De leurs mains le vis caractere.

Ainsi que la main de Zeuxis
 Pour peindre une dame de pris
 De mille beautez fut guidée:
 Vous aussi d'un mesme discours
 A mille mains avez recours,
 Pour former d'une main l'Idée.

Cen'est point sans plus mon pourtraict
 Qui à ce sujet vous attrait,
 C'est le Dieu, c'est le Dieu Cynthie,
 Pere des esprits les mieux nez,
 Qui vous a vers moy retournez,
 Sous le nom de la loy Cincie.

Heureux vrayment heureux troupeau,
 Qui au mont à double coupeau
 Puisastes ceste belle ennie,
 Pour puis au giron de Themis

Faire teste à ses ennemis,
Et à la mal gisante vie.

De Phœbus genereux guerriers
Vous ceignez vos fronts de Lauriers,
Terrassans sous vos pieds le vice,
Monstrans que le braue Aduocat
Ne fait point de l'argent estat,
Ains d'une plus noble auarice.

Que de soy-mesme guer donnez,
Il est chiche de son honneur,
Qu'à ce but rien ne le conuie
Sinon l'amour qu'il a de soy,
Et non ceste fantasque loy
Que l'on appelloit la Cincie.

Peintre, ainsi comme tu me peins,
L'Aduocat doit estre sans mains,
Non pas pour du tout rien ne prendre,
Mais bien par honnestes moyens
En bien defendant ses Cliens,
De la pauvrete se defendre.

A P O L O

A P O L O G I E D E L A
M A I N.*Au Lecteur.*

E'O N disoit anciennement que l'Afrique produisoit tousiours quelque chose de nouveau : quant à moy il me plaist de dire que ce sont les grands Iours. Tescmoins ceux de Poictiers de l'an 1579. tescmoins ceux de Troye n'aguere passez en l'an 1583. Ceux-là ayans produit vne infinité de belles inuentions sur le sujet d'une Pulce, ceux-cy sur vn objet qui n'estoit point, ie veux dire sur vne main non peinte : & l'un & l'autre d'un mesme motif. Au regard de la Pulce elle a pris son vol par la France : quant au Tableau dont est question, l'histoire merite d'estre racontee. La fortune a voulu que M. Pasquier Aduocat au Parlement de Paris, estant aux grands Iours de Troye, sous la conduite de monsieur le President de Morfan, personnage de tel merite & recommandation que chacun scait, ayant rencontré vn excellēt Peintre Flamen, delibera de se faire pourtraire par luy. Et comme il dresseoit le premier crayon, Pasquier ne sachāt comme il estoit peint, dit au Peintre qu'il luy fist tenir vn liure en ses mains, & nō des gāds. A quoy luy fut respōdu par le Peintre qu'il y venoit à tard, & que le coup estoit ja frappé: d'autāt qu'il l'auoit representé sans mains. Et comme l'esprit de celuy qu'ō pourtrayoit n'est gueres oiseux, mais

mais né pour faire son profit de tous argumens qui luy viennent à gré, il dist lors à ceux qui estoient presens que ce défaut luy auoit sur le champ apporté l'inuention d'un Distique : & de fait dès l'instant mesmes, le Peintre le tenant encores arresté, il fit ces deux vers, qu'il pensa deuoir faire compagnie à son Tableau :

*Nulla hic Paschasio manus est, lex Cincia quippe
Caussidicos nullas sanxit habere manus.*

Tellement qu'il representa aussi tost la naïueté de son esprit, comme le Peintre celle de son visage. Là quelques-vns ayans veu ce crayon représenter au vif celui que l'on auoit pourtrait, dirēt au Peintre qu'il auoit si heureusement rencontré, que si ce Tableau estoit mis en monstre, il y en auroit plusieurs autres auxquels il prendroit aussi enuie d'estre peints. Luy soucieux de son gain & de son honneur tout ensemble, ayant adiousté la dernière main à ce Tableau, l'expose vn iour à sa boutique aux yeux de tous. Ce pourtrait est veu par quelques passans. On y recognoist Pasquier au visage, & son esprit par ces deux vers. Il fait (si ainsi voulez que ie le die) vne procession l'espace de vingt-quatre heures : Aux vns aggreant le visage, aux autres le Distique. Et comme les esprits des hommes sont diuers, tout ainsi que Pasquier s'estoit dispensé de se iouir sur son pourtrait, aussi chacun diuersement se donna loy & loisir de le blasonner. Entre autres Maistre Antoine Mornac Aduocat, homme docte & d'une belle promesse, grand amy de Pasquier, donna le premier car-

rière à son esprit sur ce Tableau par vn Epigramme, dont la teneur s'enfuit:

Paschasio pictis manus est occulta tabellis,

Vt nec eget sterili muta tabella manus:

Sed qui Paschasium dubia de lite moratur,

Causidicos binas discit habere manus.

Cest Epigramme est apporté à Pasquier par Mornac, toutesfois par ce que la beauté d'ice-luy despendoit d'une conclusion qui estoit à deux ententes, & qu'en matiere d'Epigrammes de deux sens, celuy qui picque le plus est tousiours le plus soigneusement recueilly: Pasquier ne voulut pas aisément laisser dormir la debte sur le Soleil, mais comme il est homme qui ne craint rien tant que de se voir couché sur le papier iournal des marchands, aussi ne voulut il demeurer redevable à Mornac, que d'une nuit. A maniere que le lendemain au matin il le salua de quatre autres vers, qui son tels:

Esse manus nobis, verum non esse tabella,

Car mine dum Mornax ludit in ambiguo,

Luferit an Mornax, an mordax la erit, hercle

Nescio, sed tales vellet habere manus.

Ces carmes ne sont pas si tost veus, que chacun en prend la copie, & comme si par eux on eust sonné le tocsin, il y eut vne infinité de beaux esprits qui commencerent à qui mieux mieux de iouer des mains pour Pasquier. Il n'est pas que le mesme Mornac ne s'y soit aussi enrollé comme les autres, ayant fait vne belle monstre de son esprit, tant en vers Latins que Grecs. Tellement qu'il semble qu'en la ville de

Troyese soit trouué le Cheual Troyen, non pour produire des Capitaines à sa desolation & ruine, mais plusieurs braues Poètes à son exaltation & honneur, lesquels il semble qu'Apollon, qui fauorisa tousiours le party Troyé, eust couué iusques à huy, pour les esclorre à poinct nômé. Et qui est chose esmerueillable, & qui ne doit estre escoulee sous silence, c'est qu'entre six ou sept vingts tant Epigrammes, que Sônnetts, Odes & Elegies, vous y en trouuez bien peu qui symbolisent en inuention, ores que leurs auteurs ne se soyent mis en butte qu'vne main. Que si, peut-estre, vous y en trouuez, ne pensez pas pour cela que ceux qui ont escrit les derniers, ayent rien emprunté des autres, dont ils n'auoyent veu les ouurages: n'ayans les premiers sur eux autre aduantage que d'un certain droict de preuention. A maniere que les derniers peuuent icy faire le souhait qu'a fait autrefois le mesmerasquier au cinquiesme de ses Epigrammes sur vn propos, sinon en tout & par tout semblable, pour le moins non du tout dissemblable, parlant des anciens avec lesquels de fois à autres il s'estoit peu rencontrer quelques pointes:

Dij malè perdant

Antiquos, mea qui praripuêre mihi.

Ie sçay bien que quelques esprits sombres & visqueux trouueront icy assez du sujet pour se iouer sur la main d'un Aduocat: & me semble desia voir quelque sot qui voudra contrefaire l'habile homme, lequel dira qu'il ne faut point trouuer estrange que ceste compaignie se soit

liguee pour blaſonner vne main, comme eſtant matiere qui luy eſt aſſez familiere, & dont elle ſe ſçait mieux aider: Et qu'écors ceux qui ont icy eſcrit ne tomberont iamais en l'acceſſoire du Cordonnier, lequel apres auoir controulé ſes ſouliers repreſentez dans vn tableau d'Apelle, voulant outrepaſſer ce qui eſtoit de ſon art, fut arreſté tout court par ce grand Peintre, luy diſant qu'il ne falloir point qu'un Cordonnier iugeaſt d'autre choſe que du ſoulier. Car au contraire, les Aduocats ſçachans combien vaut la main, auront peu rendre certain iugement du Tableau, ſi la main y a eſté à bonne raiſon oubliée. Mais à ces Miſanthropes & Lutons, ſ'ils eſtoient dignes de noſtre colere, ie reſpondrois volontiers qu'il n'y a rien qu'ils doiuent tant craindre que la colere d'un Aduocat: d'autant qu'il a, cōme l'on dit en commun prouerbe, bec & ongles pour ſe defendre. Et combien que telles taupes cachees ne le meritent, ſi eſt-ce que par vne charité Chreſtienne, ie les veux exhorter de prendre conſeil de Platon, lequel aduertifſoit tout homme de ne s'attacher aiſément à celuy qui auoit l'eſprit en main pour ſe reſſentir d'un outrage. Diſant que ce fut la cauſe pour laquelle Minos Roy de Crete fut apres ſa mort repreſenté pour Iuge des Enfers à la poſterité. Par ce que, comme ainſi fut que de ſon viuant il euſt affligé par guerres continuelles la ville d'Athenes, qui abondoit en grands Orateurs & Poètes, auſſi les Atheniens ne pouuās recognoiſtre de mieux l'obligation qu'ils auoyent à luy que par leurs

plumes, soudain qu'il fut decedé, ne le peurent honorer de plus beau tiltre que de le faire Iuge des ames damnees. Et le semblable firent presque nos Ecclesiastiques, contre la memoire de ce grand Aduocat du Roy Maistre Pierre de Congneres, qu'ils logerent en vn petit recoin de leur Eglise, sous le nom de Maistre Pierre du Coignet: pour auoir esté le premier auteur de reduire leurs iurisdiccions au petit pied. A quel propos tout cecy? Pour apprendre à ceux qui pour ne pouuoir rien faire de bien, ne sçauent autre mestier que de mal parler, qu'ils examinent trois & quatre fois leurs consciences auant que de s'aheurter mal à propos contre la main des Aduocats. Le Poëte a la main seulement pour rediger ses concepciōs par escrit. Le Prescheur a pour son lot & partage la langue: mais l'Aduocat par vne prerogatiue speciale a l'vne & l'autre pour s'en preualoir. C'est pourquoy il faut apporter de grandes circonspectiōs & regards auant que de le vouloir attacher. Au demeurant apres auoir remué toutes sortes d'aduis à part-moy, ie ne voy nul en nul estat qui ne soit bien aise de exercer sa main à son aduantage. Soyez pres des Roys, Princes & grands seigneurs, soyez gendarme, tresorier, medecin, marchand, artisan, chacun diuersement est bien aise de faire sa main, les vns plus, les autres moins. Et ne voy point pourquoy on doie plustost faire mal son profit de la main, au preiudice de l'vn que de l'autre. Car pour parler franchement & sans aucune hypocrisie, la main est

proprement vn Polipe qui se transforme en autant de couleur en nous, comme sont diuers nos esprits. D'autât que nous vsôs de nos mains comme de noz esprits. Qu'elles soyent accompagnées d'un noble entendement de quelque estat, qualité & condition qu'il soit, il exercera noblement les fonctions d'icelles: si d'un esprit vilain & auare, tout le contraire. Et le semblable se trouue en elles és loüanges ou impropres qu'elles peuuent receuoir. Par ce que le noble esprit trouuera tousiours prou d'argument & sujet pour la solenniser; & le sot, pour la vilipender par ses escrits. C'est cōme vne espee qui non seulement tranche des deux costez, mais qui peut rapporter autant de bien que de mal. Ce qui est presque commun à toutes choses de merite. Es grandes Cittez esquelles abondent les vertus, aussi s'y trouuent les grands vices. Y a-il rien au monde qui apporte plus de profit que la langue? Y a-il rien qui procure plus de nuisance? Et sans m'arrester à vn seul membre de l'Homme, prenons cest Homme en son general, y a-il animal au monde qui produise ni de meilleurs, ni de pires effets que luy? Chose qui occasionna mesmement les anciens de dire, que l'Homme estoit à l'homme vn Dieu. puis tout à coup que l'Homme estoit à l'homme vn loup. Aussi ne faut-il point trouuer estrange que la main soit en nous vn outil qui produise du bien & du mal en extremité, puis que ses operations sont extremes. Et neantmoins si faut-il que l'on m'accorde qu'entre tous les membres de l'hō-

me, il n'y en a point de tant vtile & necessaire, que cestuy. La main est celle qui prend les armes offensives & defensives pour nous, celle qui est archer des gardes de nostre corps, & que nous opposons deuant le chef pour le garder de mesprendre, quand dans les tenebres de la nuict nous allons à taton, celle qui enseigne à l'aveugle les chemins à l'aide d'un baston. Par elle l'on bastit les maisons, par elle on cultiue les champs & les vignes : elle nous fournit de vestemens, tant en estoilles que façons, nous administre le boire & le manger pendant nostre santé, & en noz maladies les medecines. Sans elle les loix & les sciences liberales demeureroient enseuelies dans le cercueil d'oubliance. Par le seul objet de la main nous trouuâmes la premiere cognoissance des nombres : & sur ce mesme modelle nous apprenons les premiers rudimens de la Musique. Et s'il nous faut ietter l'œil sur la Medecine, il n'y a partie en nous de laquelle on descouure tant le temperament ou intemperament de noz corps, que de la paulme de la main. A fin ce pendant que ie ne face estat de ceux qui pensent que dans nostre main comme dans vn miroier nous pouuons considerer noz fortunes tant passees qu'à venir. D'où s'est insinué entre nous cest art de Chiromancie. Le Prescheur ou Orateur seroit vne peinture releuee en bosse seulement, si avec le fredon de sa langue il ne iouoit aussi des mains. Et certainement non sans cause. Car la

main a ie ne ſçay quels geſtes par leſquels elle repreſente toutes les paſſions de noz ames, ores vne affliction & douleur, ores vn aife & contentement, tantost vne menace & colere, tantost vne ſoubmiſſion & obeïſſance : brief, elle ſeule en nous parle ſans parler. C'eſt à mō iugement, pourquoy ce grand Orateur Ciceron ſe reputoit à grand honneur de pouuoir rendre en autant de façons de bien dire, tout ce qui eſtoit diuerſement repreſenté par ce grand Comedien Roſcius : Ceſtuy là vſant de ſa lāgue, & ceſtuy principalement de ſes mains. C'eſt auſſi pourquoy Demosthene attribuoit les premieres, ſecōdes & troiſieſmes parties de l'Orateur à l'aſtion, comme ſi le principal air de l'oratoire deſpendoit ſingulierement des mains. Ie n'ay pas preſentement dit ſans cauſe qu'elles parloyēt ſans parler. Car ſ'il vous plaift conſiderer ce qui tombe en commun vſagē, ſans ſouïiller ſi auant dedans l'art de ceux qui haranguent au public, vous trouuerez que par le miniſtere d'elles nous pouuons appeller ſans dire ceux que voulons venir à nous : & au cōtraire faire arreſter tout quoy celuy qui ſ'y acheminoit. Par le meſme aide, l'homme qui a quelque aſſurance de ſoy, ſe ſent eſtre loué, & celuy qui en a deſſiāce, vituperé : le tout ſans l'vſage & entremiſe de la langue, lors quel'on le mōſtre au doigt. Et les anciens par l'applaudiſſement de leurs mains donnoient à cognoiſtre le contentement qu'ils auoyent receus de ſes jeux repreſentez deuant eux. Quoy plus ? Le muet ne ſe rend pas moins entendible par les

signes de ses deux mains, que celuy qui par vn caquet affilé nous rompt la teste & les aureilles. I'adiousteray à tout cecy que non seulement és choses temporelles la main produit effects esmerueillables, mais aussi aux spirituelles: esquelles nous requerons l'imposition de la main pour la promotion à la dignité Episcopale. D'elle nous receuons interieurement les benedictions exterieures de nos Prelats. Et encores que la seule parole de Dieu fust suffisante, pour effectuer les miracles, si y voulut il apporter à plusieurs l'attouchement de la main. Il n'y a celuy de nous qui ne sçache de quelle puissance est le cœur, és prieres qui se font en l'Eglise. Et neantmoins encores y auons-nous voulu apporter les mains iointes. Voire que sans icelles il sembleroit que nos prieres fussent de peu de merite, comme nous apprenons de ce grand amy de Dieu Moyse, lors qu'au milieu des afflictions publiques de son peuple il luy falloit soustenir ses bras las, à fin de les tenir tousiours esleuez au ciel, pour ne rendre l'Oraison qu'il faisoit à Dieu, sans effect. Et en ceste miraculeuse guarison des escroüelles, octroyee par Dieu de tout temps & ancienneté, par vne singuliere prerogatiue à nos Roys, qui est celuy qui ne voye que l'interpolation de la main y faict la principale operation? D'où s'est insinué ce commun parler entre nous, par lequel nous disons nos Roys deuoir toucher les malades, lors qu'ils se voient à les guerir. Il faut vrayement que nous tous vnanimement confessions que la lague est de grande efficace

en nous, mais non de telle que la main. Car ses effects sont passagers, & se passent (si ainsi le faut dire) autour del'oreille. Mais quant à la main, c'est le vray instrument par lequel nous enchassons nos œuvres au temple de l'immortalité. Aussi a elle telle symbolisation avec l'esprit, qu'ordinairement nous confondons les fonctions de l'une & l'autre ensemblement. Voire qu'il seroit fort mal-aisé de iuger lequel des deux est plus redeuable, ou de la main à l'esprit, ou de l'esprit à la main: s'entretenans d'une telle liaison ensemble comme les roües d'un horloge avec les contrepoids de plomb. Et qui est une chose qu'il ne faut passer sous silence, c'est que la main a esté trouuee de telle recommandation, qu'en nos plus belles actions, nous les y auons de toute ancienneté employées. De là vient que pour asseurer de nostre foy, celui avec lequel nous contractons, nous mettons nostre main dans la sienne. Aussi trouuons nous aux plus anciennes histoires de Rome, que le Roy Numa ayant basti un temple de la Foy, voulut que les ministres de ce lieu officialent les mains toutes enuêlôpées iusques aux extremités des doigts. Denotans par là (si nous croyons à Tite Liue) que la foy se deuoit tres-estroittement garder, & que son vray siege estoit estably en la main. De là que les anciens en leurs gonfanons par l'entre-las des deux mains signifioient la concorde: & aujourd'huy les amants, l'amour qu'ils ont à leurs maistresses: de là qu'en la solemnization du mariage l'on met l'anneau coniugal en l'un

des doigts de son épouse : de là (à peu dire) que quand le iuge veut affermenter vne partie ou tesmoin, pour tirer d'eux vne verité, il leur faict leuer la main, & ailleurs que l'on la faict mettre sur les Euangiles. De sorte que (si tout ainsi que l'Egyptien) il nous estoit permis de mettre en vlage quelques lettres Hieroglyphiques, ie pense qu'il n'y en eut iamais de plus celebre que la main, par laquelle on peut resfigurer la Foy, la Concorde, l'Amour, la Verité, & encores la Liberalité tout ensemble. Chose que nos ancestres cognoissans, & specialement combien elle estoit necessaire à l'vsage commun, tout ainsi que ie vous ay presentement discouru, en combien de manieres se diuersifioit sa vertu, aussi la diuersifierent ils en vne infinité de formulaires de parler. De là est venu que nous disons, tenir la main à vne entreprise, pour la fauoriser : auoir les mains nettes, pour estre homme de bien : faire sa main, pour s'enrichir : lauer ses mains de quelque faute, pour s'en excuser : venir aux mains, pour venir aux prises : ioüer des mains, pour se battre : donner confortemain, pour ayder : adiouter la derniere main, pour perfection d'un œuvre : tenir vne chose sous main, pour cachee : estre en la main de quelqu'un, pour, en la puissance : main mise, pour saisie : manumission, pour affranchissement : gens main-mortables, pour, serfs & esclaves : & encores gens de mainmorte condition, comme sont les Ecclesiasticks, qui ne peuuent prendre immeubles sans le congé de leur Prince,

ny les rēdre sans l'autorité de leur superieur: mettre la main à l'œuure, pour s'employer: aller contre vn ennemy à main forte, pour à grāde puissance: mettre la main sur le collet d'un homme, pour le constituer prisonnier: tout d'une main, pour, tout d'une suite: baiser la main, pour saluër. Le temps mesmes ne s'est peu passer sans emprunter d'elle quelque chose, lors que nous disons de longue main, & encores tenir vne chose de main en main, c'est à dire, d'une longue traite de temps, ores qu'elle ne soit escrite, comme sont les anciennes traditions de l'Eglise. Et s'il faut passer plus auant, les chemins luy sont reuenables, quand nous les enseignons par la main droicte ou la gauche. Brief le Ciel mesmes y a voulu auoir part, lors que nous recognoissons quelques vns sentir la main de Dieu, voulās exprimer son courroux. Adiousteray-ie que les trois parts de tout le monde, dont les quatre font le tout, mandient leurs exercices des mains, quand nous appellōs les artizans, Manœuures, & ce qui est sorty de leur art, Manufactures: voire que la Medecine qui fait part & portion des arts liberaux ne s'est peu exempter: D'autant que nous appellōs vne partie d'icelle, Chirurgie, par ce qu'elle gist en l'operation de la main. Brief il n'y a rien qui soit destiné à exercer entre nous tant de liberalitez, soit à bien faire, ou bien dire, comme la main. Qui faict que nul ne doit trouuer de mauuaise grace que tant de personnages d'esprit se foyent ingerez à celebrer vne main. Je ne diray point si celle pour laquelle on s'est

employé le meritoit, ou non : car il y a trente ans passez que la France a peu cognoistre ce qu'elle peut faire en diuers subiets. Bien vous diray-ie que toutes ces nobles inuentions estés tombees entre mes mains, i'ay pensé de vous en faire part, non tât pour fauoriser la main pour laquelle on a escrit, que pour ne faire tort à toutes ces braues mains qui l'ont voulu honorer. Et à tant tu estimeras (Lecteur) que ie te les presente en ce lieu nō selon le rang & de-gré des personnes (n'estant entré en nulle cognoissance de cause de leurs grades & qualitez) mais selon l'ordre que ces gayetez ont esté données, ou que i'en ay fait le recueil. T'aduissant au surplus que ie n'entends de te les presenter sinon de tant & entant qu'il te viendra à gré de les lire.

A Monseigneur de Morsan Conseiller au Conseil d'Estat, & President au Parlement de Paris.



Oyez ie vous prie quelle autorité vous-vous estes donné en peu de temps sans y penser, outre ceste qui vous estoit ia acquise. Le Roy vous auoit enuoyé pour presider aux grands Iours de Troye, avec vne limitation certaine de territoire, toutes-fois par vne puissance absolue, vous auez esté du vostre iurisdiction iusques dans la ville de Paris, qui ne fut iamais des grands Iours. Sçaez vous comment? La cour-

toisie dont vsates en mon endroit à mon partement, a esté de tel effect & merite sur moy, que au lieu du congé que me donnates pour m'en reuenir, ie deuins dés lors tout à fait vostre prisonnier. Tellement qu'il m'a semblé en m'en reuenant que ie tenois les chemins pour prisõ : Prison que ie tiens encores aujourd'huy dans ceste ville de Paris, & dont ie ne veux sortir, ores que me voulussiez bailler pleine mainleuee de ma personne. Mais entendez ce qui en est aduenü : vne chose dõt ne vous douteriez nullement. Car au lieu que faiçtes le procez aux autres, tout prisonnier que ie suis, ie fais le vostre pardeçà. Mesmes enuers Monseigneur le Chancelier, auquel i'ay fait vn ample discours de tous vos beaux deportemens : dont il est demeuré si satis-faiçt & content, que ie croy que auez occasion de vous en contenter grandement. Il en estoit ia assez amplement informé par les bruits qui luy en auoient esté apportez, & vous seruira de bonne & fidele trompette enuers le Roy, tant que seiournerez pardelà. Cependant vous aduiferez s'il vous plaist de conseruer en vos bonnes graces, celuy qui desire vous demourer seruiteur, & qui ne se lassera iamais de receuoir vos commandemens.

A Dieu.

*A Monsieur Tabourot Procureur du Roy
au Bailliage de Dijon.*



E croy que tout ainſi que nous ſommes conformes en noms (car vous & moy auons ce beau nō d'Estienne) auſſi ſymboliſons nous en penſers : Parce que cōme ie receule iour d'hier vos lettres, i' eſtois ſur le poinct de vous aſſaillir par les miēnes. Mais vous m'auiez preueni fort à propos, pour celebrer vne forme d'anniuersaire de ma Main. Car mon pourtrait , qui a tant faiçt parler de ſoy, & mes deux vers de la loy Cincie, ſur leſquels on en a prouigné tāt d'autres, ſurēt tracez la veille de S. michel l'an paſſé que l'on comptoit 1583. & c'eſt le iour auſſi auquel ie vous ay eſbauché la preſente: Par laquelle auāt tout œuure vous receurez de moy vne action de graces de l'honneur que me faiçtes , en me remerciant de vous auoir inferé dans les gayetez que l'on a faiçtes ſur ma main. Voſtre Epigramme plein de courtoisie & d'eſprit ne meritoit rien moins que d'y eſtre enchaſſé. Deſlors que vous me l'enuoyates par Monsieur Minos, ie feis la reſponſe telle que vous auez veu au deſſous , laquelle vous ne receutes , par ce que ie feus aduerty par le meſme Minos qu'eſtiez party de ceſte ville. Car quant aux vers par leſquels auez de nouveau remué le meſme ſubjet de ma Main , ie feray comme font les ioüeurs de dez qui ne veulent

*Il raconte
en ceſte let-
tre plu-
ſieurs gaye-
tez dont il
ſ'eſt diuer-
ſement eſ-
gayé, qu'il
les occasions
ſ'y ſont
preſentees.*

hazarder toutes leurs fortunes en vn coup, quand on leur couche trop grandieu: le vous quitteray la main. Vous accablez avec trop d'vsures vne bonne volonté que ie vous dedie, d'aussi bon cœur, que i'accepte celle que me presentez. Au regard de ceux de Monsieur Iuret, s'il les a faits à bon escient, il a de tres-mauuais espies de mes deportemēs, n'ayant iamais eu autre but en mon estat que l'auarice de mon honneur. Si pour se iouer, & comme l'on dit à petit semblant, il pouuoit à mon iugement trouuer sujet plus sortable, que de ma main, laquelle ne sçait pas si bien prendre, que rendre à ceux qui luy veulent prester monnoye de mauuais alloy. C'est pourquoy pour ne demourer longuement en arerages enuers luy, ie le payerois volontiers de ces deux vers qui me viennent de tomber en la plume.

*Dum loculos, oculos, toties in carmine versas,
Omnibus ecce refert Echo tua carmina, culos.*

Il ne sera non plus offensé des miens, que ie suis des siens. Tout cela s'appelle ieu sans vilennie.

Voila entant que touche vos lettres. Je viendray maintenant à celles que ie voulois vous

*Le liure de
Monsieur
Tabourot
intitulé les
Bigarrures.*

enuoyer. I'ay leu vos belles Bigarrures, & les ay leuës de bien bon cœur, non seulement pour l'amitié que ie vous porte, mais aussi pour vne gentillesse & naïfueté d'esprit dont elles sont pleines, ou pour mieux dire pour estre bigarrees & diuersifiées d'une infinité de beaux traits. I'eusse souhaité qu'à la seconde impression on n'y eust rien augmenté. S'il m'est loisible de deuiner, il me semble que l'on y a ad-
iousté

iousté plusieurs choses qui ne ressentent en rié de vostre naïf, & croirois fort aisement que c'eut esté quelque autre qui vous eust malà propos, presté ceste nouuelle charité. Il faut en tels sujets que l'on pense que cefoit vnieu, non vn vœu, auquel s'ichionis toutes nos pensees. Vous cognoistrez par là que ie vous aime & honore, puis que pour la premiere foisie vous parle si librement. Au demeurant ie trouue qu'en ceste seconde impressiõ, vous appropriez à Iacques Pelletier les faceties de Bonaventure du Perier. Vous me le pardonnerez, mais ie croy qu'en ayez de mauuais memoires. I'estois l'vn des plus grands amis qu'eust Pelletier, & dans le sein duquel il desployoit plus volontiers l'esclair de ses pensees. Ie sçay les liures qu'il m'a dit auoir faits. Iamais il ne me fait mention de cestuy. Il estoit vrayemēt Poëte, & fort ialoux de son nom, & vous asseure qu'il ne me l'eust pas caché: Estant le liure si recommandable en son sujet, qu'il merite bien de n'estre non plus desauoié par son auteur, que les faceties Latines de Poge Florentin. Du Perier est celuy qui les a composees, & encores vn autre liure intitulé *Cimbalum mundi*: Qui est vn Lucianisme, qui merite d'estre ietté au feu avec l'hauteur s'il estoit viuāt. I'adiousteray à la suite de cecy que les deux vers François, que vous attribuez à Monsieur l'Official Tabourot, sont miens.

*Bien fait, non dol, los, non faueur,
Fait i' a gaigné tres grand honneur.*

Lesquels estans retournez, vous y trouuez,

*Les acetie
de Bon-
aventure du
Perier.*

*Vers retro-
grades
François.*

Honneur tresgrand gaigner i'a fait

Faucur, non los, dol, non bienfait.

Il y a plus de quinze ans qu'il les eut de moy, & en prit la copie chez feu Monsieur d'Ampierre maistre des comptes sien parét, & mon voisin: & croy qu'il ne le déniera pas quand vous luy en parlerez. Il les trouua admirables, non seulement pour estre traduits vers pour vers du Latin de Philelphe, mais aussi que nostre langue n'en est pas bonnement capable, à cause des articles que nous lions & mettons ordinairement deuant les noms François, ne nous estât pas permis de les postposer. Et de fait i'en ay autres-fois voulu faire vn autre coup d'essay tel qu'il s'ensuit, mais ie n'ay peu attaindre à la facilité qui s'y trouue en Latin.

T'on ris, non ton caquet, ta beauté, non ton fard,

Ton œil, non ton venin, tes traits, non tes appas,

Ton accueil, non ton art, ta faueur, non tes las,

Surpris, & nauré m'ont le cœur de part en part:

Cuisans, ains doux attrails, port lourd, ains gracieux,

Mon malheur, ains mon bien, mon glas, ains, ô ma flame,

De mon cœur, de mon tout, de moy, & de mon ame,

Vn present ie veux faire à toy, & non aux cieux.

S'il vous plaist retourner ces huit vers, vous y trouuerez le contraire, mais avec vne contrainte telle que ie pense toute autre chose qui se trouue au Latin ne pouuoir entrer en nostre langue, fors ceste sorte de vers, comme vous le pourrez sentir aisément.

Aux cieux, & non à toy, ie veux faire un present

De mon ame & de moy, de mon tout, de mon cœur,

O ma flamme, ains mon glas, mon bien, ains mon malheur,

Gracieux, ains lour d'port, attrait doux, ains cuisant,

De part en part l'esprit, m'ont nauvé & surpris

Tes las, non ta faueur, ton art, non ton accueil,

Tes appas, non tes traits, ton venin, non ton œil,

Ton fard, non ta beauté, ton caquet, non ton ris

Vous appelez telle sorte de vers fort à propos Qui est l'o-

Retrogrades. Et parce que ie sçay que vous nique d'en-

taschez par vostre liure de non seulement rire, tre les La

ains de rire doctement, ie vous donneray en tins qui

passant ce petit aduis, que le premier qui a par- fait mentiō

lé de tels vers (au moins dont la cognoissance des vers re-

soit arriuee iusques à nous) fut Sidonius Apol-

linaris au neuuiesme de ses Epistres, là où il les

appelle *Versus recurrentes*. Et d'as luy vous trou-

uerez ces deux qu'avez cotez *Roma tibi subi-*

to, &c. *Si bene te tua laus*, &c. Et se vante enco-

res d'auoir fait ces deux autres que vous avez

mis dans vostre œuvre,

Præcipiti modo quod decurrit tramite flumen,

Tempore consumptum iam citò deficiet.

Vous ne serez pas marry que ie vous serue de

ce mets comme faisant grâdement à vostre in-

tention. depuis comme les inuentions premie-

res reçoient augmentation avec le temps, on

y apporta cest embellissement de leur faire cō-

tenir deux sens contraires, l'un en les lisant de

leur plain, & l'autre à l'enuers. De quelle marque font ceux de Philephe que vous auez fort bien cottez. Chose qui depuis s'est trouuee fort familiere & de fait moy-mesme, qui me recognoïs le moindre des moindres, en ay fait huit de ceste trempe au second de mes Epigrammes, contre vne paix fainte & courte.

Mens bona non noua fraus, pietas, non anlica fecit

Curia, id edictum, Rex bone, pacificum:

Plebs pia, non fera lex, poterit nunc viuere tecum,

Crescere, non labi vis, puto, sordidule.

Imperium, Deus, hoc seruas, non perdis, amore

Feruida fit, nec pax hac tegit insidias.

Magnificè tibi, Rex, succedant optima, nunquã

Prælia sint, immò pax tibi perpetuò.

Plus hardy est cestuy que i'ay mis au sixiesme lieure en vn vers, qui fait vn hexametre & pentametre sous diuers sens, où sous le nom de la Gaule ie fais parler le Catholique & le Huguenot.

Patrum dicta probo, nec sacris belligerabo.

C'est le Catholique qui parle. Tournez ce carme à l'enuers, vous y verrez vn Pentametre, où le Huguenot,

Belligerabo sacris, nec probo dicta Patrum.

Et comme ainsi soit que tant en Latin que Françoisie me sois voulu donner carriere en plusieurs sortes de jeux, aussi vous puis-je dire auoir fait vn Echo au second liure, qui n'est pas peut estre de moindre grace que celuy qu'avez remarqué.

*Hic ego dum solus meditando longa anxia sector,
 En age dic Echo domine quis maior honos! NOS,
 Ergo Fabulla sonis poterit me perdere multa?
 ULTA. Sed heu sodes recita quæ causa mali
 huius?*

*Forme de
 vers es-
 quels l'E-
 cho est re-
 présentée.*

*IUS. An quod me etiam volui sacrare Sabina?
 NAE. Is fructus binis est inferuire puellis?
 IS. Sic sum ipse mea sortis miseranda lues? ES.
 Quæ Venus inde meis hæret malè sana medullis?
 LIS. Saltem ut valeam memè ablegabo peregrè?
 ÆGRE. Tandem igitur spes est gaudere Fabulla?
 BVLLA. Vah pereas, abs te discedimus. IMVS.
 Aux œuvres que l'on a fait imprimer sur ma
 Main, ie me suis aussi voulu esgayer en nostre
 langue sur vne autre Echo en ceste maniere:*

Pendant que seul dans ces bois ie me plains,

Dy moy Echo qui celebre mes Mains?

MAINTS

Ta il point quelque autre gentile ame,

Qui à louer autres mains les enflame?

AME.

Si moy vivant de mon los ie iouy,

Ay-ie argument d'en estre resiouy?

OVR.

Et si ma Main est iusqu'au ciel rauie,

Que me vaudra ce bruit contre l'enuie?

VIE.

N'y aura il nul homme de renom,

Qui en cecy soit ialoux de mon nom?

NON.

Mais si quelqu'un mal appris en veut rire,

Que produira dans mes os ce medire?

IRE.

Contre cesot, contre ce mal appris,

Ne rongeray-ie en moy que des despis?

PIS.

O sot honneur d'une main mal bastie!

Quel humeur dont vainement me manie?

MANIE.

Las pour le moins Echo si tu peux rien.

Fais que les bons de mes mains parlent bien.

BIEN.

*Si tulle fais, rien plus ie ne demande,
CÔMÂDE Or sus, à Dieu, va ie merecommande.*

Le premier que ie pense entre les Poëtes Latins en auoir vſé, est Ioannes Secundus, en vn Epitaphe qu'il infere en son boccage, qui commence:

*O quæ Dina cauos colis recessus,
Syluarumque regis domos opacas, &c.*

Vous pourrez auoir recours au passage qui est long, & pour ceste cause ie me contenteray de le vous monſtrer au doigt ſeulement. Le premier paraenture entre nos Poëtes François est du Bellay, par l'Epigramme que vous meſmes auez cotté. Au moins ne me ſouuient il point en auoir leu dans autre Poëte de noſtre temps. L'on doit au meſme du Bellay le premier ſonnet en vers que vous appelez rap-
portez, qui est le dix & neufieſme de son Oli-
ue.

*Lers rap-
portez s*

Face le ciel quand il vouldra reuiure

Lysippe, Apelle, Homere, qui le prix

Ont emporté ſur tous humains eſprits,

En la ſtatue, au tableau, & au liure:

Pour engrauer, tirer, eſcrire en cuiure,

Painture, & vers, ce qu'en vous eſt compris,

Si ne pourroyent leur ouurage entrepris,

Ciſeau, pinceau, ou la plume, bien ſuiure.

Voila pourquoy ne faut que ie ſouhete

De l'engraueur, du Peintre, ou du Poëte,

Marteau, conleur, ni ancre, ô ma Deeſſe.

L'art peut errer, la main faut, l'œil s'eſcarte,

De vos beautez, mon cœur ſoit donc ſans ceſſe

Le marbre ſeu!, & la table, & la carte.

Sonnet toutesfois que ie vous puis dire auoir esté desrobé d'un Italien, & rendu fort fidelement en nostre langue. Depuis Iodelle se fit grand maistre en ce sujet, & croy que si vous auez ses œuvres, vous y en trouuerez d'admirables. Ie viendray à vos Rebus, & pareillement à vos Equiuoques, esquels, si me permettez de souhaiter, ie desire ie ne sçay *Qui est l'auteur entre nous qui premier a traité des Rebus.* quoy de moins long que ce que vous y auez mis par vostre derniere impression : mesmes que tant de figures qui y sont adioustees en forme de demonstrations de Geometrie ne me plaisent gueres. Celuy qui des premiers a fait entre nous ouuerture aux Rebus est Geofroy de Thory en son liure de Champ fleury, que ie vous souhaite non seulement pour cest argument, ains pour tout le discours de vostre œuvre. D'autant que vous en pourriez recueillir plusieurs belles instructions non esloignees de vostre but. Encores vous veux-ie faire present de deux Epitaphes, qui peut estre meriteront de trouuer lieu avec les vostres.

*Cy gist Guillaume Departy,
Qui d'un Duc estoit Secretaire,
Et est de ce monde party
Sans sçauoir qu'il en venoit faire.*

*Antoine de Saumur nasquis 1529.
Des biens de ce monde il acquit O.
En ce basterroir il vesquit 30.
A nature il payal'acquit 1559.*

Vous prendrez ma lettre pour vn coq à l'asne, en laquelle il n'y a autre ordre, que le

desordre. I'auois oublié de vous faire part de l'Anagramme de Ruiner & Reünir, que ie fis en la congratulation de la Paix de l'an 1570. que i'adressay au Roy Charles, pour monstrier combien les guerres ciuiles estoÿét detestables, & que ce n'estoit tousiours que ruine, voire en reünisât les villes qui solemēt s'estoïét distraittes de son obeïssance.

*Qui voudra REVNIR, avec RVINER mettre
Il verra qu'il n'y a transport que d'une lettre,
Et qu'en reünissant voz villes ruiniez,
Et en les ruinant vous les reünissiez:*

*Car dans vn REVNIR le RVINER se treuve,
Dont voz pauvres suiets ont fait derniere esprenue.*

Ie vous pourrois encores dire qu'en l'an cinq cens lxxviii. deuisant avec l'un de mes amis, qui me disoit que tout alloit bien, & que le Roy auoit voulu pacifier toutes choses, ie luy fis responce à l'impourueu, qu'il ne falloit *pas s'y fier*. Entre tous les Anagrammes vous deuez, à mon iugemēt, faire estat de celuy d'Estienne Iodelle, *Io le Delien est né*. sur lequel Tahureau fit vne belle Ode, dont le refrain au bout de chaque huiectain ou dixain estoit celuy là. Paraduenture ne trouuerez-vous pas cestuy trop descouſu; mon fils aîné Theodore Pasquier estant escolier, m'enuoye au bout d'une Epistre *Thesavros pacis sudo*. Ie descouure soudain que c'estoit l'Anagrāme de son nō, qui est en Latin, *Theodorus Paschasius*. Au moyē de quoy ie le réuie d'un autre, pris de cestuy-là: *Thesauro pacis duos*. Et d'une mesme main fis cest Epigramme: *THESAVROS PACIS, verso mihi nomine, SVDO, Dicis, dum libris, mi Theodore, vacas,*

*Si non mentiris, iam te Theodore, patremque,
Atque ita THESAÏRO PASCIS, amice,
DVOS.*

Et puis que i'ay franchy le pas de m'alleguer icy pour autheur, ie ne douteray de vous faire part d'une gayeté que ie fis autrefois sur le nom tantost de Remy Belleau, tantost de Remy de Belean, pour gage de l'amitié immortelle que ie luy portois, faisant ores un Rebus, ores divers Anagrammes de son nom.

*Lors que mon Belean nasquit,
Toute la troupe celeste,
Pour solenniser sa feste,
Vers Helicon se rendit.
Là fut chanté à l'enuy,
Un Sol, un Fa, un RE, MI,
Là fut fait maint & maint tour
Gaillardement à l'entour
De ceste sainte BELL'EAU.
Pour cela fut ordonné,
Que cest enfant nouveau né,
Seroit dit REMI BELEAU.*

*Les Dieux ayans baptizé
L'enfant de cest eau sacree,
Dont ce grand Poëte Ascre
Fut en la Grece arronsé,
Eux tous d'un commun concours
Voulurent sonder son cours,
Et quel estoit le butin
Que luy forgeoit son destin:
Adonc dist l'un du troupeau,*

*Le voy que dès son enfance
Par eternelle ordonnance,
Cest enfant MIRE LE BEAU.*

*C'est peu d'avoir tout le cours
De l'univers dans sa teste,
Si on ne le manifeste
Par elabourez discours.
Qu'est-ce (respondit l'un d'eux)
De voltiger jusqu'aux cieux,
D'approfondir chacun art,
Si à tous tu n'en fais part?
Pour le bannir du tombeau
Il faut qu'en prose ou en rime,
Ce beau, ce bon il exprime,
Il faut qu'il RIME LE BEAU.*

*Cest arrest estant donné,
L'on fit d'une mesme estoife
Un Poëte & Philosophe,
Puis soudain fut estrené
Des Graces qui à grand pas
S'estoyent lancees là bas,
D'elles fut l'enfant laué,
D'elles DE MIEL ABREUÉ.
Puisque (font-elles) du ciel
Tant de bien en toy confluë,
Il faut que de par nous fluë
De ta bouche LE BEAU MIEL.*

*Ainsi dès le bers Platon
Fut succé par les Abeilles:
Ainsi par ses doctes veilles*

S'affranchit-il de Pluton.

Ainsi mon gentil Belleau

De l'ignorance le fleau,

S'est façonné un renou

Sur le moule de son nom.

Ainsi par ses doctes vers,

Malgré le temps & l'enuie,

S'est-il ouuert vne vie

A tousiours par l'univers.

Je feray encores le sot à bonnes enseignes, puis que iusques icy ie me suis laissé aller à la mercy de mes opinions, ou pour mieux dire à vne folle amitié que nous portōs à nos œuures. Tout ainsi que defunct Pelletier voulut autrefois représenter par ses vers le chât de l'alloüette, que vous auez sçeu fort bié cotter, en quoy il rencontra si heureusement, qu'il est impossible de mieux: aussi me suis-ie estudié de faire le semblable tant en Latin que François, pour le degoïsement du Rossignol.

Au cinquiesme de mes Epigrammes vous y trouuerez cestuy-cy,

Ver rediit, glomerantur aues, concentibus auras

Mulcent, & miris tu Philomela modis.

T V T V, T O T, T O T O modularis gutture voces,

Ut Philomela aliis, sis Philomusa mihi.

Et en vne chanson que ie fis malade, il y a environ trois ans, oyant le Rossignol desgoïser à pleine gorge son ramage, pour tromper mon mal il m'aduint de faire vne comparaison de ma ficure, avec le chaud amour de ce gentil oyseau, & pour conclusion de ma chanson, ie mis ce couplet,

*Je requiers sans plus vn don,
 Tu' tu' tu' tu' moy Cupidon,
 Tost, tost, tost, & que ie m'en aille,
 Il v aut mieux vne fois mourir,
 Qu'en vn desespoir me nourrir,
 Qui iournellement me tenaille.*

Je desire encores vous adiouster le jeu de ces vers, où vn seul poinct transposé diuersifie le sens :

Porta patens esto nulli claudaris honesto.

Mettez la virgule apres le mot de, *Esto*, il n'y a nul vers plus courtois : mettez-le apres *Nulli*, il n'y a rien si discourtois. Et c'est pourquoy Alciat (si ie ne m'abuse) dist que l'on fist cest autre carme :

Ob solum punctum caruit Martinus Asello.

D'où vient
 ce prover-
 be, pour vn
 poinct
 Martin
 perdit son
 asne.

Disant que c'estoit vn Abbé nommé Martin, qui pour auoir mis ce vers sur le portail de son Monastere, avec le poinct au dessous de *Nulli*, fut pour sa vilenie priué de son Abbaye nommee *Asellus*. D'où aussi est venu entre nous ce proverbe François : Pour vn poinct Martin perdit son asne. Je vous puis dire que ie me suis encores voulu iouer dans mes Epigrammes sur mesme sujet en ces deux vers que i'escriis à vne Damoiselle que ie me represente pour Maistresse :

Ecce maritus adest malus explorator amoris,

Virgula foelicem me facit, aut miserum.

Mettez la virgule apres le mot de *Adest*, voilà tout qui se porte bié pour l'amoureux : mettez-la au dessous de *Malus*, tout va mal. Ce sont en somme de mes bigarrures dont ie vous

ay voulu faire part. Je sçay bien que quelque mal habile hōme, qui voudra faire le Stoique, ou pour mieux dire, trancher du sot, estimera la plus grande partie de ce que dessus, bouffonneries, pour n'auoir esté pratiques par l'ancienneté. Mais vn autre qui sera mieux né, les estimera belles fleurs. Aussi sçauiez vous que la posterité qui suruesquit Virgile, Horace, Ouide, & tous ces braues Poëtes qui florirent sous l'Empire d'Auguste, apportèrent certaines récontres en vers qui ne furent pas reiettees, cōme est entre autres celle de ce Distique, qui fut fait en l'honneur des œuvres de Virgile, & sur le moule duquel nous auons formé en France tous nos vers rappez :

Pastor, arator, eques, pavi, colui, superavi,

Capras, rus, hosteis, fronde, ligone, manu.

Il n'est pas dict qu'il faille tousiours mettre la main à œuvres graues & serieuses. Tout ainsi que le corps s'alimente & nourrit de viandes solides, & neantmoins reprend quelquefois goust par des salades & herbages qui sont de peu de substance : ainsi est-il de nos esprits, lesquels il est bien seant d'affortir de fois à autres d'un doux entremets de gayetez & gaillardises, pour leur estre puis apres vn acheminement à discours bons & serieux. Nous auons l'un de nos compagnōs nommé Maistre Martin Mesnart, personnage qui sçait bien faire le Palais autant que nul autre, & accompagné de toutes les bonnes parties, tant de l'ame que de l'esprit, que vous sçauriez desirer en homme, lequel se ioie en ceste façon de son esprit quand

il peut, & le peut toutes & quantes-fois qu'il veut. Lorsque les Huguenots chargerent les armes en l'an 1561. pour la defenſe de leur religion, il fit ces deux vers commençant chaque mot par R.

*Rem, regem, regimen, regionem, religionem,
Reſtaurauerimus religionicola.*

Et par ce qu'il appelle ces vers aſcendans, d'autant que par forme de degré il fait monter chaque mot d'une ſyllabe, il a voulu encores repreſenter la beauté de ceſte gaillardife par ces ſix notes, Vt, Re, Mi, Fa, Sol, La, eſquelles on va toujours en montant:

*Vt Regi minimè ſaucamus, ſolicitamur
Lamentabilibus ſollicitudinibus.*

Vous ne croiriez pas combien il a de pareilles gayetez, dont ie ſouhaiterois qu'il vous euſt fait part. Par ce que voſtre liure n'en ſeroit que plus embelly. Mais ſur tout ie vous veux aduiſer de deux carmes, dont ie ne puis ſçauoir l'auteur, qui me ſemblent peſer en valeur vn liure gros & accompli:

*Quos anguis àirus trīſti mulcedine pait,
Hos ſanguis mirus Chriſti dulcedine lauit,*

Voila en deux lignes tout le vieil & nouueau Teſtament, portant noſtre condamnation, & ſauuement, preſque ſous meſmes mots rap- portez. Qui eſt, à mon iugement, vn chef d'œuvre d'homme qui n'eſtoit point apprentif en telles beautez d'eſprit. Croyez que le ſou- uenir de toutes ces grotelſques (appelez les ainſi ſ'il vous plaift) m'a tellement regaillardy qu'au partir de ceſte lettre, ie m'en vois re-

prendre mes sacs. Vous direz, que c'est retourner à ma pasture: peut-estre ne mentirez-vous pas. Vous priant au demeurant remercier de ma part Monsieur le President Iannin, du bon iouuenir qu'il a eu de moy, & luy dire qu'il se peut asseurer auoir vn bon amy & seruiteur en moy. Si en recompense de ce qu'il vous a communiqué mes Epigrammes Latins, & le Poëme faict pour ma main, vous luy voulez faire part de la presente, vous ne ferez par moy de iaduouié, toutesfois puis qu'elle est vostre désormais, vous en ferez ce qu'il vous plaira, tout ainsi comme de l'autheur qui desire se perpetuer en vos bonnes graces. A Dieu.

*A Monsieur Iuret, Chanoine en l'Eglise
de Langres.*



Ombien que ie n'aye iamais eu cest lieu de vous cognoistre de face, si pense-ie vous auoir veu ces iours passez plus à propos. Vous sçauiez ce que dict Socrates à vn ieune homme qu'on luy presentoit: Mon enfant, parle, à fin que ie te voye. Les beaux vers Latins & François qu'avez faicts sur mon pourtraict, & lesquels i'ay receus par les mains de Monsieur le Conseiller Gillot, m'ont faict cognoistre qui vous estiez: ie veux dire vn bel esprit doiüé de toutes les graces, gentillesces, courtoisies, & rōdeurs que l'on peut souhaiter. Vray qu'en la lecture d'iceux vous m'avez fait reuenir en memoire ce que fit autrefois le Phi-

Isoppe Carneades, lequel estât enuoyé des Atheniës Ambassadeur en la ville de Rome, auât que d'auoir audience du Senat, voulant faire môstre publique desõ esprit, loüa vn iour la Iustice, & le lédemain la vitupera, si à point, que l'on ne sçauoit auquel des deux iours donner l'aduantage. Qui fut cause que Caton le vieux le fit renuoyer comme il estoit venu, sans estre ouy, comme celuy qui se ioüoit de son esprit ainsi qu'il vouloit, & qui par vne parole persuasue eust peu surprendre le Senat s'il luy eust donné audience. Ainsi vous en est-il presque pris. Car representant fort dextrement & hardiment sur vn mesme sujet deux personages contraires, l'vn en haut-loüant ma main en sõ particulier, l'autre en la blasonnant sur le general de nostre profession, le malheur a voulu qu'ayez esté chastié comme celuy-là : pour le moins que vos beaux vers n'ayent esté enchassez avec les autres, pour estre ja le liure clos & exposé dés pieçà en lumiere, avec vne vente assez plausible. Or quant à ce qu'il vous a pleu de me celebrer, ie vous en remercie: ce n'est pas tant me trompeter que vous tromper. Et quât au demeurant de vos vers, par lesquels vous estes plus voulu esgayer sur la main d'vn Aduocat en general, que particulièrement sur la mienne, & dont vous excusez par vos lettres, il ne faut plus vous excuser, puis qu'on ne vous accuse plus. Ie mets quelque-fois la main à l'œuvre, & sçay combien il est fascheux à vne main plantureuse telle que la vostre de la vouloir retrancher, quand quelque belle conception se presente

*Il est mal-
aisé de sup-
primer ses
inventions.*

se presente. C'est pourquoy ie vous supplie en cas semblable ne trouuer mauuais les deux carmes que ie fis & escriuis sur le champ à Monsieur Tabourot vostre cousin, lesquels ie condamne comme champignons. Voulant que leur mort soit aussi prompte que leur naisance. A quelque chose malheur est bon, & auions vous & moy interest que ceste sottie inuention tombast de ma plume. Car autrement n'eusse ie iouy de toutes les belles fleurs de vostre iardin que vous m'auiez enuoyees. Lesquelles ie transplanteray dedans le mien, & à la charge de leur donner air avecques les autres, si on les imprime pour la seconde fois. Et cependant vous ferez estat de moy, s'il vous plaist, comme de celuy qui desire estre enregistré au nombre de vos bons seruiteurs & amis. A Dieu.

*Il s'excuse
enuers
Monsieur
Iuret, des
deux vers
qu'il auoit
enuoyez à
Monsieur
Tabourot.*

*Lettres de Monsieur le grand Prieur de
France à Pasquier.*



ENCORES que vous n'ayez plus souuenance de vos meilleurs amis, tels que ie pèse vous estre de long temps, si est ce qu'ayât icy trouué vostre liure de la main, ie l'ay caressé de tout le bon accueil qu'il m'a esté possible : estimant tout ce qui procede de son autheur, digne de loüange & d'estime. Et moy & quelques vns qui en sont pres, auons contribué quelques fruiçts de nostre Parnasse, à fin de luy rendre l'honneur que tous bons iugemens recognois-

*Monsieur
le grand
Prieur fait
cest honneur
à Pasquier
de celebrer
sa Main com-
me plu-
sieurs au-
tres auoient
fait.*

sent meriter. Si vous me faisiez quelquefois part de vos œuvres, ie me tiendrois plus assuré de l'affectiō que m'auez tousiours promise: & n'en sçauriez faire distribution à personnes de qui elles soyent mieux receuës & prisees. Je vous en prieray doncques, & de faire estat de mon amitié, comme vous pourrez faire preuve en toutes occasions. Suppliant en cest endroit, Monsieur Pasquier, le Createur vous auoir en sa sainte & digne garde. D'Aix ce viij. Iuillet 1585.

Monseigneur le grand Prieur.

*Ceste immortelle main qui bastit l'uniuers,
Se cachant à noz yeux, en ses œuvres se monstre:
Ta main, qui ne se voit d'une mesme rencontre,
Se fait plus dignement apparoir en tes vers.*

Le Seigneur de Malherbe.

*Il ne faut qu'avec le visage
L'ont tire tes mains au pinceau,
Tu les monstres en ton ouvrage,
Et les caches dans le Tableau.*

M. Mazzæi, gran Vicario del Serenissimo
Seignore gran Prior de Francia.

*L'accorto Depintor a voi ben nottè
Gran lopere Pasquier, de la man vostra,
Al'arte anzi l'asconfe, & quindi mostra
Quanto più che beltà, la virtù puote.*

*A Monseigneur le grand Prieur de France,
Lieutenant general du Roy au pays
de Prouence.*



AY receules lettres qu'il vous a pleu m'enuoyer, & vos beaux vers, dont ie vous remercie tres-humblement. Cela s'appelle tyranniser par courtoisie vos anciens seruiteurs. Ie ne pensois pas que l'on deust donner de si fortes esles à ma main, qu'elle eust peu prendre son vol iusques à vous, ni que vous luy en voulussiez donner d'autres pour la faire voler iusques au ciel. Ce n'est pas peu, disoit vn ancien Romain, d'estre louié d'un homme lourd; mais c'est chose sans comparaison de plus grande recommandation & merite d'estre honoré par vn grand Prince tel que vous, accompagné de toutes les vertus & bonnes parties que l'on peut desirer en ceux qui tiennent les grands & premiers lieux pres des Roys. Vous me faites cest honneur de vous plaindre que ie ne vous fais part de mes œuvres: Ie ne les pensois pas dignes de vous, mais puis que ie m'apperceoy que les souhaitez, ie donneray ordre d'amender la faute pour l'aduenir: & pour premier trait de l'amendement, ie vous enuoye mes Epigrammes Latins, que i'exposay pour la premiere fois en lumiere il y a enuiron deux ans & demy, & que l'on a reimprimez depuis cinq ou six mois en çà. C'est en quoy ie passe le temps, quand ie me

*Responce
aux precedentes
lettres.*

*Combien
il est bien
seant d'estre
loué
d'un grand
seigneur.*

543 LIV. IX. DES. LET. D'EST. PASQ.
veux donner relasche de mes serieuses heures. Si i'ay le moindre sentiment qu'ils vous ayent pleu, ie n'estimeray le temps que i'y ay mis pour mal employé: & me seruirez d'un autre Phœbus ou Soleil pour reschauffer mes esprits qui commençoient à se refroidir en ce sujet. Vous sçavez Monseigneur que dès pieça ie suis couché au nombre de voz bons & anciens seruiteurs, ie vous prie m'y continuer, comme celuy qui s'estimera tousiours tres-heureux de vous faire tres-humbe serui-
ce. A Dieu.





L E

NEUVIÈME

LIVRE DES LETTRES

D'ESTIENNE PASQUIER.

*A Monseigneur Brissou Conseiller au Conseil
d'Estat, & President en la Cour de
Parlement de Paris.*

IE l'auois bien entendu de quel-
ques-vns, mais ie n'eusse iamais
pensé qu'y eussiez apporté vne si
exacte diligence comme celle que
i'y ay trouuee lisant vostre œuvre. Non que ie
ne fusse asseuré que viendriez aisement à chef
de toutes choses où vous viendriez donner at-
tainte par vostre plume : mais par ce que ie
n'estimois que les grandes affaires du Palais,
esquelles estes plongé pour le rang & lieu qu'y
tenez, vous eussent peu dispenser de ce beau
loisir. Et certes quand ie considere à part moy
ce que ie vous ay veu faire par le passé estant
Aduocat simple, depuis Aduocat du Roy, &
ce que faites maintenant en la charge de Pre-
sident, ie ne veux pas dire de vous, ce qu'on
disoit d'un ancien Romain, que c'estoit chose
esmerueillable, comme ayant presque passé

*Il discourt
la differēce
qu'il y a
entre le
droit de
France &
des Ro-
mains.*

*Il entend
du Code-
Henry,
contenant
les ordon-
nances de
France que
Monsieur
le president
Brissou a eu
charge du
Roy de
mettre par
ordre.*

*Le grand
iugement
Et la gran-
de memoire
ne s'a-
compai-
gnent pas
souuent.*

tout le cours de sa vie à la lecture d'une infinité de liures, il eust eu temps suffisant pour tant escrire, ou comme ayant tant escrit il eust peu deuorer tant de liures, comme il auoit faict: Mais bien diray-ie que ie m'estonne comme ayant si bien fait au Palais & avec telle diligence, il ait esté en vostre puissance de tant lire & escrire, ou cōme ayāt tāt leu & escrit vous ayez peu embrasser si dignemēt & d'une telle cōtinuèle palais. Et qui me rēd plus esbahy, c'est que la memoire que ie voy en vous admirable, n'ofusque de riē la clarté de vostre iugement, ni la grādeur du iugemēt ne fait nul tort à la memoire. Cōbien que quād l'un & l'autre se trouuēt extremes en nous, ils ne se facent pas aisement fidelle compagnie ensemble. I'ay leu autrefois les doctes liures de Droit que feites dés vostre ieunesse, & depuis quelques mois en çà ce beau recueil des Formules des Romains qu'auēz de fraische memoire mis en lumiere: Oeuures certainement dignes de vous & du public. Mais ie n'en trouue nul tant meritoire que ce dernier que vous nommez Code-Henry, par lequel vous François, & President au premier Parlement de la France, nous enseignez à n'estre plus aulbains en nostre país. Mettant (si ainsi faut dire) en campagne d'une si belle ordonnance nos Ordonnances, qu'elles peuuent maintenant faire teste à toutes celles de Rome. Voila comme toutes choses prennent avec le temps leur façon. Ainsi veirent les Romains vn Sextus Papirius rediger en vn brief estat toutes les constitutions des

Roy de Rome, esparfes auparauant çà & là. Et depuis sous les Empereurs les ordonnances Imperiales s'estans augmentees & prouignees en extremite, plusieurs s'estudierent diuerfement de les mettre en vn abregé. De là vindrent les Codes Gregorian, Hermogenien, & Theodosien. Les deux premiers faits par hommes qui de leur propre instinct & mouuement se mirent à ceste entreprise, & le dernier par commandement expres del'Empereur Theodose. Et tout ainsi qu'aux Romains, aussi ce mesme dessein est tombé entre nous pour le regard de nos ordonnances: Car le bon homme rebuffy fut le premier des nostres qui les reduisit en quelque ordre. Auquel long temps apres est succédé Maistre Antoine Fontanon Aduocat en nostre Cour, lequel avec vne diligence admirable y apporta vn grand supplement, & depuis peu de iours en çà Maistre Pierre Guenois, en ordre vn peu plus racourcy. Iusques à ce que vous maintenant par l'autorité & commandement expres de nostre grand Theodose y apportez la derniere closture d'vne main si industrieuse, que ie ne fais nulle doubte que ne fermiez le pas à tous autres qui se voudroyent à l'aduenir exercer sur mesme sujet. Il est desormais temps qu'ostiôs ceste folle apprehensiô qui occupe nos esprits, par laquelle mettans sous pieds ce qui est du vray & naïf droit de la France reduisons tous nos iugemens aux iugemens des Romains. Ne nous aduisans pas que tout ainsi que Dieu nous voulut separer del'Italie par vn haut

La folle resolution de ceux qui reduisent l'air de la France à celui des Romains

entrejet de montaignees, aussi nous separe-
il presque en toutes choses, de mœurs, de loix,
de nature & complexions. Il me plaist me don-
ner maintenant carriere sur ce discours, puis
que l'occasion s'y presente, à la charge d'estre
en vostre endroit ce que fut autresfois Phor-
mion enuers ce grand Capitaine Hannibal.
Repassez par toutes les principales proposi-
tions des loix, tant de la France que de Rome,
& les confrontez les vnes aux autres, vous n'y
trouuerez aucun assortissement. Les choses
les plus communes & familiares d'entre les
hommes, sont les mariages, & successions.
Les successions introduites par la mort, qui
nous talonne de iour à autre, laissant à ceux
qui sont nostres, le peu de bien que nous auôs.
Et les mariages pour nous perpetuer de l'un à
l'autre par vne surrogation en ce bas & mor-
tel estre. A Rome quand l'on s'y marioit, on
ne permettoit ni d'instituer vn heritier, ni
de renoncer à vne succession par vn con-
tract de mariage. Le mary & la femme se pou-
uoient aduantage par leurs testamens. On
ne sçauoit que c'estoit de doüaire, & signam-
mēt du coustumier, moins auoit on de cognois-
sance de la communauté d'entre le mary & la
femme. EN France nous fauorisons infiniment
les aduantages qui sont faits par les peres & me-
res à leurs enfans quand ils les marient, &
aux enfans qui naistront d'eux, &
sur tout embrassons avec vn tresfauo-
rable accueil les renonciations qui sont
faites dans vn contract de mariage

*La diuersi-
té qu'il y a
de nous aux
Romains
pour le fait
des maria-
ges.*

par nos filles à nos successiōs futures, en faueur & contemplation de leurs freres. Ne permettons ny au mary ny à la femme des'aduantager en aucune sorte par leurs testamens. Auons introduit le doüaire comme guerdon & recompense de ceste belle fleur de virginité que nous cueillons en nos femmes lors qu'elles sont vierges : & quant aux veufues, pour tesmoignage & recognoissance de leur chasteté. Voire qu'en plusieurs coustumes dès le iour de la benediction nuptiale nous les rendons propres aux enfans, de telle façon que les peres n'en peuuent de là en auant disposer à leur preiudice. Faisons les maris & femmes communs en tous leurs meubles & conquests immeubles. Et apres la dissolution du mariage continuons ceste mesme communauté en faueur des enfans mineurs, quand le pere ou mere suruiuant n'a faict bon & deu inuentaire. Iacoit que la disposition du droit commun des Romains n'admette aucune continuation de societé en la personne d'un mineur, ores qu'elle eust esté stipulée. Je ne vous adiouste la Garde noble & bourgeoise du tout incongneüe aux Romains. Il n'est pas iusques aux tutelles & curatelles introduites pour les enfans mineurs apres le decez des peres & meres, que nous ne soyons diuers. Car dans la ville de Rome, la tutelle testamentaire estoit preferée à toute autre, & la Datiue mise au dernier

*Forme de
tutelle, di-
uerse.*

*Diversité
des testa-
mens &
successions.*

tes les autres. Iettons l'œil sur les successiōs que nous recueillons, ou par testament, ou ab intestat. Il n'y auoit rien plus fauorable dans Rome que le testament. Que le testateur dispose (disoyent-ils) & ce sera vne loy. Le fondemēt radical & essentiel de tout testament estoit l'institution d'heritier : L'on pouuoit estre heritier & legataire ensemblement. Par le testamēt vn pere pouuoit prohiber le rapport d'vn aduantage par luy fait à l'vn de ses enfans. En France nous restraignons tres-estroitement les dernieres volontez, ne donnant pleine bride aux testateurs en païs coustumier, ains seulement permission de disposer iusques à certaine part & portion de leurs biens, selon la diuersité des Coustumes. Et nommément il y a peu de coustumes qui ne portent que l'institution d'heritier n'est necessaire pour la validité des testamens. D'auātage l'on ne peut estre heritier & legataire. Et finalement vn pere ne peut faire par son testament que son enfant ne soit tenu de rapporter ce dont il a esté aduantage par luy, voulant venir à sa succession. Examinons les successions ab intestat, ie crains que la multiplicité des antitheses que ie vous proposeray ne vous offense. Dans Rome representation auoit lieu en ligne directe *in infinitum*, & en la collaterale iusques aux enfans des freres. En France anciennement l'on ne sçauoit que c'estoit de representation non plus en l'vne qu'en l'autre ligne. Chose que ie recognoistray auoir esté depuis par nous reformee. Dans Rome pour n'estre réputé heritier il suffisoit de

ne s'estre immiscé aux biens du defunct. A nous nō seulement il ne suffit de nes'y estre immiscé, mais il y faut avec cela vne renouciation expresse. A Rome il n'y auoit qu'un seul patrimoine, & c'est ce que l'on dit *Vnius unicum esse patrimonium*, excepté entre gens de guerre. A nous il y en a trois especes, les propres, les acquests, & les meubles. A Rome on consideroit les successions par la proximité des degrez, sās considerer de quel estoc & ligne venoyent les biens. En France nous destinons le bien paternel pour les heritiers paternels, & le maternel pour les maternels. A Rome les peres & meres pouuoient succeder aux propres de leurs enfans par le Tertullian. A nous les propres ne remontent point. Mais au lieu de ce les peres & meres succedent (si bon leur semble) aux meubles, acquests & conquests de leurs enfans. A Rome on distribuoit de mesme balance le bien des peres & meres tant aux femelles comme aux masles. En France il y a certains biens, comme les fiefs, esquels en ligne collateralle le masle exclud la femelle : Et encores entre les masles en ligne directe, bien que les filles y aient part, si est-ce que nous adiugeons à nostre premier fils vn preciput par dessus tous les autres enfans pour son droit d'aisnesse. Dedans Rome il y auoit quatre manieres pour legitimer nos enfans : Par testamens & ordonnances de dernieres volontez, *Per oblationem curie*, par vn subsequnt mariage, & par le benefice du Prince. En France nous auons seulement les deux dernieres. Tournons nos pensees aux

*Diversité
pour les
contrats.*

contrats: Le Retrait lignager incogneu à Rome infiniment receu & authorisé de nous. En donations entre vifs; Donner & retenir ne vaut entre nous: Dedans Rome iacoit que le donateur n'eust fait tradition de la chose donnée, le donataire pouuoit puis apres intenter la personnelle contre luy, afin de luy faire deliurance de ce qu'il luy auoit donné. Encores ne vous veux-je mettre en jeu plusieurs particularitez, qui dependent de nos Edicts: Comme d'auoir borné le temps des Restitutions entier contre les contrats à dix ans, d'auoir osté la preuue par tesmoins des promesses qui excedoyent cent liures pour vne fois: Que les contrats & testamens seroyent signez tât des Notaires, que des parties contractantes, & tesmoins instrumentaires s'ils sçauoyent signer, & s'ils ne le sçauoyent, qu'il seroit faite mention de ce: Et tout sur peine de nullité. Que par la contestation, l'action n'est perpetuee à quarante ans, au contraire que la peremption d'instance produict effect de prescription. Tout cecy a esté ordonné par nos ordonnances modernes, quoy que soit depuis le regne du Roy Louys douzième. Ce que ie me suis proposé de deduire en ce lieu, est du fonds de nostre vieux droit de la France. Et puis au bout de tout cela nous alleguons en vn barreau pour le soustenement de nos causes vn eschantillon de loy des Iuriconsultes de Rome. Si l'on parle d'un Retrait lignager, il est odieux & restrictible: Si des testamens, ils sont fauorables, dit on: Parce qu'ainsi il estoit deter-

*Faute que
les Aduo-
cats com-
mettent au
barreau
messans les
deux droits
ensemble.*

miné par le droit commun des Romains. Mon Dieu, que j'ay de honte que pour sauuer nos causes, nous perdions le droit de la France. Au contraire les Retraits lignagers sont tres-fauorables, & les Testamés tres-odieux entre nous. D'autant que sur deux diuers fondemés le Romain & le François semblét auoir estably leurs loix. Celuy-là sur vne consideration plus économique pour la conseruation des volontez de chacun en son particulier : Cestuy sur vne plus politique, pour l'entretenement des familles en leur entier. De là viennent les coutumes en faueur des masles (c'est à dire de ceux qui portent le nom & les armes d'une famille.) De là les preciputs donnez aux aînez entre les masles. De là les renonciations que l'on faict faire aux filles en les mariant en faueur de leurs freres à tout droit successif tant paternel que maternel auenir. Et à peu dire sur ce mesme fonds fut enté le Retraict lignager, & par mesme moyen la prohibition de tester sinon iusques à certaine portion de nos biens. Et en ceste diuersité de fondemens du droit des Romains au nostre, il y a eu aussi diuersité de maximes qui sont venues à la suite des premiers principes. Donnez en vne Republique qu'il falle sur toute chose s'estudier de cōseruer les volontez de chascun particulier en ce qui regarde ses biens & facultez, tout ce qui desdira ceste proposition, sera odieux: Accordez que la conseruation des familles en leur entier soit de plus grande recommandation & priuilege que nos volontez,

*D'où viēt
la diuersité
de nos an-
ciennes loix
avec le
droit des
Romains.*

voustrouueriez que toutes les regles qui inclinent à ce party là sont fauorables. Ie dy doncques que c'est grandement errer de vouloir deuant la face de noz Iuges confirmer ou infirmer indistinctement le droit de nostre France par celuy des Romains, en vne telle, si non contrarieté, pour le moins diuersité de propositions generales. Et ce qui m'excite encores plus le courroux, est que s'il y a quelque cas indecis par noz Coustumes, soudain nous sommes d'aduis qu'il faut auoir recours au droit commun, entendans par ce droit commun, le droit ciuil des Romains. Ceste regle est tres-veritable, si elle estoit bien entendue. Toutes les Prouinces anciennement qui estoient sujettes à l'Empire auoyent, comme il est vrai-semblable, diuersement leurs loix municipales. En quoy si elles manquoient en quelque cas, qui n'eust esté desfiny, c'estoit bien la raison que les Prouinciaux eussent recours en l'obmission de tels cas au droit commun de l'Empire sous lequel ils estoient assubgettis. Mais de nous chaulser à ce mesme poinct, ce seroit faire tort à nostre patrie. Nous ne reconnoissons en rien le droit des Romains sinon de tant & entant que leurs loix se conforment à vn sens commun dont nous pouuons faire nostre profit. Comment doncques pouuons nous mettre en œuvre ceste regle, qui veut que quand noz coustumes nous defaillent en quelques particularitez, nous recourions au droit ancien de Rome? Il est fort aisé de ce faire sans aucune sophisliquerie, moyennant que

Quelle impertinence prouient d'auoir recours au droit commun des Romains, quand les coustumes particulieres nous defaillent.

nous voulions nous affranchir sagement de ceste superstitieuse seruitude dont nous captiuons nos esprits à la suite de ce droit ancien. Il n'y a Prouince en France qui n'ait ses Coustumes, & cela nous tenons d'une bien longue ancienneté, comme nous apprenons des Memoires de Iules Cesar. Sous plusieurs de ces Prouinces il y a des Coustumes que nous appellons locales en vnes & autres villes. S'il y a quelque cas obmis en ces Coustumes locales, qui doute qu'il ne falle auoir recours à la Coustume generale de la Prouince, qui est le vray droit commun d'icelle ? Et si en ceste Coustume generale il y a encores quelque obscurité ou obmission de cas, quelle raison y a-il de l'aller plustost mendier à Rome, qu'aux Coustumes circonuoinfines ? Veu que les Romains mesmes estoient d'aduis qu'en telles occurrences d'affaires il falloit recourir de proche en proche. Aduis qui fut par eux baillé, non sans grande raison : car si les Coustumes se forment en chascun pays petit à petit de la diuersité de nos mœurs, & nos mœurs de la diuersité de nos esprits : il y a beaucoup plus d'apparence en telles obscuritez ou defauts d'auoir recours aux peuples qui nous atouchent de plus pres, lesquels pour le voisinage symbolisent vray-semblablement plus, de mœurs & d'esprits, & par consequent plus de coustumes, avecques nous. Qui est celuy qui puisse reuoker en doute que les Romains ne fussent dès leur enfance plus retenus, aduisez,

*Que le
meilleur
seroit en
defaut de
Coustume
d'auoir
recours à
celles qui
sont les plus
proches.*

& resolu en leurs opinions que nous autres? Recherchez en France vn autre Caton, qui en son enfance, voyant les cruauitez de Sylla, demanda à son gouuerneur vn glaiue pour exterminer le tyran & la tyrannie de Rome. Recherchez vn autre Papirius, lequel en vn tresbasaage ayant esté mené au Senat, pour apprendre à se façonner, ainsi qu'estoit la commune vſance des ieunes seigneurs, à son retour importuné violement par sa mere, de luy reueler ce que l'on y auoit decreté, non seulement ne le descouurit, mais qui plus est luy donna la muse par vne noble menterie. Malaisément que vous trouuiez telles resolutions en la ieunesse François. Nous auons quelques autres proprietéz & adresses qui ne nous rendent pas moins recommandables que ceux de la ville de Rome. Ie veux doncques qu'il y ait quelque coustume entre nous par laquelle l'aage de pouuoir tester n'ait esté déterminé, aurôs nous en cecy recours aux xiiij. ans des Romains? Quant à moy ie pense que ce seroit errer en sens commun. Et de fait, cōme ainsi fust que par la coustume de Paris redigee en l'ã v.c. & vii. nos ancestres se ressentans encores de la poudriere des Vniuersitez & escoles, eussent estably cest aage de quatorze ans pour les males, & de douze pour les femelles, conformément au droict des Romains, la necessité, fille du long vſage, nous ayant appris que c'estoit mal pratiquer ce vieux droict, & qu'il falloit rapporter les coustumes à nostre naturel, nous auons par la coustume nouuellement reformee

*Tester à
xiiij. ans.*

me mis, que pour tester des meubles, acquests & conquests, il falloit auoir accompli l'aage de vingt ans, & pour tester du quint de nos propres, l'aage de vingt & cinq ans. Ie ne fais nulle doute que si quelqu'autre que vous m'oyoit tenir tels discours, il ne les trouuast paradoxes, & contre la commune de nostre barreau, mais discourant avec vous, qui, par dessus les Iuriscultes François, sçauiez mesnager à propos non seulement tout ce qui est du droict de Rome, mais aussi des lettres humaines, & qui ne iugez des affaires par vne superficie & elcorce, ains par vne vraye & pure saie, ie m'asseure que fort aisement cōdescendrez à mon opinion. Ie ne veux pas ce pendant nier qu'en ceste bigarrure de droicts, il n'y ait quelques particularitez entre nous, esquelles ie souhaitteroie quelque bonne reformation. Ny le mari, ny la femme ne se peuuent faire aucun aduantage par donation entre vifs, pendant & constant leur mariage. Loy qui est commune tant au Romain, comme au François. Mais en cecy ie recognoistray franchement que nous cedons au Romain. De tant qu'en ces contracts de mariage il estoit sobre distributeur de son bien, & reseruoit ceste liberalité à vn testament, lors que le mary par vne longue & mutuelle conuersation s'estoit rendu asseuré des bons ou mauuais offices de sa femme: & elle en cas semblable des fauorables traitemens de son mary. Nous, au rebours, sommes prodigues par nos contracts de mariage en faueur de ceux ou celles qu'à peine nous cognois-

*Quelques
defaux qui
se peuuent
remarquer
en nostre
droict de
France.*

*Que le Ro-
main nous
deuance en
quelques
particula-
rites.*

*Douaire
coustumier,
propre aux
enfans.*

sons, & lors que nous sçauons de quels merites ils ont esté en nostre endroict, & que voulons rendre l'ame à nature, l'on nous ferme les mains n'estant en nostre liberté d'aduantager par nos testamens nos femmes, ni aux femmes de faire rien pour leurs maris. Je louë grandement le douaire coustumier: Mais quand ie voy qu'en plusieurs coustumes on l'a rendu propre aux enfans, & que pour le regard des biens de la femme, on les laisse en sa pleine disposition apres le decez de son mary, il me semble que noz deuanciers par vn iugement bizarre & mal ordonné se desfierent par trop, ou de la prud'ceou de la prud'homie des hommes. Au contraire, qu'ils se redirēt mal à propos trop asseurez de la suffisance des fēmes, lesquelles d'aillieurs nous publions estre beaucoup plus fragiles que nous & pour ceste cause d'as Rome estoÿēt en la perpetuelle tutelle des hommes. Au contraire nous mettons les hommes sous la tutelle de leurs femmes & de leurs enfans auant qu'ils soyent nez du iour de la solennization du mariage. S'il y faut quelque reformation ie l'attends principalement de vous, qui outre ce beau code Henry que bastissez, couuez encores en vostre esprit vn recueil de toutes les belles decisions que pensez pouuoir appartenir au Palais. Enquoy ie vous veux sans plus prier d'une chose, qu'en voulant conseruer nostre droict de France, aduisiez à vous conseruer vous mesmes. Bien que l'exercitation & assiduité tantost de lire, tantost d'escrire augmente de iour à autre les forces de

noz esprits, si diminue elle celles du corps. Et vous scauez combien l'esprit vif a d'intérest d'estre logé dans vn corps sain, comme vn bon vin dans vn fort vaisseau. A Dieu.

A Monsieur de Tolet, Abbé de Plimpie.

QUOBIEN que i'aye esté grandement aise du retour de mon second fils, si ne l'ay ie poin tant esté, que d'auoir cogneu par voz lettres & la bonne volonté que luy auez portée, & les bons officies que faites en ma faueur à l'autre qui est demeuré dans Rome, presde Monsieur l'Ambassadeur. Me trouuant en cecy constitué entre deux extremittez: Car si ie ne souhaite dem'en ressentir par effect, ie me fais tort: Si au contraire ie le souhaite, ie vous fais tort. Par ce que le plus beau souhait que ie puissè faire pour vous, est que viuant en vn perpetuel repos d'esprit, n'ayez iamais affaire de moy en mon estat. Et neantmoins en quelque sorte que ce puisse estre, ie vous presente tout ce qui est de ma puissance. Au demeurant quant à ce que me repaissez de plusieurs belles esperances pour celuy qui est encores de delà, me mandant qu'il s'adonne à tous nobles exercices, dignes de l'homme qui veut faire profession des armes, ie le prens de vous comme d'un amy, qui veut aucunement flater vn pere sot, lequel se laisse fort aisément tromper de ses enfans. Mais si semonds de la verité, vous me l'auiez figuré pour tel, ie louie Dieu &

*Il remercio
l'Abbé de
Plimpie,
des bons of-
fices qu'il
faisoit dans
Rome à
deux de ses
enfans.*

l'en remercie. Il est en l'escole d'un sage seigneur, que l'on peut dire le miroir de vertu. Vos belles exhortations luy serviront encorcs d'esperon. S'il faict ce que vous me dites, il s'en trouuera tant mieux lors qu'il sera de retour, pour en faire present à quelque Prince ou grand Seigneur. A Dieu.

*A Monsieur Taucan, Procureur au siege
Presidial de Sens.*

*Il prie
Monsieur
Taucan,
sien amy,
d'apporter
quelque
diligence à
l'expeditio
d'un pro-
cez.*



Este-cy est la cinq ou sixiesme que ie vous ay escrite pour ma seruante, sans auoir responce. Vous me le pardonnerez, mais il me semble que sans lettres la longueur du temps, & la pitié qu'il y a en ceste pauvre femme, deuoyent suffire pour vous seruir d'interpellation bonne & vallable. Vous auez esté bon guerrier du commencement, & obtenu belle victoire, mais il me semble qu'auuez esté vn autre Hânibal, ne l'ayât pas poursuiuie d'une mesme pointe. On impûtoit anciennement aux Gaulois, que sur leur premiere arriuee ils estoient plus forts que des hommes, mais à la longue plus foibles que femmes. Je vous prie me faire ce bien de vous dispenser de ce defaut, & que vos liures & estudes, que sçauiez mesler avec la pratique, ne vous facét oublier vos meilleurs amis. Monsieur le Lieutenant general m'assëura dernièrement qu'il ne ténait à luy ny aux Iuges que n'eussions la vuidange du procez. Je m'assëure que si le voulez, nous en aurons la fin

au premier iour. Tout ne depend que d'un point de droict. Le present porteur m'a promis de vous en solliciter, & m'en rapporter responce. Si vous n'enterinez à ce coup ma requeste, ie recognoistray librement que ie seray au bout de mon rollet. A Dieu.

*A Monsieur de Luzarche, Cheualier de l'Ordre,
& Lieutenant de la compagnie de Monseigneur de la Chapelle des Versins.*

NE pensez pas que ie vous quite pour cela. C'est la Rhetorique des mauvais debteurs, de payer leurs debtes en gibier. Vous me deuez vingt escus il y a six mois passez, c'est à dire depuis vostre absence, lesquels i'eusse gagné avec vous à la premiere ou au Glic, si eussiez esté par deçà. Cest argent m'est deu de bonne guerre, & n'en rabatray pas vne maille : toutesfois par vos fuites & longueurs, ie suis contrainct de les mettre au chapite des deniers comptez, non receus. Parquoy aduisez ou de vous venir acquiter en personne au premier iour, ou bien n'attendez pas de moy vn sergent pour vous executer. Mais bien, tout ainsi qu'aux emprunts de ville, quand on ne paye à iour nommé ce à quoy l'on est cottizé, l'on enuoye aux maisons des garnisons d'hommes, quel'on appelle Mangeurs: aussi sommes nous cinq ou six, qui deliberons d'aller vous prendre d'affaut à Luzarche : & Dieu sçait quelle bonne chere nous ferons, & aux despens de qui. Ma debte

*Il se gausse
avec le sei-
gneur de
Luzarche
sur sa l'ogee,
absence.*

est priuilegee: c'est argent de jeu. Je sçay bien que pour vous excuser, vous me coucherez ce-cy, d'vne maladie de madame vostre belle mere, d'vne grossesse de vostre bonne partie, d'un pour parler de mariage de Madamoiselle de Beaugarnier, & mille autres telles deffaites. Mais tout cela n'est que vent, que ie ne prends pour argent content. Suffise vous vne fois pour toutes, que ie veux estre payé, sans esperance d'aucun respit. A Dieu

A Monsieur Maillart, seigneur de Sourche, Conseiller & Maistre des Requestes ordinaires de l'Hostel du Roy.

Il descript la calamité de ceux qui plaident en leur nom.

NON : Je n'eusse iamais pensé que le plaider en son nom apportast tant de benedictions de Dieu, comme il fait. Croyez que ce n'estoit pas sans raison que ce grand plaideur d'Abbé desiroit que de quarante ou cinquante procez qu'il auoit, on luy en laissast deux ou trois pour passer son temps. Estes-vous homme lent & paresseux? ne faites nulle doute que ne trouuiez assez de sujet pour destourner les embusches d'oisiueté. Il ne vous faut point plus beau reueille-matin qu'un procez. Estes vous haut à la main, ou desdaigneux, vous aurez assez de loisir pour apprendre à courtiser non seulement vos Iuges; ains vos Aduocats & Procureurs, voire iusques à leurs Clerks. Si d'un esprit engourdi, vous trouuerez prou d'inuentiō pour vous garentir des surprises dont on vous vou-

droit preuenir. Si hôteux, la necessité vous enseigne d'oster ceste taye de vos yeux, & vous rendre plustost importun, qu'autre. Si auaricieux, mon Dieu comme ce beau mestier vous en dispense. Car il n'y a marchandise en France qui couste tant que la Iustice. Tant il faut passer par diuersés mains, à toutes lesquelles il faut son offrande : & pour l'enuie que nous auons d'atteindre au dessus de nos desseins, nous ne pensons pas que cela nous coûte, iusques à ce que nous voyons le fonds de nos bourses. I'ay fait esprouue de tout cela. Quand ie plaiderois seulement pour autrui, ie ne voyois Messieurs de la Cour qu'avec dignité, ie ne sortois de mon liét qu'à mes bons poincts & aïssances, ne remuois mon esprit qu'ainsi comme il me plaisoit. Maintenant ie suis tout autre homme : deux procez que i'ay en mon nom m'y ont inuité. Ce sont de grandes benedictions, ie le confesse, mais Dieu vous en vueille garder. C'est assez ry pour vn plaideur, il est temps que ie vous die à bon escient, que ie ne pense point qu'il y ait passion plus aiguë que celle là, ne qui produise tant de tintoins en nos testes. I'en excepteray les trois bourrelles de nos esprits : l'amour, l'ambition, & l'auarice. Car en ceste cy il y a presque vn melange des deux dernieres ensemble, accompagné d'un desir de vengeance, qui produit de merueilleux effects en nous. L'Italien dit que nul ne sçait quel plaisir c'est de se venger, sinon celuy qui a receu l'injure. A Dieu.

A Theodore Pasquier son fils.

*En exhortant
ici son
fils il mon-
stre de quel
le façon doit
estre le bon
Aduocat.*

V I S que Dieu m'a fait tant de bien que i'ay peu vous eleuer du bas aage des escoles pour entrer maintenant en quelque honneste profession, ie vous veux escrire la presente, non par forme de lettre missiue, ains comme vne leçon que ie desire estre empreinte en vostre cœur tout le temps de vostre vie. Dés-lors que ie vous mis au college, mon premier project fut de vous destiner à l'estat d'Aduocat. Qui est celuy, auquel, graces à Dieu, i'ay acquis quelque degré entre mes compagnons. Ne voulant en cecy ressembler plusieurs autres de nostre ville, lesquels se voyans aduancez en quelque estat, n'imaginent autre chose sinon de promouoir leurs enfans à plus hauts estats. Quant à moy, la loy me plaist infiniment que l'on dit auoir esté obseruee tant en Egypte, que Sparte, esquels lieux il y auoit certaines vacations qui se transmettoient successiuellement de pere à fils. Non toutesfois que ie voulusse faire ceste reigle perpetuellement stable, sinõ entant que ie trouuerois les enfans y estre enclins: car sur tout il ne faut forcer leur naturel, autrement ce seroit cõme les Geãs mal appris, vouloir guerroyer le ciel. Ie vous ay destiné à cest estat, nõ seulement par ce que i'y auois receu quelque benediction de Dieu, mais aussi d'autant que dès vostre enfance, vous faisiez declamer, ie vous y trouuois aucunement disposé. Et aussi qu'il me semble entre tous les

estats n'y en auoir que trois, qui doyuent estre singulierement solénisez : celuy de Prescheur, del'Aduocat du Roy en vn Parlement, & de l'Aduocat des parties, comme ceux auxquels l'homme qui a du fonds peut faire demonstration publique des graces que Dieu a infusées en luy, plus qu'en nuls autres. Vray que ie mets au premier rang le Prescheur, non seulement pour le sujet qu'il traite, qui est de la Religion, mais aussi qu'il n'y a celuy des escoutans, de quelque estat & condition qu'il soit, qui ne vienne à son Sermon avec toute submission, & pour y apporter creance. Ie mets l'Aduocat du Roy au second, lequel conioignant avec son esprit, la dignité de son office, rend ses opinions beaucoup plus persuasives. Et en tiers lieu l'Aduocat simple, que ie trouue beaucoup plus penible que les deux autres, pour auoir le plus du temps non seulement à combatre l'Aduocat de sa partie aduersé, ains vn Aduocat du Roy, & encores vn President qui se peut donner permission de le rompre selon que les occasions l'admonnestent. Mais aussi quand il vient à chef de son entreprise, il se rend beaucoup plus meritoire & recommandable que les autres. Et sur tout en ces trois especes d'estats, on a de contenter & satisfaire aux oreilles d'un grand Theatre, qui n'est pas vn petit aiguillon pour nous exciter à bien faire. La premiere recommandation doncques qu'avez entrant au barreau, sera de vous armer de deux choses, d'une bonne volonté, & d'une continuë. I'en ay veu venir au Palais avec vne deliberation d'y bien

*Trois estats
qui relui-
sent prin-
cipalement
entre nous.*

*Quand on
vient au
barreau on
y doit ap-
porter une
bonne vo-
lonté avec
une contin-
uë.*

faire, mais la longueur de l'estat se tournant en eux en langueur, leur faisoit changer de propos, & mettre leurs esprits en autre sujet. Quoy faisant, tout ce qu'ils auoient edifié, s'eluanouïssoit en fumee. I'en ay veu d'autres frequenter le Palais avec vnelongue assiduité, mais d'une volonté si froide, qu'ils sont du tout demeurez en friche. Ie desire le mariage de l'un & de l'autre: asseuré que quiconque en vsera de ceste façon, s'il n'arriue au premier rang, pour le moins ne sera-il des derniers. Et par ce que l'estat auquel ie vous ay voüé, gist part en la Iurisprudence, part en l'Oratoire. Au regard du premier point, encores que les anciens ayent sur tout désiré la memoire au Iuriconsulte, si est-ce que ie ne puis condescendre à leur opinion: quant à moy ie combats pour le iugement. La memoire sans le iugement n'est rien en l'Aduocat: le iugement sans memoire est beaucoup. Nous appellons nostre estude Iurisprudence: pour montrer qu'elle consiste plus en la prudence, & par consequent au iugement. Vray que qui peut auoir l'un & l'autre ensemble, a vn bien grand aduantage sur ses compagnons. Ceste prudence ne s'acquiert que par l'og usage. Partant il vous faut rendre sur vostre arriuee assiduel auditeur au barreau (où l'on digere vrayement les loix) bastir vostre estude sur l'estude de ceux qui plaident, ne vous donner aisémēt loy de les controller, ains tout ainsi que ce grand Pline en tout liure, aussi trouuer toujours quelque chose dont faciez vostre profit,

*Le iugement
est plus re-
quis au I.
C. que la
memoire.*

*La ieune
Aduocat.
doit avec
route sub-
mission se
rendre au
diteur.*

voire en ceux quisõt de moindre merite. L'admiration qui se loge en vn ieune homme, luy est vn grãd progres pour l'aduenir. C'est la mere des sciences. Et ie ne veis iamais homme sur lequel il n'y eust beaucoup à redire, qui trouue beaucoup à redire aux autres. Ie sçay bien qu'apres auoir quelque temps presté l'au-reille, vous aurez part, avec l'aide de Dieu, comme les autres, aux plaidoiries. Et d'autant que ce noble exercice a plus de participation avec l'ancien Orateur de Rome que Iuriscõsulte, ie vous diray deux mots de ce qu'il m'en semble. N'attendez point icy que ie vous enseigne tous ces masques d'oraison qui nous furent representez en ce subiet par les anciens Grecs & Romains, en combien de fa-çon sil faut diuersifier son bien dire, la maniere de remuer les passions de ceux qui escoutent, la closture agreable d'vne clausule, & vne infinité de belles fleurettes dont leurs liures & enseignemens sont farcis. Tout l'artifice que i'entends icy vous donner, est de n'vser point d'artifice: ie veux que vous soyez prud'homme: quand ie dis ce mot, ie di tout. Et ce que Demosthene disoit que la premiere, seconde, & troisieme partie del'Orateur gisoit en vne belle ordonnance de son corps & de son parler ie l'approprie à la preud'homme. Le but où visel'Aduocat par ses plaidoiries est de persuader les Iuges: & on se laisse aisement mener par la bouche de celuy quel'õ estime hõme de bié: au cõtraire soyez en reputatiõ de meschât,

*De quel e-
st est l'ad-
miraton
au ieune
homme.*

*Quel doit
estre l'Ad-
uocat.*

*La pre-
miere piece
de l'Ad-
uocat est
d'estre prud-
d'homme.*

apportez tant d'elegances & hypocrisies de Rhétorique qu'il vous plaira, vous delecterez davantage les oreilles de ceux qui vous escoutét, mais les persuaderez beaucoup moins, parce que chacun se tiendra sur ses gardes pour l'opinion qu'il aura de vous. Ne vous chargez point de cause que ne la pensiez bonne: car en vain pèferez vous persuader vos Juges, si vous n'estes le premier persuadé de vostre cause. Cōbatez pour la verité, & non point pour la victoire. Mais ces deux derniers preceptes sont inutiles; parce que la preud'homme les apporte tout d'une suite quand & soy. Au demeurant ie ne desire pas que soyez seulement preud'homme, ie souhaite que ceste preud'homme soit armée d'une vive force, pour terrasser le vice, soutenir vertueusement le pauvre affligé, faire pavois de vostre conscience contre les efforts des plus puissans, qui veulent abuser de leur autorité & grandeur à la ruine des plus foibles. Ostez de vostre teste ceste courtoisie que ie voy estre pratiquée par quelques uns, qui ne se veulent charger de causes contre les grands, pour ne leur déplaire. Encores que sur le champ vous leur déplaisiez, si est-ce qu'à une autre occasion, reuenans à leur mieux penser, ils vous prendront pour leur Aduocat, voyans qu'aurez bien & fidelement seruy vos parties en contr'eux. Ces propositions estans imprimées dās vous, il me semble qu'il y a deux choses que devez soigneusement observer: l'une de contenter au moins mal qu'il vous sera possible ceux qui vous choisiront pour leur

Aduocat: l'autre de ne mescontenter trop rudement voz parties aduerses. Vous deuez entretenir voz cliens d'une douce chere, ne les rudoyer, supporter de leurs importunittez; faisant ce perpetuel iugement en vous, qu'il n'y a maladie d'esprit plus poignante, que de ceux qui plaident en leurs noms. Non toutes fois que ie veille que liez voz opinions à leurs passions; si vous pensez pouuoir apporter honnestes remedes à leurs causes, il ne les faut oublier. Sinon, c'est pecher contre le saint Esprit, de les repaistre de vaines esperances en leur administrant ie ne scay quels moyens, plus familiers au Palais que ie ne voudrois, pour tenir les choses en longueur. Ce sont autant d'artifices de la ruine des pauvres gens. En vsant de la facon que ie vous dy, vous abonderez moins en pratique, mais elle sera plus solide, & honorable. Entant que touche voz parties aduerses, donnez ordre s'il est possible d'attremper voz plaidoyers de modestie: iamais la modestie ne fut malseante à nul, & par especial au ieune homme. Non toutes fois que ie vueille qu'elle se tourne en preuarication. Cela depend de la prudence de l'Aduocat, de peser ce qui est necessaire de taire ou de dire en sa cause. L'on dit que Philippe Roy de Macedone ayant à sa suite vn seigneur qui auoit trahy son pais en sa faueur, & le gratifiant de pensions pour le bien qu'il auoit receu de luy: ce seigneur se plaignit à luy de ce que quelques gentils hommes Macedoniens l'auoyent appellé traistre, dont il esperoit

Celuy qui plaide est aucunement excusable en ses passions.

L'Ad- uocat, doit estre modeste & comment.

auoir bien grande repartation: ce sage Roy sans s'enaigrir autrement, luy respondit: que les Macedoniens estoient de leur nature gens rustiques, qui ne pouuoient représenter les choses, qu'avec la naïfueté de leurs paroles. S'il y a de la malefaçon exemplaire, ie ne pense point qu'il la falle dissimuler: és autres choses ie seray bien d'aduis que l'on pardonne à la pudeur des personnes. Vous ne deuez vous presenter au public que bien préparé de voz causes: le seul objet de ce grand tribunal vous doit en cecy seruir de leçon. Voz plaidoyers ne seront, ni trop brieufs, ni trop longs, la briefueté cause souuent l'obscurité: & la longueur attedie ordinairement les Iuges. Mais on ne peut dire rien estre trop long, quand l'on dit ce qui sert necessairement à la cause. Encores vous diray ie ce mot: Iesçay

*Qu'il faut
estre auaricieux de
son honneur.*

que nous choisissons diuerses vacations pour passer avec quelque commodité nostre vie. Ie veux que soyez auaricieux, mais d'une noble auarice, de l'auarice de vostre honneur & non de l'argent. Les anciens colloquerent le temple d'Honneur ioignant celuy de Vertu, pour nous enseigner que l'honneur nous est vntaisible acheminement à la vertu. Exerçant vostre estat de ceste façon, ie remets le demeurant de vostre fortune entre les mains de Dieu, lequel vous deuez implorer en toutes voz actions, avec vne ferme asseurance qu'il ne laisse iamais ceux qui de cœur deuot le reclament. De ma part i'en oublieray rien de ce que ie penseray faire à vostre promotion &

aduanccement, comme bon pere: mais au conseil que ie vous donne, ie ne seray iamais marry que vous oubliiez d'estre mon fils: ie veux dire que vous pensiez estre fils d'un pere qui n'a moyen de vous pouller, & que conduisiez vostre fortune comme si elle commençoit de prendre ses racines en vous, sans mon aide & ministere. Il n'y a rien qui perde tant le Parisien, que l'opinion qu'il a d'estre fils d'un pere qui a quelques biens & moyens.

A Monsieur Chandon Secretaire du Roy.

E meure s'il ne falloit faire mourir *il combat*
Machiauel & so liure dedas vn feu lors *Machiauel*
que dedas son institutiō du Prince il fut si impu- *qui a fait*
dēt de nous faire vn chapitre de la Sceleratesse *un chap. de*
(ainsi le dit il) par lequel il enseigne comme le *la Scelera-*
Prince peut paruenir à vne principauté, & s'y *tesse, par*
maintenir par meschanceté. Mon Dieu! se *lequel il*
peut il faire que ceste proposition monstrueuse *monstre*
soit entree en la teste d'un qui se disoit Chre- *comme un*
stien, & que les Ethniques, qui n'eurent *Prince se*
cognoissance de la lumiere de Dieu qu'à *peut main-*
tats, nous ayent appris qu'il ne falloit *tenir en son*
en nulle affaire separer l'utilité d'auēc- *est par*
ques l'honneur, entendans par ce mot *meschan-*
d'honneur tout ce qui concernoit la vertu? *ceté.*
Je laisse que le mot de Sceleratesse de soy
est honteux, & qu'il n'y a putain si descheuelee
en particulier, qui ne soit bien aise en public de
contrefaire la prude femme. Et toutes fois
cest homme de bien donne à ce chapitre le
frontispice de meschanceté. Je ne pense

point qu'il y ait au monde discours qui contiene plus d'impieté, d'enseigner à celuy qui doit estre la vraye image de Dieu en ce bas estre, d'acquérir vne souueraineté par mal faire, & de luy vouloir faire accroire par exemple qu'il s'y pourra conseruer. Ie dy que c'est errer en l'histoire, ie dy que c'est se fouruoyer non seulement en discours, ains en sens commun. Ie ne nie pas que Dieu quelques fois par vn iugement caché ne permette que le Prince ne paruiene à vn grand estat par cesmoyés extraordinaires, & qu'il n'abuse de la puissance absoluë au preiudice de ses subjets.

*Qui apres
que Dieu a
puny les
subiets par
la Seclera
resse d'un
Prince, il
punit puis
apres le
Prince.*

*Les pre-
miers liures
de Tite
Liuë, sur
lesquels
Machiuel a
faict des
Discours,
condamnet
son opinion
de la Seclera-
tesse, sur
qu'il s'en
soit aduë.*

Mais apres qu'il s'est ainsi voulu iouer, ie ne voy point que la fin n'en ait esté tousiours tragique, & à peu dire que Dieu ne jette les verges au feu dont il auoit voulu chastier, ou le peuple, ou quelques particulieres familles. Et ce qui me rend encores plus courroucé contre ce grand Machiauel; c'est que iamais homme ne fut plus nourry en la lecture de Tite Liue que luy, tesmoins les trois liures de Discours qu'il feist sur la premiere Decade, de laquelle combien qu'il peut tirer vne leçon telle que ie soustiens, voire dès l'entree de l'œuvre, toutes fois il estoit tombé en sens si reprouué, qu'elle luy passa deuant les yeux sans y donner aucune atainte, s'amusant à tirer vne quinte essence d'autres histoires, & laissant celle qui seruoit à l'edification des Roys & Princes souuerains. Ie repasseray sommairement ce que i'en ay leu. Vous trouuerez qu'Amulius Roy d'Albe fut tué par

tué par Romulus & Remus ses neveux : Romulus par les patrices & sénateurs qu'il auoit instituez : Tarquin le vieil par deux pastres qui faisoient contenance de s'entrebatre: Seruius Tullus par Tarquin l'orgueilleux : & cestuy finalement expulsé de son Royaume, avec toute sa famille sans esperance de regrés par Iunius Brutus son cousin germain. Voila vn piteux fondement d'une si grande principauté. Mais qui considerera quels sont les iugemens de Dieu, il verra que tous ces Princes estoient paruenus à leurs estats par sceleratesse, ou que par la mesme voye ils s'estoyét voulu maintenir : & neantmoins que quelque sage discours humain qu'ils eussent apporté pour s'y conseruer, Dieu en fin par l'iniustice des hommes exerça en eux sa iustice. Je commenceray par Amulius : à Numitor son frere aîné appartenoit l'estat d'Albe par vne prerogative de son aage, toutes-fois Amulius luy osta le sceptre des mains luy conseruant seulement la vie, pour l'estimer homme de peu. Mais craignant que sa posterité prit à l'aduenir argument de remuer contre luy nouveau dessein, il tua toute la lignee masculine de Numitor ; & quant à Rhea sa fille, la feit rendre Nonnain voilee : estimant que le vœu de chasteté, où elle entroit, & la seure & estroite garde en laquelle elle seroit, luy osteroit, & l'enuie, & le moyen d'auoir enfans. Toutes-fois tout au rebours de son intention, Rhea commet vn inceste par lequel elle eut d'une ventree deux enfans, ce furent Romulus & Remus. Dont

*Il discours
sur les pre-
miers Roys
de Rome,
qui paruin-
drent à
leurs estats
par malen-
gin.*

Amulius son oncle aduerti iouï à ce coup-cy à quitte ou à double, & commande qu'ils fussent submergez. Celuy qui en eut la charge obeit, & non obeit tout ensemble. Parce qu'il les exposa à la misericorde du Tibre dans vne aulge. Et comme le ciel les preparoit à vne iuste vengeance du tort qui auoit esté fait à leur ayeul, leurs oncles, & leur mere, comme si le Tibre eust eu quelque sentiment, il eut pitié d'eux & les chassa à bord, encores leur falloit-il nourrisse pour les sustenter. Vne Loue naturellement impiteuse les allaite toutes-fois humainement de ses mammelles. En fin estans nourris entre les pastres, & ayans sceu leur condition, ils font vn amas de gens perdus & desesperez, & avec cest aide des-pouillent Amulius leur oncle tant de sa vie, que de son Royaume, auquel ils retablissent le bon Numitor leur ayeul en la ville d'Albe. Et quant à eux, vont fonder la ville de Rome avec leurs adherans où Romulus commença de regner. Voyez avec combien de meschancetez Amulius s'estoit pensé faire grand selon le sens humain, & toutes-fois en vn instant, lors qu'il pensoit estre plus asseuré, il veit sa grandeur, & son asseurances'esuanoïir en fumee? Le semblable aduint il à Romulus, & sous mesmes gages. Car voyant que Remus son frere estoit vne espine à son pied, il le tua malheureusement sous vne querelle d'Alemant à fin d'oster ce corriual de sa pensee. Il s'estoit par ce moyen estably seul en la Royauté, & ne voyoit plus qu'il y en eust aucun qui

luy peust faire teste. Vray qu'il n'auoit attainc au dessus de son intention. Par ce que nulle femme ne vouloit prendre alliance de mariage avec ces patrices qui estoient gens composez de toutes pieces, les vns bannis, les autres fuitifs de leur país pour la crainte du magistrat, comme ceux qui auoyent suiuy la fortune d'un ieune Prince desesperé. Parquoy pour fonder sa principauté de tout poinct il fait encores deux traits tres-meschans. Pour le premier il bastit vn temple qu'il dedie à vn Dieu imaginaire nommé Asille, pour seruir de retraite à tous les meschans, sans que l'on leur peust mal faire à l'aduenir, apres qu'ils y seroyent entrez & rendus citoyens de Rome. Et afin de trouuer mariage aux siens, il fait puis apres publier par tous les enuiron de la ville qu'il vouloit faire ioüer des jeux magnifiques & solempnels, ausquels il conuia tous les peuples voisins, mesmes les Sabins par vne hospitalité qu'ils auoyent ensemble : lesquelss'y estans transportez avec leurs femmes, enfans & familles, à peine furent les jeux ouuerts, que les Romains se iettent pêle mesle au milieu des pauvres Dames Sabines, lesquelles ils se donnent en proie, & enleue chacun sa chacune qu'il espouse bon gré mal gré peres & meres. Si iamais infidelité fut commise, si iamais on viola le droit diuin & humain tout d'un coup, ce fut lors : aussi appporta cela plusieurs guerres entre le Sabin & Romain : pour ausquelles mettre fin, mesme par l'intercession des femmes, qui estoient possedees par

leurs nouveaux maris, fut faite vne conclusion generale de paix, par laquelle il fut aduisé que tout ainsi que par le lien & vnion de tels mariages les deux peuples se trouuoient estre incorporez & vnis ensemble, aussi viuroient-ils de là en auant sous la puissance vnue de deux Roys. Et deslors de deux Republiques on en feit vne qui fut regie par l'entremise de Romulus Roy des Romains, & Tatius Roy des Sabins; vray que l'un & l'autre auoyent leur Senat separé, dont ils prenoient aduis, & puis par commune conference le rapportoyent ensemblement pour suiure ce qui seroit plus expedient. Cest establissement passa quelque temps par dissimulation & conuiuence de la part de Romulus, mais comme il estoit impatient de corruial; aussi donna-il ordre de faire mourir Tatius, quoy que soit iamais il ne prit punition des meurtriers. Qui monstre assez qu'il y auoit consenty. Et depuis se voyât auoir attainct au sommet de ses desirs, commença deslors à empieter la tyrannie sur les patrices, & de les vilipender. Qui les occasionna en fin de le tuer. Ainsi vous voyez vne punition exercee encontre luy sur vne querelle nouuelle : mais à mon iugement proueneue d'une vraye iustice de Dieu, pour le chastier des meschâcetez qu'il auoit exercees pour regner, contre Remus, les Sabins, & Tatius. Ce que i'ay maintenant à vous escrire contient vne plus grande & longue chaisne de vengeance que Dieu permet, pour seruir d'exemple à tous Roys de ne gaigner leurs estats par scele-

rateffe. Tarquin le vieil eſtranger, homme riche & opulent, pour ſe garentir de l'enuie des ſiens quitta par le conſeil de Tanaquil ſa femme le pays d'Hetrumie où il reſidoit, & ſe vint habituer dedans Rome; où il ſceut ſi bien diſſimuler ſon naturel par beaux ſemblans, que non ſeulement il gaigna la bonne grace du Roy Ancus Marcius, mais qui plus eſt entra en opinion enuers luy d'une tresgrande preud'homme. Qui fut cauſe que mourant il luy recommanda ſon Royaume, & le createur de ſes enfans mineurs, eſtimant qu'il n'y auoit meilleur moyen de leur conſeruer ſon eſtat qu'en le deſpoſant és mains d'un ſi homme de bien. Mais il n'eut pas les yeux ſi toſt clos, que par ſourdes pratiques & menees il ſe feit proclamer Roy de Rome, tant par le peuple que le Senat. Ceſtuy ſçachant que par voyes indirectes il eſtoit paruenue à ceſte grandeur, eſtima que pour s'y conſeruer, il y deuoit apporter de l'artifice, crea cent autres Senateurs, pour eſtre de ſa faction; eſtimant qu'autant de nouuelles creatures de ſa main, luy ſeroient autant de ſupport contre les conſpirations & embuſches que l'on pourroit faire contre luy: il amuſe le peuple par diuerſité de jeux annuels qu'il introduiſit, donne police de ſeance en iceux à vns & autres magiſtrats pour les contenter, fait vne infinité d'ouurages publicques pour ſeruir d'amuſoir au peuple. Toutes-fois pour fin de la tragedie, apres auoir regné pluſieurs ans, les deux enfans d'Ancus Martius le font

assassiner par deux pastres, feignant deluy de-
 mander iustice d'une querelle qu'ils auoyent
 ensemble. Ni pour cela ne furent ils reestablis
 en l'ancienne dignité de leur pere: Car le ciel
 couuoit vne plus notable vengeance contre
 la memoire de Tarquin le vieil. Aussi n'estoit
 ce pas vne petite perfidie, d'auoir osté la cou-
 ronne aux pauures pupils qui luy auoyent esté
 donnez en depost, comme ceux que nous de-
 uons auoir en pareille, ainçois plus grande re-
 commandation que noz propres enfans, les-
 quels nous acquerons aux despens de nostre
 vegetatiue seulement, & ceux-cy sous vne
 reputation de preud'homme que nous auons
 acquise parmy le peuple. Tanaquil femme de
 Tarquin ayant dès sa ieunesse esté nourrie en
 la science de deuiner fort familiere aux He-
 truriens, imagina que Seruius Tullus estoit né
 pour estre grand Roy, ores qu'il fust né d'une
 femme esclaué, & qu'il fust vn enfant bastard,
 qui n'auoit cognoissance de son pere. Et ce
 d'autant qu'en son dormant on auoit veu re-
 luire vn grand feu sur son chef. Cela fut cau-
 se qu'elle mesme procura le mariage d'une sié-
 ne fille & de luy. Comme doncques Tarquin
 le vieil eut esté blecé & retiré par la Roynie sa
 fême en vne chambre où il mourut tost apres,
 ceste Dame sollicita à l'instant mesme Seruius
 son gendre de s'emparer des forces, & pour y
 apporter quelque fueille, donna à entendre au
 peuple que le Roy son mary estoit vif, & qu'il
 auoit commandé à son gendre de prendre la
 charge des affaires en main, pendant qu'il re-

uiendroit en conualefcence. Ce qu'il fait, & fi dextrement, quefans attendre, ni l'autorité du peuple, ni du Senat, luy mefme par vne puiffance abfoluë s'installe Roy. Ce qui n'auoit iamais esté fait: & pour fonder à meilleures enfeignes son estat, d'un costé il baille en mariages les deux filles à ses deux beaux freres Tarquin & Aruns, d'un autre costé apres auoir radoubé la premiere faute, & s'estre fait confirmer en sa Royauté par le Senat & le peuple, il publie vne infinité de loix politiques, obtiét plusieurs victoires contre les peuples estrangers, & regne quarante quatre ans. Toutesfois lors qu'il pensoit son estat estre cloüé à cloux de diamant, & que le long laps de temps eust enseuely sous le cercueil d'oubliance la memoire du tort qu'il tenoit à ses beaux freres & gendres; le temps suscite sa fille mefme, qui exhorte son mary Tarquin à recouurer l'estat sur son pere, & de le tuer. Chose qu'il entreprit, & executa vigoureusement, n'ayant autre instigateur, & promoteur de ceste entreprise que sa fille contre le pere: laquelle mefme voyant le corps de son pere mort sur la place, passa avec son char dessus luy. Voyez, ie vous prie, quelle est la piteuse fin de ceste histoire. Tarquin le vieil homme nouuellement adopté dans Rome se fait couronner Roy. Seruius Tullus naturellement esclau, apres son decez obtient pareil tiltre. Cestuy là au desaduantage des pupilles: cestuy au preiudice des enfans mefmes de Tarquin, n'ayant autre plus

prompt conseil pour ce faire, que la mere mesme de ceux auxquels appartenoit en droicte ligne la couronne : &, qui est le comble de ceste miserable histoire, cestuy-là fut tué par deux pastres à l'instigation des enfans du Roy Martius: cestuy par son gendre à la suscitation de sa propre fille. Et vrayement voila l'exécution d'un grand & celebre Arrest, qui doit enseigner à tout Prince de n'entrer point par meschanceté à vne principauté. Ce meurtrier Tarquin dernier regna depuis avec vne façon si estrange, qu'il fut surnommé l'Orgueilleux, desdaignant le conseil des Peres, tyrannisant à outrance le peuple, voire iusques à violer la femme d'un sien parent & Sénateur. Aussi Dieu permist pour closture de ce ieu, qu'il perdit entierement son Estat : sans esperance de ressource pour luy & les siens. Et ce mesme par le moyen de Iunius Brutus son cousin germain: lequel de la corruption d'une Monarchie bastit un Estat entremeslé de l'autorité des Potentats & du peuple. Qui a esté l'un des plus grands qui iamais ait esté au mode. En effect voila la fin des premiers Roys de Rome, qui voulurent ou paruenir ou se maintenir par sceleratesse en leurs royautez. Au cōtraire, vous trouuerez un numa, un hostilius, un martius auoir eu fins douces, calmes, & tranquilles, telle qu'auoyét esté leurs dignitez, auxquelles ils estoient arriuez, & s'y estoient maintenus par les voyes ordinaires qui font regner les bons Roys. Pleust or' à Dieu que Machiavel au lieu de plusieurs autres discours, nous eust seruy

de ce premier mets, comme faict ce grand Tite Liue. Je croy que ceste seure leçon eust mieux vallu pour l'instructiō de nos Roys: que tout ce qu'il a deduit dedans les trois liures: ou pour le moins cela luy eust seruy de bride pour ne faire point dans son Prince vn chapitre de la meschancetē. mais que m'amuse-ic à vous solenniser ces exemples? Je ne veux que le Machiauel mesmes pour le condamner. Les sages auteurs voulans bailler quelques instructions & memoires aux Roys de bien regner, leur presenterent des Roys preud'hommes & guerriers, pour leur seruir de miroier & exemple. Ainsi Xenophon dressa sa Cyropēdie sur le modelle du Roy Cyrus. Ainsi l'auteur de Marc Aurelle nous proposa ce grand Empereur, à fin que sur ce patron les autres Princes formassent leurs deportemens. Machiauel au contraire nous baille pour exemple d'un tres-grand Prince, le plus meschant qui fut oncques, si vous croyez à tous ceux qui escriuient de son temps apres sa mort: ce fut Cesar Borgia. Or au mesme chapitre où il raconte les fruiets que la sceleratesse apporte aux Princes (ie suis contrainct d'vser souuent de ce mot, comme estant celuy qu'il employe en ce lieu là) il recite l'histoire de Borgia, qui auoit entrepris durant vn soupper, faire mourir quelques Cardinaux, personages d'honneur, qui n'estoyent de sa faction, ny du Pape Alexandre son pere: & pour y paruenir auoit donné charge au sommelier de leur donner à boire du vin qui estoit en quelques bouteilles qu'il

*L'exemple
de Cesar
Borgia,
dont Ma-
chiauel
fait estat
entre les
Princes qui
se sont vou-
lus main-
tenir par
meschan-
cetē, con-
damne le
mesme
Machiauel*

auoit empoisonnees, estimant qu'ayant la fin de ceux-cy, il viendroït puis apres aisement à chef de son dessein, qui estoit de se faire Roy dela Toscane. Grand conseil (ce dit ce grand precepteur des Princes) mais il ne voit pas quelors que Borgia pensoit auoir attainé au dessus de son entreprise, Dieu dissipe en vn instant ses conseils, & veut que le sommelier mesprenant donne du vin empoisonné à Borgia & à son pere, qui en moururent quelque temps apres: & les autres designez par ceste malheureuse trahison à la mort s'en retournerent sains & sauues. Parlez à vn Machiaueliste, il vous dira que c'estoit vn braue projet bien tramé. Mais vn homme de bien rapportera sagement ceste mort à vne grande prouidence de Dieu, qui veut que les meschâs Princes prennent vne fin malheureuse. Nous sommes les iouïets des Roys, les Roys sont les iouïets de Dieu. Ils sont les procez au peuple: le peuple à eux au semblable par les benedictions ou maledictions qu'il leur donne selon leurs merites ou demerites: sur lesquels Dieu le grand Iuge de nous interpose puis apres ses parties. Tel Prince pense estre bien asseuré en sens humain, lequel à vn cil d'œil voit toutes ses opinions renuersees, & se trouue si malheureux que le plus grand heur qu'il ait, est de trouuer de l'eauë pour boire dedans le creux de sa main pour estancher sa soif, comme Darius Roy de Perse, apres la victoire d'Alexandre: ou bien de rencontrer homme qui le vueille massacrer, pour mettre fin à ses miseres: ce que le

*Dieu fait le
procez aux
Rois.*

cruel & impiteux neron ne peut trouuer apres auoir exercé toutes sortes de tyrannies contre son peuple. Je souhaiterois que tous ceux qui approchent les Princes eussent ces miroïers deuant eux, pour les leur représenter, & non ce malheureux autheur que ie voy estre chery & honoré presque de tous les courtizans, dont la condition est telle, que tout ainsi qu'ils sont nez pour estre esclaves, aussi ne projecttent-ils rien que de rendre les autres esclaves. Estimant que c'est vn grand secret de nourrir leurs maistres en ces propositions extrauagantes & miserables. Vous approuuez doncques l'autheur de l'Antimachiauel (direz-vous.) Il y a des extremitez en luy, comme en l'autre. En ce qu'il se conformera à la Iustice, & au repos du bien public, ie seray volontiers des siens: Mais si par propositions erronees, il veut exciter à murmure les sujets encōtre leur souuerain magistrat, ie le condamneray tout à faict. A Dieu.

*A Monsieur Chandon Secretaire
du Roy.*

LE discours que ie vous escriuy dernièrement sur les vengeances que Dieu voulut estre exercees contre les premiers Roys de Rome, qui voulurent appuyer leur grandeur sur voyes extraordinaires & meschantes, m'en a remis vn autre en memoire, sur vne querelle qu'vn ie ne sçay quel courtizan me dressa ces iours passez en vostre presence, quand

*Combien le
Romain a-
uoit l'esprit
resolu à
executer ce
qu'il pro-
ettoit.*

*Mot inepte
qui s'est
aujour
d'huy insi-
nué entre
les Courri-
zans.*

*Admira-
bles resolu-
tions des
Romains.*

*Deux a-
dulteres,
l'un com-
mis
l'autre que
l'on vou-
loit com-
mettre, fu-
rent cause
de perdre
l'estat de
Rome à
ceux qui
le posse-
doient.*

il m'aduient d'appeller vn esprit Romain, celuy
quel'on appelle maintenant en Cour, homme
Determiné. Mais aduisez, ie vous prie, qui m'a
semonds à ceste metaphore. Je n'ay iamais veu
histoire où i'aye veu l'esprit d'un homme si re-
solu au bien ou mal, comme du Romain. Je
vous repasserois volontiers tous ces premiers
Roys, mais ce ne seroit qu'une redite. Tou-
tesfois, s'il vous plaist vous en ramenteuoir,
vous trouuerez que iamais resolution ne fut
telle en meschanceté, comme celle que la plus-
part d'eux eurent pour regner. Aussi s'il vous
plaist tourner le fueillet, vous les trouuerez
tout autant Determinez à bien faire (i'vseray
de ce mot avec nos Courtizans) lors que sous
la Dimocratie ils entreprindrent non seulemēt
la protection de leur liberté commune, mais
aussi de la discipline publique. En ceste façon
lisons-nous vne resolution admirable en Bru-
tus, quand apres auoir exterminé les Roys de
la ville, il iugea non seulement son fils à mort,
ains fut spectateur du supplice, pour auoir a-
uec quelques autres ieunes Gentils-hommes
Romains conspiré contre la Republique en fa-
ueur de Tarquin l'Orgueilleux. En ceste mes-
me façon veit-on vn Virginius tuer en pleine
place la fille innocente, Virginia, à fin qu'elle
ne fust violée par Appius Claudius: lequel abu-
sant de son autorité Decemvirale, exerçoit la
tyrannie dans Rome avec ses autres compa-
gnons. Quoy faisant tout ainsi que la mort de
Lucrece fut cause de l'extirpation de la tyran-
nie des Roys, aussi la mort de Virginia restablit

ceste belle liberté, qui auoit esté emblee par l'autorité extraordinaire de ces nouueaux Decemvirs. C'est vne chose detestable deuant Dieu & deuant les hommes, qu'un enfant tué son pere, ou soit autheur de le tuer, ny que le pere tue son fils. Le premier fut executé par Seruia contre le Roy Seruius son pere, pour faire regner Tarquin son mary. Le second par Brutus & Virginius, pour la manutention de l'estat de la chose publique. Le premier fut abhominé de tous, par ce que l'occasion en estoit sinistre. Le second honoré & embrassé de chascun, d'autant que c'estoit pour vne fin honorable. Le semblable en aduint-il pour la conseruation de la discipline, en laquelle nous voyons vn Manlius auoir condamné son fils à mort, pour auoir esté si temeraire de combattre sans son commendement, ores qu'il eust eu tres-heureux succez & victoire de ses ennemis: mais pour la dangereuse consequence que ce pere rigoureux (mais tres-sage Capitaine) voyoit en pouuoir aduenir à l'estat, s'il eust passé par conuience tel faict. A fin ce pendât que ie vous escoule sous silence, vn Horacius, vn Sceuola, vn Decius, qui de propos delibéré s'exposerent à vne mort volontaire, pour garantir leur pays de l'estranger, n'estans pas les deux premiers de moindre merite & recommandation sans mourir, que le dernier en mourant. Mille autres nous auons de ceste mesme impressiõ. Et voila en peu de paroles pourquoy i'appelle vn esprit Romain ce-luy que le Courtizan du iourd'huy appelle

Combien la discipline publique fut en recommandation d'as Rome.

Determiné. Mot auquel ie ne trouue pas grãd fondement pour luy donner vogue , encores que ie le voye authorizé par les bouches de plusieurs gens de Cour , que ie n'establiray iamais pour iuges du bien parler , combien que le commun peuple se persuade le contraire. A Dieu.

A Monsieur de la Croix du Mans.

*Il exhorte
le seigneur
de la Croix
du Mans,
qu'il se gar-
de d'estre
surpris par
les recom-
mandatiōs
d'uns &
autres qui
desireront
d'estre con-
chez, com-
me au-
teurs en
sa Biblio-
theque des
auteurs
de la Fr.ñce.
Pierre Pas-
chal kom-
me qui se
faisoit va-
loir par les
plumes
d'autrui.*



Entends que bastissez vn liure qu'intitulez, La Bibliotheque, qui est vn Catalogue general de toutes sortes d'auteurs qui ont escrit en François, avec vn recit de leurs compositions, tant imprimees , qu'à imprimer. Oeuure certes laborieux , & digne de celuy qui a beaucoup veu & leu. Mais auquel auez à vo^r garder de plusieurs embusches de ceux qui , pour ne pouuoir paradventure rien de soy, tascheront des'aduantager en reputation, aux despens, non de leurs plumes, ains de la vostre. Car ne pensez pas que la fosse de Pierre Paschal n'ait produit plusieurs reiettons. Quand ie vous dis Pierre Paschal, vous sçauiez ce que ie veux dire. Et neantmoins puis que ie suis maintenant de loisir , encores vous en feray-iele cōpte par maniere de passe-téps. Pierre Paschal estoit vn Gascon , qui sur son premier aduenement se fit amy & compagnon de la plus-part des Poètes de nom qui florissoient sous le regne du Roy Henry second. Ce-
stuy voyant tant de nobles esprits mettre la

main à l'œuvre, & qu'il luy eust esté mal feant au milieu d'eux de fetaire, commença de nous repaistre de belles promesses. Se vantant de faire l'histoire de son temps, & pareillement le sommaire des vies des gens de marque qui lors estoient, à l'imitation de Paul Ioue. Sous ces faux gages, il sollicitoit impudemment vns & autres Poëtes de le trompeter par leurs escrits. Leur promettant vne pareille, & de les arranger entre ses Hommes illustres. Ses importunités & prières porterent tel coup, qu'estant haut loué par Monsieur de Ronfard, & quelques autres, le bruit de son nom en vint iusques aux oreilles du Roy Henry. Ce n'est pas vñ petit secret és affaires du monde, d'enuoyer vñ bon bruit de nous, pour auant-coureur de nos actions. Le Roy au son de sa renommée le fit son Historiographe, aux gages de douze cens liures par an. Toutesfois apres son decez on ne trouua rien si froid que son estude. Car aussi, pour en dire le vray, il ne sçauoit parler ny Latin, ny François: & le peu de Latin qu'il redigeoit par escrit, estoit tiré piece à piece des Commentaires de nizolius, pour dire qu'il estoit Cicéronié. De ce vous en puis-je asseurer, cōme celuy qui l'ay veu de pres. Et qui est le plus beau de ce compte, c'est qu'au mariage de la Roïne d'Escoffe avecques le Roy Dauphin, il fit imprimer vne longue harangue fort mal bastie, dans laquelle il faisoit parler au Roy ceste Princesse fort ieune, quand elle arriua en la France, tout ainsi que si elle eust eu trente ans sur la teste. Et portoit le tiltre que ceste harangue

auoit esté extraicte du quatre ou cinquiesme liure de son Histoire, dont il n'auoit encores encommencé le premier. Celuy qui halena premierement son fard, sur ce grand & docte Adrian de Tournebu, personnage aussi aigu & violent en Satyres contre ceux qui le meritoient, comme doux en mœurs & conuersation avecques les gens d'honneur & de lettres. Lequelluy fit vne plaisante Epistre sous ceste intitulation. *Egotibi*, laquelle fut depuis mise en François par du Bellay, & à leur suite Ronfard quil'auoit tant de fois célébré par ses escrits, chantant vne palinodie, fit vn Elogue Latin de luy, que ie traduisi en François, & ay encores entre mes broüillats. Je vous dirois volontiers que Guillaume Cretin fut presque de ceste meisme trempe, sous le regne du grand Roy François: Car ie le voy solennizé par Marrot, & quelques autres qui florirent de ce tēps là, comme grand Historiographe du Roy: & neantmoins nous nelisons rien de ses escrits. A quel propos tout cecy? Pour vous dire que soudain que l'on aura le vent de vostre liure, ie ne fais nulle doubte que ne soyez courtizé de plusieurs, à fin qu'y enchassiez leurs noms. Auez vous iamais leu les deux epistres de Ciceron & Pline, par lesquelles ils se recommandoyent à face ouuerte, cestuy-la à Luceius, cestuy-cy à Cornelius Tacitus, à fin d'auoir quelque lieu dedās leurs histoires? Le semblable fera l'on en vostre endroit. Et neantmoins il me semble que ne deuez-vous laisser emporter à telles importunitéz. Les liures muets doiuent parler

Guillaume
Cretin.

parler pour ceux qui ont escrit. A tous autres il faut auoir l'aureille sourde. Tout ainsi comme l'on dit qu'il n'est point en la puissance d'un Roy de faire des Princes artificiels, par ce qu'ils se font tels dès leur naissance : aussi ne pouuez vous faire des auteurs, il faut qu'ils se facent d'eux mesmes. Et en cecy si ie vous pouuois seruir de quelques instructions, il me semble que deuez apporter double consideration à vostre entreprise : L'une pour ceux qui par cy deuant ont escrit, lesquels ont payé le tribut commun à nature : L'autre pour ceux qui sont viuans. Quant aux premiers, vous en auez plusieurs qui ont fait des œuvres qui ne courent par les mains de tous, pour n'auoir iamais esté imprimées, ains sont és grandes Bibliothèques, ou en autres particulieres. Aufquels ie suis d'aduis que donniez leur place, comme aux autres. Vous auez Monsieur Fauchet premier President aux monnoyes, personnage qui, sans fard & hypocrisie, s'estudie à ces vieilles recherches, lequel vous y pourra seruir d'un bon guide, comme celuy qui en son Recueil de l'origine de la langue & Poësie François a amassé les noms & sommaire des œuvres de cent vingt-sept Poëtes François, viuans au parauant l'an mil trois cens. Mais sur tout ie desire aussi que lors qu'en ferez estat, vous recognoissiez celuy qui vous aura soulagé de peine. Car en matiere de liures ie hay mortellement l'homme qui transforme son emprunt en larcin. Au regard des autres qui courent par les impressions, ie m'assure tant de vostre suffisance, que

Quelle ordonnance doit tenir le sieur de la Croix dans son liure.

Monsieur Fauchet. docte homme en nostre siecle.

n'en oublierez vn tout seul : ſçachant que vous vous eſtes ſoigneuſement attaché à ceſte eſtude. Voila pour ce qui concerne les morts : & pour le regard des viuâs, ie ſouhaite que ſoyez vn peu plus retenu. Il y a des hommes fort doctes qui ne ſ'amuſent à recommander par eſcrit leurs noms à la poſterité, encores qu'ils le peuſſent faire. Ie croy que ceux-là n'attendent de vous nul Eloque pour le ſujet que traictez. Quant aux autres, les aucuns ont eſcrit, & ſont leurs eſcrits publiez auxquels vous feriez tort & à vous, ſi vous n'en failiez honneſte commemoration. Et neantmoins encores y conuient-il apporter quelque attrempance: car pour auoir fait courir quelque chanſon, ſonnet, ou epigramme, cela ne me ſemble digne d'en faire grand compte, ſ'il n'eſtoit ſuperlatif en ſon eſpece. Par ce qu'il y a bien difference entre bien faire vne epigramme ou vn liure : & toutesfois il peut aduenir qu'un epigramme bien fait, tel que celui de Vitalis pour la ville de Rome, ſe parangonnera à vn liure. Au demeurant quant à ceux qui ſe vantent auoir fait des liures qu'ils gardent dans leurs maiſons, ou qui promettent d'en faire, ie loüe l'intention des premiers qui veulent ſoumettre leurs œures à leur cenſure de neuf ans. Et pour le regard des ſeconds, nous deuons leur ſçauoir bon gré de bien vouloir à leur patrie: Mais d'autant qu'ils ne me ſemblent en l'un & l'autre de ces caſes eſtre auteurs que'n herbe, & non en gerbe : certes ſi vous les y mettez, ie les coucheray au chapitre (quel'on appelle en la chambre

des Comptes) de Reprise & deniers comptez non receus. Je seray tousiours de l'aduis de Martial, quand il dit:

Non scribit, cuius carmina nemo legit.

Aussi n'estime-ie nul homme deuoir estre mis au calendrier des auteurs, sinon pour le regard des liures qu'il aura exposez en lumiere.

Quand ie vous en parle en ceste facon, ie ne me pardonne à moy mesme. I'auois au premier de mes Recherches de la France promis six liures, dont ie n'ay fait imprimer que les deux premiers. I'ay les quatre autres sous ma clef, que

Les six liures des Recherches de la France.

ie communique particulierement à tous mes amis, qui me font cest honneur de me visiter. Cependant puis que ie leur ay ordonné vn silence, pour quelque raison qui m'induit à ce faire, aussi ne seray-ie iamais marry que vous n'en faciez d'estat. Je ne veux pas seulement que vous croyez que ie les aye faits, pour la consequence, & afin que ne soyez trompé des autres qui vous pourroyent dire le semblable de leurs compositions, qui se tourneroyent apres en fumee. Brief si avec ceux qui ont escrit, vous enregistrez les autres qui peuuent ou qui promettent d'escire, & ceux qui se pourront vâter auoir de beaux & grands subjects par deuers eux, vous trouuerez par vostre liure, qu'il y a auourd'huy plus d'auteurs viuant par la France, qu'il n'y eut oncques par le passé. Qui seroit vne chose du tout inepte & ridicule. C'est pourquoy vous y deuez apporter vne grande circonspection. Autrement ie seray bien empesché de iuger si vous leur ferez

plus de tort en les inferant dans vostre liure, ou eux à vous. Et crains qu'en leur conscience, ils ne se moquent de vous ou ne pensent estre moquez par vous. D'auantage prenez garde qu'en voulant gratifier à ceux qui ne le meriteront pas, ne faciez tort aux autres qui seront de quelque merite. Il y a autant & plus de faute de conferer aux indignes les offices ou benefices, comme d'en frustrer ceux qui en sont dignes. Je suis seur qu'y apporterez telle prudence que l'on scauroit desirer de vous. Si le faites vostre Bibliotheque en sera moins enflée, mais plus solide : & j'aimeray tousiours mieux vn homme fort & nerueux, que boursoufflé de gresse. Je vous escriis cecy comme à celuy que j'aime, & desire estre honoré. Qui me fait penser que prendrez cest aduertissement de bonne part. A Dieu.

*A Monsieur Mornac, Aduocat au
Parlement de Paris.*

*Combien
les Ro-
mains sou-
blierent
en la guer-
re que les
Gaulois
leur firent
sous la con-
duite de
Brennus,
& comme
depuis ils*



E ne vous passeray iamais condamnation que la guerre que firent les Gaulois aux Romains lors qu'ils prindrent la ville de Rome, fut telle qu'ils la baptiserent, ie veux dire vn tumulte Gaulois, pour tirer ce mot à nostre desauantage, & faire croire que ce fut vn estourbillon sans discours. Si le mot Latin de *Tumultus* est composé de *Timor* & *multus*, comme leurs Gramairiens nous enseignent, on le pouuoit sous meilleurs gages appeller Tumulte Romain. Car iamais il n'y eut

guerre en laquelle les Romains se trouuerent si desperdus , & où ils ayent perdu tout à vn coup tant de cœur, de conseil & de reputation, comme en ceste-cy, soit que vous consideriez le commencement, progrès, ou la fin. Au contraire il ne se trouuera point entreprise plus gaillarde, ni plus sagement executée que celle de Brennus, sous la conduite duquel les Gaulois trauerferent les monts pour faire nouuelles conquestes. C'estoit vne coutume familiere aux nostres quand ils se trouuoient trop abonder en peuples d'en descharger le païs, & prendre leur vol la part où ils pensoyēt y auoir plus de moyen de cōquister. Les Clusins au païs d'Italie possedoyent vn grand terroir dont ils n'en cultiuoyent que la moitié, laissant le reste en landes. Les Gaulois de ce aduisez prennent leur route celle part. Dont les Clusins aduertis, appellent à leur secours les Romains, comme leurs confederes, lesquels enuoyerent trois Gentil-hommes de Rome de la Famille des Fabiens pour s'informer quel estoit le motif de leur venuë. Ausquels les Gaulois firent responce, qu'ils demandoient seulement le peu de terres, dont les Clusins auoyent trop. Et comme ces ambassadeurs eussent voulu par viues raisons leur faire entendre que ce n'estoit la raison d'occuper le bien d'autrui, encores qu'il luy fut oiseux & inutile, les Gaulois d'une responce gaillarde leur respondirent, que le droit gisoit à la pointe de leurs espees. Chose dont les Romains irritez mettent à l'impourueu

*tascherent
de courir
leurs fau-
ses par
leurs Hi-
storiogra-
phes.*

*Colonies
qui estoient
enuoyees
par les
Gaulois à
la cōqueste
de nou-
ueaux païs*

la main aux armes, & en cest estour tuent l'un des capitaines Gaulois. Que le Romain n'eust en cecy fait vn tour de sot, il n'en faut faire nulle doubte : Aussi leurs Historiographes mesme ne peuuent excuser ceste faute, qu'eux venans en qualité d'Ambassades, ils offensassent ceux avec lesquels ils capituloyent. Et quant à l'entreprise des Gaulois contre les Clusins, ie ne la trouue pas moins iuste, que celle des Romains, lesquels faisans semblant de prendre le fait de leurs alliez en protection, apres les auoir defendus, les alleruissloyent eux mesmes petit à petit sous leur seigneurie & domination. Mais pour ne m'esslogner de mon but, l'iniure qui auoit esté faite aux Gaulois estoit grande, & telle que tout ainsi que l'un de leurs chefs auoit esté assassiné à l'impourueu, aussi pouuoient-ils à la chaude-cole rendre la pareille aux Romains, toutes-fois par commune deliberation il fut aduisé d'enuoyer ambassades à Rome pour demander reparation de l'iniure qui leur auoit esté faicte. Toutes-fois les Romains non seulement mirent à nonchaloir ceste ambassade, ains firent capitaines generaux de leur armee, les trois qui auoyent commis la faute. Icy vous desirerez & iustice, & conseil aux Romains : Iustice, de n'auoir reparé le tort : Conseil d'auoir commis leur armee à ceux dont ils auoyent ia esprouué vne insolente temerité. Mesmes que les opposans aux Gaulois, c'estoit leur donner occasion de n'estaindre le feu qui estoit allumé dedans leurs poitrines. Les Romains en ce

Les Romains faignant de prendre en main le fait de leurs allies, s'en faisoient maistre

temps-là aux moindres rancurs de guerres qui se presentoyent encontre eux, effiloient les plus dignes personnages de leur Republique en l'Estat de Dictateur, auxquels ils donnoient vne puissance absoluë pour le repos commun de l'Estat. En ceste cy ils se trouuerent si esgarez de leur bon sens, qu'ils donnerent la charge de ceste grande guerre, qui leur tomboit sur les bras, à ces trois Gentils-hommes petulans, & qui pour premier trait de leurs deportemens auoyent fait vne demonstration tres-certaine que l'on ne deuoit rien esperer de bon de leur part. Comme aussi le succez les en rendit sages: par ce que les deux armées venans à se ioincre, les Romains se trouuerent dès le premier abord surpris d'une telle frayeur que presque sans coup ferir ils se meirent d'eux mesmes à vauderoute, choisissans pour lieu de plus seure retraite non la ville de Rome, pour y apporter les nouuelles de leur defaite, ains celle des Veyens qu'ils auoyent peu auparauât conquise. Tellement que les Gaulois par leur arriuee és enuiron de la ville de Rome en furent presque les premiers messagers. Qui redoubla encores vne telle crainte au Senat & autres citoyens, qu'ils delibererent ouürir les portes à leur ennemy, & mettre la ieunesse dás le Capitole avec les reliques de leurs dieux, leurs femmes, & enfans: & quant aux plus vieux resolurent de demeurer sur le seuil de leurs portes, avec leurs habits de parade, pour receuoir la vie ou la mort telle qui leur

ieroit octroyee par les nostres. Les Gaulois
 esmerueillez du peu de deuoir quel'on appor-
 toit à la defense de la ville, mesmes voyans les
 portes leur estre ouuertes, douterent trois
 & quatre fois d'entrer: & ce avec vne sagesse
 bien grande, craignans que ce fust pour les
 allecher, & que dans l'enclos de la ville on leur
 eust dressé quelque embuche: toutes fois apres
 auoir esté esclarcis de la verité de ce qui estoit,
 ils y entrèrent: & pour dire le vray en prenant
 la ville, ils y entrèrent en triomphe. Car c'estoit
 vrayement triompher, de prendre vne telle &
 si ample cité sans perdre vn tout seul des leurs,
 & mesmes que les seigneurs se rendoyent à la
 misericorde de nous avec leurs habillemens
 signalez. Le malheur voulut toutes-fois qu'un
 soldat voyant vn vieux Gentil-homme Ro-
 main assis sur son huis avec vn baston & sa
 longue barbe, luy ayant mis doucement la
 main à la barbe comme le voulant flater (car
 ainsi le recite l'histoire) le Romain tirant cela
 à iniure le frappa de son baston, dont le Gau-
 lois indigné tua l'autre: & de là, comme vn
 feu de paille de peu s'espand à vn instant bien
 loing, aussi commença tout le demeurant de
 l'armee à s'eschauffer, & de iouer des cou-
 steaux: faisant passer en moins de rien par
 le fil de l'espee tous ceux qu'ils trouuerent
 en place. Discourez encores sur ce point,
 iamais crainte ne fut si sotte que celle là d'a-
 bandonner leur ville à la mercy de celuy qui
 estoit enflé d'une nouvelle victoire, & qu'ils
 auoyent deux fois irrité; l'une par l'outrage

qu'il auoit receu des Ambassadeurs de Rome, l'autre pour n'en auoir fait, non seulement la punition exemplaire, mais gratifié les delinquans de l'enseigne collonnelle de leur armee. Et neantmoins toutes choses se passoyent par douceur sans la temerité du vieillard, qui pour defendre sa barbe, alluma vn feu d'as nostre ost, luy qui d'ailleurs n'auoit osé prendre les armes pour la defense de sa patrie. Passons plus outre & venons au Capitole, dans lequel ils auoyent enclost tous leurs plus precieux ioyaux, mesmes la fleur de leur noblesse: encores faillit-il d'estre surpris de nuict par les nostres, n'eust esté que au bruit des Oyes & battement de leurs aisles, les Romains furent refueillez. Et vraiment falloit bien qu'ils eussent les sens assoupis, voire qu'ils fussent oysons, veu qu'ayant esté leur armee mise en route, leur ville prise & sacquee, leur ennemy au pied de leur roque, ils furent refucillez par des Oyes. En fin le plus beau fut de renvoyer sur vn pont d'or ceux qui estoient arriuez sur vn pont de fer. C'est pourquoy on brasse vne paix avec le gaulois, laquelle estant concludë & arrestee comme l'on comptoit les deniers, Camille banny prenant qualité de Dictateur leur donne à dos & les desconfit. Ceste victoire ne peut estre recitee qu'à la honte & confusion des Romains. Qu'au milieu d'une paix iuree, vn homme banny de la ville, soit aduoué de courre contre celuy qui auoit mis les armes bas. Et neantmoins ie ne sçay qu'elle fut ceste victoire. Par ce que quelque palliation & hypocrisie dont le Romain

masque ceste histoire, la rongnure de l'armée des Gaulois fut telle, qu'ayant receu partie de ce qui luy estoit promis, ils se feirent voye au trauers del'Italie, & delà percerent iusques à la Grece, se faisans croire par tout où ils passoyent, iusques à ce qu'en fin ils establirent leur demeure en la Natolie, qui fut appelée d'un mot mi-party Gallogrece. Je ne trouue doncques point guerre plus heureusement, ny plus dextremét conduite, que celle que feirent lors les Gaulois. Ny guerre plus sinistrement, malheureusement & honteusement maniee que celle de la part des Romains, ny où ils apportèrent iamais tant de crainte & frayeur, qui leur feit perdre l'entendement au besoin. Frayeur qui en cest endroict leur feit compagnie iusques au dernier soupir de la Republique. Car soudain qu'ils estoient aduertis de la descente des Gaulois en Italie, encor que ce ne fust qu'un faux bruiet, toutes-fois chacun courroit lors aux armes sans exception de personnes. Vray que comme ils estoient industrieux à deprimer nos victoires, pour donner lustre aux leurs, ils appellerét telles descêtes, *Tumultus Gallicos*, mot certainement fort malpropre, n'estoit qu'ils voulussent dire que telles descêtes Gauloises, *Iniciebant in animos eorum timores multos*. Et en effect voila ce que j'auois à vous en mander : sur quoy ie vous prie m'escrire ce qu'en estimerez apres auoir leu la presente. A Dieu.

Combien
les Ro-
mains re-
doutoyent
la descente
des Gau-
lois en Ita-
lie.

*A Monsieur Senesigneur du Pré, President au
Siege Presidial de Melun.*

NE pensez pas que ie sois à moy, ie suis voué à mes vendanges, mais non telles que les communes, dont ielaisse le meynagemēt à ma femme. Depuis que ie suis arriué en ma maison du Chastelet, ie me suis confiné en ma chambre, avec vn contentement plus grand de la cueillette que ie fais que de la pleine vinee que ie voy estre en ce pais. C'est pourquoy vous aurez grande iurisdiction sur moy si vous m'en pouuez distraire. Toutes-fois estant dans vostre ressort, ie serois vn vray contumax si ie ne comparoissois à l'assignation que me dōnez en vostre maison du Pré. Moy-mesme sans sommation deliberois de m'y trouuer. Mais vous receurez s'il vous plaist pour ce iourd'hui mon exoine, puis que voulez auoir mary, femme & enfans tout ensemble. Ma femme n'a encores faict qu'une moitié de son mesnage : ses vins sont aux cuues sur le point d'estre pressurez, les miens cuuent dans ma teste : ie crains seulement que ie ne m'en enyure, tant est le plaisir doux que ie prends à nourrir icy mes penſees, dont ie vous feray plus amplement part à nostre premiere veuë. A Dieu.

*Il se gausse
avec Mon-
sieur le
President
de Melun
qui l'auoit
conuie à
diner en sa
maison du
Pré.*

A Monsieur de

*Il conseille
à un sça-
uât homme
de ce temps
de n'escrire
point con-
tre vn au-
tre qui a-
uoit mis en
lumiere v-
ne histoire
qu'il ne
trouuoit
vraye.*

*Que c'est
vne chose
pedâtesque
d'escrire
par liures
expres con-
tre les œu-
res d'au-
truy.*

Ay leu ie ne sçay combien de fueillets du liure qu'avez encommencé contre celuy qui a mis fraischement en lumiere l'histoire de & l'ay leu de tant plus ententiuement que m'avez faict cest honneur de mel'é- uoyer pour vous en dire mō aduis. En vn mot: Ie le trouue beau en ses membres, ie le trouue laid en son tout. Voila vn enigme ce semble. Rien moins. Quand iel'ay leu par celle à par- celle, il n'y a rien qui ne soit escrit doctement, nettement, religieusement, & selon la foy hi- storiale, ainsi que vous faites toutes choses. Car si i'ay quelque sentiment aux anciennetez de la France, comme quelques-vns me le font ac- croire, ie vous donneray ce nom d'auoir au- tant bien entendu que nul autre, ce qui appar- tient à nostre histoire; ie ne veux pas dire mieux pour n'exciter aucune enuie, & contre vous, & contre moy. Mais quand ie viens à l'œconomie generale de vostre nouveau sujet, ie vous ay en telle reputation, que cela ne me semble di- gne de vous. Sçauiez vous pourquoy? I'estime que nous deuons laisser prendre le vol aux plumes d'autrui tel que le temps leur donne- ra, sans nous heurter contre les auteurs. Bien les pouuons nous aduertir amiablement par lettres de ce qu'il nous semble (combien que ne les cognoissions de face) pour vn mutuel traffic & commerce que les nobles esprits ont del'vn à l'autre: nous pouuons encores les des-

dire modestement par nos œuures quand l'occasion se presente: Mais de le faire par vn guet apensie veux dire par liure à ce expressement dedié, ie l'estime vn assassinat. Monsieur Vignier m'a faict cest honneur, ne me cognoissant que par mes liures, de m'alleguer en quelques endroits de son histoire de France, & en quelques autres il m'a desdit; signamment au chapitre où il parle des Bretons. Autant en a faict Monsieur Pitou en son traicté des Comtes de Champagne, où il faict plus honorable mention de moy que ie ne merite, & neantmoins sans me nommer il est de contraire opinion à la mienne, tant pour l'institution de nos Pairs, que de nos Baillifs. Et ie vous puis dire que ie ne me sens pas moins satisfait d'auoir esté repris en ceste façon, que quand i'ay esté hautement loüé d'eux. Car en ce faisant nous tous contribuons à vne bonne volonté, qui est de profiter aux nostres. Voire quand il seroit aduenü que par liure expres on se seroit voulu formaliser contre mes Recherches, encores n'y voudroy-ie respondre. Il faut laisser telles manieres de faire à ceux, qui habituez en la poulrière des escoles, nourrissent vne ambition pedantelque, ou aux autres, qui n'ayans autre object que les Cohues, se repaissent de demandes, defenses, repliques, & dupliques. La posterité nous lisant sera Iuge competant de nos œuures, sans que nous forcions les iugemens des vns ny des autres. Quant à celuy qui a faict ceste nouuelle histoire, on ne luy peut oster ce nom de docte, comme celuy qui est versé en

plusieurs liures anciens: mais aussi ne peut-on dire qu'il ne soit aucunement partial en ce qui regarde l'honneur & exaltation de son païs. C'est vn vice qui est fort familier à chacū, quād il est question de parler des siens. Ce pendant ie suis d'aduis, si trouuez quelque chose en luy ou à redire, où desdire, que vous l'en aduertissiez fraternellement par lettres: m'assurant qu'estant nourry aux bons liures, non seulement il ne le prendra de mauuaise part, ains vous en remerciera liberalement. Autrement ie crain, si vous passez outre, que n'apprestiez entre vous deux la farce de Clement Marot & Sagon. A Dieu.

A Monsieur Seue Docteur en Medecine demeurant à Melun.

Il décrit à Monsieur Seue Medecin quel est son naturel, à fin que sur ice luy il aduise quelle Medecine il luy pourra ordonner.

M'Estant par expres retiré pendant les vacations de la ville de Paris en ma maison du Chastelet, en deliberation de trouuer quelque relasche aux flots & reflots d'affaires qui nous enuironnent au Palais, apres m'estre reconcilié neuf ou dix iours avec mes liures, ie me suis trouué assailly d'un flux de ventre fort aigu, que ie n'oze encores appeller disenterie: Mal que ie croy m'estre aduenu d'une crudité d'estomach. N'y ayant eu iour que mes papiers nem'ayent possédé l'espace de huiet ou neuf heures, mesme soudain apres le past, sans auoir esgard à mon aage, ny par consequent à ma santé. L'humeur est acre & picquante, & pour ceste cause pec-

câte, qui exerce en moy de grandes & extraordinaires espraintes. Toutesfois ie me sens, graces à Dieu, sans fieur & inquietude de mēbres, qui me fait esperer que ie n'auray que le mal present, & non pis. Mais par ce que vostre medecine nous enseigne que les dissenteries *que ab atrabile fluunt, lethales sunt*, & que ie ne sçay bōnement de quelle fontaine & source me peut prouenir ce mal icy, ie recognoistray franchement qu'au milieu de mon esperance ie nourry vne crainte. Cela me faict vous enuoyer ce porteur pour auoir de vous quelque ordonnance, & ensemble que me prescriuiez le regime que ie dois tenir, à fin que ce mal ne prouigne. I'ay vne apprehension prompte & vifue, & pour ceste cause ie suis fort facile à esmouuoir. Ioint que i'abhorre naturellement les medicamens, voire que la seule apprehension opere quelquefois en moy, autant qu'aux autres la prise. Vous aduiserez, s'il vous plaist, d'y apporter de vostre art, selō le sujet que ie vous presente. Ie me fusse volontiers de moy-mesme ordonné vne reubarbe, que nous apprenons dans vos liures, auoir vne vertu restrai gnante, & neantmoins expulsive des malignes humeurs : mais tout ainsi que nos loix ciuiles nous prohibent d'estre Iuges & parties-en nos causes: aussi les vostres de Medecine defendent de n'estre le Medecin & le malade tout ensemble. A Dieu.

*A Monsieur du Port seigneur de Rozières,
Conseiller au siege Presidial
d'Angoulmois.*

*Il raconte
des morts
de quelques
seigneurs
de robbe
longue, qui
aduindrent
en l'ā 1584*

Lest ainsi comme ie vous ay escrit : ceste
annee est vrayement de biffexte, & lu-
ctueuse pour les gens de nostre robbe, s'estant
liguee avec la mort contre les plus signalez.
Nous l'auons cogneu par effect en la persō-
ne de ce grand Chancelier de France René de
Virague, en celle de cest autre grand person-
nage Paul de Foix Ambassadeur pour le Roy
à Rome, & en ces deux celebres Medecins de
nostre ville le Grand & Pietre. Mais sur tout
elles s'est ahcurtee encontre nostre Parlement,
dont elle nous a raüy ce braue President de Pi-
brac, & six Conseillers de la grand Chambre,
du Puis, le Sueur, Vignole, Anjorant, Viole,
& du Val. Je laisse le seigneur de Villemor des
enquestes. Cela me remet en memoire l'an-
nee cinq cens lvj. où nous veismes pareil raua-
ge. En laquelle nous perdismes deux vertueux
Presidens, Meigret, & Lignery, trois grands
Conseillers Potier, Tiraqueau, Alligret ; au
Chastellet Aubery Lieutenant ciuil ; au college
des Aduocats, ces deux doctes hommes Troüil-
lart & Boucherat le ieune : entre les Theolo-
giens, ce grand Predicateur Picart, honneur
de la faculté de Theologie : entre les Medecins
Burgensis, qui par quarante ans & plus auoit
tenu le lieu de premier Medecin, tant du grand

*En l'annee
cinq cens
lvj. plu-
sieurs gens
de marque
moururent.*

Roy.

Roy François, que du Roy Henry son fils: & finalement entre les Professeurs du Roy, maignen, homme des premiers de son temps, tant en Medecine, que Mathematique. Voila vne piteuse obseruation que ie vous rameine en memoire. Le commencement de ceste lettre vous sera vn peu fascheux, mais la fin en sera plus belle. L'on doit deux iournees aux Conseillers de la Cour: l'vne à leur entree pour cognoistre de leurs sens & suffisances: l'autre à l'issue pour semondre la Cour au conuoy. Et tout ainsi qu'aux tournois solennels il y a ordinairement deux ou trois Cheualiers qui ouurent le pas à tous venans, aussi en ce dernier acte y a-il l'vn des Presidens, lequel assisté des parens & amis fait en chasque Chambre diuerses harangues dediees à l'honneur & commemoration du defunct. Et pour general refrain les conuie de se trouuer aux obseques. Là à bien assailly, bien defendu: Par ce que chasque President respond avec telle parade dont il s'est peu aduifer. Il seroit impossible de vous dire avec quelle dexterité d'esprit, avec quel flux de doctrine, Monsieur le premier President de Harlay a contenté tous les escoutans, combien de belles fleurs il a espandu pour ces sept. mais par special pour monsieur de Pibrac pour lequel il prit vn sujet fort à propos, tant sur la facilité que felicité (ce sont les mots dont il vsa) de sō esprit, de ses mœurs, & de son bien dire. Combien il loüa hautement en Monsieur d'Aigremont son labeur conioinct avec vne preud' hommie, industrie, & iugement.

Des harangues mortuaires que l'on fait au Parlement lors qu'un Conseiller est decedé.

Harangues de Monsieur le premier President en la commemoration des seigneurs qui estoient morts.

Harangue
de Mon-
sieur le pre-
mier Pre-
sident, pour
Monsieur
du Val.

admirable, luy donnant vne encyclopedie de toutes belles choses dont les autres relui-
soyent diuersement par parcelles. Mais en
l'Eloge du vij. qui fut Monsieur du Val, il se
vainquit soy-mesmes au iugement de ceux qui
l'oüirent. Cestuy estoit le septiesme de la grãd
Chambre qui estoit mort, & auoit suiuy de
quelques iours Monsieur d'Aigremont. Il ra-
menteut les sept nobles citoyens que les Athe-
niens deuoyent tous les ans au Roy Minos,
pour le meurdre commis en son fils Andro-
gee, lesquels on exposoit au Minotaure dans
le labyrinthe. Que ceste annee nous auõs payé
de tribut à la mort, sept des premiers Conseil-
lers de la Cour: Que la mort des Atheniens e-
stoit preparee dãs vn labyrinthe inextricable,
que celle de ceux-cy prouenoit des secrets de
Dieu qui sont du tout inexplicables. Et apres
plusieurs beaux discours il prioit Dieu que
tout ainsi qu'en la fabrique de ce grand Vni-
uers il s'estoit reposé le septiesme iour, aussi
que son plaisir fust de s'estancher en ce septies-
me Conseiller. La closture fut encores belle,
en ce qu'il rencontra ingenieusement sur le
nom de du Val. Disant que s'il luy estoit per-
mis en cel uctueux sujet mesler quelque cho-
se de la Poësie ancienne, il s'asseuroit que du
Val estoit au val Elisien, que là il seroit accueil-
ly par le seigneur Viole, tout ainsi qu'Ouide
promettoit le semblable à Tibulle qui estoit
decédé quelque temps apres le docte Catul-
le:

Sit amenè nobis aliquid nisi nomen & umbra

Restat, in Elisia valle Tibullus erit.

Obuius huic venies hedera, iuuenilia cinctus

Tempora, cum Caluo, docte Catulle, tuo.

Je vous écris par exprestous les plus hardis traits de ceste belle harangue, laquelle ayant esté solennisée par les nostres dās nostre Palais, merite d'estre sceuë par vous en vostre pais d'Angoulmois. Tous ceux que i'ay cy deüsus nommez, estoient gens d'honneur, qui meritoient vne commemoration honorable de leur vie. Mais à la mienne volonté, que laissant toutes ces fleurettes & flateries en arriere, l'on vst de nos Conseillers tout en la mesme façon que l'on faisoit des Roys d'Egypte, lesquels on exposoit apres leur mort au public, & permettoit-on au peuple d'honorer ou accuser leur memoire selon leurs merites ou demerites. Autrefois fit-on presque le semblable en France, où nous voyons que l'ancienneté donna tels epithetes à nos Roys qu'auoit esté le cours de leurs vies : iusques à en appeller l'un Fait-neant, l'autre le Simple. Qui n'estoit pas vne petite bride pour les contenir dans les bornes de leur deuoir. Ciceron, & apres luy Tite-Liue, disoient que les flateries & mensonges que l'on auoit introduit es harangues funebres des grands, auoit fait esgarer la plus grande partie de la verité historique de la Republique de Rome. Certes ce seroit vn grand esperon à tous Conseillers pour bien faire, s'ils auoyent ceste opinion qu'apres leurs decez on ne les espargneroit non plus à tromper leurs vices, qu'à solenniser leurs vertus.

Que les harangues funebres faites en l'honneur de ceux qui ne l'ont meritè, perdent le Palais. Sobriquets que nos anciens donnoient à nos Roys, s'ils auoient mal fait durant leurs vies.

Ceseroit vrayement les exposer tous nuds au public apres leur mort. Il n'y eut rien (disent les anciens) qui empescha les morts volontaires des vierges Milesiennes, que la loy par laquelle il fut ordonné que celle qui se seroit tuee, seroit monstree toute nuë au peuple: & la seule apprehension qu'elles eurent de ne decouvrir apres leurs decez leurs parties honteuses, fut cause que nulle de là en auant ne fut homicide de soy-mesme. Au demeurant estàs aujourd'huy les bons & mauuais louëz indifferemment, & presque d'une balance, c'est apprendre aux viuans d'estre indifferemment & d'une mesme balance aussi mauuais, comme bons. A Dieu.

*A Monsieur Sene seigneur du Pré, President au
siegé Presidial de Melun.*

*Il s'esgaye avec le Pre-
sident de
Melun, &
le semond
à disner.
Ceste lettre
serapporte
à une pre-
cedente où
il auoit use
des termes
de practi-
que.
En matie-
re de duels
à qui ap-*

Lne faut plus que nous vfiôs de ces termes, d'assignation, sommation, comparution, contumace, exoine. Quant à moy ie veux que sçachiez que depuis mes dernieres, ie me suis fait nouueau guerrier: mais sça' vous quel? Vn Fierrabras, vn Rodomont, vn tail-
lant, fendant, mangeur de charrettes ferrees, duquel vous receurez la presente, non comme vne lettre missiue, ains comme vn cartel de des-
fy, de la part de celuy qui vous veut combatre à outrance. Et par ce qu'à moy appartient le
choix du champ, comme assaillant: & à vous celuy des armes, ie vous aduise que me trouue-
rez tout prest Lundy prochain au village du

Chastellet. Oû i'auray pour mes confidens les seigneurs de Bobigny & de Valence, qui deliberent resolument me seconder en ceste querelle. Aduisez de ne faillir à vous y trouuer, & d'amener qui vous plaira à vostre aide. Le pas sera ouuert à tous. Le meurdre ne sera petit. Car il y a ja vn grand abatis, mais c'est de perdreaux, leuraux, lapereaux, coqs d'Inde, chapons, pigeons & poulets, dont la table sera iôchee. Je ne la vous feray plus longue, estimât que telles affaires ne gisent pastât en vne piaffe de paroles, qu'en vne prompte & vifue execution. Les mains commencent de me demanger, & n'attends plus que le cry du herault; Laissez aller les vaillans combatans. Assuré qu'il n'y a celuy de nous qui ne ioüe fort bien des cousteaux, quand ce viendra au fait & au ioindre. A Dieu.

*partient le
choix du
champ &
des armes.*

*A Monsieur du Port seigneur des Roziers, Con-
seiller au siege Presidial d'An-
goulmois.*

UL est ainsi comme le dictes, l'amour de nostre patrie ne nous sollicite point tant d'un retour, quand nous en sommes esloignez, comme la reueuë de nos bons amis. Et quelle chose que l'on vueille dire d'Ulixé, i'estime que le plus grand esperon qu'il eust pour retourner en sa maison, n'estoit point tant pour le desir qu'il eut de reuoir son pais, que sa femme & son fils, pour vne amitié viscerale qu'il auoit en eux. Vous sçaez les an-

*Que l'a-
mour de
nostre pais
ne nous re-
tient point
tant que
des nostres.*

Tout le
monde sert
de país aux
sages.

ciennesrencontres de tous ces grands Philo-
sophes: de Socrates, quand il respondit qu'il
estoit du monde: de Diogene le Cynice, qu'il
estoit Cosmopolite & citoyen de ce grand V-
niuers : celuy du Lacedemonien, que no-
stre país estoit par tout où nous estions à
nostre aise. Et si voulez que ie vous adiousté ce
vers:

Omne solum fortipatria est, ut piscibus equor.

Bien seray-ie d'accord que si pendant nostre
absence nous voyons nostre país en danger,
& que luy puissions donner secours, ce seroit
le fait d'un homme trop lasche & indigne de
cette commune societé, s'il preferoit sa com-
modité particuliere à la publique, & qu'il
ne quitast tout autre séjour, pour secou-
rir celuy de sa naissance. C'est vn office que
nous luy deuons naturellement. Ainsi le fit
Camille, ainsi plusieurs autres, encores
qu'ils eussent receu de grandes indignitez
& ingrattitudes de leurs concitoyens. Mais
quand il ne seiourne en nous que la vaine opi-
nion du país, sans qu'autre expresse necessi-
té nous inuite à nostre retour, croyez que ce-
stuy-là est encor d'un cœur plus lasche & fe-
tard, qui se laisse mener à telles sortes ima-
ginations. Quant à ce que m'honorez tant
par vos lettres, ie ne le veux ni puis recognoi-
stre. Ie n'ay pas si peu vescu avec moy, que
ie ne me sente leger de plus de grains que ne
dites. Mais c'est l'amitié que me portez qui
vous aveugle. Le fruit que ie rapporteray
de ces loüanges, est de donner ordre, si ie puis,

de ne vous faire point menteur. Au regard
de mon fils le Lieutenant que mandez n'auoir
fait responce à vos lettres, ie croy que vous
l'excuserez aisément, quand vous entendrez
que c'est vne maladie qui luy tient de pere à
fils. Son pere n'en fait pas moins quelque-
fois. Il amendera sa faute avec v sure, s'il m'en
croit. A Dieu.





L E

DIXIESME

LIVRE DES LETTRES

D'ESTIENNE PASQUIER.

*A Monsieur de Tournebu Conseiller en la Cour
de Parlement de Paris.*

*Lettres en
forme de
Paradoxe
pour les
bestes bru-
ses.*



'E S T I M E Z pas que ie me mocque:
Car quant à moy ie suis du nombre
de ceux qui pensent que nature ait
esté trop indulgente mere enuers les
autres animaux, au regard de nous. Ie vous
laisse à part que sans pleurs & gemissemens ils
entrent au monde, que la plus grande partie
d'eux soudain qu'ils son nez, cognoissent, qui
la mammelle, qui les esles de leurs meres, sous
lesquelles ils se nourrissent d'eux-mesmes.
Qu'ils naissent chaussez & vestus, & que se
faisans grands ils sçauent se maçonner & fa-
çonner leurs maisons, quester leur vie &
pasture, sans autre chef d'œuure de leurs apprê-
tiffages, que leurs propres instincts. Tout cela
ce sont les vieilles querelles des anciens, iustes

toutesfois & tres-raisonnables : d'autant que nous n'acquerons que par bien longues fatigues tout ce qui leur est octroyé en leurs especes, par vne grande facilité & debonnaireté de nature. Le plus grand defaut qu'ô leur baille, est que Dieux les ayant accôpaignez de toutes ces commoditez, leur a osté ceste grande Dame Raison, dont il a pour recompense voulu bien-heurer les hommes. C'est le premier poinct de presumption, qui nous perdit dès le commencement de ce monde, quand nostre premier pere Adam, non content de demourer dans les bornes d'Innocence, en laquelle Dieu l'auoit estably, & qui le rendoit tres-heureux, voulut par vn orgueil trop hardy, goustier du fruiet de l'arbre de Science. Qui fut cause de la perdition de luy & de toute la posterité. S'il vous plaist de me le permettre, ie compareray l'ame de l'homme avec le miroüier luisant & poly, priué de toute autre couleur, fors de sa pureté : mais toutesfois qui semble emprunter diuerses couleurs selon la varieté des objets que l'on luy presente. Telles sont nos ames, lesquelles n'estans autre chose que vn feu & lumiere celeste, claires, luisantes, sans macule & tasche, venans s'vnir avec nos corps mornes, sombres & terrestres, comment lors d'estre diuersement affectees, selon la diuersité de nos humeurs. Chose que nous descouurons à l'œil : Car qui ne voit que l'yrouesse & la maladie, passions de nos corps, n'effarent en nous nos esprits ? Qui ne voit lors combien noz ames semblent patir & endurcir ?

*Discours
sur la Raison
dont
l'homme
s'auantage
sur les be-
stes.*

*L'ame de
l'homme est
comme le
miroüier.*

*Les passions
tant des
corps que
de l'esprit
troublent
nostre rai-
son.*

Ainsi ne faut-il point douter que la passion brusque ne produise de merueilleux effects en nous, qui troublent les vrâyes fonctions de nos ames. C'est pourquoy Platon disoit que leurs operations gisoyent en deux choses : En la raisonnable qui hebergeoit au cerueau : & l'irraisonnable, au cœur & es parties basses : entendant par cela, les passions. Toutesfois il y a telle correspondance de ces deux en nous, que

*sçavoir si
l'esprit gist
au cœur ou
au cerueau.*

ie fais grande doute si nous deuons colloquer ceste raison aux parties hautes ou basses. Pour le moins celuy qui souhaitoit que nous eussions

*D'où vient
ce mot, Ap-
prendre les
choses par
cœur.*

vn fenestre au cœur, pour manifester l'intérieur de nos pensees, estimoit que là estoit la residence de nostre esprit : comme aussi les passages de l'escriture qui dient, *In corde cogitationes*, semblent nous enseigner le semblable. Et quand les Latins vserent de ce mot *Recordari*, qui vient de *Cor*, & nos François dirent, Apprendre les choses par cœur, ils ne furent pas grandement eslongnez de ceste opinion. Car en ce disant, ils sembloient establir le siege de la memoire au cœur. Je ne veux pas bonnemét

*La corres-
pondance
qu'il y a
de nostre
raison a.
uecques
nos passions.*

dire qu'il soit ainsi. Bien diray-ie qu'il y a telle fraternité entre le cerueau où repose la raison, & le cœur seiour de la passion, qu'ils ne peuuent presque operer l'un sans l'autre. Ce que nous auôs de nostre temps peu recognoistre par des exemples oculaires. Nous auons eu vn Villemanoche en Cour sous le grand Roy François, & vn Tulenus puis n'agueres, qui ne pechoyent en autre sujet de l'esprit, sinon quand vous mettiez celuy-là sur les maria-

ges des Princesses, & cestuy sur l'Euesché de Cambray & amour de la grande Royne de Nauarre. Es autres choses vous trouuiez en l'un & l'autre, dispureté, splendeur, & netteté, & toute discretion, sans vous appercevoir vn seul brin de l'alteration de leurs cerueaux. Et ce que l'on obserua en ces deux cy, nous le pouuons retrouver és autres plus ou moins, selon le plus ou le moins que les passions les transportent. La composition de nos humeurs produit en nous des passions plus ou moins picquantes, qui corrompent l'habitude de nostre cerueau, que nous appellons la Raison, qui faict qu'elle ne peut estre nette. Car de ces deux (i'entends la Raison & la Passion) qui font vn pesse-mesle ensemble, s'engendre vne fille bastarde que nous appellons Opinion, vague, fluctuante, & pleine d'incertitude. De là vint que ceux qui comme plus sages firent planche & voye à nouuelles sectes, se donnerent tous diuers Principes, l'un les Atomes, l'autre les Idees, & l'autre l'Endelechie. Qui a perdu soy & toute sa posterité; qui a introduict l'idolatrie: faict les hommes Dieux: colloqué les bestes brutes en ce mesme thronne? qui a produit l'heresie? qui est le motif de toutes guerres, diuorces, & dissensions? L'homme, avec sa folle Raison. Cela fut cause que quelques sages mondains cognoissans les infirmités qui naissent, & dans & hors de nos cerueaux, confesserent franchement qu'ils n'auoyent cognoissance d'autre chose, sinon

*Opinion
fille bastarde
de de la
raison &
passion.*

*Diuers
principes
entre les
philosophes.
La folle
raison de
l'homme
cause de
tous nos
malheurs.*

*La verité
cachée par
l'ignorance
de nostre
raison.*

de leur ignorance : Les aucuns , que la verité estoit submergée aux fons & abismes de la terre : Les autres qu'ils cognoissoient mieux ce qui n'estoit point , que ce qui estoit : & les derniers plus hardis , qu'il n'y auoit rien si certain entre nous que l'incertitude. Voire iusques à n'attribuer aucune certainté à nos propres sens. Je ne veux point vous raconter les mescontentemens que nous apporte ceste Raison cerebrine. Car ayans la cognoissance du passé par la memoire , du present par nos sens , du futur par l'apprehension & fantasie , il faut par necessité que nous soyés fustigez par trois grands bourreaux , le Desir , la Crainte , & l'Esperance , qui engendrent en nous la Joye , Douleur , Amour , Ambition , Auarice , Jalousie , Vengeance , & autres mille tels estourbillons , qui ne laissent nostre ame en repos. Si toutes ces sagefolles apprehensions ne passoyent par l'alambic de nos esprits , nous supporterions aisément le mal present sans esperance du mieux , & crainte du pis , & sans nous soucier que bien apoint du lendemain. I'adiousteray que plus l'homme est grand d'esprit , & moins il trouue à s'assouvir. Et puis au bout de tout cela dites maintenant que nous sommes grandement aduantagez par dessus tous les autres animaux par ceste grande raison qui produit en nous des effects si miserables ? Mais à quel propos dirons-nous que les autres animaux en soyent des garnis ? He ! vraiment c'est en quoy ie puis dire que nous sommes tous sans raison , quand nous disons qu'ils n'en ont point. Ils ont esprit

*Sçavoir si
les autres
animaux
sont paris-
cipans de la
raison.*

pourueu chacun en leur endroit de l'imaginatiue, iudicatiue, & memoire. Ayez fait quelque bon traictement vne & deux fois à vne beste en quelque lieu, elle en sçaura fort bien retrouver le chemin: qu'elle y ait esté battue autant de fois, elle doutera d'y retourner. Prenez vn foüet auquel soit attachee vne sonnette, & qu'un chat ou vn chien approchans du feu, pour corbiner sur vn plat, en ayant esté quelque-fois battus, ne faictes doute que au premier son de la sonnette sans les toucher ils ne s'enfuyent fort viftement, comme se souuenans pourquoy ils ont esté battus, & iugeans que s'ils y retournent, la mesme peine les attend. Mais pourquoy douterons nous de dire qu'ils ayent quelque remarque de la Raison, si les arbres, & vegetatiues semblent auoir quelque estincelle de sens en ce qui appartient à leur conseruation, pour cognoistre & discerner ce qui leur est bon ou mauuais: voire auoir quelque ressentiment de volupté, & se reparer sur le printemps de leurs habits neufs, aussi bien que les oyseaux de leurs châts, & en ce mesme temps s'estudier à leur propagation tout ainsi comme tous les autres animaux? Mais parce que vous pourriez estimer que ie me moque, ou que pour exercer mon esprit, ie voulusse entrer en vn nouveau Paradoxe, & aussi que celan'est de mon sujet, ie vous dy que vous ne pouuez presque rechercher particularité en nous qui prouiène de la raison, dont vous n'ayez de grandes aperceuances diuersement és autres animaux.

*Sçauoir si
les arbres
ont quel-
que estin-
celle de
sens.*

que l'Elephant & le coq semblent auoir quelque instinct de Religiori.

La bestise de quelques peuples qui mirent des bestes au rang de leurs dieux Les augures de Rome.

Je ne toucheray point à la Religion, qui est le haut poinct, qui semble auoir esté donné à l'homme & non aux bestes : & neantmoins encores dit-on quel'Elephant, comme ayant quelque ressentiment de la grandeur du ciel, adore tous les matins le Soleil. Comme semblablement le Coq qui se leue & couche avec luy, & luy fait la foy & hommage aux principales heures du iour. Et l'Elephant estant malade se met quelque fois à la renuerse, & iette des herbes au ciel, comme s'il luy vouloit faire offrande des biës de la terre, pour obtenir guerison. Il me desplaist de m'amuser longuement sur ce subiect : car ie ne m'y puis arrester, que ie ne descouure par mesme moyen la brutalité de quelques anciens qui furent si aueuglez de constituer quelques animaux au rang & nôbre de leurs dieux : Comme les Egyptiens, leur Beuf qu'ils appelloient Apis, par le moyen duquel ils se faisoient accroire de presagir les choses qui leur estoient à venir, selon qu'il prenoit sa pasture ou non, par les mains de ceux qui la luy presentoyent. Et dans Rome mesmes, l'un des principaux articles de leur Religion estoit de ne rien entreprendre sans auoir premierement recours à leurs Augures : qui estoit vn college de leurs Pontifes, qui donnoient aduis du bon ou mauuais succez des affaires de la republique par certains signes qu'ils tiroient des oyseaux. Il me souuient auoir leu en quelque passage que l'on tenoit dans Rome la maniere de deuiner par oyseaux pour science tres-certaine que l'on auoit dressée en art & methode. Il

n'est pas que quelques animaux n'exercent v-
ne charité entr'eux, tant à l'endroit de leurs *que la*
malades que des morts: Parce que ceux qui *charité est*
ont décrit la Republique des Abeilles, nous *entre quel-*
enseignent que les aucunes estâns malades & *ques ans.*
couchées deuant la porte de leur ruche, sont *max.*
secourues par leurs compagnes qui leur admi-
nistrent le manger. Et si quelques autres
sont mortes dedans, on les transporte de-
hors, & leur faict-on compagnie comme
nous aux funerailles de nos voisins, parens
& amis. Et particulièrement entre toutes les
bestes l'on voit la Fourmy enterrer celle qui
est morte, comme vn dernier obsequie qu'el-
le luy doit. Je ne vous parle point icy de la
charité que nature nous enseigne de porter
à ceux qui sont issus de nous. Celle que ie
vous ay figuree est vniuerselle par vn droict
commun de bourgeoisie. Car quant à l'autre,
le Pellican se fait mourir pour donner gueri-
son à ses petits: les Cicongneaux nourrissent
leurs peres & meres assez de vieillesse. Et la
Tigresse, que nous mettons entre les animaux
les plus dangereux & sauages, fait assez am-
ple demonstration de cest amour & charité,
quand luy estans ses petits soustraits, elle avec
vne vitesse extreme & inimitable poursui-
uant le larron à la piste, cestuy-cy n'a autre
moyen de sauuer son larcin, & se garentir
de la fureur de celle qui est, à tres-iuste occa-
sion, vlcerée, que luy donner la muse, en luy
iettant vn des les petits en voye, que la pauvre
beste recueille soigneusement, & reporte en

son repaire : puis avec mesme vitesse retournant, on luy en rejette vn autre, qu'elle repréd & rapporte , pendant lequel temps le larron gaignant tousiours le deuât, & la mere retournant sur ses brisees, en fin ne peut rataindre ce trompeur, qui se faict riche du demourant de sa despoiille par la tromperie dont il a escorné ceste pauvre mere : laquelle toute esperduë n'alors recours qu'aux gemissemes & regrets.

Magnanimité de certaines bestes.

Repassons toutes les autres vertus : les autres animaux sont-ils sans magnanimité? Je ne vous allegueray que le Lyon, lequel ores qu'il rongevne colere perpetuelle dans soy, & que nature l'ait assorty sur tous les autres d'une grâde force, toutes-fois iamais il n'offense celuy qui se couche & humilie deuant luy, & blessera plustost vn homme, qu'une femme, comme sujet floüet & non digne de sa colere : & si entre plusieurs chasseurs il en remarque quelqu'un qui l'ait blecé, il abandonne librement les autres pour auoir sa reuange contre celuy-là seulement. Que si l'un d'entr'eux a failly de le blesser, & qu'il tombe sous la mercy de ceste furieuse beste, elle se contente de le boule-verser sans plus. Ne sortons point de nos maisons, quelle plus grande magnanimité voulez-vous que celle d'un chien, lequel, quelque rogue & mauuais qu'il soit, ores qu'il gtongne, abbaie & morde les estrangers, toutes-fois s'humilie & prosterne enuers tous ceux de la maison? & à la mienne volonté que de ceste generosité fussent tous nos gens-d'armes munis, lesquels

lesquels tout au contraire ne font la guerre qu'à leurs concitoyens, pendant qu'ils s'armēt à petit semblant contre l'estranger, lequel ils ne voyent que le moins qu'ils peuuent. Au regard de la liberalité, ie ne sçay pas si les bestes l'exercent entre elles, en ce qui est de leur pecule, si est-ce qu'en ce que le hazard leur a permis de negocier avecque nous, vray Dieu y ail aucun entre nous qui ne se rende plus ingrat enuers son bien-faicteur qu'ils ne font? *Les bestes non ingrates.*

Le Lyon, auquel Androcles Esclaue fuit i fa-
uoit osté l'espine du pied dans la grotte nous en rend assēuré tesmoignage, quand en reconnaissance de ce bien-fait, il le nourrit de la venaison qu'il prenoit tant & si longuemēt qu'il fut en ceste cachette. Et depuis estant repris par son maistre, & exposé en vn theatre public avec d'autres, pour combatre avec des Lyons, entre lesquels par fortune se trouua pareillement cestuy-cy, non seulement il n'offensa ce pauvre esclaue, ains le defendit en contre tout autre, se souuenant du plaisir qu'il auoit receu de luy. Voulez-vous considerer la iustice guerriere entre eux? souuenez-vous de ce que l'on *Discipline guerriere*
recite des Cicoignes, lesquelles ayans vn si-
gnal entre elles, comme vn mot du guet entre nous, de se trouuer à iour prefix ensemblemēt, celle qui par sa paresse y arriue la derniere, est exposée à mort par les autres. Le tout en la mesme façon que l'on faisoit anciennement en la Gaule à la publication de leurs Bans & Arrierebans. La voulez vous plus ciuile & politique? En la Republique des mouches à miel, chacu-

*Police en-
tre les a-
nimaux con-
tra les fas-
tueux.*

ne estant diuerlement ententue à sa besongne, les vnes à se forger vne cellule, les autres à la replastrer, les aucunes à seruir de man œuures, & les autres à quester leurs viandes: Et sur tout elles punissent tres-rudemment les paresseuses. Nes'eslongnans pas en cecy grandement de la loy que le Roy Amasis feit en Egypte, par laquelle il vouloit que chacun rendist raison au magistrat de sa besongne tous les iours. Cha-

*Iustice en-
tre les au-
res
animaux.*

tiant tres-estroittement les faitneans. Cela se fait par vne iustice qui naist avecques elles. Car quant à celle que l'on peut apporter aux bestes par artifice, il n'en faut faire de doubte.

*Les bestes
capables
de honte &
pudeur.*

Qu'ainsi ne soit, ayez plusieurs Chiens en vostre maison, les vns grands & forts, les autres petits, si vous voulez, il ne faut faire nulle doubte, que vous ne les accoustumiez de sorte que le plus fort n'ostera point au plus foible ce qui luy aura esté donné. Il n'est pas que la honte & pudeur ne se loge en l'esprit de quelques animaux és necessitez naturelles: Car l'on tiét pour tout asseuré qu'entre les Elephans le male ne s'apparie iamais avec sa femelle qu'en

*Combien
les autres
animaux
abondent en
prudence.*

lieux sombres & hors la veüe des autres. Que s'il vous plaist repasser sur la prudence, qui est l'une des principales veines de nostre raison, certainement tous les autres animaux en leurs espèces ont de grands aduantages & prerogatiues sur nous, soit pour trouuer pasture, soit pour se preseruer des aguets ausquels ils se voyent exposez, tantost par la subtilité des hommes, tantost par les autres animaux qui nourrissent vne taisible antipathie encontre

eux. La fourmy va en questel'esté & fait sa provision pour son huiuer, pendant lequel l'interperie du ciel ne luy permet de sortir de sa fourmilere. Et parce qu'elle fait son reseruoir dedans terre, elle rognonne le grain qu'elle y veut cacher, à fin qu'il ne germe point. L'abeille fait le semblable sur les fleurs dont elle fait amas en pareil temps comme l'autre. Le cheual d'eau estant venu paistre en vn blé, s'en retourne à reculons, creignant que l'on ne le suiue à la trace. Le Renard pour n'estre recherché & surpris, se donne garde de faire la guerre aux poules de son voisin. Quelle plus belle & sage chasse voulez-vous que celle de l'Araigne, laquelle apres auoir tendu ses rets aux mouches, se fabrique à l'escart vne maisonnette, qui luy est comme vne eschauguette, dont elle voit toute la proye qui est tombee dans ses filets ? Voulez-vous plus grande sagesse que celle du Castor, lequel se voyant poursuivy par les veneurs, se coupe de ses propres déts les genitoires, recognoissant par vn taisible instinct de sa nature, que l'on ne luy fait la guerre que pour ces pieces là ? Ainsi font les sages financiers qui ont fait quelque superbe bastiment, quand ils en font present aux Princes & grands seigneurs, afin que l'on ne les recherche. Voulez-vous autre plus grande sagesse que celle de la Seche, qui iette vne humeur noire de soy, comme de l'ancre, afin que les pecheurs puissent perdre la cognoissance d'elle ? Ou bien que de la Dormilleuse, nommée par les anciens la Torpille, laquelle se trouuant

prise par l'ameçon, sans le remuer, vomit vne poison de soy, le long du filet, laquelle à vn instant endort & engourdit de telle façon le bras du pefcheur, qu'il est contraint quitter avec sa ligne, sa prise? Ou du poisson qu'on nōme l'Amie, lequel tenant à l'ameçon, a' ceste industrie en soy de rompre le filet de ses dents, & par ce moyen euader? Ou de l'Elephant, lequel estant pris dedans vne trape, tous ses cōpagnons venans au secours iettent bois, pierres & fueilles, pour en faire vn montioye par le moyen duquel il puisse gagner le dessus? Je vous laisse les habilitiez que le Daulphin apporte contre le Crocodile, dont il est ennemy iuré: celle du Rhinocerot encontre l'Elephant, les adresses du Dragon & de l'Elephant pour auoir le dessus l'un de l'autre, celle des oiseaux de proye encontre les autres oiseaux ou poissons, & les subtilitez dont ce petit peuple s'arme pour ne tomber en la mercy de celuy qui n'a pitié de luy, & infinité d'autres choses, esquelles le papier me faudroit plustost que la metiere. Il n'est pas que la Lyonnaise mesme pour couvrir son impudicité, n'apporte de ruses aussi promptes, que la femme impudique enuers son mary: Car ayant esté saillie par vn Liepard elle se sçait fort bien baigner, afin que son masle ne s'en apperçoie. Lequel d'ailleurs s'en apperceuant n'apporte pas moins de coherction contre sa femelle, que le mary homme de bien, quand il sçait que sa femme a forfait cōtre son honneur. Mais sur tout l'on ne peut

*Subtilité
de la Lyonnaise pour
couvrir son
impudicité
enuers le
Lyon.*

assez admirer la preuoyance des rats & souris, lesquels delaisent & abandonnent à grands colonies vne maison qu'ils sentent estre caduque & preste de tomber. Voire qu'il n'y a point de plus asseuré prognostic de sa ruine, que quand on s'apperçoit d'un bannissement volontaire de ceste vermine. Demandez vous vn lien d'amitié nompareil entre le masle & la femelle? iettez l'œil sur les Tourtres & Tourtrelles. L'on dit qu'en vn certain pays des Indes les femmes auoyent fait ce vœu solennel, que soudain que leurs maris estoient morts, elles se iettoient toutes viues dans leurs sepulchres, où elles terminoyent leurs iours. Ceste mesme deuotion se trouue en certains poissons. Quand entre les poissons, que l'on appelle Muges, le masle est pris, attachez le à vne cordelle & le tirez le long de la mer, tout aussi tost toutes les femelles qu'il a frayees voulans mourir avec luy se laissent prendre. Je recognoistray que toutes ces vertus ne sont point generally esparfées entre tous les animaux, ains diuersément distribuees à vns & autres, selon qu'il a pleu à nature les en gratifier. Mais il y a vne vertu generale entre eux tous, dont ils nous passent & surmontent sans comparaison: Qui est la Continence que l'on doit apporter à la procreation de ses semblables. Dieu veut que nous nous perpetuyons en nos especes, & pour nous y al-lecher a mis vne opinion violente de plaisir en nous: laquelle ne se peut estancher en l'homme, non plus qu'en la femme, encores

*Lien d'a-
mitié entre
des bestes.*

*Tous au-
tres ani-
maux na-
turellement
plus con-
tinens que
l'homme.*

qu'elle soit grosse, ie veux dire cōbien qu'elle ait atteint par sa grosseſſe au point pour lequel ceste cupidité de conionction mutuelle deuroit estre empreinte en elle. Considererie vous prie combien nature a apporté plus d'attempance à toutes autres especes d'animaux, desquels soudain que la femelle est pleine, elle ne souhaite ni le masle, ni n'est souhaitee par luy. Certainement quand ils n'auroient que cest aduantage sur nous, il est d'assez grand efficac, pour monſtrer que nous n'auons nulle occasion de nous enorgueillir dessus eux. Au milieu de toutes les particularitez que ie vous ay discourües, par lesquelles vous cognoissiez combien nature a rendu les autres animaux bien appris en ce qui despendoit de leur conseruation lors qu'ils sont en pleine ſanté: encores ne les a elle destituez de Medecines quand ils sont malades. Le Cerf nauré d'vne fleche n'a-il son Dictam, & offensé par vne beste venimeuse ne ſçait-il pas trouuer des Cancres de riuieres, remede formel pour ce mal? La Tortue ferüe du serpent mange de la ſarriette. La Bellette voulant guerroyer les Rats se munit auparauant par forme de preseruatif, de la Rue. La Cicongne a l'origan, le Sanglier le lierre, le Chien, le leſchement de sa langue pour ses playes, & le vomissement pour ses maladies interieures, le Lyon, la diette, ou bien il deuore vn Cinge pour s'exciter au mesme vomissement. Et pour tout ce cy il ne leur faut point escoles de medecines: Ils sont passez maîtres & docteurs en cest art

Les medecines que nature a diuerſemēt apprises aux autres animaux.

du iour de leurs naissances. Leur medecine s'exerce aux seuls despéds de la nature, à laquelle ils portent toute obeissance. Ils ne veulent point estre plus sages qu'elle, comme nous, qui estimans que ceste mere commune nous ait manqué en cest endroit, ne nous contentons des simples qui naissent dans son sein, ains faisons ie ne sçay quelles compositions : Par le moyen desquelles apres auoir longuement raisonné sur la medecine, nous sommes contrains de confesser que c'est vne trèsbonne & salutaire medecine de n'vser point de medecines. *L'homme pense estre plus sage que la nature, en la medecine.*

Quoy? si nous mesmes auons emprunté des autres animaux les poincts ordinaires de nostre medecine? Car nous deuons les clysteres à certains oiseaux d'Egypte, nommez Ibis, le vomissement aux chiens, en cas de trop grand repletion, pour lesquelles Paracelsites ont de nouveau ramené en vsage l'antimoine, au cheual d'eauë la saignée, à l'arondelle l'esclere, pour le mal des yeux. Mais pourquoy doubte-rons nous de recognoistre d'eux ces traits de la medecine, si les anciens Ethniques leur deurent les premiers & principaux fondemens de leur Religion? D'autant que voyans que l'Elephant & le Coq adoroient naturellement le Soleil, duquel ils apperceuoient d'ailleurs les effectz admirables, tant sur les coprs, que les esprits, ils se mirent soudain en teste qu'il n'y auoit autre Dieu au ciel que celui là, par lequel estoit eschauffé & illuminé ce grãd Vniuers. Car il est certain, comme nous apprenõs de Macrobe, qu'en leur Theologie ancienne

*Qu'il sem-
ble que les
Ethniques
eussent ap-
pris des be-
stes les pre-
miers ru-
dimens de
la religion.*

sous les noms de Iupiter, Phœbus, Mars, Bac-
 chus, Venus, & autres de telle farine, ils n'a-
 doroyent que le Soleil: Pour l'image duquel
 mesmement les Chaldees introduirent le feu
 en leurs temples, comme ne le pouuans plus
 proprement représenter que par cest element
 chaud & clair. Vous me pourrez, peut estre,
 dire que pour le moins les passions nous, de
 tant que l'Homme est vn animal sociable, les
 bestes non. Iamais ie ne vous passeray condam-
 nation de cest article. Tout ainsi comme les
*Sçauoir si
les autres
animaux
sont socia-
bles en leurs
especes.*

animaux sont instruits & informez naturelle-
 ment de leurs portees, & qu'ils recognoissent
 en quoy gist leur force, l'vn aux cornes, l'au-
 tre à la dent, l'autre aux griffes, l'autre aux
 pieds, & qu'ils sçauent comment ils se doiuent
 defendre, & où assaillir leurs ennemis, que le
 Rhinoceros voulant combattre l'Elephant,
 aiguise sa corne à vn Roch: le Dauphin se sçait
 mettre sous le Crocodile plus grand & plus
 fort que luy, pour luy fendre par son areste
 la plus tendre partie de luy, qui est le ventre:
 que le Loup pour se garder des cornes du Tau-
 reau, ne l'assaut que par le train de derriere, &
 vers le parties plus sensibles, qui sont les geni-
 toires. Aussi sont-ils tous sociables en leurs es-
 peces, & sçauent les moyens par lesquels
 ils se peuuent maintenir en leur commune
 societé. Or qu'ils soyent tels que ie vous pleu-
 uis, ie le vous représenteray au doigt & à
 l'œil. Mettez quantité de toutes sortes d'ani-
 maux en vn parc, n'ayez peur qu'ils demeu-
 rent pêle-mêle ensemble. Icy vous verrez les

otailles prendre leur quanton à part, là vn escadron de bestes chéualines, en vn autre endroit les bouines, les Oyes d'vn autre costés s'affortir auecques les Oyes, les Poules auecques les Poules: il n'est pas que les Poules d'Inde ne se separent d'elles pour faire leur troupeau ensemble. Ne sont-ce pas toutes remarques tres-certaines de leur societé? Mais ils n'ont point de loix, comme nous. Vrayement c'est là où ie vous attendois. Il n'y a rien que nous estimionstant que la loy commune, comme estant espuisee de la mouëlle de la raison generale d'vn pais: ne qui tant descouure nostre infirmité. Dites moy, ie vous supply, y a-il chose tant bigarree entre les hommes, que la loy? Icy vous verrez le larcin auoir esté defendu sur peine de la hart: en vn autre lieu estre permis, & loué, comme habilité d'esprit. Icy l'adultere rigoureusement chastié: ailleurs (comme aux Massagetes) permis. En certains lieux les diuorces tres-estroitement prohibez: és autres mis à l'abandon, comme vne chose indifferente. A la suite de cecy les aucuns permettre de se marier apres le diuorce, les autres le defendre. Les vns fauoriser sur toutes choses les mariages: Les autres la vie celibé. Quelques legiflateurs auoir approuué la communauté des biens au preiudice de ces mots, Mien & Tien, desquels despéd le trouble & le repos presque de toutes nations. Et encores en ce Mien & Tien, quelques-vns auoir voulu que les biens fussent esgalement partis & distribuez entre les citoyens, par vne proportion Arithmeti-

*Les loix
descourent
l'infirmité
de nostre
raison.*

*Diuersité
de loix es-
tre les hom-
mes.*

*Que les
loix mes-
mes se chā-
gent en vn
mesme
pays.*

que, sans acception de personnes, ny de leurs qualitez. Il n'est pas qu'en chaque país les loix ne se diuersifient selon la diuersité des saisons : se trouuant en vn temps vne loy bonne, laquelle puis apres est anichilee. Tant est l'esprit de l'homme composé de diuerses pieces, qu'il est mal-aisé de dire si nos loix prennent leurs fonds de ce que nous appellons Raison, ou de vne vague & fluctuante opinion. Non toutes-fois que ie trouue mauuais ces changemens, selon que la necessité nous y semond. Mais par là vous voyez combien l'Homme est fort en bride, veu que selon l'instabilité de ses mœurs, il faut que le Magistrat change ses loix, qui deussent estre vnes, stables & perpetuelles à iamais. Mais laissons toutes ces considerations à part. Les bestes n'ont point de loix, dictes vous. Aussi n'en ont-elles que faire, non plus qu'aux Republiques bié moriginees. Grande chose, qu'é toutes les œuures d'Home-
re il ne se trouue point qu'il ait faict mention de la Loy, ny que ce mot luy soit tombé de la plume, comme pensant représenter, peut-estre, vn temps auquel il estimoit l'innocence auoir esté plus en regne. La multitude des loix en toute Republique est vne demonstration tres-certaine de la corruption, ou du peuple, ou du Magistrat souuerain. Et toutesfois vous ne pouuez dire que plusieurs autres animaux n'ayent & leurs Republiques, & leurs loix, dót les vnes se manifestent d'auantage à nos yeux, les autres moins. Si nous croyons aux anciens, les Elephans marchent tousiours en troupe, &

*La multi-
tude des
loix signifie
la corrup-
tion d'une
Repub.*

*Plusieurs
bestes ont
leurs Re-
publ.*

font passer pour premier le plus vieux d'entre eux, comme leur chef & conducteur, & celui qui le suit d'age est à la queue. Direz-vous que les Elephans n'ont point de loy ? Je le nie. Veu que l'avant-garde & arriere-garde de leurs troupes est commise à ceux qui par la prerogative & ancienneté de leurs aages, doiuent estre estimez les plus sages. Nous apprenans encores par cela non seulement qu'ils ont vne forme de chose publique, mais qui plus est que nous, à leur imitation, ne deussions point appeller aux grands & premiers Magistrats que ceux ausquels l'ancienneté de l'age a peu apporter quelque maturité & sagesse. Or qu'il y ait de l'ambition en eux, le seul exemple quel'on recite du Roy Antiochus y est admirable. Car ayant vne grande troupe d'Elephans en son camp, qui tous auoyent leur nom (comme nous donnons à nos chiens) & voulant passer son armée par vne riuere, il commanda au capitaine de tous les autres Elephans nommé Ajax, de sonder le gué : à quoy se monstrant retif, le Roy promit la capitainerie à celui qui l'entreprendroit. Au moyen dequoy l'un d'entre eux nommé Patroclus, sous ceste promesse se mit à traverser la riuere. Et de retour ayant esté honoré & caparassonné de haut appareil, comme capitaine de la troupe, l'autre en mourut de desplaisir. Au regard des Grues, tous ceux qui en escriuent demeurent d'accord, qu'elles se choisissent vn Roy, pour les conduire & passer de pais à autre. Et a chaque troupe

*Repub. des
Elephans.*

*S'il y a de
l'ambition
aux bestes.*

*Republ.
des Grues.*

son capitaine, au cry duquel toutes les autres obeïssent pour se mettre en rang. Au demeurant quand elles font alte de nuit, elles font la sentinelle par tout, ayans vn pied sur terre ferme, & dans la serre de l'autre qui est en l'air elles tiennent vne pierre, à fin de s'empescher de dormir, & que là où ils se trouueroyent surpris du sommeil, la pierre leur eschappant, les resueillast. L'on dict qu'Aristote ce grand Philosophe faisoit presque le semblable quand il tenoit vne plote d'airin sur vn bassin en l'vne de ses mains, à fin que s'il luy aduenoit de dormir, la plote tombant le fist resueiller. Qui ne reconnoist encores aux Oyes sauuages le semblable qu'aux Grucs, lesquelles nous voyons arriuer en troupe, dresser leurs bataillons en pointe, comme l'esperon d'vn nauire, & les dernieres reposer leur testes sur les premieres, & quand la guide se lasse, elle laisse sa place à celle qui la suit, & se met la derniere, à fin que chacune par vne entre-suite exerce la mesme charge? Voulez-vous plus belle Monarchie que celle que nous voyons iournellement en nos maisons, sans nous en appercevoir, en nos Coqs & Poules? Là nous voyons monfieur le Coq portant la creste sur sa teste en forme de couronne, marchant & piaffant à grands pas au milieu de ses Poules, qui luy seruēt de femmes & sujets tout ensemble. Iettez quelque grain deuant ceste troupe, tant s'en faut que comme leur chef il en prenne les premieres becquees, qu'au contraire vous le verrez faire vn ou deux tours entr'elles, comme pour les vouloir mettre en

*Republ.
des Oyes
que nous
appelons
sauuages.*

*Monarchie
du Coq.*

ordre, & apporter quelque police, puis prendre sa part quand il les voit en bonne ordonnance. Mettez vn autre Coq avec luy, vous cognoistrez fort aisémēt cōbien toute Royauté est impatiente de compaignon. Et qui est vne chose fort remarquable, s'il y a quelques pauures chappons qui soyent de la troupe; ils ne s'osent qu'avec toute crainte approcher des Poules: le Coq non seulemēt les guerroye, ains les Poules mēmes, cōme vn rebut de leur Repub. & membres inutiles, qui ne peuuent profiter à la propagation de leurs semblables, pour leur en auoir esté ostez les outils. mais pourquoy douterons-nous de recognoistre des Republ. entre les bestes, si c'est en quoy les insectes se rendent vn miracle de nature entre nous? Quā*Republ: des Fourmis.* ie voy dans vn bois vn mont-ioye de fourmis de la hauteur d'vn homme & plus, & les chemins tous semez de ces petites bestioles, les vnes aller en quēste à vuide, les autres chargees de leurs prouisions retourner, puis toutes se rendre en leur generale retraicte, où il y a vne infinité de fourmis, ne serois-ie despourueu de tout sens commun, si ie ne croyois qu'il y a quelque Police entr'elles, par laquelle chacune d'elles recognoist ce qui est sien, & qu'il faut qu'il y ait quelques superieurs qui commandēt aux autres, ou bien vne iustice naturelle emprainte en elles, qui les faict mutuellement cōtenir en leurs deuoirs les vnes à l'endroict des autres? Car quant au Royaume des mouches à miel, il n'y en a point de tel ne si stable entre les hommes, que cestuy-là. Et c'est en quoy

*Royaume
des Abeilles*

nature semble auoir voulu dresser vn chef d'œuvre, ou, pour mieux dire, vn trophée pour nous rabbaïſſer noſtre orgueil, leur ayât donné tant d'aduſ, tant de conduite & prudence à leur manutention, & neantmoins qu'il ne peut tomber en l'imagination de nous tous, quelle part peuuent reſider tous leurs ſens. Noz Medecins ſont bien empeschez de ſçauoir où reſident les parties imaginatiue, iudiciaire, & memoriale, & ſi elles ont leurs ſieges ſeparez ou confus en noſtre cerueau. Ces petites beſtes ont tout cela brauement, & toutesfois vous ne ſcauriez diſcourir en quoy. Premièrement il n'y a ietton d'Abeilles qui n'ait ſon Roy: Elles viuent dedans vne Ruche bien cloſe, comme nous dedans noz villes, chaque mouche a ſa cellule où elle heberge, comme nous auons noz maiſons. A leur Roy, elles en edifient vne plus haute exhauffee que les autres en forme de Palais. Chacune s'employe diuerſement à la beſongne, l'vne à baſtir ou replaſtrer ſa cellule, comme i'ay dit cy deſſus: l'autre à former ſa cire ou ſon miel, l'autre à ſe mettre en queſte pour le pourchas de ſes prouiſions. Ce pendant le Roy fait ſa reueuë parmy ſa ville, pour recognoiſtre ceux qui demeurent en leur deuoir. S'il y en trouue d'ancanties, il en faiçt vne punition exemplaire, iuſques à les expoſer quelquefois à mort. Elles viuent & mangent en commun, à fin qu'après leur repas pris, elles retournent enſemblement à leur beſongne. Quand la nuit ſ'approche, vous les orrez marmonner vn petit bruit,

cōme si auant que de reposer elles vouloyēt redre en leur langage bourdonnesque quelque action de graces au ciel, iusques à ce que leur trompette sonnē la retraicte, leur donnant signe de repos. Il n'est pas qu'ils n'ayent soing de leurs malades, & de ietter les corps morts hors de leur seiour, & en outre leurs excemens, pour euitē à corruption. Quant à leur Roy (chose admirable) l'on dit qu'il n'a point d'aiguillon, ores que toutes autres Abeilles en ayent. Monstrant par cela que tout Roy se maintient plus par sa majesté, que par ses forces. Il a neantmoins autour de luy des autres mouches plus anciennes qui luy assistent, comme pour son conseil, & ne le desemparent que bien peu. S'il sort, soudain tout le ietton se met à sa suite, & comme s'il fust lors question d'une entreprise, il dōne assez à cognoistre quelques iours auparauant par son bruit & bourdonnement quel'on dresse quelque expedition pour faire vne saillie. Estant en campagne, toutes luy font la cour pour captiuer sa bonne grace, & s'il se trouue recu, il y en a les aucunes qui le portent. Où le Roy se pose, tout le cāp fait le semblable. Et, qui est vne deuotion admirable qu'elles ont enuers leur Prince, tout aussi tost qu'il est pris, vous estes assuré d'auoir tout l'essein, ou s'il se trouue perdu, le camp se rōpt, & cherche chacun sa fortune (comme enfans perdus & aduenturiers) és autres iettons. Et quand il meurt de maladie, tout le ietton porte le dueil, que l'on descouure par son silence, commēçant d'auoir leur vie en horreur.

*Le Roy des
Abeilles
n'a point
d'aiguillon.*

Et qui ne les feroit sortir de la Ruche, pour les priuer de la preséence de leur Roy mort, elles mourroyent toutes avec luy. Vne chose me semble tres-digne d'estre considérée en elles. Par ce que nous voyons bien les autres animaux par vne certaine antipathie se guerroyer quelquefois, voire en troupes, mais c'est entre bestes de diuerses especes. Cestes-cy par vne ambition particuliere se font quelquefois la guerre de jetton à jetton, de ruche à ruche, selon que leurs necessitez les pressent. Car quand leurs munitions sont faillies, elles escarmouchent leurs voisins, en deliberation de leur rair leurs prouisions, & les autres se sçauent fort bien arranger en bataille, & tenir sur leurs gardes. Et puis soustenez maintenât qu'elles soyent destituees d'entendement, en ceste generale police qui a esté obseruee en elles depuis tant de milliers d'annees? I'auois oublié vn poinct, qui me semble ne deuoir estre escoulé sous silence; que tout ainsi que nature a baillé à toutes les bestes de l'esprit à suffisance, pour leur manutention, comme à nous, aussi les a elle voulu rendre dociles & susceptibles de plusieurs choses que nous estimons estre propres seulement à l'homme. Nous auons veu vn certain bouffon nommé Constantin, qui contrefaisoit tantost le chant du Rossignol, tantost la voix d'vn Asne, puis d'vn Chien, & de quelques autres. Chose que nous tenons pour tres-esmerueillable, & nous ne tournerons en admiration de voir vn Perroquet ou vne Pie représenter la parole del'homme, contrefaire le chien chassant,

fant, & le Veneur mesme? Ni l'Elephant qui anciennement auoit appris d'escrire en Grec? Et par ce que l'on se fait accroire qu'ils n'entendent pas ce qu'ils dient, l'histoire est trop commune & rechâtee du temp del'empereur Tibere, d'un Corbeau, lequel nourry priuement en la boutique d'un Cordonnier de Rome, apprit si bien à parler, que non seulement il sçauoit les noms des grands Princes & seigneurs de Rome, mais qui plus est, alloit tous les matins au Palais, où il salüoit l'Empereur Tibere, & tous les autres par leurs noms & surnoms à mesure qu'ils passoyent: & apres ces bons iours ainsi par luy donnez, s'en retournoit en la maison de son maistre. Plin recite en cas semblable auoir veu vne Corneille, qui disoit des propos entiers, apprenât tous les iours quelque chose de nouveau. Je vous laisse que ce fut vne chose fort familiere & commune aux anciens de faire dancer des Elephans sur les cordes, les faire escrimer aux theatres publics, & que la mesme beste a le bruit de recorder sa leçon de nuict de ce qu'on luy apprend le iour: à fin de n'estre battuë par son maistre. Je vous laisse encôres que nous voyons noz bastelleurs faire danser les chiens au son de leur trompe, & qu'en ma ieunesse i'en aye veu vn auoir autant appris à vn cheual. Mais laissans ces bastelleries à part, ceste prompte docilité qui setrouue en ces animaux à quelque fois surpris la simplicité de plusieurs peuples. Comme quand Sertorius pour se maintenir en sa grandeur, faisoit accroire qu'il

*Admirable
histoire d'un
Corbeau.*

parloit aux Dieux sous la figure d'une Biche qu'il auoit appriuoisee. Et Mahomet en cas semblable, quand il faisoit que son pigeon venoit becqueter dans sa bouche, disant que c'estoit l'esprit de Dieu, qui sous la forme de cest oiseau luy communiquoit ses secrets. Qui

*Es bestes
de fust la
parole, qui
est cause de
tous nos
maux.* monstre que leurs esprits sont capables de docilité, si non tant comme les nostres, aussi ont-ils d'autres particularitez, dont nature les recompense par dessus nous. Reste vn point

que l'on peut desirer en eux: qui est la parole que nature nous a baillie particulièrement. Chose que ie prendrois à tresgrande prerogative & priuilege, si ie ne voyois la parole nous apporter autant de dommage que de bié. Car d'où viennent tant de meurdres, sinon pour nous venger des paroles mal digerées que l'on nous a dites, ou proférées en nos absences contre nous? Qui entretient les heresies, qui nourrit les procez, qui rend vn homme adultere de la femme de son voisin, sinon la mesme parole? Ce fut la cause pour laquelle Esope semond de faire vn soupper de la meilleure viande qu'il pensoit estre en nature, presenta pour tous mets des langues: & requis d'en faire le lendemain vn autre de la pire viande qui se pouuoit trouuer, presenta de rechef d'autres langues. Nous voulant par là enseigner que la langue nous produit d'une mesme balance autant de maux que de fruit. Nature n'a donné aux autres animaux la parole, mais elle leur a baillé assez de quoy se faire entendre entr'eux. Pensez-vous que les Poules coquetans, où, si

*Les bestes
s'entendent
assez entr'
elles par*

voulez qu'ainsi ie le die, caquetans ensemble, *leurs voix.*
 les Loups avec leurs hurlemens, les Lyons en
 leurs rugissemens, les Bœufs avec leurs bugle-
 mens, les Brebis par leurs belemens, les
 Chiens par leurs jappemens & abbois, les Chats
 par leurs miaulemens, les Abeilles par leurs
 bourdonnemens, ne donnent assez à enten-
 dre leurs conceptions les vns aux autres, en-
 tant que leur besoin & necessité le requiert? Et
 vraiment il est bien à croire que nature eust
 voulu produire en eux ces voix oiseuses & inu-
 tiles. Il n'est pas que sans la parole ils n'ayent
 assez de signes pour se faire entendre, non des
 autres de leur espee, ains de nous mesmes,
 quand ils en ont affaire. Tescmoin le Lyon,
 dont i'ay cy dessus parlé, à l'endroit d'Andro-
 cles, & vn autre au pais de Surie tout sembla-
 ble enuers vn nommé Mentor, quand par doux
 accueils & semblans ils sollicitèrent l'un & l'au-
 tre de leur oster l'espine qu'ils auoyent aux
 pieds. Iettons l'œil sur la beste qui familiarise le
 plus avec nous, qui est le Chien, ne reconnois-
 sez vous en luy, soit par ses signes ou par la di-
 uersité de son aboi, tout ce qu'il veut & desire?
 I'ay vn petit Chien qui me donne mille passe-
 temps. Mais ie vous puis dire que ie sçay tou-
 tes les passions qui l'affligent, soit de ioye, de uel
 & courroux: & s'il me veut demander quelque *Le Chien*
 chose, ie sçay son formulaire de requeste. Il *se rend ai-*
 me parle quelquefois de l'œil, aussi bien que *sement in-*
 l'amoureux fait à sa maistresse. Brief ie ne l'en- *telligible*
 tends pas moins qu'un muet. Vray qu'il a cest *entre nous.*

aduantage sur luy, que le muet ne me pourroit entendre que par signes, & mon petit Chien m'entend au simple son de ma voix, selon que ie la diuersifie. Mais voyez encores en cecy combien nature s'est voulu moquer de nous en vn poinct. Car combien qu'elle leur ait denié la parole, toutesfois entores y ail vne sorte d'animaux qu'on appelle Hyenes, qui scauent contrefaire le langage des Pastres, & qui ayans appris le nom de l'un d'eux, ils l'appellent pour le faire sortir de son toict, & puis en faire vne gorge chaude: Voila d'esmeruillables & paradoxes particularitez, lesquelles ie vous ay voulu reciter tout au long, non pour former vn atheisme entre nous, comme quelques esprits visqueux & mal nez se persuaderoient aisement, ains pour bannir de nous ceste ontrecuidace & orgueil, par lequel nous donnans tous autres animaux en proye, comme si nous fussions leurs Roys, nous sommes si miserables, que pensons commander aux choses celestes, voulans à l'instant mesme escheller le ciel, & luy faire la guerre, non materielle, comme les Geans, ains avec des propositions extrauagantes, & qui couurent des bestialitez plus estranges, que celles des bestes les plus farouches. Mais pourquoy des bestes farouches? Car quelles bestes pouuez vous appeller plus farouches que l'homme resolu à mal faire, dont il n'y a Roy ni Prince qui se peust bonnement garantir, quelques gardes qu'il ait autour de soy? Ainsi que de fraische memoire le defunct Prince d'Aurange a es-

*Orgueil
Et pre
somp
tion
de l'hom-
me.*

prouué par deux fois. Dont à la premiere il faillit d'estre mis à mort, & à la seconde fut tué, par vn homme qui depuis en mourant supporta la mort avec vne patience plus forte, que les Stoiques n'imaginerent iamais en leurs disputes au milieu de leurs escoles. Voulez vous doncques que ie vous die à cœur ouuert, qui ie pense estre le plus grand non seulement par dessus les bestes, ains par dessus tous les hōmes? Celuy qui estant doüé de plusieurs grandes parties d'esprit, de corps, & de biens, s'estime toutes-fois le plus petit, qui n'imaginerie contre les loix communes de son pays, qui sans extrauaguer en discours particuliers porte obeissance à ses superieurs; vit selon la loy ancienne de son pays, sans remuer chose aucune contre la discipline que d'une longuemain l'on y a plantee, qui loüe Dieu en toutes ses creatures; brief qui estime que combien que Dieu ait voulu gratifier l'homme de plusieurs grandes benedictions par dessus les autres animaux, toutes fois pour luy raualler son orgueil, aduantagé les bestes de plusieurs grands aduantages que nous tous deuons tirer à nostre edification. J'attends de vous vne belle & docte responce, soit pour ou contre; comme sujet sur lequel il y a assez à discourir. A Dieu.

A Monsieur Morin.

*Il recom-
mande Mo-
sieur Tour-
nebu le ieun.
ne allant à
Rome, à
Monsieur
Morin.*

E present porteur allant à Rome ie ne
l'ay voulu laisser partir les mains vui-
des. Il est mien cousin, & le dernier
des enfans de ce grand & docté personnage,
feu Monsieur de Tournebu, les pas & traces
duquel il suit à bonnes enseignes. Car ie le
vous pleuuis pour vn tres-sçauant ieune hom-
me, tant en Grec, que Latin; & qui passe d'un
point son pere pour faire un vers François aus-
si gentil & bien façonné qu'il est possible. Cō-
me il a l'esprit beau, aussi luy est il tombé en te-
ste, ce qui tombe, ordinairement aux ames
les plus genereuses, de vouloir voyager pour
se faire sage, aux despens des nations estran-
geres. Ie l'ay asseuré de l'amitié que me portez,
& qu'en ma faueur il trouueroit toute cour-
toisie en vous. S'il m'en croit, il se contentera
de voir l'Italie en passant. Car ce que Pyrrhus
Neoptolemus disoit de la Philosophie, qu'il
falloit philosopher, mais sobrement, ie le dy
du voyage d'Italie, à tous nos ieunes Frâçois
qui s'y acheminent par vne conuoitise de voir.
Iesçay bien qu'y auez estably vostre demeure
il y a vingt ans passez, & qu'il vous en est bien
sucedé: mais on en trouue bien peu qui ayēt
sçeu si à propos mesnager les mœurs de l'Italiē
comme vous: & l'exemple d'un seul ne me per-
meit iamais de tirer les choses en consequence.
Cependant ie le vous recommande. C'est vne
chaine d'obligations que ie contracte avec-

*Qu'il faut
sobrement
voir l'Italie.*

ques vous, enchainant ceste-cy soudain apres le partement de mon fils : duquel ie vous diray en passant que ie l'ay enuoyé à Calais, pour y apprendre par quelques mois les rudimens de la discipline militaire. N'ayant nulle enuie de le rendre casanier ou trai-n'espee de Paris. Quel qu'il puisse estre, si iamais le pere & le fils ont moyen de vous faire paroïr combien ils sont vostres, ils n'y oublieront vn seul point de leur deuoir. Ie louë infiniment l'honneste liberalité qu'exercez par deçà enuers vos nepeueux pour les entretenir aux estudes: Dieu benira vos actions de bien en mieux. Ie souhaite- rois que l'aîné fut pres de vous, vostre seule presence luy seruiroit de double precepteur, tant pour l'instruction des bonnes lettres, que des mœurs. A Dieu.

*A Monseigneur de Gourdan Cheualier des
deux ordres du Roy, Gouverneur
de Calais & pais circon-
uoisins.*

Q O M B I E N que pour n'auoir cognoissan-
ce de moy ie ne vous deüssé importuner
par lettres, toutes-fois puis que Monseigneur
d'Esparnon m'a fait cest honneur de vous re-
commander mon fils, que ie vous dedie, i'eus-
se pensé faire tort à mon deuoir, si ie ne l'eusse
accôpagné de la presente, pour en le vous pre-
sentât, faire aussi present du pere. Ie l'ay desti-
né aux armes, il a demeuré dans Rome l'espace
de quatre ans ou enuiron à la suite de feu

Monseigneur de Foix : pendant ce temps il s'est adonné à quelques nobles exercices bien seans à sa profession. A son retour i'ay pensé, s'il reçoit cest honneur d'estre bié veu de vous, qu'il le facilitera pour l'aducnir vne voye, que tout homme de bien & valeur se doit proposer : & par ce que ie sçay qu'estes l'exemple de vertu, non seulement au sujet des armes, ains en tout autre, ie vous prie le fauoriser, comme le fils d'un pere qui desiré demeurer au rāg de vos humbles & affectionnez seruiteurs. A Dieu.

A Monsieur le Baron de Ramefort.

Il se ma-
que del'hy.
pocrisie que
les Gensils.
hommes
apportent
aujour-
d'huy
pour se
sauuer
d'un de-
mentir.



E pensez pas qu'ils combattent, quel-que beau semblāt qu'ils facent d'aiguiser leurs cousteaux. Ceux qui ont enuie de combattre, y vōt à plus basse noise. Ils se tirent par la cape seul à seul; sans en aduertir leurs cōpaignons, & s'ils ont quelques cirons qui leur demangent dans la ceruelle, se les ostent avec la pointe de leurs espees. Vos querelles de Cour sont ainsi comme les mines, lesquelles estans esuētees ne produisent aucun effect. Ie souhaiterois que la noblesse de France ne trompetast point tant le poinct d'honneur sur lequel elle fonde toutes ses actions, ou qu'elle y apportast moins d'hypocrisie à le soustenir. Il n'y a pas tant de chiquaneries aux Cohues, comme on en trouue entre les courtisans pour destourner un dementir. Si vous auez dit cela ie vous en

Le point
d'honneur
dont la no-
blesse Fran-
çoise fait
estat.

feray mentir (dira quelque esprit hagar) l'autre plus froid & retenu respondra, ne l'auoir dict. Les Gentils-hommes arbitres de ceste querelle respondrôt que puis qu'il ne l'a point dict, il n'y a point de dementir. Par ce que le dementir estoit donné sous vne condition seulement. Vn autre plus hardy, à qui les mains fretilleut dauantage, dira pour n'entrer en ceste distinction: Puis que vous l'avez dict, vous avez menty. Encore ay-ie veu resoudre cela en vne condition, au conseil des Mareschaux de France, en vne querelle qui n'estoit point entre des petits seigneurs. Vous penserez que ce n'est à moy d'en parler. Que mon chaperon & mon bourlet me le defendent, & qu'il est bien seant à chacun de discourir de ce qui touche son estat: si m'en dispenseray-ie pour ce coup, à la charge, non que les plus braues, ains les plus couïards diront que i'en parle comme vn clerc d'armes. Si le poinct d'honneur est de telle recommandation entre ceux qui maniēt les armes, comme ils en font contenance, soudain que le dementir est baillé, soit auecques condition ou non, on n'y peut plus apporter de fucille. La seule opinion que l'on a eu que l'homme de bien ait peu contre sa conscience dire vn mensonge, meritē de venir aux mains sans exception ny reserue. Ie fais bon marché du sang, mais aussi ay-ie, en ce faisant, l'honneur plus cher, qu'vn tas de piaffeurs de Cour, qui le publient sur toutes choses, en leurs cōmuns deuïs à la table des Princes & grands seigneurs, & neantmoins ne craignent rien tant

*La folie du
temps qui
court de
prendre vn
amy qui
nous secōde
en nos cō-
bats.*

que de faire pauois de leurs vies pour le defendre. Et qui me semble encores plus ridicule & indigne d'un braue guerrier, c'est qu'en la plus part des querelles, il faut que nous ayons vn second, pour nous affranchir du Loup-garou. Ceux qui ont peur des esprits, en vlent en ceste façon; ils ne couchent iamais seuls en vne maison. S'ils ont vn homme qui leur face compaignie, les voyla adonc alleurez. Il n'y a point signe de plus grande coïardise que de demāder vn adioint pour demesler vne querelle à laquelle il n'a nulle part: ny plus grand argument de folie, que de voir vn homme s'exposer à la mort de sens froid, contre celuy avec lequel il n'exerçoit nulle inimitié precedente. Nos peres en vſoyēt d'une autre façon, & croy que la posterité, ou du tout ne le croira, ou estimera cest aage infiniment fol & corrompu. A Dieu.

*A Monsieur de la Bite Juge general
de Mayenne.*

*Il s'excuse
d'auoir esté
pareſſeux
d'eſcrire à
Monsieur
de la Bite.*

Quand i'ay veu que par la vostre me priez, que pour ne me distraire de mes meilleures occupatiōs ie diſſe de bouche à Monsieur Seneschal ce que ſouhaitiez apprendre par mes lettres. A ce que ie voy les mocqueurs ſont auſſi bien aux petites villes comme aux grandes. On n'accuſa iamais plus à propos vn pareſſeux tel que moy, en l'excusant. Ie ſeray à ce coup plus franc à la plume, pour vous dire que ie

n'ay empeschement au monde que ie ne laisse
 tres-volontiers pour vous, quand aurez affai-
 re de moy. Il y a trop long temps que nous
 nous cognoissons & aimons, pour en vser au-
 trement. Croyez que les amitez qui pren-
 nent leurs racines de la ieunesse, ont de grands
 aduantages sur les autres, que nous contra-
 ctions quand nous commençons d'estre enta-
 chez du venin d'ambition & d'auarice. Je
 louie Dieu que soyiez maintenant garenty de
 ceste fascheuse fieure quarte, qui s'estoit lo-
 gee dans vous l'espace de deux ans. Je ne
 l'appelle pas sans cause, fascheuse, mesme-
 ment entre nous autres François. Car quand
 nous voulons mal à vn homme, le plus beau
 de nos souhaits, est de luy desirer, Ses fie-
 ures quartaines. Ce qui n'a pas esté mis en
 vsage sans raison par nos anciens. Car si l'es-
 prit du François est prompt, chaud, boiil-
 lant, & qui vueille ou tost mourir, ou tost
 guerir, ce luy est vne dure prison, de demeurer
 si long temps malade. Iene dy pas cecy pour
 vous. Par ce que ie sçay qu'estant né d'un esprit
 calme, la patience vous fait perpetuelle compa-
 gnie. Mais cela mesme estoit cause de la lon-
 gueur. D'autant que ce calme, & ceste patien-
 ce, font ordinairement leur seiour aux esprits
 melancoliques, qui sont les vrais sujets de tel-
 les fieures. Je craignois ceste maladie dauanta-
 ge en vous, non seulement pour ce qu'elle vous
 estoit aduenue en temps d'Automne, mais
 qui plus est sur vostre automne, i'entends
 estant desia chargé d'ans; & vous sçauiez que

*D'où vient
 qu'entre
 les François
 on souhaite
 la fieure
 quarte pour
 grande ma-
 disson.*

*Toutes lon-
 gues mala-
 dies sont de
 dangereux
 effects aux
 vieilles
 gens.*

c'est vn ancien Aphorisme d'Hipocrate, que les fieures quartes ne sont mortelles que quand elles s'acharnent sur les vieilles gens. Chose que nous pouuons dire de toutes autres maladies qui de leur nature se tirent en longueur. Car la chaleur naturelle defaillant en eux, il est malaisé qu'ils trouuent ressource encontre tels accidens. Dieu sçauoit bien que vostre ville auoit encores affaire de vous; & puis qu'en estes deliuré, vous donnerez ordre de ne vous mettre désormais à tous les iours. Vous auez à vous conseruer non seulement pour les vostres, ains pour tout le public. La perte est trop grande, quand elle ne se peut aisément recouurer en vne autre personne. Le país où administrez la iustice, desire vn tel surueillant. La droiture nasquit avec vous, laquelle auez fort bien sçeu fortifier par vne bonne doctrine, vn sens acquis, & longue experiéce que le temps vous a apportée. Et quand il plaira à Dieu de vous appeller, *Tu marmorea relinques, quam lateritiam urbem inueneras.* Ne pensez point que ie preste cecy à vos oreilles : ie suis bien aisé de louer vn mien amy, voire en face, quand il s'en rend digne, à fin de luy donner esperon de faire de bien en mieux. Quant aux nouuelles de deçà, il court ie ne sçay quel bruit d'une nouuelle guerre ciuile. Nous sommes tous aux escoutes: chacun en parle diuersement : les vns ne la veulent croire de la part dont on la corne, les autres la tiennent pour tres-certaine. Quelque chose qu'il en soit, si elle est vraye, nous en verrons bien tost des esclats en ce mois de mars

Nouveaux
bruits de
troubles
1585.

où nous sommes, lequel semble auoir esté fatal à l'ouuerture & closture des guerres ciuiles de nostre France. Il sembloit au cōmencement de cet an, que toutes choses fussent disposees comme en vne tref-profonde paix : & mesmes il y a lōg temps que l'on n'auoit fait plus d'allegreses que celles que l'on a pratiquees à la receptiō des Ambassadeurs d'Angleterre. Qui me fait grandement craindre ceste guerre inopinee, comme venant de la main expresse de Dieu, pour moderer nos opinions. Apres luy, ie croy qu'il n'y a que la Royne mere qui y puisse donner ordre, qui n'est apprētie à faire des paix entre les subjets du Roy, quand les occasions s'y sont presentees. A Dieu.

A Monsieur Brulart seigneur de Chillery, President en la troisieme Chambre des Enquestes du Parlement de Paris.

A Peine m'estois-je retiré de la ville en ma maison d'Argentueil, pour me recōcilier par quelques iours avec mes liures & meilleures pensees, quand i'ay receu vn paquet de vous, accompagné de deux discours, composez de mains partiales, selon les passions particulieres de ceux qui les font courir. I'auois depuis quelques ans en çà fueilleté les Ephemerides de Leouicius & Stadius, mais ny l'un ny l'autre ne nous promettent tant de maux par leurs Eclipses, comme ces cartels de deffi, que i'appelle autrement trōpettes de nos calamitez. Je voy vne estrange & horrible tragedie que

Il deplore la calamité des troubles, & le danger que ils trainent avecques soy.

Les libelles que l'on fait courir.

au commencement des troubles sont les seminaires de nos ruines.

l'on veut représenter sur le theatre de la France. Et tout ainsi qu'anciennement en tels jeux, le fatiste introduisoit presque d'ordinaire quelque messager ou autre telle personne qui donnoit à entendre le motif, source & occasion de la fable, aussi sont-ce icy les nonces & avant-coureurs de nos miseres. Et en ce mystere vous trouuerez que les Princes & grands seigneurs ioueront diuersement leurs roolles, les vns sous le nom de la sainte ligue, les autres sous celui de la religion. Et tout le pauvre peuple de la France seruira de Chœur pour deplorer aux entremets son malheur, & tout d'une suite prognostiquer la subuersion de l'Estat. Par ce que de tous les troubles qui se sont passez entre nous, i'en en trouue nuls de plus dangereux effect & perilleuse consequence que ceux-cy. Les effects d'une guerre ciuile sont de produire plusieurs & diuers reiettons, iusques à ce que pour closture finale, l'Estat se trouue, ou du tout changé, ou ruiné. Ainsi dedans la ville de Rome apres ceste grande diuision qui fut entre Cesar & Pompee, tant s'en faut que leurs morts y apportassent fin, qu'au contraire elles engendrerent vne pepiniere d'autres guerres, tantost encontre Sexte Pompee, tantost contre Scipion, puis encontre Marc Anthoine, iusques à ce que finalement en la fortune heureuse d'Auguste, apres plusieurs reuolutions d'annees, fut la conclusion du malheur, qui apporta nouvelle face de Republique. En ceste mesme façon sous le regne de Charles VI. les diuisions des Bourguignons & Orleannois

Les guerres ciuiles ont tousiours de longues queues.

prenans diuers plis: les Orleannois tantost prenans pied & racine par vn Connestable de la maison d'Armaignac, puis par vn Dauphin de France : & les Bourguignons par les Anglois; nos ancestres & predecesseurs veirent en fin nostre France occupee quelques annees par les mesmes Anglois, pendant que le naturel François n'estoit occupé qu'à la ruine desoy-mesme. Ia à Dieu ne plaïse que mon Prognostic sorte effect. Mais remarquant de nostre temps cinq aages des troubles: le tumulte d'Amboise, que ie compare à l'enfance: les armes de soixante vn, que ie nomme l'adolescence: la suite de soixante sept iusques en septante deux, qui fut comme la force & virilité de nos maux: le siege de la Rochelle & autres deportemens iusques à la Pacification de l'an cinq cens septante sept, qui me represente vn temps qui va entre la virilité, & vieillesse: puis remettant deuant mes yeux ce qui s'est passé par la France pendant l'entrejet de la paix, maintenant en ce dernier acte qui m'est le cinquiesme, & que i'estime estre la vieillesse, ie crains grandement qu'il ne nous apporte vne fin, non des troubles, ains de nostre Republique. Car, pour vous dire le vray, le malheur est, que voyans, nous ne voyons rien: & si comme au corps humain on voit à la longue son commencement, progresz, & entretenement, & declinaison, sans que nous en apperceuions, estant en cecy nostre vie ny plus ny moins que de l'eguille d'vne Horloge, *Quam progredi non videmus, progressam autem videmus.*

*Cinq aages
des troubles
de la France.*

Aussi toutes choses estans en nostre France al-
 lees de mal en pis depuis vingtcinq ans passez,
 nous ne nous en apperceuons. Mais qui auroit
 dormy depuis la mort du Roy Henry second
 (que Dieu absolve) iusques à huy, certaine-
 ment à son resueil il trouueroit tant de change-
 mens, qu'il penseroit estre en vn nouveau mô-
 de. Les Republiques ont certaines proposi-
 tions, par lesquelles elles se conseruent, puis se
 perdent. C'est pourquoy il me semble qu'il
 faut auoir recours à dieu, par humbles prieres,
 processions, & rogations publiques : à fin qu'il
 luy plaise destourner son ire de nous : encores
 que ie sçache bien que la plus grande partie des
 corrompus de ce temps s'en mocqueront : lais-
 sans à part la Croix aux gens de bien : & se don-
 nans en partage le baston de la Croix de frere
 Ieâ des Antomeures, représenté par Rabelais.
 Ne s'aduifans pas que tant que Moyse eut les
 mains esleuees au ciel, il obtint victoire encon-
 tre ses ennemis. Non que ie vueille que faisans
 cela d'un costé, nous nous endormions de l'autre.
 Il faut vacquer à tous les deux ensemble-
 ment, mais beaucoup plus se remettre à l'aide
 de Dieu, que du monde. Et s'il vous plaist que
 ie sois en ce temps plein de vice & corruption,
 bon Chrestien, & bon citoyen tout ensemble,
 sça' vous que ie souhaiterois ? En premier lieu,
 vne Foy & vne Loy, non point qui soit establie
 sur vn nouveau Concil national, ains telle que
 l'auons apprise de main en main de nos peres :
 ie ne voy point que nostre Christianisme ayt
 rapporté grand fruiet par les Concils, quand
 on y

*Sçauoir s'il
 est bon de
 venir par
 nouveau
 Concil
 pour la re-
 conciliatio
 des deux
 religions
 qui sont
 par la
 France.*

on y donne voix deliberative à ceux qui sont
 esloignez de la foy commune & ancienne.
 Chacun y veut demeurer le maistre, nul ceder
 à son compagnon. Ni le Concil de Nice, qui
 est l'un des plus celebres qui fut iamais, n'ex-
 termina les Ariens, ni celuy de Constance
 l'heresie de Iean Huz, & de Ierosme de Pra-
 gue. Nous en auons fait l'experience de nostre
 temps en la ville de Poissy, quand nous vou-
 lumes entrer en conference deuant le Roy
 Charles neuuesme avec les Ministres, contre
 l'aduis de ce sage Cardinal de Tournon, qui
 proposoit les inconueniens qui en aduien-
 droient. Delaquelle conferance nous ne rap-
 portasmes autre fruit, sinon qu'au partir de
 là chacun demeurant fiché en sa religion, les
 Ministres se firent de là en auant accroire qu'ils
 faisoient partie de nostre Republique, veu
 que l'on leur auoit fait cest honneur de leur
 donner rang en telles disputes deuant la face
 du Roy, & en vn si solennel theatre. Nostre
 foy est despicça establie, tant par la sainte
 Escriture, autorité des saincts Peres, que
 traditions de l'Eglise. S'il y a quelques abus, il
 les faut sans plus elaguer, & non deraciner
 tout à fait ce que nous tenons d'une si longue
 ancienneté. Ouurez la porte aux disputes, il
 n'y a article de foy, qu'un esprit mal né &
 visqueux ne puisse reuoker en doute. Il me
 souuient auoir leu dans l'histoire Ecclesiasti-
 que, que pédant que par diuers Concils les Ca-
 tholics & Ariens soustenoyent chacun leur
 party, ils auoyent tellemēt embarassé les escri-

*Il faut cor-
 riger les a-
 bus, & non
 changer la
 religion an-
 cienne.*

*Il faut sur-
 tout crain-
 dre d'en-
 trer en dis-
 pute en
 matiere de
 religion.*

tures, quel'on ne pouuoit bonemét discerner quel estoit le vray poinct de nostre creance. Qui occasionna l'Empereur Constantin de prohiber par loy expresse, de disputer à l'aduenir de la foy, & par special de la Trinité. Aussi est-ce la raison pour laquelle les Philosophes en choses, sans comparaitan, moins serieuses, sont d'aduis qu'il ne faut entrer en dispute avec ceux qui denient les Principes, entendans sous ce mot de Principes, les determinations arrestees en chaque science, d'une longue ancienneté, par les grands maistres. Je ne fais point profession de Theologie, ains me contente de croire ce que l'Eglise me commande, & que ie voy auoir esté arresté de tout temps par mes superieurs. Je diray seulement ce que ie pense estre de l'histoire, sans entrer en plus profond examen & cognoissance de cause. Repassez l'ancienneté, vous trouuerez que de tout temps dependoit de la chaize saint Pierre & de ses successeurs en la ville de Rome, l'union de l'Eglise generale & vniuerselle. Ainsi l'apprenons nous de saint Irenee, Tertullian, saint Cyprian, saint Ierosme, saint Ambroise, saint Augustin, Optat, saint Iean Chrysostome. Aussi n'est-il pas fort aisé de croire que Dieu qui souffrit mort & passion pour nous sauuer, eust voulu laisser vaguer, perdre & fluctuer son Eglise, cent ou six vingts ans apres, iusques à la venue de Calvin. Car la plus grande partie des ceremonies & propositions que ceux de la Religion appellent idolatries, estoient en

De tout

temps &

despêdu de

la chaize

de S. Pierre

l'union de

l'Eglise.

vogue dès le temps mesme de Tertulian. Ie
 veux viure & mourir en ceste foy: & à la miē-
 ne volonté que toute nostre France fust
 reduite sous la mesme creance. Qui est pour
 respondre en passant au liure intitulé, l'Auer-
 tissement. Mais aussi en contreschange veux
 ie respondre à l'autre liure, & vous dire que de
 vouloir extirper l'heresie, & asseurer nostre *Si l'heresie*
 religion par les armes, ie ne puis bonnement *se doit ex-*
 me resoudre s'il est expedient, ni mesmes il *terminer*
 nous est permis de le faire. Car encores qu'un *par les*
 Guy de Montfort ait autrefois practiqué cela *armes.*
 entre nous avec vn heureux succez encontre
 les Albigeois, si est-ce que tous nos voyages
 de Ierusalem, qui en fin ne seruirent que de
 tombeau à tous les nostres, me font dire que
 ce n'est la voye pour paruenir à vne bonne re-
 duction. Et c'est aussi la premiere prohibition
 qui semble auoir esté faicte par le grand Mai-
 stre de nostre Eglise, quand il defendit expres-
 sement à saint Pierre de prendre les armes pour
 sa defence & protection, qui estoit celuy tou-
 tesfois qu'il auoit choisi entre ses Apolstres pour
 estre le fondement de son Eglise apres luy. Et
 mesmes ie ne vous accorderay iamais que les
 armes materielles de Montfort eussent peu ve-
 nir à bout des Albigeois, sans les sainctes ex-
 hortations & presches de saint Dominique, *Pourquoy.*
 quiluy assista en toute ceste expedition. Par *les Iacobins*
 le moyen desquelles, luy, & successiuellement *sont Inqui-*
 ceux de son ordre, obtindrent le priuilege d'a- *sisteurs de*
 uoir la charge del'Inquisition de la foy. Et de *la Foy, &*
 là encores est venu que tous les religieux de la *appelle*
Frere Pres-
cheurs.

famille sont appelez freres Prescheurs. Ie sçay bié que vous me direz que ne voulât ni Cōcil ni les armes, il sēble que ie vueille permettre que ceste nouuelle opinion pullule de plus en plus. Et que les Medecins sont d'aduis d'employer pour les guerisons des Maladies ou la medecine, ou la saignee, ou le cautere. La nef de saint Pierre a esté diuersement agitee de plusieurs flots & tempestes, toutes fois iamais elle ne fut submergee. Les heretiques quelquefois ont trouué de plus hardis combatans que les Catholics. Quelques anciens nous attestent que les liures des Ariensestoyent plus doctes & mieux bastis que les nostres. Ce neantmoins leur doctrine estant faulse & mensongere se supprima d'elle mesme, sans aucun artifice des hommes. Le semblable en aduient il aux Pelagiens, Nouatiens, Donatistes, & autres de mesme trempe. Et ne fais nulle doubte qu'il n'en aduienne autant de ceste opinion Calviniste, avec le temps: moyennant que nous y apportions quelque zele & deuotion de nostre part. Non par contentions d'esprit, telles que produisent les confertes des Catholics & Heretiques, non par meurdres, homicides, & assassinats, qui naissent au milieu des armes, qui produisent bien souuent l'Atheisme: Ains en reduisant l'Eglise Catholique en son ancienne dignité. Commettant les charges d'icelle, non à femmes, non à gendarmes, non à enfans, non à varlets, qui malquez d'une longue soutane, ne portent que le tiltre d'Euesques & Abbez, sans effect: mais à gens de bien & d'honneur,

qui auront bien merité des saintes lettres, & qui en leurs bonnes mœurs pourront seruir de bon exemple à tout le peuple. Brief, bannissez de nous la Simonie, vous bannirez, sans y penser, peu de temps apres l'heresie, & tout d'une suite asseurerez le Royaume au Roy & aux siens. Il me souuient auoir leu, que sous deux Roys du nom de Charle, nostre Royaume fut infiniment affligé de guerres ciuiles: sous Charle le Simple, & sous Charle sixiesme. Cōbien que le premier fut apres son decez surnomé le Simple, par forme de sobriquet, si est-ce à la verité qu'il eut assez d'entendement & proüesse, pour faire teste à ses ennemis: & neātmoins commença en luy de s'esgarer, voire perdre la Majesté qui auparauant reluisoit aux Roys de la seconde lignee. Combien que le second n'ait esté qualifié apres son decez du surnom de fol, ains de Bien-aimé, toutesfois on ne peut denier que la plus grande partie de son regne, il ne fut mal ordonné de son cerueau. Et toutesfois quelques guerres ciuiles qu'eust causé du commencement son enfance, puis l'alteration de son esprit, iusques à introduire & insinuer l'Anglois en la plus part de nostre France: ceneantmoins par vn grand mystere de Dieu, le Royaume fut conserué à Charle septiesme son fils, & à sa posterité. Si vous me demandez la cause de si diuers succez, il est aisé de la recueillir à celuy qui sera versé en l'histoire de France. Pour autant que sous cestuy-cy au milieu de toutes ces dissentions & diuorces publics, chacun

*Sous Char
les troisiè-
me & vi.
le Royau-
me gran-
dement af-
fligé de
guerres ci-
uiles.*

toutesfois conspiroit deuotement à la manutention de la dignité de l'Eglise, & extirpatiō tant des erreurs, que des abbys. Sous le premier l'on faisoit des Eglises estables aux cheuaux, distribuant les biens & charges d'icelles à capitaines & soldats. Voila en somme ce que i'auois à respondre aux deux liures que vous m'auiez enuoyez. Quant au surplus, tout ce que ie desire entre nous est vne Paix. C'est la premiere, la seconde, c'est la derniere partie de mes opinions. Si bien ou mal, ie m'en remets à la censure des plus sages. Tout ainsi que ie ne voudrois blasmer celuy qui souhaitte la guerre pour estre son opinion fondee sur vn zele de religion, qui porte son sauf-conduit encontre tous les maldisans, aussi ie croy que tout homme de bien ne trouuera mauuais si vn autre desire la paix pour la consequence, & par vn autre discours. Tous deux sont fondez en vne bonne & sincere deuotion qu'ils apportent au bien public, vray qu'en l'vn il y a avec le zele, moins, en l'autre plus de prudence & discretion. Mon Dieu, combien de Princes & grands Capitaines nous ont esté ravis par les troubles premiers & seconds, lesquels estoient capables de conquerir vne Europe, s'ils ne se fussent acharnez à la ruine les vns des autres? Le fruit d'une guerre civile est d'introduire vn Chaos, confusion, meslange, & desolation de toutes choses. Les chefs de party decernent plus de commissions pour leuer gens, qu'il n'y a de capitaines. A cesteemonco chacun y accourt à l'enuy, non seule-

*Combiē de
maux pro-
duisent les
guerres ci-
uiles.*

ment par ce que la guerre plaist à celuy qui en a fait experience, mais aussi que les Faict-neans estiment lors la porteleur estre ouuerte à toutes impunitéz : & sous ceste asseurance le donnent loy de viure à discretion sur le bon-homme, de le piller, violer femmes & filles. Le païsant d'un autre costé se voyant reduit en ces extremitéz, abandonne sa maison, & se blotit dans les bois, pour ne tomber en la mercy du soldat impiteux : ce pendant le labour demeure en friché, la marchandise sans traffic, le Magistrat sans gages, le citoyen n'est payé ni de les rentes de ville, ni de son reuenu des champs : & neanmoins ayant deschet de toutes choses, les Roys & Princes pour subuenir à la necessité des guerres, sont contrains, voire contre leurs volonte, de faire des emprunts extraordinaires, leuer des octrois gratuits, croistre les anciens subsides, & en inuenter de nouveaux : lesquels ores que pour le besoin du temps ayent pris cours, si est-ce que les choses venans à se pacifier, on ne sçait que c'est de les supprimer. Qui sont au long aller autant de materiaux de la ruine & subuersion de l'Estat. D'ailleurs iamais telles partialitez n'aduennent qu'il n'y ait tousiours vn party plus foible que l'autre : & en ce desaduantage le plus prompt remede que l'on a, c'est d'auoir recours aux estrangers, lesquels, comme estés en vn païs de conqueste, ruinent & rauagent tant ceux de l'un que de l'autre party, estans venus plus pour s'énrichir que pour combattre.

Les guerres civiles appaissent ou subuersion ou mutatio de l'Estat. Et si mesmement il aduient qu'apres auoir esté long temps fols, nous deuentions sages par noz ruines, vray Dieu quelle leuee de deniers faut il pour licencier ceux qui s'en retournent gras & enfliez de noz despouilles? Et qui est vn

point que ie trouue plus à craindre en telles affaires, c'est que combien que les estrangers sur leur premier abord facent semblant de fauoriser celuy pour lequel ils sont appelez, toutesfois il se trouue ordinairement par la closture du compte, qu'ils emportent tout ce qui estoit demeuré du reliqua de telles seditions. Chose qui est si familiere en exéples, que n'estoit la nécessité du temps present, ie voudrois les vous ramenteuoir. Les Autunois & Sequanois (que nous appellons auourd'huy Bourguignons) deux Quantons anciens des Gaules, combatoyent pour la primauté, & auoient attraits diuersement à leurs cordelles plusieurs villes, bourgs & bourgades. La fortune sur le commencement fauorisa les Autunois. Au moyen dequoy les Sequanois sollicitèrent à leur secours Ariouist l'vn des Roys de la Germanie, à l'aide duquel ils obtindrent le dessus des Autunois. Mais que

Les estrangers que nous appellons à nostre secours se font en fin maistres de nous. leur aduint-il de ce grand bien? Ariouist voyant les forces des Sequanois affoiblies, & les siennes encores fraisches, s'empara du plus beau territoire qu'ils eussent, pour recôpense de ses trauaux. Il desplaisoit aux Autunois d'auoir receu ceste honte de leurs ennemis, & s'en vouloiét ressentir, toutesfois leur puillâce n'estoit correspondante à leur cœur. Ils ont recours

aux Romains, desquels ils se disoyent confederer. Iules Cesar est delegué pour cest affaire, lequel prend leur querelle en main : mais voyant les forces des vns & des autres decliner par leurs diuisions à leur propre ruine, apres auoir remis sus les Heduens, il rendit pour fin de jeu toutes les Gaules tributaires au peuple de Rome. Le Royaume de Ierusalem auoit quelques ans prosperé dessous les Princes Chrestiés. La fortune du temps voulut que Bauldouin le Lepreux mourant laissà pour heritier de sa couronne, vn autre Bauldouin son nepueu, enfant du premier liēt de Sybille sa sœur, qui lors estoit conuolee en secondes nopces avecques Guy de Lusignen. Ce Roy decedant ordonna que Raimond Comte de Tripoli eut la tutelle de son nepueu. Mais il ne fut si tost decedé que Raimond trompant l'opinion du defunct, fit mourir sous main son pupille, en intention de se faire proclamer Roy : toutesfois ses desseins furēt empeschez par Guy de Lusignen, à l'occasion de sa femme, qui attouchoit de plus pres à la couronne, par proximité de lignage. Guerre ciuile se meut entr'eux, en laquelle, Raimond estant le plus foible, appella à son secours Saladin Souldan de l'Egypte. Grande pitié. Cest Egyptien prit, sans aucune resistance, les villes d'Azoton, Ascalon, Berithe, & celle de Ierusalem, & generalement tout le Royaume qui nous auoit cousté tant d'ames : & pour conclusion mit l'vn & l'autre des contendans hors du jeu, faisant contenance de vouloir gratifier à l'vn d'eux. Les Grecs sous les Empereurs de

Constantinople se trouuerent long temps flotter en dissentions populaires, pour faire tomber la courõne de l'Empire, les aucuns es mains de Iean Cantacussin, & les autres en celles de Iean Palleologue son gendre. Cestuy se trouuoit le moins fort : & pour ceste cause s'allia d'Orcan Roy des Turcs, qui passa le destroit du bras saint George, que les anciens appelloient Hellespont, avec l'aide desquels il se fit sacrer Empereur. Les Turcs auparauant ce temps n'auoyent iamais gousté la douceur de l'air de la Grece. Ils voyent qu'il y faisoit bon pour les diuorces & partialitez qui y estoient: à leur retour ils s'emparent de la ville de Gallipoli, & depuis Orcan estant mort, Amurath sõ successeur prit celles de Philippopoli & Andrinopoli, & ne cessèrent iamais iusques à ce qu'ils se fussent du tout emparez de l'Empire, & eussent chassez les Palleologues qu'ils y auoyent du commencement installez. Mais que faut-il aller plus loin? Nos ancestres ne sentirent-ils presque mesme de l'arroy, en la diuision des Bourguignons & Orleánois (comme ie disois sur le commencement de ceste lettre) quand Iean Duc de Bourgogne voyant ses ennemis estre assiste de la presence & autorité du Dauphin, attira par sourdes pratiques la nation Anglesche en France, pour rendre sa cause plus forte? Qu'aduint-il en fin de cecy, sinon que parmy nos diuisions, l'Anglois vsant dextremement du temps à son aduantage, se fit maistre d'une bonne partie de la France? Mesme de nostre ville de Paris, qu'il tint en sa pos-

cession l'espace de dixhuit ans? A quel propos doncques tout cecy? Pour vous dire qu'en ces troubles que ie voy se renouueller entre nous, en vne assurance de tout, ie crains tout. Ie ne fais nulle doute que nous n'ayons recours aux Reistres, lesquels nous auons ja tant de fois adomestiquez entre nous à nostre tres-grand lommage. Ils ont depuis xxvij. ou xxviii. ans en çà cogneu l'abondance de nostre païs, tant en bleds, vins, qu'argent & richesses. Nous leur auons non seulement enseigné les chemins de nostre Royaume: mais qui plus est les auons conduits & menez par la main. Au bout de tout cela ie crains qu'ayàs tant de fois appris le chemin pour nous venir voir, enyurez & de nos vins, & de la commodité de nostre païs, ils n'oublient tout à fait le retour du leur. Brief, ou que du tout ils ne se fassent maistres de nous (ce que Dieu s'il luy plaist par sa sainte grace ne permettra) ou en tout euenement, qu'ils ne vueillent estre payez de leurs soldes, non en argent, ains en assiette de terres, ainsi qu'autrefois les Normands apres auoir halené par trois & quatre venuës l'air de la France: & auparauant les Visigots, quand Stilicó pour les souldoyer les partagea du pays, qui depuis fut appellé de leur nom, Langue de Got, & par succession de tēps Languedoc, où ils establirent leurs demeures. *Languedoc, Langue de Got.* Dónons qu'au milieu de ceste fureur publique nous soyons si sages de ne solliciter l'estranger, ou que le mesme estrange se donne la patience de voir quelle issue prendra ceste tragedie,

sans se mettre de la partie, ne deuõs nous point craindre que pendant que chacun se dira en s'õ endroit garde d'es bonnes villes & citez sous le nom du Roy (car en tels rauages publics chacun tant d'un party que d'autre ne couche que de l'authorité de son Roy , & n'y a pour bien dire que luy qui principalement y perde) ne deuons nous (dy-ie) craindre, que tous ces gardiens de villes ne s'en facent maistres par traite de temps ? Non veritablement que ie vueille croire qu'il y ait aucun Prince ou grãd seigneur, quel qu'il soit, qui projette maintenant de le faire : Mais le temps quelque-fois nous licentie au milieu de telles desbauches à choses auxquelles nous n'auons du commence-

*D'où se sõt
faictz les
Ducs &
Comtes tant
de la France
que de l'I-
talie.*

ment pensé. Pour le moins de ceste façon, les Princes & Barons de France vnirent à leurs familles, & feirent perpetuels les grands Duchez & Comtez, qui estoient auparauant viagers (comme les gouuernemens des Prouinces que le Roy distribue à present.) Le tout par le moyen des guerres ciuiles, qui eurent vogue en ceste France depuis la minorité de Charles le Simple, iusques à la venue de Capet. Et en cas semblable des siefs qui dependoyent, partie de la Papauté, partie de l'Empire, se feirent dans l'Italie plusieurs Ducs, Marquis & Comtes tels que nous les voyons auourd'huy. Et ce par les factions des Guelphes & Gibellins : ceux là portans le party du Pape, & ceux-cy de l'Empereur. Car tout estant tombé en ruine par ces diuisions, & les capitaines iouians dans vne mesme ville à bout hors, le Papiste la tenant

tantost , & peu apres l'Imperial, selon la diuersité des rencontres, ces villes estans presque tenues comme espaues en faueur de celuy qui les occupoit, les Papes & les Empereurs aimerent beaucoup mieux en gratifier à la fin leurs partisans par forme d'inféodation, que du tout en perdre & la seigneurie & la propriété tout ensemble. Je ne dy pas que tout ce que ie discours avec vous soit infallible 'comme l'Euangile : il n'y a reigle si generale qui ne souffre ses exceptions. Mais la deuotion que i'ay à mon Roy, à ma patrie, à tous les Princes & grands seigneurs, à la noblesse & à tout le peuple de France, me faict tenir tels propos : craignant de veoir ce que nul bon citoyen ne doit desirer, ie veux dire, l'euersion, ou la mutation de l'Estat. C'est pourquoy si de deux maux il faut choisir le moindre, ie ne douteray point de dire à pleine bouche & cœur ouuert, qu'encores que la tyrannie soit odieuse à Dieu, & au monde, & qu'à la longue elle perde son autheur, si aimeray-ie tousiours mieux vne tyrannie, pendant vne paix, que de tomber en la misericorde d'une guerre civile. Je souhaite vne bonne paix, si telle on la peut obtenir : & si on ne la peut obtenir, il me semble que la plus fascheuse que l'on puisse proposer est plus expediente au Roy qu'une guerre civile. Les armes sont iournalieres, les iugemens de Dieu incogneus, & n'est pas dict que ceux qui suiuent le meilleur parti doiuent tousiours vaincre. Vne victoire obtenue par celuy que l'on se donnoit en proye, emporte vn

*Vne guerre
civile moins
tolerable
qu'une ty-
rannie en
temps de
paix.*

grand desarroy à l'Estat. Il ne fut iamais mal-
 leant à vn sage Pilote de caller la voile à la tem-
 peste. Iamais vn Roy n'a tant d'aduantage sur
 les sujets durant vne guerre ciuile, comme d'v-
 ne paix. Sa Majesté demeure tousiours. Au
 contraire les armes mises bas, les coleres des
 sujets se passent, leurs forces se dissipent d'elles
 mesmes, & par mesme moyen leur sont les oc-
 casions, & peut estre les volontez de se reünir,
 ostees. Faiçtes qu'vn maistre desgaine à la chau-
 de cole son espee contre son varlet, & que le
 varlet pour euitier le danger mette la main aux
 armes, le maistre portera la moitié de la peur :
 lequel peut toutesfois commander à la baguet-
 te luy seul à cinq ou six des seruiteurs, & s'en
 faire croire quand les affaires de sa famille sont
 calmes. Quelque chose que l'on vueille dire,
 iamais le Roy n'a tant gagné sur ceux de la re-
 ligion en temps de guerre, comme il a fait par
 ses Edicts de Pacification. A Dieu.

*A Monseigneur de Tiard seigneur de
 Bissy, Euesque de Chalons
 sur Saône.*

*Il se plaint
 de quelques
 cingés, qui
 veulent à
 fausses en-
 seignes pa-
 roistre
 grands aux
 despens des
 œuvres
 d'autrui.*

LE faut que ie vous appreste à rire : car
MA pourquoy ne nous chatoüillerons nous
 pour charmer aucunement nos douleurs au
 milieu de ceste calamité publique, à laquelle
 ne pouuons donner ordre? I'estois hier en vn
 lieu où ie ne sçay quel Sarlatan de Cour nous
 vouloit enseigner les moyens de se faire paroi-
 stre fort sçauant à peu de peine. Premierement

il estoit d'aduis qu'il se falloir rendre sobie admirateur des œuures d'autrui, ores qu'elles fussent de grand merite : par ce (disoit-il) que l'homme qui estoit peu voyant quant à l'esprit, estoit contraire à celuy qui a la veüe du corps courte. Cestuy-cy estimant toutes choses petites qui sont eslongnees de luy, posé qu'elles soyent grandes : & l'homme de petit esprit, à l'opposite reputant toutes choses qu'il lit pour grandes, jaçoit qu'elles soyent petites. Au moyen dequoy pour ne tomber en cest accessoire, & à fin d'emporter le renom de grand personnage, il trouuoit estre le plus expedient de tenir peu de compte de ceux qui escriuoient, & trouuer tousiours à redire, & ne fust-ce que toutes choses estans bien succedees à son auteur, & deduites selon son projet, luy imputer toutes-fois qu'il se soit fait tort, ou pour l'impertinence de la matiere, ou que le sujet qu'il traite ne soit correspondant à son aage, ou profession, voire quand il n'y auroit rien à cōtroller, hausser ce nonobstant les espaules, & secoüer la teste, de sorte que la compagnie cognoisse que l'on y trouue quelque chose à dire. De là, cōme celuy qui singloit en pleine mer, encores passa-il plus outre, disant qu'un homme auoit bien peu de credit, s'il n'auoit quelque Poëte amy duquel il pourroit escornifler quelque Epigramme, Sonnet, ou Ode, sur le mariage, la mort, ou victoire d'un Prince. Chose qu'il feroit passer de main à autre pour siëne. D'ailleurs qu'il se pouoit faire recōmander par les liures

de ceux qui sçauoyent mieux escrire, & se faire estimer sçauant, puis qu'il accostoit les sçauans. Et comme ce grand docteur se laissoit emporter du vent, aussi nous bailla-il plusieurs autres belles leçons dignes d'estre icy recordees. Il n'est pas dit (faisoit-il) que chacun puisse atteindre au parangon de ceux qui escriuent le mieux : & toutes-fois encores y a-il moyen de suppleer ce defect. Si les belles conceptions vous defaillent, pourquoy douterez-vous de les aller mandier chez vos voisins, en Italie, ou en Espaigne, & les rapporter en vostre langue cōme vostres? Car pour vn qui s'apperceura du larcin, il y en aura cinq cens qui ne le descouuriront, enuers lesquels vous acquerrez reputation telle que desirez. Je seray encores plus hardy, par ce que ie ne doubteray de me faire riche des plumes des auteurs modernes François, qui auront par leurs longues veilles extrait les riches tresors de l'ancienneté, & neantmoins feray contenance de les auoir comme eux puisez des vieux liures dont ie ne veisiamais la couuerture. Et pour autant que cecy gist peut estre en quelque peine, qui m'empeschera de reduire les gros œuures d'autrui en abregé, ou bien sans les abreger, les distribuer en liures, comme autresfois on feut de Philippe de Commines, ou en chapitres, pour arrester l'œil du lecteur? Et ce pendāt se verra tousiours sur le front de l'œuure mon nom, comme de celui qui aura apporté le lustre & embellissement à l'auteur. A tant se teut ce grand maître, & nous aussi, comme luy : les aucuns se
rians de

rians de ces beaux discours, & les autres s'en colerans, comme prouenans d'un esprit plein d'impudence trop effrontee. Toutes-fois rompant mon silence, ie dis lors en l'aureille, à quelqu'un de la compagnie, ioignant lequel i'estois: Vrayement nous en voicy bien: i'auois autres-fois ouy parler d'un sçauoir pedantesque, mais maintenant en voicy un d'autre façon, quel'on peut appeller courtisan. Comment (me dit l'autre) pensez vous qu'il ne vous die la verité? Tout ce qu'il vous a deduit se pratique. La plus part de ceux qui escriuent sont ou Copistes, ou Abreuiateurs, ou (si vous me permettez vser de ce mot) rabobelineurs de liures. Et quant à ce qu'il vous a dit qu'il se feroit à pis prendre recommander par les plumes des mieux escriuans, cela estoit de la Rhetorique du vieux temps, ie veux dire du regne de Henry deuxiesme, lors que l'on se frotoit aux robes de ces grands Poètes qui florirent sous ce bon Roy, pour trouuer un arriere coin dās leurs œuures: mais maintenāt on passe plus outre. Car ceux qui ne feirent iamais rien, se font alleguer pour auteurs, comme s'ils auoyent faict quelque œuvre laborieux, dont nous ne veismes iamais le premier eschantillon. Qui est vne recommandation sans comparaison plus effrontee, que celle dont vous parle ce Courtisan. Si cela est (respondy-ie à cestuy-là) ie quitte desormais la partie, & suis d'aduis que c'est grand folie de s'alambiquer le cerueau sur les liures, veu qu'à si bon marché on se fait estimer bon auteur. Sur ce

mot nous-nous departîmes : Et ne voulant que ces propos tombassent à terre, sans estre par moy recueillis, soudain j'ay mis la main à la plume pour vous en faire part, à la charge que nous en rirons vous & moy, mais que puis apres donnerons lieu à ce qui est du commun deuoir. Il n'y a remede, il faut que ie m'esclatte à ce coup, & me pleigne à gorge desployee de la calamité de ce siecle, qui nous a produit si grande foison d'auteurs, ou putatifs, ou auortons. Il n'y a si malotru qui ne vueille que ses premieres apprehensions prennent air, craignant qu'estant trop longuement enfermées, elles ne sentent le remugle. Vray Dieu! l'odelle me semble auoir autre-fois heureusement rencontré en ces six vers:

*Et tant ceux d'aniourd'huy me faschent,
Qui dès lors que leurs plumes laschent
Quelque trait soit mauuais ou bon,
En lumiere le vont produire,
Pour souuent avec leur renom,
Les pauvres Imprimeurs destruire.*

A la mienne volonté que nous eussions, cōme les Romains, quelques doctes Grammairiens qui nous seruissent de Censeurs, pour sinderiquer les liures, & trier les bons d'avec les mauuais. Tant de liures mal tissus, seruent plus de scandale, que d'edification à nostre langue : laquelle me semble desia decliner contre tout ordre de nature, auant qu'elle ait attein à sa perfection, & ; si ainsi le faut dire, s'en aller auparauant qu'elle soit venue. Car les langues ne demeurent pas moins auilies,

quand chacun indifferamment se donne vne
 liberté d'y escrire à son plaisir, que quand les
 esprits assoupis de nonchalance, ne s'estudient
 de les embellir: estant les deux extremités
 vicieuses. Et tout ainsi que le non escrire fait
 qu'elles ne soyent cogneuës, aussi le trop escrire,
 mesmes par gens qui n'ont autre tesmoignage
 de leur valleur, que celuy qu'ils en imaginent
 d'eux mesmes, rend les langues si obscurcies
 en leur pensant donner quelque lustre, que
 l'on n'en tiët compte. Ce n'est pas assez de dire,
 i'inuente ou traduis en mon François, ains
 faut que celuy qui veut mettre la main à la
 plume, ait vn fonds de bonnes matieres, vn
 amas de paroles de choix, & eslite, qu'il les
 mesnage dextrement, & qu'empruntant quel-
 que discours d'autrui il le rende toutes fois
 pour sien: ie veux dire qu'il face comme le bon
 estomach, lequel faisant vne bonne cuisson
 des viandes les distribue puis apres par l'aide &
 ministere du foye dans les veines, tout autres
 qu'il ne les a prises, dont se fait l'entretènement
 general de nostre corps. Mais c'est trop serieu-
 sement entrer en matiere pour vn homme qui
 sur le commencement de sa lettre auoit prote-
 sté seulement de rire. Si vos belles & saintes
 homelies vous dispensent de quelque loisir, ie
 vous prie recharger la presente de mesme su-
 jet, afin que ie ne sois estimé seul me plaindre
 de l'impudence de nostre temps. A Dieu.

*A Monsieur Hennequin seigneur de Sarraoise,
Conseiller & Maistre des Requestes
ordinaire du Roy.*

*Il se gaussé
avec le sei-
gneur de
Sarraoise
sur les pei-
nes qu'ont
les peres en
mariant
leurs en-
fans.*



E ne veux plus croire qu'il n'y ait que les meres qui soyent en trauail d'enfant. Les peres y ont mesme part. Les meres quand leurs enfans sortent de leurs flancs pour prendre vie. Les peres quand ils les veulent par mariage faire sortir de leurs maisons, pour entrer en vne autre vie. Vous ne m'en sçauriez dire des nouuelles, pour n'y auoir iamais passé. Cela sera cause que ie vous en comteray plus librement, comme celuy qui y est maintenant. Je ne vy iamais tant de remuemens de mesnage : marchands de Soye, Orfeures, Tailleurs, Chaussietiers, Cordonniers, Rostisseurs, Patissiers, Tapissiers, Cuisiniers, Violons, Musiciens, & mille autres tels baguenaudiers. Les femmes en accouchât sentent des tranches; & tout ce que ie viens de vous reciter sont mes tranches, mais tranches de saint Mathurin. Car pour le vous dire en vn mot, ce sont autant de folies. Et le plus grand mal que i'y voye, c'est qu'au trauail des meres, on y appelle des sages femmes pour les secourir, en cestuy cy les sages n'ont voix deliberatiue au chapitre, & n'y a que les ieunes (ie n'oze dire les plus folles) qui s'en facent croire. Chacū dit que qui moins en fait est le plus sage. Il n'y a sentence plus commune que celle là, ne qui tourne moins en vsage. Si

l'esperes & merès y veulent apporter quelque sobriété & attrépance, soudain les enfans s'escrient, que c'est pour eux que l'on fait la feste, qu'ils n'ont qu'un ou deux iours à eux, & que nous ne nous souuenons d'auior esté ieunes. Que feriez vous à ceste objection? Il faut raieuenir avec ceux, & leur passer condamnation de leurs volonte. Croyez que l'en fais le moins que ie puis, & neantmoins trois & quatre fois plus que ie ne veux. A Dieu.

*A Monsieur Maillard Conseiller & Maistre des
Requestes ordinaire du Roy.*

A PRES plusieurs allees & venues, la Roy-
ne mère en fin a si bien besogné que la
paix a esté conclue: & suiuant la capitulation
le Roy est venu le xvij. de Iuillet dernier en
son Parlement, où il a solemnellement cassé
tous les Edict precedens qui auoyent donné
tolerance à l'exercice de la nouuelle religion.
mōsieur le premier presidēt a sagement remarqué
en sa harangue que le premier Edict quil'auoit
toleree estoit d'un mesme mois en l'an 1561.
Il est dit qu'il n'y aura plus en toute la France
que la religion Apostolique, Catholique, ro-
maine, que les Ministres vuideront dedans
deux mois, à peine de confiscation de corps &
biens, & les autres dans six, s'ils ne veulent
se reconcilier avec nostre Eglise. En somme ce-
ste paix est le renouvellement d'une vieille
guerre, mais au vray, la paix des financiers.
Parce que quelques iours apres on a supprimé

*En recitant
l'Edict de
Pacification
qui fut fait
en Iuillet
1585. il
deterse l'a-
bition des
François.*

la Chambre Royale, moyennant deux cens mil escus qu'ils financent au Roy pour fournir aux frais de la guerre. Ceste nouvelle entreprise ne se peut passer sans couster beaucoup au Roy & au peuple. Qui est cause que l'on a maintenant recours au reſtaſſement de tous les eſtats de iudicature qui auoyent eſté ſupprimez. Il n'y a point telle eſpargne pour nos Rois que celle qui prouient de l'ambition de leurs ſujets. C'eſt vn fonds inexpuisable. En cecy chacun court en poſte à la pauureté. Il n'y a bonne maiſon dont nos Roys ne ſoyent par ce moyen heritiers. Il y a enuiron deux ans que le Roy ſupprima par mort tels offices, comme venans à la foule du peuple, voire avec vne tref-eſtroitte rigueur, ſans admettre les reſignations de ceux qui s'en vouloyent demettre auant que de mourir. La memoire de ce meſnage eſt en vn inſtant eſuanoüie. Il n'eſt pas fils de bonne mere qui ne mette là ſon denier. Il n'y a rien tant à craindre en vne Republique bien ordonnee, que le nombre effrené des officiers : & neantmoins rien qui tant la ſouſtienne eſaſſiſſions generales; telles que ceste-cy, comme quelques-vns eſtiment. Par ce que tenans leur grandeur d'un Roy, chacun craint la mutation de l'Eſtat. Toutesfois apres auoir remué toutes ſortes d'aduis à part moy, ie compare ceste multiplicité d'Eſtats au lierre, lequel on eſtime eſtre le ſouſtenement de la muraille contre laquelle ell'eſt collee, combien qu'interieurement ell'en ſoit au long aller la ſeule ruine. A Dieu.

*L'ambition
des François
eſt vne eſ-
pargne in-
expuisable
pour nos
Roys.*

*A Monsieur Regnier President en l'Election
de Soissons.*

VOus pouuez recepuoir ceste lettre de moy sans hazard, & m'en croyez. S'il y eust eu du danger en ma maison ien'eul-
se esté si maladuisé d'y seiourner & moins me
voudroy-ie maintenant oublier en vostre en-
droit, vous escriuant. I'ay esté visité de Dieu,
mais de sa petite visitation, & non de la gran-
de: ie veux dire, du bruit commun, & non
de l'effect. Toutesfois pour contenter l'opiniõ
du peuple, ie me suis retiré aux champs. C'est
ainsi que va ma fortune: iamais ie n'ay receu
grande allegresse, que soudain Dieu ne l'ait
voulu attremper de quelque fascherie: ni n'ay
esté combatu de grand delplaisir, qu'à l'instant
il ne m'ait enuoyé quelque objet pour me con-
soler, sans que l'un ait esté estouffé par l'autre.
C'est vne obseruation que i'ay faite en ma for-
tune, que ie vous pourrois verifiser par vne in-
finité d'exemples, si iel'auois entrepris. Ie me
contenteray seulement de vous dire qu'il y a
enuiron cinq semaines que i'ay eu ce conten-
tement de marier mon fils aîné: les feries
n'en estoient à peine expirees, que i'ay esté
salüé de ceste nouuelle affliction. Tellement
que quand ie verray toutes choses me reuenir
à souhait, ou à contre-poil, sans estre balan-
cees de leurs contraires, ie penseray estre au
bout de ma vie, ou de ma fortune: ni pour ce-

*Il raconte
comme sa
bonne for-
tune est
contreba-
lancee par
la mau-
uaise*

Belle chose de tirer commodité de ses incommoditez. la ie ne m'en estime moins heureux. Car comme ce soit vn grãd secret de sçauoir tirer cōmodité de ses incommoditez, aussi estime-ie ce contrepoix de malheur, me tourner à tres-grand heur : n'y ayant rien, à mon iugement, que l'on doie tant craindre, qu'un flux & longue suite d'un heur absolu. Lequel non seulement fait mettre nos pensees à l'essor, ains couue ordinairement sous soy vn grand precipice, qui nous procure plus de tourment, que la ioye n'auoit esté grande, pendant que nous estions en vogue. Or maintenant ie suis

Il se gausse sur ceste vieille rencontre de n'estre moins otieux que quand l'on est otieux. aux champs en pleines vacations. Je ne sçay pas comme l'ancien Romain entendoit ce mot que l'on a tant solennisé : qu'il n'estoit iamais moins otieux, que quand il estoit otieux. I'en dy tout autant queluy : que ie ne me trouuay iamais tant empesché, qu'ores que ie ne suis empesché. Et si ne le dis pas à mon aduantage, comme il faisoit. Je vois, ie viens, ie tracalle dans ma maison, d'une chambre à autre, ie descends du haut en bas, ie remonte du bas en haut. Brief, ie fais plus de tours

Il se mocque en parlant de soy de ceux qui sont en leurs maisons sans rien faire. de mon corps, que Diogene le Cynic ne faisoit faire à son vaisseau, lors qu'il ne vouloit estre non plus oiseux que les Corinthiens, quand ils affustoyent leurs appareils, & appareilloient leurs affuils pour faire la guerre. Et ne suis pas seul empesché. Car en ne faisant rien, i'empesche toute ma famille. Je veux sçauoir comme il va de toutes choses. En vn mot ie suis vn quatre-mesnage, ou pour me mesler d'un mestier auquel

ie suis neuf & apprentif, ie suis vn gaste-mefnage. *Quatre-mefnage, gaste-mefnage.* Vrayement si le Romain dont i'ay parlé en estoit logé là, il n'estoit pas de grand merite. Ie sçay bien que vous m'objecterez les arbres auxquels ie puis prédre quelque deduit & passe-temps. Ie vous diray franchement, que pour la premiere rencontre, les champs resuscillent mes esprits. Mais deux ou trois iours apres, ie retourne à mon naturel. Les arbres ne parlent *Les chaps de l'ent seulement pour la premiere rencontre.* point. Au moyen dequoy ie veux lors auoir recours à mes liures, pour leur communiquer mes pensees. Mais quel trafic pouuons-nous auoir maintenant avec eux, au milieu de cest orage & tempeste publique? Tout ce que ie demande à Dieu, est, ou de bien tost me depescher, pour ne voir plus ce que ie voy, ou de m'empescher comme auparauant, à fin qu'en yuré des affaires particulieres, i'oublie celles du public, auxquelles, quelque tourment & affliction que ie m'en donne, ie ne puis apporter remede. A Dieu.

*A Monsieur Coignet, seigneur de Congy,
Aduocat au Parlement,*

En plus beau champ ne me sçauriez-vous *Il deduit plusieurs anciennes priuileges, & autres choses de remarque de la ville de Paris.* mettre, estant Parisien comme vous, que de me demander d'où vient le nom de nostre ville, quel a esté son progrez, & tout ce que ie pense appartenir à sa grandeur. Si vous voulez que ie m'arreste à nos vieux rappetaisseurs, ie vous diray que Paris le Troyen en fut le premier fondateur, & qu'il la nomma de son nō.

Qui est vn vray fantosme d'histoire. Moins seray-ie d'accord avec vn tas d'escóliers, qui disent qu'elle fut appellee par les anciens *Lutetia*, du mot Latin *Lutum*, pour les boües & fanges qui y abondent : ou bien du mot Grec *Λουκία*, qui signifie blancheur, pour les plâtrieres qui se trouuent és enuirs. Quant à moy ie ne seray iamais d'opinion qu'elle eut du commencement emprunté son nom de deux nations qu'elle ne cognoissoit point. Deuant la venue de Iulles Cesar és Gaules, nous ne cognoissions dans Paris, le Romain que de nom. Et ores quele Phocenses Grecs fussent fondateurs de Marseille, si ne trouuons-nous qu'apres qu'ils se furent là establis, ils eussent faict aucunes conquestes en toute la Gaule, par le moyen desquelles ils eussent donné vogue à leur lāgue. Et au surplus d'estimer queles Gaulois parlaissent Grec, comme quelques-vns se persuadēt, c'est ignorer les premiers rudimens de nostre histoire : veu que nous trouuons dans les memoires de Cesar, que luy voulant escrire quelque chose qui importoit à Labienus son Lieutenant, il luy escriuit en langue Grecque : à fin (dit-il) que si elle estoit surprise par ses ennemis, nul ne peust entendre ce qu'elle portoit. Et neātmoins il ne faut faire nulle doubte que nostre ville auoit eu tousiours son nom originaire, que i'estime vray-semblablement auoir esté *Lu* ou *Len*, sur lequel & le Romain, & le Grec, enterent selon la commodité de leurs lāgues, celuy-la vne *Lutetia*, cestuy vne *Λουκία*. Il n'y a ville, peut estre en l'Europe plus heureu-

Que la lā-
gue Grec-
que n'e-
stolt co-
gneüe aux
Gaulois.

sement situee, ny accompagnée de tant de commoditez, que ceste-cy. En toute ville que l'on desire rendre grande, il est requis deux choses: facilité de bastir, & commodité de traffic. Paris est environné de toutes parts de perrieres sousterranees, d'où on espuise tant le moilon, que pierres de tailles: & outre ce a particulièrement des plâtrieres dont se faict le plâtre: qui est vne forme de ciment propre à nous autres, & qui ne se trouue point ailleurs. Par le moyen desquels deux thresors vous verrez en moins de rien vne maison richement & plantureusement paracheuue de fonds en comble. D'auantage il est abreuué de ceste grande riuier de Seine qui perd son nom dans l'Océan au dessous de la ville de Roüen: Riuier, dy-ie, dans laquelle aboutissent trois grands fleuues, Marne, Yonne, Oise; dans lesquels aussi plusieurs riuieres viennent fondre: & en outre les riuieres de Montargis & d'Estampes. Tellement qu'avec vne facilité admirable toutes sortes de marchandises y peuuent aborder à peu de coust, de la Bourgongne, Champagne, Picardie, Normandie, Lyonnois, la Beauce, & de plusieurs païs estranges. Tout ainsi qu'elle est abreuee de tant de riuieres, aussi nostre ville n'estoit anciennement qu'une Isle, qui est ce que nous appellons la Cité. Laquelle, si vous y prenez garde de pres, vous trouuerez auoir la forme d'un Nauire. Car si vous la considerez du costé du Palais, l'Isle va tousiours en estroississant en forme de bec, que nous appellons la Prouë, & du costé de nostre

Ce qui est requis pour l'establissement d'une grand' ville.

Pour quoy la ville de Paris porte un Nauire en ses armoiries.

Dame, en forme de Pouppe. Et c'est pourquoy, à mon iugement, nos predecesseurs donnerent le Nauire pour armoiries à nostre ville de Paris. La commodité de son assiette fut cause que les Empereurs ayās à reboucher la pointe des Allemans, qui affligeoyent iournellement les Gaules, s'y habituerent de fois à autre. A maniere que commençant à se faire grande, elle prit, avecques le temps, le nom du pais où elle estoit située, qui estoit le Parisi,

Quelques
Empereurs
se sont as-
mez à
Paris.

D'où vient
que nostre
ville porte
le nom de
Paris.

comme ville principale & metropolitaine. Car quand les anciens, & mesme Iulles Cesar, en parloyent, ils la nommoient *Lutetiam Parisiorum*, comme si nous voulions dire Lutece en Parisi. Et depuis on laissa le mot de Lutece, & prit-on seulement celui de *Parisijs*, pour denoter nostre ville. Le premier dans lequel vous en verrez quelques enseignes est Amian Marcellin en plusieurs endroits, & signamment au vingtiesme de son histoire, quand il parle de la promotion de Iulien l'Apostat à l'Empire, & du séjour qu'il y fit. *Et cum ambigeretur diutius* (dict-il) *qua pergerent via, placuit, notario suggerente Decentio, per Parisios, homines transire, ubi morabatur adhuc Cesar, nusquam motus. Et ita factum est. Isdemque aduentantibus in suburbanis, princeps occurrit, ex more laudans quos agnoscebat.* Auquel lieu le mot de Faux-bourgs nous enseigne qu'il parle de la ville de Paris.

Iulien se-
journa six
mois à Pa-
ris.

Iulien y sejourna seulement six mois, comme il dit en son *Myfopogon*, pendant lequel temps il y prit si grand plaisir, qu'il la voulut embellir de quelques nobles bastimens, comme nous

voyons par les anciens fragmens, qui sont en l'hostel de Clugny, & les Aqueducs qu'il deliberoit d'y faire venir du village d'Ercueil, dont on voit encores les reliques. Apres luy, Valentinian Empereur y demeurant tant qu'il séjourna es Gaules. Cela fut cause que quand Clouis se fut fait maistre & seigneur de la plus grande partie des Gaules, il y alleit son domicile (côme nous tesmoigne Gregoire de Tours) & apres luy sa posterité. Qui nous reüssit si à propos, que combien que par deux fois le Royaume fust party en quatre, se nommans les enfans de France diuersement Roys, de Paris, Soissons, Orleans, & Mets: si est-ce que celuy de Paris auoit tousiours quelque aduantage & prerogative par dessus les autres. Et depuis les apanages s'estans insinuez entre nous sous la lignee de Hugues Capet, il semble que nos Roys aient lié leur fortune avecques celle de Paris, d'où ils ont tiré vne infinité de secours fauorables, quand les necessitez s'y sont presentees. Leur ayant esté vne tres-alleuree retraicte lors de leurs afflictions. Qui a esté cause qu'en contr'eschange ils l'honorèrent de plusieurs nobles priuileges: car outre ce qu'elle est franche & exempte de tailles, le Parisien, de condition roturiere, peut posseder des fiefs sans dispense, il est franc du ban & arriereban, ne peut en defendant estre distrait de son domicile pour quelque matiere que ce soit, & luy est permis de proceder par voye d'arrest en vertu d'une cedula non recogneuë, sur les cheuaux & biës meubles de son debteur estranger, qu'il trouue

Les Roys de France de la troisieme lignee ont lié leur fortune avecques celle de Paris. Priuileges des Bourgeois de Paris.

dedans Paris. En plus fors termes il pouuoit anciennement le contraindre par corps, mais ceste coustume s'est auécques le temps supprimee. Qui sont tous priuileges qui prouien² nent de roictroy de nos Roys, mais nous en auons vn plus grand qui nous a esté ordonné par la pleine grace de Dieu. Qui est que nostre ville se peut vanter n'auoir iamais esté surmontee que par soy-mesme. L'on appella sur le declin de l'Empire, la ville de Rome, *Urbem eternam* : si ne peut-elle se garantir qu'elle ne fust prise & saccagée, premierement par les Gaulois, & depuis à trois diuerses fois par les Gots : mais, graces à Dieu, ce malheur n'aduint iamais à la nostre. Les Normands, sous la lignee de Charlemaigne, s'estans faict voye par la plus grande partie de la France, & ayans mis à sac, tantost la Bourgongne, tantost la Touraine, tantost le país qui porte auourd'huy leur nom, assiegerent deux & trois fois nostre ville, mais ils furent contraints de leuer le siege auécques leur courte honte. Le semblable firent les Bourguignons sous Louys onzieme, & de nostre temps les Huguenots en l'an cinq cens soixante vn & soixante vij. Et quand nous trouuons que sous le regne de Charles sixieme, elle fut prise par le Capitaine Pisleadam, cela aduint par ce que les Parisiens vouloyent estre pris, comme ceux qui lors fauorisoient le party de Iean Duc de Bourgongne, contre les Armaignacs qu'ils vouloyent exterminer de leur ville, comme ils firent. Qui plus est, l'on peut dire, comme chose vraye, que

*La ville de
Paris n'a
iamais peu
estre vain-
cue de ses
ennemis.*

Paris a tousiours seruy de tombeau à ses ennemis, comme nous en peut rendre certains, & la iournee des Armaignacs en l'ā 1417. & celle des Huguenots de l'an 1572. Il n'est pas qu'ils ne se soyent sentis de cest heur en vn exemple admirable. Charles sixiesme au retour de la iournee de Rosebec, vſa d'vne punition extraordinaire contre nous, pour vne esmotion populaire aduenüe dedans Paris pendant son voyage de Flandres. Et nommément fit oster les cheſnes des ruës, & despendre les huis des quatre principales portes de la ville. Le tout à l'instigation du Conneſtable de Clisson, qui fut executeur de tous ces rigoureux commandemens. Et de fait pour l'appaiser nous fusmes contrains de luy faire present d'vn hostel (dont auourd'huy iouiſſent Messieurs de Guise) semé diuerſemēt d'vne M. d'or, qui vouloit dire Misericorde : pour laquelle cause les vns l'appelloyent l'hostel de Clisson, & les autres de Misericorde. Mais voyez, ie vous prie, quelle fin eut ce jeu. Clisso auoit esté promoteur de ceste seuer punition, aussi la fortune des Parisiens ne voulut laisser cest outrage impuny à l'endroit de luy. Dix ans apres il fut assassiné par le Seigneur de Craon, qui n'eut moyen d'eſcader que de nuict par la porte S. Antoine, qui estoit l'vne de celles qui auoit esté condamnée à estre tousiours ouuerte. Chose qui est naïfucement exprimee par Froissard, duquel ie vous veux icy inserer le passage tout de son long. *Pour le temps deslors les quatre souveraines portes de Paris estoient toute nuict & tout le iour ouuertes, & auoit*

*Paris tom-
beau à ses
ennemis.*

*L'hostel de
Clisson.*

ceste ordonnance esté faite au retour de la bataille qui fut faite en Flandre, où le Roy de France desconfit les Flamens à Rosebec, & que les Parisiens se voulurent rebeller, & que les maillets furent ostez. Et pour mieux à toute heure chastier & seigneurier les Parisiens, Messire Olivier de Clisson auoit donné ce conseil d'oster toutes les chaisnes des carrefours, pour aller & cheuaucher toute nuit : par tout furent ostées hors des gonds, les souveraines portes des fueilles, & là couchées, & furent en celuy estat environ dix ans, & entroit-on à toutes heures dedans la ville de Paris. Or considerex comment les saisons payent. Le Connestable auoit cueilly la verge dont il fut battu, car si les portes de Paris eussent esté closes, & les chaisnes lences, iamais Messire Pierre de Craon n'eust osé faire ce delict & oufrage qu'il fit, car il n'eust peu issir hors de Paris, & pour ce qu'il scauoit qu'il istroit bien à toute heure, s'aduisa il de faire ce maiesfice. A tant Froissart. Exemple que ie vous ay voulu représenter, non que i'approuuasse la iournee que nos ancestres appellerent des Maillo-tins, mais pour vous dire qu'en vne querelle où nous auions tort, le hazard voulut encores que celuy qui nous auoit affligé fut chastié des verges mesmes dont il nous auoit battus. Je vous laisse à part l'Vniuersité (qui est des pieça la premiere de toute l'Europe) pour vous dire que nos Roys eurent de toute ancienneté dans Paris trois maisons, le Palais, le Louure, & le logis des Tournelles pres S. Paul. Palais dy-ie, qui contient les deux premieres Chambres de la France. Celles du Parlemét, & des Comp-

Trois logis
de Roy d'as
Paris.

des Comptes, l'une pour la iustice commu-
tative, l'autre pour la distributive. Palais
auquel noz Roys ne se presentent gueres à
face descouverte, que ce ne soit en haut
appareil pour représenter toutes choses appar-
tenant à leur Royauté. Le Louvre dont re-
leuent tous les fiefs qui se meuvent immédiate-
ment de la Couronne de France. Car quant
aux Tournelles, c'estoit vn lieu de plaïssance:
qui a esté deux fois malheureusement fatal en
la France. La première sous Charles sixiesme, *L'ostel des*
lequel ayant dédié l'apresdisnée d'un iour du *Tournelles*
sainct Sacrement à faire iustes & tournois, *fatal à la*
où se trouuoient tous les Princes du sang & *ruyne de*
plusieurs grands seigneurs qui auoyent la *France.*
meilleure part en sa bonne grace, ceste al-
legresse ayant continué depuis le midy iusques
à la minuit, le seigneur de Craon qui estoit en
embusche dedans sa maison, sur ceste occasion
vint inuestir à l'impourueu le Connestable de
Cliffon, dont ie vous parlais maintenant:
lequel il laissa sur la place pour mort. Ce que
le ieune Roy prit tellement à contre-cœur,
qu'il en voulut poursuiure la vengeance à ou-
trance cōtre le duc de Bretagne, vers lequel Craon
s'estoit retiré. Et en ceste apprehension con-
ceut vne telle melancholie, qu'il en perdit puis
apres l'esprit: dont sourdit vne pepiniere
de guerres ciuiles entre nous, qui cuiderent
mettre nostre Royaume au dessous de toutes
affaires. Car quant à l'autre infortune, nous
en pouons estre tesmoins pour estre aduenue
de nostre temps en la personne du bon Roy

*Combien
les guerres
ciues ont
faict de tort
a la ville
de Paris*

*La ville de
Paris. grā-
de metropu-
lente sous
le regne de
Charles V.*

Henry. Qui fut cause que pour expier la memoire de ceste mesaduanture, la Roine sa veufue, feit aussi razer cest hostel, quoy que soit, il fut departy à vns & autres particuliers habitans de ceste ville, comme nous le voyons aujourd'huy : Tant y a que la perte de l'esprit de l'un, & de la vie de l'autre, nous apporterent diuers troubles: Les premiers qui durerent pres de quarante ans, & les autres dont nous n'auons encores la fin. Mais par ce que ie souhaiterois que nous nous feissions maintenant sages par ces troubles anciens, ie vous puis dire que sous le regne de Charles cinquieme nostre ville fut grandement riche & peulee. Ce Roy qui apres son decez fut surnommé des vns le Sage, & des autres, le Riche, y faisoit presque son ordinaire demeure: & à l'imitation de luy il n'y auoit grands Prelats, ou Princes, qui n'y eussent aussi leurs maisons, & non point maisons affamees, ains grands & magnifiques Palais. Nous ne pouuons auoir plus grand & fidelle tesmoignage de ceste richesse, que de la condamnetion que nous encourusmes pour la iournee des Maillets, sur le commencement du regne de Charles vj. Par ce que Froissard nous atteste qu'il tira de nous quatre cens mille liures, qui en vaudroyent maintenant douze cens, eu esgard que la monnoye estoit trois fois plus forte qu'elle n'est aujourd'huy. L'esprit de diuision se logea à la malheure dans nostre ville, pour soustenir in iustement la querelle de Ieā Duc de Bourgogne, contre les enfans de Louys Duc d'Orleāns:

En laquelle nous-nous esperdismes de telle façon, que tantost nous chargeasmes la croix Bourguignonne sur nos chapeaux & chape-rons, & feismes vne confrairie de saint An-dré dans l'Eglise saint Eustace, de laquelle se trouuerent en vne procession xxv. ou xxx. mil Confreres, tantost nous massacrâmes tous les Orleannois & Armaignacs qui se trou-uerent dans Paris, sans acception de person-nes. Mais il nous en prit tout ainsi qu'aux ma-lades, lesquels du commencement surpris & agitez d'une fièvre chaude, se font tenir à quatre dedans leurs lits, pour vne inquietu-
 de perpetuelle de corps & d'esprit qui leur *Paris en*
 commande : iusques à ce que ceste fureur *grande*
 s'escoulant, ils commencent de sentir leur mal *souffrir*
 par vn affoiblissement general de tous leurs *par le moyē*
 membres, lesquels il faut restaurer à la longue *des guerres*
 tant par douces purgations, que bonnes vian-
 des: aussi pendant que furieusement nostre
 villes'amusa de soustenir le party Bourguignō,
 elle deuint sans y penser toute deserte. Et cō-
 mencerent ces grands hostels de Flandres, Ar-
 tois, Bourbon, Bourgongne, Nesles, & plu-
 sieurs autres seruir de nids à corneilles, au
 lieu où au precedent c'estoient receptacles de
 Princes, Ducs, Marquis, & Comtes. I'ay
 leu dans vn liure escrit à la main, en forme de
 papier iournal, quē de ce temps-là il y auoit
 vn loup qui tous les mois passoit au trauers de
 la ville, lequel ils appelloient le Courtaut, e-
 stant le peuple tant accoustumé de le voir,
 qu'il n'en faisoit que rire. Chose qui se faisoit,

ou pour les massacres qui se commettoient dâs l'aris, & pour les cadauers qui y pouuoient estre (n'y ayant animal qui ait le flair si subtil comme le loup) ou par ce que la ville estoit lors grandement deshabitee. Quoy que soit s'estât sur les troubles du Bourguignon & Orleannois entee la guerre de l'Anglois & du François, il faut tenir pour chose tres-certaine que la ville de Paris vint en grande souffrette, veu qu'en l'histoire mesdisante du Roy Louys xj. nous trouuons que pour la repeupler, il voulut faire comme Romulus auoit fait autrefois dans Rome, & donner toute impunité de mesfaits precedens, & rappel de ban à tous ceux qui s'y voudroient habituer. Ce que toutes-fois ie ne trouue escrit ailleurs : & ne trouuant ceste permission dans les registres du Parlement, ceste histoire m'est aucunement suspecte. Mais plus grande demonstration ne pouuez-vous auoir de ceste pauureté & solitude, que de l'ordonnance qui se trouue aux vieux registres du Chastellet, par laquelle il estoit permis de mettre en crie les lieux vagues de la ville : & si pendant les six semaines il ne se trouuoit nul propriétaire, qui s'y opposast, le lieu demouroit à celuy qui se le faisoit adiuger. Aussi quand nous lisons dans nos vieux tiltres & enseignemens, quelques maisons & heritages tant en la ville, qu'és champs, vendus à non prix, tant s'en faut que ce soit vn argumēt de la fecilité de ce temp-là, qu'au contraire c'est vne demonstration tres-certaine du malheur qui estoit lors en regne, par la longue

*Le bon
marché qui
estoit an-
ciennement
des maisons
de Paris est
vn argumēt
du malheur
qui estoit
lors.*

suite des troubles. La richesse d'un pays cause
 l'abondance du peuple, qui fait que toutes
 choses y sont cheres. Le peu de peuple au con-
 traire fait le non prix, & par mesme moyen
 nous enseigne ou l'infelicit  ou l'infertilit  d'un
 pays. Maintenant graces   Dieu nostre ville est
 abondante en maisons, peuple, & richesses,
 plus que iamais. N'ayant toutesfois (non plus
 qu'un malade) repris ses forces tout   coup,
 ains peu   peu, ie veux dire   mesure que nos
 Roys s'en sont approchez depuis les troubles
 de Charles sixiesme, & septiesme. Le Roy
 Loys vnziesme auoit choisi pour sa principale
 demeure le Plessis lez Tours: Charles viij. son
 fils, Amboise: Louys xij. la ville de Blois:
 non qu'ils ne vinssent souuent dans Paris, selon
 la necessit  de leurs affaires, mais chacun d'eux
 prenoit diuersement son plaisir en ces villes l ,
 s'approchans cependant & Charles viij. &
 Louys xij. chacun de demy iournee de la
 nostre.   la suite d'eux, Francois premier
 franchit le pas plus hardiment: Car il laissa
 tout le pays de Touraine & Blesois pour se
 loger  s enuiron de Paris, tant   Fontaine-
 bleau que saint Germain en Laye. Et apres
 luy Henry deuxiesme son fils, s'y aima plus
 que nul de ses deuanciers, qui nous apporta
 grand lustre, & successiuement Charles ix.
 pour la necessit  des troubles fut contraint de
 s'y habituer. Mais entre tous les Roys il n'y
 en eut iamais vn qui s'y aimast tant que le
 nostre   present regnant. Ce qui a apport 
 vne grandeur admirable en l'augmentacion du

*Comme
 Paris s'est
 remis sus.*

peuple, & des bastimens, de telle façon que toutes choses semblent estre paruenues à leur dernier essay, tant pour la vente des offices, mariages des filles, que loüages de maisons. Qui me fait presque desfier de nostre fortune à l'aduenir. Les Musiciens nous enseignent que quand nous sommes aux extremitez de la gamme, il faut venir aux muances. Il n'y a point plus asséuré instrument de ce changement qu'une longue trainee de guerres ciuiles. Et à la mienne volonté que nous-nous puissions faire sages par l'exemple de nos ancestres, pour destourner cest orage de nous. C'est le comble de mes souhaits. Quant au surplus il me plaist de clore ceste lettre par vne honneste cō-émémoration que vous ne trouuerez hors de propos. Nous enuoyons nos enfans en Italie pour apprendre leur entre-gent, & plusieurs nobles exercices qui s'y trouuent selon la diuersité des villes: & ie veux qu'on sçache, car il est vray, que nostre Paris est tout vn pays d'Italie racourcy au petit pied, n'y ayant exercice de corps ou d'esprit delà les monts, qui ne se pratique dedans l'enclos de nostre ville. Dieu.

*Paris est
un racour-
cissement
de toute
l'Italie au
petit pied.*

A Monsieur Loisel Aduocat en Parlement.

*Il disoart
ladine. si
de iugemēs
que l'on
fera de ses
lettres.*



Velque chose que vous en pensiez, vous serez tref-mauuais garand de mon entreprise. Croyez que celuy a grand auantage sur son compagnon, qui en ce temps miserable & calamiteux se tient clos & couuert dedans sa

maison. Ne sçauuez-vous la diuersité d'argumens que ietraicte, qui sont autant d'esmorches de mescontentemens d'vns & autres? Les opinions des hommes sont trop diuerses, pour se conformer en tout & par tout aux miennes. A l'un desplaira le seul tiltre, comme chose nouvelle & inaccoustumee en la France de traicter sujets de merite par lettres. L'autre m'improperera que ie fais le contraire de S. Hierosme, lequel appelle quelquefois liures des Epistres qui ne contiennent que trois fueillets, & qu'au cōtraire i'appelle lettres, telles qui sont vrayement des liures. Ne considerant pas que saint Cyprian s'est donné le mesme priuilege: ayant fait passer sous le nom d'Epistres les plus beaux sermons qu'il feit iamais. Cestuy, que ie discours des matieres non conuenables à missiues, & qu'il y en a quelques-vnes qui ne se rapportent, ni à mon estat, ni à l'aage auquel ie les escriuois, estant plustost vne histoire de mes mœurs que de mes aages. Et quelque sage mondain adiousterà que ie parle trop hardiment du téps de l'Est at, des maisons. Brief autāt de testes, autant d'opinions. Encontre tous ces controoleurs ie n'ay autres armes pour me parer, sinon de leur dire en vn mot, Mes amis, ie n'ay entrepris de vous contenter tous en general, ains vns & autres en particulier, & par special moy-mesme. Mais sur tout il me semble voir quelque Cinge qui en ses communs propos fera la mouë à mon œuvre, lequel sera bien aise d'en faire son profit, & employer mon labeur pour sien, mettant la main à la plume. Et à

*Combien les
opinions des
hommes sont
difficiles à
contenir.*

*Cōbien les
opinions
des' hōmes
sont diffici-
les à contē-
ter.*

cestuy ie ne puis autre chose respondre, sinon que vrayement il aura victoire de moy, comme celuy qui m'apportera plus de mescontentement que nul autre. Mais voyez ie vous prie comme les affaires vont en matiere de liures. Ayant fait imprimer mes Epigrammes Latins, ie voy peu de gens auxquels ils ne fussent agreables : toutes- fois quelque personnage mien amy qui voulut faire l'Aristarque, m'admonnesta que ie ferois beaucoup mieux pour moy, si tout ainsi que les Iardiniers ressepent & elaguent de leurs arbres plusieurs branches superflues, pour donner plus longue vie au tige, aussi i'ostois plusieurs petits Epigrāmes qui ne seruoyent que d'estouffer les meilleurs. Encores que ie sois du nombre de ceux que l'on met quelquefois entre les Poètes, & qui en ceste qualité deuois flater mes conceptions, si me laissay-ie lors aller à l'opinion de ce grand Censeur. Et de faict à son instigation ie commence de faire le procez à mes Epigrammes, & en condamne plusieurs à tenir prison perpetuelle dans mon cabinet, quād on les reimprimeroit. Je communique ce mien iugement à vn autre de mes amis, qui auoit l'esprit moins hagard que le premier, lequel me conseille d'en suspendre l'execution. Me donnant nommément aduis de mettre deux de mes liures és mains de deux honnestes hommes, pour retrancher diuersement & à part, ce qu'ils penseroient estre subject à retranchement. Je pratique encores ce conseil, & prie deux de

mes amis de me s'indiquer. Mais il leur en print comme aux trois conuiues d'Horace, qui se trouuerent chacun de diuers appetits: aussi ce quel'vn des deux trouua bon fut condamné par l'autre, & au contraire ce qui fut agreable à cestuy despleut au premier. Au moyen dequoy en ce bigarrement d'opinions, ie feis cest arrest en moy de ne supprimer aucuns de mes Epigrammes à la seconde impression. Les foibles seruent de fucille aux plus beaux. Estant l'esprit beaucoup plus retenu en la lecture d'un liure, quand on le trouue balancer, tantost en subjects riches, tantost en moindres, que lors que toutes choses vont d'un mesme fil. Voyez vne compagnie de Damoiselles, qui toutes soyent belles en perfection, vous ne sçauiez sur laquelle asseoir principalement vostre veuë. Qu'il y en ait quelques vnes moins belles, en l'assortissement du plus avecques le moins beau, vous trouuez beaucoup plus de quoy contenter, & vostre esprit, & vos yeux. Seneque ne se faict pas manier par tous, d'autant que d'un ne mesme teneur, il est perpetuel en sentences, ne donnant loisir au lecteur de reprendre son haleine. Au contraire Plutarque pour n'estre tousiours tédû en hauts subjects, se lit par toutes sortes de personnes. Ceste consideration a fait que i'ay pensé de mettre indifferemment toutes mes lettres en lumiere. Et peut-estre aduiendra-il que celles dont ie fais moins de cōpte, seront les mieux recueillies. Ainsi que l'on dit estre autrefois aduenü à Iean Boccace, duquel le Decameron a esté beaucoup plus ho-

Pour plaire au lecteur, il ne faut pas estre tousiours tendu à hauts sujets.

Seneque ne se lit pas par tant de gens que Plutarque, & pour quoy.

*Combien
il est aisé
de faire
des fautes
aux im-
pressions.*

noré par la posterité, que son Philocope, & autres œuures dont il faisoit plus d'estat. Or quel que soit mon liure, ie le vous enuoyeray soudain qu'il sera acheué d'imprimer. Je m'assure que trouuerez plus de fautes en l'impression que ie ne voudrois. Car quel liure peut on imprimer de nouueau qui n'y soit infiniment subiect? L'on enuoye à l'imprimeur ses copies les plus correctes que l'on peut. Qui passent premierement par les mains du Compositeur. Ce seroit certes vn vray miracle, que sans fautes il peust assembler toutes les lettres: C'est pourquoy on luy baille pour controleur vn homme qui prend le tiltre de Correcteur, auquel on presente la premiere espreuue. Cestuy pour l'opinion qu'il a de sa suffisance, se donne quelque-fois iurisdiction sur les conceptions de l'auteur, & en les voulant rapporter aux siennes, les interuertit: & ores qu'il ne se donne ceste loy, si est-ce que son œil se peut escarter. Qui est la cause pour laquelle on a recours pour la seconde espreuue à l'auteur: mais ou du tout on ne le trouue point, ou si on le trouue c'est au milieu d'autres empeschemens, pour lesquels il ne peut auoir l'esprit bien tendu à ceste correction: Voire que quand il seroit en pleines vacations, il luy est fort aisé de mesprendre, comme celuy qui relisant ce qu'on luy apporte, pense le lire tout ainsi qu'il l'auoit couché par escrit. Voyla pourquoy ie vous prie, ou excuser, ou supplier les fautes de l'impression. Au demeurant ie ne veux oublier de vous escrire que cinq ou six sepmaines apres

que mes lettres furent sur la presse, mes Dames des Roches feirent imprimer vn petit Recueil, portant aussi le tiltre d'Epistres, esquelles vous voyez plusieurs belles fleurs & gentilleſſes d'esprit. C'est la seconde fois que Madame des Roches fille, & moy, sommes sans y penser rencontrez en mesmes pensees: la premiere, au Poëme de la Puce, & maintenant en la publication de nos lettres. Et vrayement ie ne seray iamais marry de symboliser avec celle que i'estime & honore infiniment entre les belles, honnestes, & vertueuses Dames de la France. A Dieu. En Auril 1586.





L E
V N Z I E S M E
 LIVRE DES LETTRES
 D'ESTIENNE PASQUIER.

*A Messire Jacques de la Guesle, Conseiller d'E-
 stat, & Procureur General en la Cour
 de Parlement.*

*Il luy re-
 monstre
 combien
 on fait peu
 d'estat de
 la Mercu-
 riale, & la
 compare à
 la Censure
 de l'ancièn-
 ne Rome.*

ON dit qu'estes sur le poinct d'ouurir la Mercuriale au Parlement. Dieu vueille qu'elle ressemble le Mercure, lequel mis en œuvre avec les autres metaux sert infiniment pour les assouplir. Entre tous les actes que representez en ce grand theatre de France, i'en en trouue point de si solennel que cestuy : Que vous autres, Messieurs, qui estes destinez pour donner la loy à autrui, appreniez de la vous donner à vous mesmes. Et d'autant qu'il est plus solennel, aussi en estime-ie l'exécution plus difficile, soit de la part de vous, auquel pour la prerogative de vostre estat, il appartient de faire les remonstrances, ou de ceux pour lesquels elles sont faites. Les faites vous en

general? Pardonnez vous aux noms des personnes, pour toucher seulement les vices? L'exhortation en est froide. Chacun se donne beau jeu au partir de là, se persuadant que le deffaut qui abonde en luy est couuert, pour n'auoir esté descouuert qu'en termes generaux. En touchez vous l'un des vostres par nom, ou par remarques infailibles? Vous-vous faictes vn ennemy irreconciliable en celuy que voulez reconcilier à soy. Il faut que celuy qui se rend ennemy formel des vices, se rende par mesme moyen ennemy capital des hommes. Et quand iely que Caton le vieil fut accusé cinquante fois deuant le peuple Romain, & autant de fois absous; luy qui d'ailleurs estoit l'un des plus prud'hommes qui fust oncques dedans la ville: (car il n'y a Seigneur que Tite Liue. honore en toute son histoire avec si honorable eloge que cestuy:) ie l'impute aux inimitiez qu'il estoit pourchassées & acquises pendant la Censure, laquelle il exerça avec telle seuerité, que depuis la posterité luy donna particulieremēt, entre tous les autres, cest epithete de Censeur. Choisissez doncques, ou en general ou en particulier, l'exhortation; ie trouue qu'il y a de tous costez des espines. Mais encores crains-je bien plus que vos remonstrances ne soyent vaines; & que tout ainsi que le Mercure, dont ie vous ay cy-dessus parlé, se dissipe à faute de trouuer sujet; aussi qu'en vostre Mercuriale ce soyent paroles emportées du vent. D'autāt que ce que vous y faictes est par forme de conference amiable, qui demeure sans effect, si

*Caton com-
bien de fois
accusé &
absous.*

*Pourquoy
appellé
Censeur.*

elle n'est accompagnée d'une crainte d'animadversion exemplaire. Il n'est pas qu'en l'Eglise mesme, qui n'vle de mainmise sur nos corps, apres que l'on y a apporté les censures Ecclesiastiques, on n'implore le bras seculier contre celui qui n'en tient compte. C'est pourquoy en l'estat du Censeur des Romains, la puissance estoit telle que trouuant vn Seigneur mal-reiglé de mœurs, on le pouuoit non seulement suspendre pour vn temps; mais à iamais luy interdire & deffendre l'entree du Senat: Ainsi que nous lisons que le mesme Caton fit à sept Senateurs, entre lesquels fut vn Lucius Quintius, qui auoit autrefois esté Consul, & frere de ce grand Titius Quintius, qui lors de fraische memoire auoit reduit toute la Grece sous l'obeissance des Romains: Toutesfois ny la memoire de la dignité Consulaire par luy autrefois exercee, ny la faueur des bons & fideles seruices de son frere, ne le peurent garentir de ceste note. Et dauantage estoit permis au Censeur de faire courir parmy le peuple des manifestes portans les causes de la rigueur par luy exercee, contre vns & autres. Nos anciennes ordonnances n'y ont apporté ceste seuerité; aussi ne rapportez vous tel profit de vos Mercuriales, que le Romain de ses Censures. L'amour que particulièrement nous-nous portons chatouille tellement nos esprits, que ne voulons aisément rendre à la raison l'hommage que luy deuons, si le Magistrat n'y interpose à bonnes enseignes son autorité. C'est gaster &

*La Censure
à Rome de
quelle au-
torité.*

mon guerir vne playe , quand nous la flacons. Vous me direz que ie contrefay le Censeur ; & que ie veux par vne puilliance nouvelle mercurier de mon autorité priuee vostre Mercuriale. Je ne suis pas si mal appris de le vouloir faire. Bien souhaiteray-je que tout ainsi que le pere chastiant ses enfans avec vne honnesté exhortation mellee d'une douce cholere , n'en rapporte pas moins de fruct, que quand il corrige ses valets à coups de baston ; aussi que nostre ordonnance qui voulut traicter vos confraires avec vne douceur paternelle, produise au milieu de vous autres pareils effects, comme dedans nos maisons, nos remonstrances envers nos enfans, quand ils sont bien naiz. A Dieu.

A Monsieur de sainte Marthe, Conseiller du Roy, & Thresorier General de France en la Generalité de Poictiers.

NE pensez pas qu'il n'y ayt de la main de Dieu, ie dy de la main de Dieu tres-ex-<sup>Il décrit les premiers commence-
ments & progrès de
la Ligue.</sup> presse ; qui me faict grandement douter de l'euement de nos nouveaux troubles. Qu'ainsi ne soit, eussiez vous iamais estimé voir les affaires plus calmes & en meilleur train, que lors que ce nouveau remuement est suruenü ? Par la mort de Monsieur le Duc, tout son apanage auoit esté reüni à la Couronne ; & par mesme moyen s'estoyent esuanouyes plusieurs ja-

louzies, & ombrages qui pouuoient estre en la teste du Roy, pour la grandeur de Monsieur son frere; ce neantmoins ie vous puis dire que la mort de Monsieur le Duc a esté le premier acheminement de nos maux; m'asseurant que s'il eust vescu, nul n'eust iamais osé leuer la teste. Soudain apres son decés, le Roy pensant estre au dessus du vent, & desirant de pouruoir à la tranquillité generale de tout le Royaume, de peschale Duc d'Espernō par deuers le Roy de Nauarre, pour le semondre de venir en Cour, comme celuy qu'il sçauoit estre le premier Prince du sang & plus proche habile de succeder à la Couronne. Il part avec vne grande suite de Gentils-hommes; & fut remarqué qu'à son partement il prit congé de tous les Princes & grands Seigneurs, fors de Messieurs de Guise & de Mayenne, dans lesquels se logea deslors vn grand mescontentement, pour se voir de telle façon mesprisez: ce qu'ils pensoiēt prouenir d'vne plus haute main; & par auanture non sans cause. Le Roy s'en va à Lyō pour y attendre de pied quoy le Seigneur d'Espernon, lequel approchant de la ville, tombe du haut en bas d'vn rocher, tout froissé & moulu: presage presque assuré que ceste negotiation seroit vn precipice fatal de nostre France. Iamais plus sage conseil ne fut pris de premiere apparence que cestuy, de rappeler le Roy de Nauarre, lequel tant s'douz l'esperāce de la Couronne, que pour estre pres du Roy, pourroit aisément se reconcilier avec nostre Eglise. Et au surplus, pour luy faire entendre, sans parler,

auec

avec quelle deuotion il estoit semonds, & que le Roy n'estoit en bon mesnage avec les Princes Lorrains. L'Ambassadeur ne leur auoit point dit, A Dieu: Toutesfois, contre l'opinion de tous les sages mondains, ce conseil produisit deux effectz contraires: Car, d'un costé ces deux Princes se voyans vilipendez partirét de la Cour tres-malcontens: D'ailleurs le Roy de Nauarre qui auoit esté vne autrefois eschaudé, estimant que tout cecy fust vn second piège pour l'attraper, refusa de venir: tellement que demeurant en son cœur la deffiance emprainte, & aux deux freres le desdain, se formerent les deux partis que nous voyōs auourd'hui; & spécialement celuy de la Ligue. Il n'y auoit presque homme d'entendement, qui ne veit ceste nouuelle pratique; toutesfois nul de nous iamais ne la veit. Que dy-je, ne la veit? Au contraire chacun bandoit les yeux, pour n'en auoir cognoissance. Salcede l'auoit tout au long descouuerte, & par le menu. Ce neât-moins nō seulement on ne l'escoute; mais, pour auoir trop parlé il est tiré à quatre Cheuaux. Le Breton Aduocat fut pendu & estranglé, pour auoir trop inconsiderément escrit. Huit iours apres, c'est à dire à l'ouuerture du Parlement à la saint Martin 1584. le Roy supprima soixante Edictz, partie au Parlement, partie en la Cour des Generaux des Aides, qui estoient à la foule du peuple: Et tout d'une suite decerna vne Commission, par laquelle il estoit enioint à son Procureur general de faire informer contre tous ceux,

*La Ligue
d'où
print son
origine.*

*Salcede ex-
ecuté
E le Bre-
ton.*

qui sans son adueuf estoÿét liguez. Qui mon-
stre bien que deslors on auoit en Cour quel-
que sentiment de la reuolte; Mais par toutes
ces predictions, nous n'en deuimmes pas plus
sages. Par ce que tout cest hyuer là, ce ne
furent que dances, balays & masquarades. Il
n'est pas que le premier Dimanche de Ca-
resme, on ne vauast à ceste desbauche en
la maison Episcopale, pendant que les Cha-
noines chantoyent leurs matines dans la
grande Eglise. Plusieurs personnes en mur-
muroyent dans leurs ames; mais nul n'en eust
osé sourciller. Et Dieu voulut que deux iours
apres le Roy receut nouuelles de la part du
sieur de Bouillon, que sous le nom de la Ligue
Mô sieur de Guise l'estoit emparé de la ville de
Chaallons en Champaigne. Et puis nous se-
rons si fols d'estimer, que ce ne soit vn
ieu de Dieu! Il faudroit estre sans yeux, ou
sans iugement. Quand il veut exercer sur nous
vn trait admirable de sa vengeance, il bande
nos yeux, estoupe nos oreilles & tous nos
sens, afin que son coup soit plustost frapé que
preueu.

*Ses pre-
miers ef-
fects.*

Maintenant les Seigneurs de la Ligue font
courir vn manifeste par lequel ils se plaignent
de trois points. Premièrement des Tailles,
Aides, Subsidies extraordinaires, qu'ils requie-
rent estre reformees. Secondement que plu-
sieurs Gentils-hommes estoÿent promeus &
aduancez aux premieres dignitez de la France
au desauantage des Princes. Et pour troisiem-
e on y a glissé sur la fin vne clause concer-

nant la Religion nouuelle, qu'ils requierent estre bannie de la France. Vous ne croiriez pas comme à vn instant les cartes ont esté mellees. Le Roy a enuoyé de toutes pars commissions, pour leuer gens, tant de cheual que de pied. On garde les portes par les villes; & spécialement pour asseurer la nostre, il a créé des Capitaines, qui sont les Officiers; & sous eux des Lieutenants, qui sont à sa deuotion. Brief, nous sommes maintenant deuenus tous guerriers dans Paris. Le iour nous y gardons les portes; la nuit faisons guets, patrouilles & sentinelles. Bon Dieu! que c'est vn mestier plaisant à ceux qui en sont apprentifs. L'Espagnol fournit au deffroy de ceste guerre à huis ouuert, cōme celuy qui ne desire que le brouillement de nostre Estat. Disant, que nous auōs troublé les pays-Bas en renards, par l'entremise de feu Monsieur le Duc, & qu'il ne douteroit deormais de nous traiter en Lyon. Tout ainsi que le Roy s'arme, aussi fait la Ligue; qui a ja surpris vne infinité de villes, tant en Champaigne que Normandie. .

Et en ceste nouuelle reuolte, & surprise inopinée de villes, sans auoir fait aucune requeste au Roy, auant que de prendre les armes, les hommes plus retenus ne peuvent bonnement iuger, si c'est à l'Estat qu'on en veut, ou bien à la Religion nouuelle. Et sont quelques vns d'aduis, que l'on mesle l'vn & l'autre ensemble. Quant à moy, ie ne le croy. Bien diray-je que les trois diuerses propositiōs

du Manifeste tiennent vn chacun en ceruelle. Le menu peuple tres-content que l'on cōbate pour sa liberté ; Les Princes pour leurs dignitez, & qu'ils ayent tous part au gasteau, sans qu'il soit seulement distribué à deux ou trois : Et tous generallement ne sont point marris, que l'on extermine la nouuelle Religion. Mais, quelque chose qu'il en soit, le Roy s'estime auoir esté infiniment offensé, & prend toutes sortes d'aduis pour en auoir la raison.

Et n'est pas vne petite question desçauoir si en ce nouveau remuement il doit appeller à son secours le Roy de Nauarre & les siens. Il y a du pour & du contre. Il le doit appeller, dira quelque hardy entrepreneur : Car en affaire de telle consequence, ie prendray aide, voire d'un Turc. Et loustenant ceste proposition, s'aidera de la braue responce, que fit le Roy François premier de ce nom, lequel s'estant confederé avec Soliman, grand Seigneur de Constantinople, l'Empereur Charles v. luy improperoit, qu'il s'aidoit d'un Chien contre luy, (ainsi appellons-nous ordinairement, par vne metaphore, les Turcs) Ie m'aide, respondit le Roy, d'un Chien; mais c'est pour conseruer mon troupeau contre la dent d'un Loup. Le Roy de Nauarre est vn grand Chef, qui apportera vn merueilleux poix à nostre balance. Ceste proposition ne plaira pas à quelqu'autre, qui sera franc Catholic; & encores moins voudra-il, qu'elle tombe en l'esprit d'un Roy, qui

entre tous les Roys de France tres-Chrestiens, fait profession tres-expresse de la Religion Catholique, Apostolique, Romaine. Et ce qui en ceste deliberation me fait plus penser, c'est qu'il a estably sa demeure dedans Paris, ville du tout vouëe au party Catholique: & y auroit danger que tirant aide du huguenot, il n'allienast de foy le cœur des Parisiens.

Ostons ceste taye de nos yeux, estimez vous que le Roy de Nauarre se ioigne aisement avec nous? Il le doit faire, dira quelqu'autre: Car entre les articles du manifeste de la Ligue, on fait mention de l'extirpation de la nouvelle Religion. Il ya quelque apparence. Mais vous ne scauriez oster de l'opinion de quelques vns, qui pensent estre clair-voyants, que le Roy ne s'entende avec la Ligue, & que c'est vn ieu couuert pour surprendre les autres (encores qu'en mon particulier iesois tout asseuré du contraire) & nommément plusieurs de la Religion font fraptez à ce coing là, de ne se fier iamais à nous; veu qu'au milieu d'un festin & mariage d'une fille de France, estans venus en ceste ville sur la foy publique d'un Roy, ils y furent traittez de la façon que l'on scait. Adioustez que ces deux Rois ont interest de se conseruer en reputation enuers les Princes estrangers, l'un enuers les Catholiques, l'autre enuers les Protestans. Par ainsi mesnagez ceste proposition de telle façon

qu'il vous plaira, vous ferez fort empêché.

Prendra il doncques le party de la Ligue? Je crains qu'il ne s'y puisse condescendre, pour plusieurs considerations; mesmes que, comme ie vous ay dit, il est outre mesure offensé de ceste nouvelle leuee de Gendarmes, & surprise de villes. Et celuy qui pensera estre grandement zelateur de la Couronne, ne trouuera pas bon qu'un Roy recoiue la loy de son subyet, ny que pour obuier au mal present il recherche avec la Ligue vne paix, qui luy apportera vne autre guerre. Quoy dont? Se tiendra il clos & couuert, pendant que ces deux grands partis iouëront des cousteaux au milieu de son Royaume? C'est vne medecine malaisée de prendre à vn Roy, que deux Princes ruinent de fonds en comble les pays; & que cependant il soit Spectateur de ceste ruine, sans y pouuoir remedier. D'auantage leur laissant les armes aux poings, il sera fort facile à celuy qui aura victoire de son ennemy, de donner puis apres la loy à son Roy, mesmement voyant maintenant les villes, par vne nouvelle police se prendre d'elles mesmes, sans vouloir receuoir garnison ny du Roy ny d'autre Seigneur. Je ne puis autre chose estimer, sinon qu'elles sont aux escoutes, pour se mettre entre les bras de celuy qui en fin aura le dessus.

Voila de grands ombrages, sans se resoudre, me direz-vous: Plus grands encores

que ne dites. Car aux autres Troubles qui se font cy deuant passez, l'object de deux Religions nous rendoit à cœur ouuert ennemis des vns ou des autres. En la querelle qui se presente aujourd'huy, ie ne scay si le Roy se peut asseurer, qui est des siens. Tel fait contenance de garder les portes de Paris pour luy, qui en son ame les garde pour son ennemy : Parce que les trois protestations du Manifeste ne sont point de petits appasts, pour attirer à leur cordelle le commun peuple, qui n'est iamais content du gouuernement present. Pour conclusion, de quelquesens que ie me tourne, soit à la guerre, ou à la paix, ien'y trouue ny fonds, ny riue. Laisant pour ceste cause aller mon opinion à la mercy des vens & vagues. La Royne merenon apprennie en telles negotiations, est d'aduis qu'il faut composer toutes choses avec Monsieur de Guise, & a pris ceste charge en main, pour en apres traiter avec le Roy de Nauarre. Mais voyez, ie vous prie, en quel piteux estat nous sommes reduits; d'autant que quelques Docteurs contemplatifs se persuadent, que sans son adueu le Duc de Guise n'eust pris les armes; & que ne se voyant plus appelée par le Roy son fils aux affaires, elle s'estoit voulu rendre necessaire. On ne peut empescher les langues venimeuses de mal parler. A Dieu.

Au Capitaine de la Ferlandiere, Pierre Pasquier, son fils.

Il donne des enseignemens à son fils comme il se doit comporter en sa charge de Capitaine. **E**N TENDS que le Roy vous a donné vne compaignie au regiment du Seigneur de Cluseau, dont ie suis tres-aïse; d'autant que ce vous est vn acheminement pour vous faire valoir entre les gens de bien & d'honneur. Et aussi pour estre auïourd'huy à l'escole d'un Maistre de Camp, que i'estime l'un des premiers & plus aduïsez Capitaines de la France. Et parcé que vous estes ieune, ie vous veux faire vne leçon, que vous retiendrez de moy, qui suis vostre pere, encores que ie ne face aucune profession des armes.

En ceste charge ie crains tout, ie ne parle de vostre vie: Car y estant appelé ie sçay qu'estes la principale bute contre laquelle l'ennemy descoché ses flesches, quand il faut venir aux mains. Et combien que vostre vie me soit chere; toutesfois c'est la moindre partie dont ie fais estat. Bien desire-je, que ne la mettiez au hazard sans subiect; Par ce que, tout ainsi que deuez bannir de vous toute crainte, quand il est question d'entreprendre quelque bonne faction; aussi ne faut il que la temerité vous commande. L'une & l'autre par diuers discours empeschent les vertueux effects de la guerre. Il ne faut fuir les dangers, quand l'occasion le requiert; mais aussi

ne les faut-il temerairement affecter. On dit que celuy ne doit aller au bois, qui a peur des branches; aussi ne faut-il aller à la guerre, qui craint la mort. Chacun est diuersement exposé à vn coup de bale, selon qu'il plaist à Dieu l'appeller. Mais ie croy qu'il y en a infinis qui y meurét plus pour se laisser aller à leur imprudence, que par leur proüesse & vertu. L'vn des plus braues Capitaines que nos troubles nous eussent enfanté, pour vn ieune Seigneur, estoit feu Monsieur de Brissac. Et si vous prenez garde à sa mort, il en fut le premier ouurier à mucidan, pour vne trop grande assurance qu'il auoit de sa valeur. Ce n'est pas chose incompatible d'estre sage & hardy ensemble. Au contraire la hardiesse, qui n'a la prudence pour compaignie, est vne folie & temerité. Ie vous escry cecy par expres, pour vous dire, que pour le seruice de Dieu & du Roy, vostre vie & vostre mort vous doiuent estre indifferentes; & qu'il faut mesnager vostre vie non pour fuir la mort; ains pour la reseruer à vne entreprise dõt il puisse reüssir fruiët à vostre patrie & aux vostres.

Sur tout ie crains en vostre charge, la foule & oppression du peuple. Ie sçay combien le François est insolent de sa nature, & principalemēt ccluy qui suit l'infanterie; mesmes en temps de guerre ciuile; où toutes choses sont à l'abandō. Tous les soldats jettent les yeux sur leur Capitaine; c'est leur principal rendez-vous. Ils le viennent courtizer en son logis. Vn pauvre hoste ce pendant patit, aux despens duquel les

chefs exercent malheureusement leurs liberalitez. Je vous prie, & vous commande, de tant que j'ay commandement sur vous, de penser que si voulez que Dieu benisse vos actions, il faut sur toutes choses espargner ce pauvre peuple qui ne peut mais de la querelle; & neanmoins en porter la principale charge. Quand ie vous recommande le peuple, ie vous recommande vous-mesmes. Les benedictiōs qu'il nous donne, sont autant de prieres à Dieu & certains presages de nostre bōne fortune pour l'aduenir. Je ne vy iamais soldat malgilant, contre lequel le temps n'ait en fin produit vne bonne & iuste vengeance; & quelque-fois plustost que nous ne pensiōs; cōme vous sçauiez estre fraischement adueni deuant Marennēs à celuy que cognoissiez. Les fautes que font les chefs ne sont si grandes d'elles mesmes, que d'autant qu'elles traignent quand & soy vne lōgue queue, par ce que ceux qui sont à leur suite, se façonnent sur leur exemple. Que le Ca-

*Benedi-
ctions du
peuple sont
prieres.*

*Tel qu'est
le Capitai-
ne, tels sont
les soldats.*

pitaine soit sobre, doux, affable; il eist malaisé que le soldat ne luy ressemble. Et à peu dire vous iugez par les deportemens du soldat, quel est le Capitaine; & par ceux du Capitaine, quel est le soldat. L'estre vaillant est bien seant à celuy qui commande; mais si ie ne m'abuse, la discipline le surpasse: & quand les deux sont ensemble, c'est l'accomplissement & chef-d'œuvre. Sur tout ie vous prie de n'estre blasphemateur du nom de Dieu. C'est vne heresie & opinion detestable, qui court entre ceux qui portent les armes, d'estimer que leurs blasphe-

mes & iuremens soyent l'ornement de leurs
vaillances: combien qu'il n'y ait rien qui tant
les repare, que la modestie, tant de faict, que
de parole. Si elle reside en nous, croyez que
nous auons de grands aduantages sur les au-
tres; quand ce ne seroit qu'elle faict qu'aisé-
ment ne tomberons en querelles; mais qu'e-
stans vne fois entreprises nous les sçaurons
bien mettre à fin. Vous n'ignorez de quelle
façon i'ay cōduit vostre fortune iusques à huy;
& comme vous voyant disposé aux armes, ie
donnay ordre, estant à Rome, de vous faire
entrer en la maison de feu monsieur de Foix,
lors Ambassadeur pour le Roy; qui vous a deu
estre vn miroir de vertu. Auquel lieu vous feites
vostre premier apprentissage à tirer des armes.
Delà estant de retour, ie vous enuoyay sous
ce sage Capitaine, monsieur de Gourdan, à
Calais. Et depuis, ne craignant rien tant, que
de vous voir cazanier, ie vous ay enuoyé au
lieu où il me semble que les gens de bien peu-
uent faire cognoistre leur vertu. Ie m'assure
que vous-vous souuiendrez d'appartenir à vn
pere, qui vous aime comme son fils: mais si de-
generez de la vertu, qui vous doit seruir de
guide, ie vous desaduoue tout à faict. A Dieu,
1586.

A Monsieur de Sainte Marthe.

*Il décrit
deux beaux
traicts de
Magnani-
mité, l'un
de la part
de M. de
Guise, l'au-
tre du Baro-
de Rame-
fort son pri-
sonnier.*

ET puis dites, que la magnanimité des Ro-
mains a esté ensevelie avecques leur Re-
publique. nō, elle se ramenteroit aujourdhuy au
milieu de nostre France. Monsieur de Guise
s'estant faict maistre de Verdun, le Roy crai-
gnāt qu'il ne fit le semblable de la ville de Mets,
commanda à monsieur d'Espernon d'y pour-
voir : lequel dès l'instant mesmes depescha le
Capitaine Bonouurier avec trois cēs bons sol-
dats, tirez du Regiment des Gardes du Roy,
pour se mettre en garnison dans la ville. Et
comme il s'y acheminoit, monsieur de Guise
en receut aduis, par quelques vns des nostres ;
tellement que s'il eust voulu, il le pouvoit ai-
sément desfaire ; toutesfois par vne lettre fort
courtoise, il luy mande qu'il eust à rebrousser
chemin ; autrement qu'il seroit contraint de
faire ce qu'il ne desiroit. Bonouurier se voyant
estre descouvert retourne en Cour, où mon-
sieur d'Espernon, par nouveau conseil, donne
ceste commission au Baron de Ramefort, que
ie vous puis dire estre l'un des plus accomplis &
determinez Gentils-hommes de ceste France.
Et fut entr'eux aduisé qu'il marcheroit seule-
ment au couuert de la nuict ; & que le iour il se
reposeroit. Ce qu'il fait, & conduit son affaire si
à propos, qu'il arriue sept lieues pres de Metz ;
se promettant d'y entrer sans aucun destour-
bier. Toutesfois il ne peut si bien couvrir son
jeu, qu'il ne fust encores descouvert. Car, pour

bien dire, monsieur de Guise ne mâque d'aduis, ayant plusieurs gens qui luy seruent d'espies pres du Roy. A la sortie d'un bois, Ramefort est salué par plusieurs Reistres Lorrains. La meslée est forte entr'eux ; son Lieutenant tué à ses pieds ; & comme les autres le surmontoient en grand nombre, aussile defeirent-ils ; mais non sans leur auoir cher vendu sa peau. En fin il est par eux pris. Chose dont monsieur de Guise aduerty, commande qu'on le luy amene ; amené qu'il est, on commence de disputer de sa rançon au Conseil ; où apres plusieurs opinions, quelques vns mirent en auant qu'il le falloit troquer contre quelques Gentilshommes des leurs que nous auions pris. Ce dont le Seigneur de Ramefort aduerty, vint trouuer monsieur de Guise à son leuer, & luy fit vne requeste digne d'un braue Cauallier : Monsieur, dict-il, ie sçay ce qui s'est passé en vostre Conseil, pour mon faict ; ie vous supplie humblement ne permettre que ie sois troqué contre d'autres ; non que ie doute de leurs valeurs : mais ie suis asseuré de la mienne ; & sçay comme i'ay esté pris. Au demeurant que l'on n'espargne ma bourse selon la iustice des armes. Mais à bien assailly, mieux deffendu : & à braue demande, la responce fut encores plus belle de la part de Monsieur de Guise. Monsieur de Ramefort, luy respondit-il, ie n'ignore point vostre valeur (car souz ceste opinion vous ay-ie choisi pour mon prisonnier.) Ie ne veux ny vous troquer, ny rançon de vous ; ains delibere vous réuoyer sur vostre foy : à la char-

ge, si les choses ne se peuuent pacifier entre le Roy & nous, que vostre espée ne demeurera oyseuse dans vostre fourreau. Vne chose desire-jesans plus; qu'aduenant que quelque Seigneur de marque des miens fust par cy-apres pris, & que ie vous en escriue lettre expresse de ma main, vous moyennerez sa deliurance enuers le Roy, & l'obtenant, désà present ie vous quitte de vostre foy: ne l'obtenant, vous-vous rendrez pardeners moy. Repassez toute l'ancienneté, vous ne trouuerez vne magnanimité plus grande que ceste-cy. Il n'y a prisonnier de guerre, qui ne s'estime tres-heureux de receuoir vn troc pour troc sans bource deslier, ny maistre qui ne vueille ou le troc ou la rançon; c'est le mesnage de la guerre. Icy le prisonnier se rend suppliant encontre le troc, & offre de payer rançon; au contraire le maistre le renuoyant sur la magnanimité de son prisonnier, ne veut icy troc ny rançon. Apres ce commun pourparler, le seigneur de Ramefort est renuoyé. Je ne veux oublier de vous dire (car ie le scay de sa bouche mesme) que luy qui est tres-Catholic, prenant congé de monsieur de Guise, luy dit; Que si en la guerre qu'il auoit entreprise, il n'estoit poullé que du zele de la religiō, Dieu beniroit son entreprise; mais s'il y mesloit tant soit peu d'ambitiō, il se trouueroit abismé lors qu'il péseroit estre au dessus de ses affaires. A quoy Monsieur de Guise respondit, qu'il appelloit Dieu à tescmoin, s'il auoit autre but en sa teste que la Religion. A la mienne volonté que l'un & l'autre ayent dit vray. A Dieu.

*Au Pere Jean Canart, Correcteur des Freres
Minimes à Nigeon pres de
Paris.*



E pensez pas que ce soit vne afflictioⁿ d'esprit, qui me commande de vous
 escrire; le plus grand plaisir que
 i'auray iamais, sera quand ie verray
 toutes choses se tourner à l'honneur de Dieu, &
 au salut de l'Am^e de mon fils; mais ie crains que
 en la voulant gagner par vne abondance de
 zele, qui se trouue en vos maisons, nous ne nous
 mettions au hazard de la perdre. Vous pouuez
 estimer qu'estant pere, il me desplaist, par vne
 taissible suggestion de nature, de perdre le
 corps; mais estant Chrestien, quand auec ce
 il y va du dâger de l'Am^e, ie ne me puis bônemét
 resoudre. Ie ne doute point que ne trouuiez du
 commencement cecy paradoxe, que ie craigne
 la perte de l'Am^e de celui qui se voüe en vne
 Religion si austere comme la vostre. Mais quâd
 repenserez en vous, qu'en prenant l'un des plus
 grands & saincts Sacremens de nostre Eglise,
 qui est celui de l'Autel, il y va de nostre sauue-
 ment ou damnation, selon que nous y venons
 preparez; vous ne trouuerez trop estrangela
 proposition que ie vous faix. Si le saint Esprit
 y a operé, ainsi que presupposez, & com-
 me il besongne quelquefois en nous ino-
 pinément, ie recognoistray que c'est vne
 grande benediction, & pour moy, & pour
 tous les miens: mais si au contraire, il y a

Il luy ra-
 conte l'oc-
 casioⁿ pour-
 quoy son
 fils a prins
 fantasie
 de se faire
 Religieux,
 & en quel-
 le sorte il le
 doit rece-
 uoir.

ie ne ſçay quoy que l'on ne doit deſirer en tels accidens. le croy que ſerez d'accord avec moy, que c'eſt aucunement abuſer du nom de l'Egliſe, de dire qu'il y ait en cecy de l'œuvre du S. Eſprit. Or tout ainſi que le ſage Medecin, deuant que d'ordonner vne purgation à ſon malade, s'informe ſommairement de ſon naturel, quelle eſt l'habitude de ſon corps & de ſon eſprit, quelle ſa maniere de viure, & qui luy a cauſé la maladie: auſſi ſuis-je d'aduiſ, que vous, que ie veux eſtre Medecin du cas qui s'offre, examiniez diligemment le naturel de mon fils; & comme toutes choſes ſe ſont paſſées. Premièrement ie vous pleuuy le patient pour vn ieune homme fier de ſa nature entre tous mes enfans, haut à la main; d'une volonté inuincible, & qui veut en toutes choſes auoir le deſſus de ſes cōpaignons. Voyla pour le regard de l'eſprit. Quant au corps, ie ſçay que naturellement il abhorre le poiſſon, & ſe paſſe pluſtoſt de pain, par vne certaine antipathie qui naiſt en nous dès le iour de noſtre naiſſance: Et toutesſois le poiſſon eſt voſtre paſture ordinaire. Au demeurant il partit de mon logis par vn deſpit: & ſi ie ne m'abuſe, depuis ſautant d'un penſer à autre, il ſe vint rendre en voſtre maiſon, pour me faire vn autre deſpit. Que le deſpit ſoit cauſe de ſon partement, i'en ſuis trop aſſeuré: Qu'il ſe ſoit retiré par deuers vous pour me faire deſpit, ſi cela n'eſt vray infailliblement, i'ay de grandes raiſons pour le croire. Par ce que toutes ſes actions des iours precedens, meſmes de l'immediat, ne ſe rapportent en rien à ceſte deuotion

uotion inesperee. Et quand il n'y auroit que l'opinion que i'en ay, encores faut-il qu'il donne ordre de me l'effacer auant que de passer plus outre. Je ne pense point qu'il puisse faire aucun profit entre vous, s'il n'y entre avec ma benediction; & croy que c'est vne espece de malediction, que ceste opinion me soit entree dans la teste, ores qu'elle fust faulſe.

Les benedictions que nous donnons à nos enfans, ne dependent point seulement d'un signe de la Croix, que nous faisons dessus eux, quand ils prennent congé de nous. Ce signe n'est qu'une image exterieure du bon vouloir que nous leur portons interieurement dans nos

Les benedictions des Peres à leurs enfans en quoy consistent.

ames, par lequel nous les licentions avec deuotes prieres à Dieu, qu'il luy plaise de les conduire. Et quant aux maledictions, encores que nous ne maudissions nos enfans, si est-ce qu'un maltalent conçu, ie ne diray point iustement, mais avec vne simple couleur encontr'eux, est vn malheureux prognostic de leurs euenemens futurs. Pour autant qu'apres Dieu, le plus beau simulacre qu'ils doiuent auoir empraint dans leurs cœurs, est celuy de leurs peres & meres. Je ſçay bien que vous autres messieurs ne demeurez pas en cecy courts, ny sans responce, comme estant vn lieu commun qu'avez iournellement à traiter; quand meſmes les peres & meres, plus commandez par la chair que l'esprit, se laissent aller à leur pure sensualité. Chose dont ie ſuis d'accord. Mais c'est en quoy nous trauaillons, de ſçauoir si au cas present les particularitez

Et en quoy les maledictions.

estant telles que ie vous ay representé, nous reputerons que pour changer d'habit & de maison, il y aura quelque chose pour le seruice de Dieu. En somme, ie crains que le despit ne l'ait acheminé par deuers vous, & que la honte ne l'y retienne puis apres. L'adiouste, (car ie parle à vous comme à celuy qui auez passé par tous les destroits de la Philosophie) qu'il n'y a rien si familier en la nature, que de voir les choses prendre fin de mesme proportion & conduite qu'elles ont pris leurs commencemens. Le champignon qui naist en vne nuict, perit aussi en vne nuict; la fleur qui s'espanouit en cinq ou six iours, se ternit en autant de temps sur son tige. Ce qui a lieu non seulement en la vegetatiue, mais aussi en la sensitue. D'autant que l'homme qui est prompt & aisé des'exciter à cholere, s'appaise aussi fort aisément; Comme au contraire le melancholic, qui est d'une qualité froide, & qui par consequent ne se cholere facilement, lors que la cholere l'a gaigné, il est malaisé de la luy oster. A quel propos tout cecy? Pour vous dire, que quand telles opinions subites tombent en nos testes, telles que celle de mon fils, en vne assurance de tout il faut tout craindre. Et que tout ainsi qu'il se fera aisément disposé de se rendre vostre; aussi il ne se vueille apres dispenser de sortir d'avec vous, au scandale de vostre famille & de la mienne. Sçavez vous doncques que ie desire que nous en facions? Un bon Religieux, qui ne porte à l'aduenir la penitence sur le front, non de ses fautes passees, ains de

celle seulement qu'il pensera auoir faite au changement de sa vie: Religieux, qui ne soit du nombre de ceux, lesquels apres auoir demeuré vingt & vingt cinq ans dans vn monastere, donnants conseil à ceux qui y veulent entrer, disent que quant à eux ils ne voudroient estre autres que ce qu'ils sont; toutefois ne leur conseillent d'y entrer. Je veus qu'il porte sa Croix avec vne allegresse de cœur; que le poisson luy soit vne manne de Dieu; la haine plus facile à porter, que la chemise de lin aux hommes nourris aux delicateſſes du monde; brief, qu'il nous estime tous miserables, au regard de son Paradis present, sans cest autre qu'il attend, lors qu'il sera passé de ceste vie passagere à vne autre plus certaine & perdurable: Et pour conclusion, qu'ayant eu sur les fonts baptismaux le nom de René, il renaisse desormais vrayement en vous & par vous. Pour y paruenir i'ay vne priere à vous faire, qui est que l'exerciez sans consideration qu'il soit mien, pendant trois mois entiers en toutes charges rigoureuses destinees aux nouices; neantmoins que pendant ce temps il ne prenne l'habit de Moine; afin que si la disposition de son corps ou de son esprit, ne pouuoit porter le fais de vostre regle, il ne soit puis apres espris de honte, qui l'empesche de reuenir. Et si pendant ce temps vous-vous pouuez commander, (quand ie dy Vous, j'entends tous les vostres) de ne le prescher & semondre par belles paroles de demeurer, ains laisser besôgner le saint Esprit en luy, croyez

que i'auray l'accomplissement de mes desirs. Car si au bout de ces trois mois conduit de ceste façon il perseuere, non seulement ie seray content, ains embrasseray avec toute deuotion, sa deuotion, & estimeray que ce vous sera vn bien grand trôphée, d'auoir non gaigné vn corps, ains vne Ame. Je vous adresse spécialement ceste lettre, non seulement pour estre au iourd'huy le Pere Correcteur de vostre maison, mais aussi pour la doctrine & bonne Ame que i'ay recogneuë en vous, au peu de temps que ie vous gouuernay dernièrement. Vous asseurant, que de quelque façon que les choses se tournent, vous aurez en moy vn amy, resolu de vous faire tous bons offices en ce qui concernera les affaires de vostre maison. A Dieu.

*A Monsieur Toarnebu Conseiller en la Cour de
Parlement de Paris.*

*Il represente
la difficulté
qu'il y a de
traduire de
vne langue
en autre: et
neantmoins
luy promet
de traduire
l'oraison de
Ciceron
pour Milon.*



Vous voulez doncques que i'habille Ciceron à la François. Voyez, ie vous prie, quelle iurisdiction vous auez acquise sur moy. Il n'y a rien que i'abhorre tant que le mestier de Traducteur; non que ie ne l'estime de quelque recommandation, pour estre celuy, par l'entremise duquel nous auons part aux belles conceptions des Autheurs anciens; mais entre les labeurs de nos esprits, ie n'en estime aucun plus penible, & plus ingrat, que cestuy-cy; non seulement pour asseruir en ce faisant nostre plume sous vn langage est rā-

ger, & captiuer nostre esprit sous la tyrannie d'un autre ; mais aussi que ie crains que nos Traductions ne se transmettēt à nos suruiuans, ains meurent avec nostre vulgaire, qui se charge de cent en cent ans, demeurans par ce moyē nos Traductions enseucies dans les tenebres d'une longue anciēneté. Et de ma part, ie ne souhaite en mon mesnage ces baux d'Eglise, que l'on fait à quatre vingts dix & neuf ans seulement ; mais vn heritage, bien que non si riche, qui soit mien à perpetuité, avec vne esperance de le laisser à ma posterité, pour vn tousiourmais. Quand nos inuentions sont de merite, quelque changement qu'il y ait d'un vulgaire, on est contraint de venir à nous, pour n'y auoir d'autres protocoles ; voire que si les paroles desplaisent pour estre trop anciennes, ceux qui nous suruiuent les ageacent quelquefois à la moderne, afin que le peuple ne soit frustré de ce beau sujet. Ce qui n'aduiant pas, au Traducteur, lequel, pour ne prester que la robbe, quand elle se treuue trop vsée, par vn long laps de temps, est abandonné pour auoir recours aux auteurs originares, soient Grecs ou Latins, dont les langues approuuees se sont par plusieurs siecles perpetuees iusques à nous. Adioustez, que les lāgages ne se rapportent les vns aux autres en leurs manieres de parler ; & que ce qui est bien seant en vne langue, le voulant transplanter en l'autre, sera trouué de mauuaise grace. Tellement, que tout ainsi qu'il y a plusieurs choses au Latin qui ne se peuuent de mesme naïfueté represēter

*Le langage
vulgaire
change de
cent en cent
ans.*

Difficulté
grande aux
Tradu-
cteurs.

en nostre François ; Aussi y en a il plusieurs au François, que Ciceron mesmes s'il venoit à renaitre, seroit bien empesché de rendre avec mesme grace en Latin. Je vous passe que les Romains vians sous vn Estat populaire, & nous sous vne Monarchie & Royauté, nos polices & nos magistrats n'ont aucune communauté des vns aux autres. Car ces mots de *Senat*, *Senateur*, *Consul*, *Consulat*, *Tribun*, *Edile*, *Prateur*, *Dictateur*, *Proconsul*, qui se puisēt du fonds d'une Democratie, & autres qui viennent à leur suite, comme *Comices*, *Craisons*, *Concions*, *Auspices*, *Centurions*, *Gladiateurs*, & mille autres de telle trempe, sont de tel effect que les rapportans à nostre vsage, en parlant François nous Latinisons : ie veus dire, qu'ils n'apportent non plus d'edification au peuple François, non nourry aux lois & mœurs des Romains, comme s'il les lisoit en Latin. Et si pour penser estre plus habiles que nos compaignons nous voulions approprier quelques mots de nostre creu au lieu d'iceux, pour quelque symbolization & rencontre que nous penserions y auoir de quelques vns de nos estas avecques ces anciens ; ie croy que l'on se rendroit encores moins intelligible ; & que pensans par ce moyen acquerir la grace du peuple, on se rendroit vne bute de mocquerie à chacun : ainsi qu'il est aduenu à ceux qui veulent accommoder ie ne sçay quels mots Latins à nostre pratique François. D'auantage il y en a quelques autres que vous ne sçauriez mesmes traduire, comme sont ceux-

cy, *Rostra, Forum, Circus, Maximus, Flamen,*
 & infinité d'autres, dont ien'ay fait registre en *Mots qui*
 ma memoire. de maniere que c'est proprement *ne peuvent*
 ce que l'on dit, *Tenir le Loup par les oreilles;* *estre tra-*
 Car de quelque sens que tourniez vos pensees, *duus.*
 vous ne sçauriez quel party tenir. Pour le
 vous représenter à l'œil, ie me contenteray de
 vous toucher les deux premiers mets du sub-
 jet que ie me suis proposé. Vn Ciceron, que
 les Romains appellerent, *grand Orateur;* &
 la cause qui se presente pour Milon, qu'ils
 oppellerent *Oraison.* Comment vsons nous en
 François du mot *d'Orateur?* Ce sont les Euef-
 ques & Prelats, lesquels és lettres qu'ils en-
 uoyent aux Rois & Princes; prennent cette
 qualité de leurs humbles Orateurs, rappor-
 tans ce mot à leurs deuotions & prieres: com-
 me en cas semblable, parler du mot *d'Orai-*
son à vn simple peuple, iamais il n'estimera
 qu'il doie auoir lieu pour les causes quel'on
 plaide, ains seulement pour les prieres que
 nous faisons à Dieu, & aux Saints. Que l'ap-
 pelle Ciceron Aduocat, comme nous ap-
 pellons auourd'huy ceux qui plaident, il n'y *Orateur*
 a homme si peu nourry en l'ancienneté qui *estoit d'au-*
 ne sache tout aussi tost, que ie rualle gran *tre qualifié*
 dement la dignité de cest ancien estat. Et de *à Rome.*
 fait Tacite, ou celui qui sous le nom de *qui Aduo-*
 luy a fait vn Dialogue de l'Eloquence de *cat entre*
 son temps, monstre bien, que ceste grande *nous.*
 splendeur de parler au public estoit lors gran-
 dement decheuë, par ce que ceux qui l'exer-
 coyent estoient plustost nommez Aduocats

qu'Orateurs. Et en cas semblable, que ie donne au subiet qui s'offre le nom de Plaidoyé (comme ie suis resolu de faire) encores ne fay ie nulle doute, que ie n'encourelle controolle de plusieurs, qui penseront que ce mot est trop bas, pour la grandeur de ceste cause. Qui fait que ie suis contraint de dire & confesser, que le Traducteur tombe en l'une de ces deux extremittez : Car, ou il escrit pour celuy qui entend la langue Latine, ou pour celuy qui ne l'entend. Si pour le premier, c'est en vain; par ce que vray semblablement il se donnera plustost le loisir de puiser l'eau de la vraye source & fontaine. Si pour le second, il y a grandement à craindre, que nous promettons de luy faire entendre vn Ciceron, nous ne fournissions à nostre esperance. Et par ainsi que soyons abandonnez del'un & del'autre. Tellement que nostre labeur tombera seulement és mains de quelque poignée de gens curieux, lesquels pour estre en petit nombre, au regard des deux autres, ie fais grande conscience d'alambiquer mon esprit en telle espee d'escire pour leur complaire : ioint que tels esprits sont ordinairement plus malaisez à côtééter, que les autres. Toutes lesquelles particularitez peuuent auoir de grandes puissances, pour nous destourner de la traduction. Mais quand avec tout cela nous adiousterons, cōbien l'Eloquence en son general estoit plus familiere aux Romains, qu'à nous, il y auroit trop & trop de matiere pour nous faire craindre. Ils auoyent affaire à vn peuple qui se repaiñoit de paroles, &

*L'Eloquence
pourquoy
plus familiere
aux
Romains
qu'à nous.*

attendants de luy la promotion de leurs grandeurs, toute leur estude n'estoit que de haranguer en public. Et pour ceste cause auoient des Maistres exprés, qui leur expliquoyent l'ornement de leur langage, les masques & figures de bien dire, la maniere de remuer les passions en nous, de trafiquer le cœur du peuple, captiuer la bien-vueillance des plus reuesches & farouches, les roidir & assouplir, exciter les escoutans, tantost à vne cholere, tantost à vne compassion & pitié : & pour n'estre controllablez de l'assistance, se donnoient carriere telle qu'il leur plaisoit, consommant quelquefois le téps en plusieurs friuoles superfluités, qui nous attendent, mesmes en les lisant. Mais quant à nous, pour auoir à mesnager nostre industrie avecques luges graues, il nous faut estre plus retenus. On demande en nos plaidoyers plus de nerfs & moins de chair. Que si nous voulions nous donner la loy de cajoler, comme la plus-part de ces anciens, outre ce qu'il ne nous seroit permis de ce faire, nous apprestierions à rire à chacun. Je ne vous mettray autre exemple deuant les yeux, que le present plaidoyé, auquel (par le témoignage des plus grands) Cicéron desploya tous les nerfs de son eloquence. Vray Dieu ! combien y trouuez-vous de dispenses, qui ne seroyent iene diray pas receuës en nos Parlemens ; mais bafouées, si l'on s'y vouloit arrester ! De sorte que l'accoustumance qu'ils auoient de mettre en œuvre leurs conceptions & paroles à leur plaisir, leur apprit à diuersifier en beaucoup de façons leur langage. Chose

quin'est peut-estre en nous, pour ne faire telle profession de parler comme ils faisoient. Et toutesfois vous me poursuiuez à outrance de faire quelque experience de la traduction, mesmement sur ce plaidoyé. Qui n'est à vray dire, autre chose que d'exposer ma reputatiõ au langage des vns & des autres, en voulant faire mon coup d'essay sur vn chef-d'œuvre de Ciceron, duquel ie puis dire (car il est vray) que tout ainsi qu'Alexandre le Grand ne vouloit estre representé en peinture plate où en bosse, que par le Peintre Apelles, ou le Graueur Lyssippe, tous deux parangons en leurs Arts; aussi ne doit-il estre permis à aucun de vouloir représenter Ciceron, s'il n'est vn autre Ciceron, en sa langue. Je le feray neantmoins, à la charge de me precipiter du haut en bas, comme Icare, pour vouloir approcher trop presmes aisles de la chaleur de ce grand Soleil, estant content de me mescontenter non seulement pour vous contenter; mais aussi par ce que ie ne veus pas dire que nostre vulgaire soit si court, que il n'ait assez de proprieté pour rendre plusieurs choses du Latin, sinon avec perfection, pour le moins avec quelque grace & naïveté. Et pour conclusion, s'il y a quelque chose à redire en ce que ie représenteray, ie veux qu'on l'impute, non à la pauvreté & disette de nostre langue Françoisse, ains à celle de mon'esprit. Que si ie ne puis satisfaire à vn chacun, il aduiendra au traducteur pareil desastre qu'à l'Autheur; lequel

quelque diligence & industrie qu'il y eust apporté, pour bien ordonner son plaidoyé, perdit la cause : aussi perdray-je la mienne, quelque peine que j'aye mise à le traduire. Mais tout ainsi que Milon prit la bonne volonté de Cicéron pour l'effect ; aussi me promets-je, que si ce mien labeur tombe és mains de quelques esprits bien-nez, ils se contenteront que j'aye bien voulu aux miens ; entre lesquels ie desire qu'on sçache que tenez l'un des premiers lieux ; & que vos prieres ayans lieu de commandement sur moy, ie ne pouvois vous des-obéir, sans encourir le crime de felonnie tel, que de Vassal au Seigneur. A Dieu.

Lettre de Monsieur Airault, Lieutenant Criminel au Siege Presidial d'Anjou, à Pasquier, luy faisant present du Livre, par luy intitulé ;

L'Ordre, Formalité & Instruction Judiciaire, dont les anciens Grecs & Romains ont usé aux accusations publiques.

COmptant sur mes doigts à qui par honneur ie deuois donner mes fruits Angevins, j'ay pensé que vous en deuiez estre l'un des premiers : car si par quelque malheur, ou plustost imperfection, j'ay quitté ceste lice, où ie vous ay veu courir si

brauement, il ne s'ensuit pas qu'ayez oublié ceux qui vous ont tousiours honoré & estimé: comme aussi le cognu-ie fort bien au dernier voyage que ie fis à Paris. Mais pour ne vous mettre en ligne de compte chose qui ne soit bien alloüable, puisque maintenant y tenez rang auectant de dignité & vertu, ie vous diray franchement, pourquoy ie me suis resolu vous en faire part. C'est pour vous corrompre. Les Dieux mesmes se gaignent & addoucissent ainsi. I'ay pensé de qui est-ce que plustost ie craindray la docte & graue Censure, que de mon Pasquier, duquel & le nom, & la langue, & les mains volent aujourd'huy par tout le monde? Par honneur il supportera & dira que ils sentent autre chose que leur moustarde, & langues de bœuf d'Anjou, & n'en degousteront point les autres, s'il accepte luy mesme le don qui luy en sera faict, venant de l'Autheur. Ie vous prie doncques, Monsieur, le prendre à ceste charge, & ne craindre les loix Romaines, qui ne nous obligent, qu'autant que leur voulons donner cours & autorité par nos Liures. Monsieur, encores vseray-ie de l'ancienne formule, & en vous baisant humblement les mains, ie prieray Dieu vous donner tres-longue & tres-heureuse vie.

*A Monsieur Airault , Lieutenant Criminel au
Siege Presidial d'Angers.*

Qombien que ie me sente infiniment ho- *Il respond*
noré du liure qu'il vous a pleu m'euoyer; *à la prece-*
toutesfois ie recognoistray franchement que *dense, &*
du commencement i'ay douté de le receuoir; *l'exhorté de*
d'autant que vostre courtoisie estoit vne accu- *distinguer*
sation taissible de mon deffaut; pour m'estre tât *son liure*
oublé par le passé, de ne vous auoir iamais fait *par cha-*
part de mes nouueaux fructs. Quoy que soit, *pitres.*
ie ne Pay peu receuoir sans rougir; mesmes a-
pres auoir leu vos lettres, esquelles donnant
plus à nostre ancienne amitié, qu'à vostre bon
iugement, me faites cent fois plus d'honneur,
que ie ne merite. Et specialement en ce que
desirez passer par ma censure, (ainsi vous plaist
il l'appeller) me souuenant de vous mander ce
qu'il me sèble de vostre œuvre, ie le feray pour
vous obeir. Je vous ay tousiours estimé &
respecté comme Iuge incorruptible; & le iu-
gement que i'en faiso y n'estoit vain. Car mes-
mes ie n'en veux autre plus prompt tesmoigna-
ge que de vostre Liure, dans lequel faites fort
dextremēt & dignemēt le procès à toutes sortes
de gens qui le meritent. Mais si pour se laisser
aisément manier par plusieurs personnes, tout
Iuge appreste à penser de soy, ie crains certes
que ne perdiez ceste belle reputation qu'auiez
de longue main acquise: car ie vous verray ma-
nié par tant de mains, que iamais Iuge de Pro-
uince ne se rendit tant fauorable. Et aduiendra

au bout de cela , si n'y prenez garde , que faisant le procez à autrui , vous le vous ferez à vous-mêmes , en alambiquant vostre esprit , & le laschant trop facilement à la mercy de vos doctes veilles. Le mal-heur est en telles affaires , que pour nous faire viure , sommes homicides de nous. Quant au sur-plusie m'assure que vostre labour ne se contentera d'une premiere impression. Et combien qu'il soit mal-seant à tout homme d'estre ingenieux sur le fait d'autrui ; toutesfois si estoit à moy , lors qu'on le r'imprimeroit , ie le digererai en chapitres , selon la diuersité des matieres qui sont traittees en chascue Liure. Nô que ie ne voye bien , que vostre intention a esté de nous donner vn œuure massif , sans fleurettes , & à l'antique ; mais ce que ie vous en conseille est pour contenter l'opinion de ceux auxquels l'auez voüé ; ie veux dire des François , qui ne se sçauroyent presque donner le loisir de lire vn liure tout d'une tire ; ains veulent ie ne sçay quelles poses , pour reprendre haleine. Il n'est pas que les Italiens plus retenus que les François en leurs actions , ne contribuent à ceste impatience avec nous. Qui a fait que deux de leurs premiers Poëtes , par vne œconomie non recogneüe par tous les anciens , ont diuisé leurs poëmes en chants (qui est vne forme de chapitre) Arioste & Tasso , lesquels on peut opposer à toute l'ancienneté. Et Quintilian mesmes l'a fait , en ses Institutions Oratoires. Ioinct que vostre Liure semble y estre aucunement disposé , pour se diuersifier en plusieurs

Il est mal-seant d'estre ingenieux sur le fait d'autrui.

matieres, lesquelles vous nous monstrez (si ain-
 si voulez que ie le die) au doigt par les apostil-
 les qu'avez inserées en la marge. En effect, voi-
 la tout ce que ie vous en puis mander; vous re-
 merciant humblement de l'honneur que m'a-
 uez fait par vostre bon souuenir, & priant par
 mesme moyé faire estat de moy, comme de vo-
 stre ancien amy, i'adiousteray Seruiteur, à la
 vieille François: mais ce mot d'amy me plaist
 plus. A Dieu.

*A Monsieur Airault, Lieutenant Criminel
 d'Angers.*



Vous auez perdu vostre fils aîné, *Il conseille à M. Airault de vendiquer son fils en quel lieu qu'il le treuve, qui s'estoit ren-*
 par l'artifice impiteux de ceux, *du Reli-*
 qui souz le masque de Religion, *gieux.*
 fôt trophée de la despoüille d'un *son fils en*
 pauvre pere, en la personne de *quel lieu*
 son enfant. Mais, comme la Pal- *qu'il le*
 me plus est terrassée, moins se red, aussi rappor- *s'estoit ren-*
 tez vous maintenant d'eux vne ample victoire *du Reli-*
 à leur honte & confusion. Qui me console grã- *gieux.*
 dement en l'affliction que ie vous voy suppor-
 ter, à laquelle ie participe par l'amitié que ie
 vous porte. Et quant à vous, il me semble que
 deuez vous consoler par vous-mesmes: car la
 perte de vostre fils charnel, vous en a fait en-
 gendrer vn autre, qui passe de tant le premier,
 que l'esprit est de plus grãd merite & recôman-
 dation que le corps. Nos enfans sont tels que le
 hazard de leurs naissances nous les donne: Qui
 est cause que receuons d'eux plus de blanques

que de benefices. Mais ce second est vostre
vray fils, duquel ne pouuez receuoir que con-
tentement. Quand nous lisons dans Genèse,
que Dieu forma l'homme à son image, il le faut
rapporter à l'esprit; & non au corps, duquel il
ne s'estoit encor reuestu. Aussi estime-je que
nos plus vrayes pourtraitures soyent, non les
ensans qui naissent de nos corps, ains de nos
esprits. Or entre ceux de ceste marque, qui
sont issus de vostre forge, i'estime grandement
celuy qu'il vous a pleu fraischement m'enuoyer.
Ie n'y voy rien que de beau. Vn commencement
brusque, qui nous excite de le lire, non par vne
semonce pedantesque, que nous apprenons
de ces escholiers Rhetoriciens; ains par vne
demarche hardie, telle que dans Heliodore.
Ie ne sçay où vous visez du commencement, ny
quelle doit estre la suite. Cela m'engage à la le-
cture: & plus ie m'y voy engagé, moins ie m'é-
puis retirer, pour vne infinité de belles senten-
ces, & mots choisis qui y sont, accompagnez
d'une docte anatomie de toute l'ancienneté
sur ce subiect, & d'une forte eloquence d'un
bon pere, fondée sur vne iuste douleur. Et
pour vous dire en peu de paroles, il n'y a rien
qui m'y desplaie, fors le desplaisir qu'en por-
tez. Mais desplaisir, qui me semble deuoir es-
tre couuert par le contentement que vous
doit maintenant apporter ce nouuel enfant; le-
quel toutesfois (comme m'escriuez,) vous auez
esté en opinion de supprimer. Comment? A-
pres auoir perdu le premier, qu'eussiez esté
patricide du second? non; il faut qu'il recoiue
vie,

vic, par la mort de l'autre: Ou pour mieux dire, qu'il se soustraye de vostre presence & vogue parmy le monde, tout ainsi que l'autre. Mais en ce faisant i'ordonne qu'une mesme condamnation produise deux diuers effects; Et que le premier, pour vous auoir desobey, sente la punition de Cain (permettez moy de donner air à ma cholere) & que l'absence de l'autre se tourne à vostre honneur, & à l'edification de nous tous, pour ne vous auoir abandonné que sous vostre bon plaisir. Et si ne luy voulez bailler la clef des champs & faire imprimer, que quand l'assemblee des Estats sera ouuerte à ce prochain mois de Septembre ou d'Octobre (ainsi que me le mandez) ie le veux bien. Au demeurant, ie soussigne à vostre aduis; Que l'enfant ne se peut vouër en Religion, sans l'expres cōsentement des pere & mere.

*L'enfant
ne se peut
vouër en
Religion
sans l'ex-
pres con-
sentement
des pere &
mere.*

Et ores que ie ne puisse rien adiouster à ce qu'auiez si doctement discouru; toutesfois, puis que me faites cest honneur de me demander pour secōd, i'entre tres-volontiers en champ de bataille avec vous; non pour combattre avec armes de si haut appareil que les vostres, ains seulement avec l'espee & la cape, cōme font ceux qui se baillent la main l'un à l'autre, pour decider leurs querelles. Ie tiens qu'Elie premiere-
ment, puis Elizee son disciple, feurent les premiers auteurs & instituteurs des Moines. Quoy que soit i'en ay certains argumens qui m'induisent d'ainsi le croire. Car ils eurent marteaux distincts & separez de la commune: Et mesmement Elizee eut plusieurs deuotes pet-

*Elie & E.
l'ee pre-
mier insti-
tuteurs des
Moines.*

*Loy de
Charle-
magne pour
les Reli-
gieux.*

sonnes à sa suite, qui s'habituèrent avec luy son vn mesme toict à Galgal. Or quand Elie appella Elizee à soy, il ne fut soudain obey; mais Elizee le pria qu'il luy permit auant que de passer plus outre, d'aller baiser ses pere & mere; qui estoit en bon langage, prendre congé d'eux & recevoir leur benediction; c'est à dire, leur consentement, auant que de se soubmettre à ce nouveau vœu. Ce qu'Elie luy accorda. Et sans fueilletter autres Loix que nos anciennes, il y a dans les Loix de Charlemagne article expres portant inhibitions & defenses aux enfans de se rendre Moines, sans le consentement expres de leurs peres & meres. Pourquoy doncques ne vous sera il permis de vous esclatter contre ceux, qui vous ont rauy vostre fils, qui le vous cachent, le destienent malgré vous contre nos anciennes Loix, contre l'arrest du Parlement par vous obtenu, & contre la volonté expresse de nostre Prince?

*Le Seigneur
a droit de
sustre contre
son homme
de Corps.*

Vn Seigneur a droit de suite contre son homme de Corps; voire iusques au bout du monde: Et nous ne l'aurons sur nos enfans au milieu de nous? Vn Seigneur haut-iusticier peut vendiquer son subject, se voulant distraire de sa iurisdiction, pour subir, voire celle mesme du Roy; Et nous peres ne pourrons réclamer nos enfans, se voulans soustraire de nostre obeissance pour se ranger sous celle d'un Espagnol ou Italien? Mais, c'est (dit-on) pour se consacrer en tout à Dieu. Comme si en l'obeissance du fils au pere, il n'y auoit point de Dieu, ou qu'il n'y ait point de

Dieu dedans nos maisons ? Au contraire l'estime qu'une maison bien reglée, où le pere & la mere par bons exemples seruent de miroir à leurs enfans, est vn vray Monastere, franc & exempt de toutes lourdes rancunes, qui font ordinairement leur seiour au milieu des Moines. Le plus beau conseil que devez prendre, est celuy dont Alcibiades vsa quand sa femme l'ayant fait adiourner en instance de separation de corps & de biens, pour les mauvais traitemens qu'elle receuoit de luy ; il fut si hardy en presence de tous les iuges, de la saisir par le fort du corps, & la ramener de sa priuee autorité en sa maison ; Qui fut vne faillie de mary, dont non seulement il ne fut repris, ains grandement loué par chacun. La querelle de ceste sage Dame estoit iuste contre son mary ; toutesfois elle fut contrainte de luy obeir : Et vostre fils ne vous iurera estant par vous recherché ? On le vous a par vne mainmise extraordinaire soustrait, vous le pouuez par autre mainmise iuridique reprendre, au milieu de ces nouveaux & impudens arbitres de nos consciences, toutes & quâtesfois que le trouuerez. Il n'y a ny laps de temps ny long entreiect de lieux, ny pretexte de Religion, qui puissent prescrire au preiudice de l'autorité paternelle. Vous auez de quelle façon ce grand Empereur Auguste se comporta à l'endroit de Tarius Senateur, sien amy, en l'accusation qu'il auoit intentee contre son fils, en laquelle il ne voulut bien que present, seruir d'autre chose que de

*Traict
hardy
d'Alcibia-
de enuers sa
femme.*

conseil; laissant la seule & entiere cœrcion au pere, comme premier & dernier iuge domestique de son enfant. Et où est-ce que cela doit auoir plus de lieu qu'en France, si nous auons encores quelque ressentiment de ceste seuerité genereuse de nos anciens Gaulois, par laquelle les peres auoyent toute puissance de vie & de mort sur leurs enfans? Ie suis pere, ie parle à vn pere, & à vn pere mien amy: Ie ne puis que ie ne lasche toute bride à ma douleur, aussi bien que vous: Et peut estre en ce faisant, la vostre diminuera d'une moitié, estant diuisee en deux. A Dieu.

A Monsieur de Sainte Marthe.

*Recit de la
paix entre
le Roy &
monsieur de
Guise.*

A Pres plusieurs allées & venues, la Royne mere a si bié besongné, qu'e fin la paix a esté conclue entre le Roy & mōsieur de Guise; Et au lieu que le Manifeste de la Ligue estoit reuestu de trois points, comme ie vous ay cy deuant mandé, on a passé par conuience les deux premiers, pour se heurter au dernier, qui concernoit la nouuelle Religion. Et est arresté, qu'il n'y aura plus en toute la France que la Religion Catholique Apostolique Romaine; Que les Ministres vüideroient dedans deux mois, à peine de confiscation de corps & de biens; & les autres dans six, s'ils ne vouloient se reconcilier avec nostre Eglise: & permis aux officiers de se deffaire de leurs Estats dans le mesme temps. Le Roy est venu en personne le dixhuietième Iuillet pour faire publier l'Edict au Parlement. Le bruit est

que s'y acheminant il a dit à monsieur le Cardinal de Bourbon, qu'il auoit fait deux edicts de pacification entre ses subjects ; l'un en l'an 1577. contre sa Conscience, par lequel il auoit toléré l'exercice de la nouuelle Religion; mais toutesfois à luy tres-agreable, comme celuy par lequel il auoit pourchassé le repos general de toute la France ; Que presentement il en alloit faire publier vn autre selon sa conscience, auquel il ne prenoit aucun plaisir, comme preuoyant qu'il apporteroit la ruine vniuerselle de son Estat. A la verification de l'Edict, monsieur le premier President de Harlay a sagement remarqué, que le premier Edict qui l'auoit permise estoit d'un mesme mois, en l'an 1561. En somme ceste paix est le renouvellement d'une vieille guerre: mais, à vray dire, la paix des Financiers; par ce que quelques iours apres on a supprimé la Chambre Royale, moyennant deux cens mille escus qu'ils baillét au Roy, pour fournir au defroy de la guerre. Ceste nouuelle entreprise ne se peut passer sans beaucoup couster au Roy & au peuple; qui est la cause que l'on a auourd'huy recours au reestablissemēt de tous les estats de iudicature supprimez. Il n'y a point telle espargne pour nos Rois, que celle qui prouiet de l'abition de leurs subjects. C'est vn fonds inepuisable; Et en cecy chacun court en poste à la pauureté. Il n'y a bonne famille, dont nos Rois ne soient par ce moyen heritiers. Il y a enuiron deux ans que le Roy supprima par mort tels offices, comme venans à la foule du

*L'Edict de
luslet con-
tre les Hu-
guenots pu-
blié en par-
lement.*

*La Chambre
Royale sup-
primee.*

peuple; Voire avecques vne tres-estroite rigueur, sans admettre les Resignations autres que de pere à hls. La memoire de ce menage est, en vn instant esvanouye. Il n'est pas fils de bonne mere qui ne mette là son denier. C'est vne taille qui court en cette France sur les riches ambitieux. A Dieu.

A Monsieur de Maugarry, intendant des affaires de Monsieur le Duc de Guise.

*Il le remer-
cie de ce
qu'il luy a-
voit enuoyé
vne certai-
ne lettre de
monsieur de
Guise.*

E vous remercie de la bonne souue-
nance qu'il vous a pleu auoir de moy;
memes en vn subiet si noble, m'ayant voulu
faire part des lettres de monsieur de Guise, que
ie vous puis dire dignes d'estre enchasseés aux
archifs de la Republique de Sparte. Je n'ay
iamais rien leu de plus genereux, plus mouë-
leux, plus sententieux, en peu de paroles;
brief, plus digne d'un monsieur de Guise. L'ad-
mire son iugement; ie louë le vostre, d'auoir
estimé qu'il falloit que cette lettre courut
par les mains des gens d'honneur. Et ce qui
me plaist encor grandement est, que les auez
accompaignees de celles de l'autre Seigneur
pour leur seruir de bel œil. Au demeurant,
combien que i'estime infiniment sa genero-
sité, telle que ie l'ay veuë pourtraite par
ses lettres; si ne fay-je pas moindre estat de
sa prudence, quand il n'a voulu admet-
tre pour compaignon de la reprise de Ro-
croy, celuy qui a grande peine de s'ex-
cuser. S'il en eust esté autrement, croyez

qu'il se fust fait vn grand tort : Et s'il luy aduient de reprendre la place dans le temps que m'escriuez, ie dirois volontiers qu'il auoit interest qu'elle fust surprise, pour l'exaltation de sa grandeur. A Dieu.

A Monsieur de Sainte Marthe.

S O V D A I N apres que la pa- ^{Quel in-}
cification faite auecque la Li- ^{gement il}
guea esté publiee, la Royne ^{fait sur la}
mere se promettant d'obtenir ^{pacification}
plusieurs belles choses du Roy ^{faite avec}
^{la Ligue.}

de Nauarre, pour establiir, comme elle disoit, vne paix generale par tout le Royaume, s'est transportee par deuers luy, auec vn grand appareil. La ville de Congnac a esté choisie pour leur entre-ueuë. Par plusieurs fois ils se sont abouchez ensemble : Et autant de fois ceste Princesse s'est trouuee trompee de son esperance. Toutes ses actions sont, ainsi que l'on dit, suspectes à ce Prince. Nous auons veu par 'escriit ses responses aux demandes qui luy estoient faites ; le ne sçay si vrayes ou non ; mais merueilleusement sages & bien couchees. Tant y a que la Roynes'en est reuenue tout ainsi qu'elle y estoit allee. Maintenant les affaires de nostre France sont reduites en tel estat, que le Roy, si i'ose le dire, commandé par la Ligue, se va mettre sur l'offensine, & le Roy de Nauarre sur la deffensine. Quant à moy, ie me fais accroire (Et vous prie ne trouuer mauuais ce que ie vous dy en confession) ou

que du tout il ne falloit faire la paix avec la Ligue ; ou la faissant, il falloit laisser les choses en tel estat, qu'elles estoient auparavant qu'elle prit les armes. A Dieu.

A Monsieur de Sainte Marthe.

*Grands pre-
paratifs du
Roy contre
les Hu-
guenots
tournez à
n'ant; avec
une descri-
ption des
miseres du
temps.*



Il ne faut plus parler de paix avec les Huguenots, qui ne veut estre déclaré crimineux de leze maiesté diuine & humaine. C'est le lieu commun de nos Predicateurs en leurs Chaires. On iouë maintenāt à pis faire. Mais voyez ie vous prie, comme Dieu se mocque de nous. Le Roy auoit fait ceste année en vn mesme tēps six armées, pour terrasser inopinément tout d'un coup toute la puissance Huguenote. Mōsieur de Guise commandoit en l'une, sur les frontieres de Champagne pour fermer le passage au secours étranger ; Monsieur de Mayenne à vne autre, en la guyenne, qu'il deuoit ioindre à celle du Marechal de Matignon ; Le Marechal de Biron en Poitou ; le Sieur de Ioyeuse en Auvergne ; le Sieur de la Valette en Daulphiné. Il n'y auoit sage-mondain qui ne iugeast, que les Huguenots de ceste façon inuestis à l'impouruea, seroyent desconfitz sans esperance de ressource. Toutesfois nous n'en auons rapporté autre fruit, que la prise de quelques Bicoques, lesquelles auparavant à peine cognoissions nous de leurs Nōs : & maintenant ne se rendent recommandables, que par leurs ruines. Ceux qui aujourd'huy conduisent le party Huguenot, ont pris tout autre con-

seil, que le feu Admiral de Chastillon; lequel pendant nos premiers & seconds troubles estoit enuisonné d'armées sur les champs, pour iouër à quitte ou à double; & en deliberation de hazarder la decision de sa querelle au peril d'une Iournée. Ceux-cy par vn nouuel aduis ont pensé, que pour ceste premiere demarche il leur estoit plus expediét de parer aux coups, & se tenir clos & couuerts dedans leurs villes, qu'ils sçauent fort bien fortifier. Ce faisant, sont autant de sieges; & par mesme moyé d'amusoirs. La guerre se conduisant de ceste façon, ie ne voy point que nous ayons si propre fin du Huguenot cōme la Ligue se promettoit. Pour le deffroy de toutes ces armées, outre ce que l'on a faict reuiure tous les États supprimez; Le Roy a voulu d'abondant rendre par nouuel Edict hereditaires tous les offices qui n'estoyent de iudicature. Et sans faire mention des autres Edicts, il a vendu par permission de Rome, cinquante mil escus de rente du temporel de l'Eglise. Medecines, que quelques vns n'estiment pas de moins dangereux effect, que la maladie qu'on veut guerir. Affin que ie ne vous ramentoie icy en passant, qu'é voulant guerroyer à outrance le huguenot, on a faict vne guerre plus forte aux pauures sujets du plat país. Car outre l'argent extraordinaire que l'on a tiré d'eux par police, ie vous laisse à penser quel inuétairé tous les soldats ont fait des biens de leurs hostes en passant país. Toutesfois chacun supportoit debonnairement ceste affliction du commencement, esperant que

elle seroit courte. Maintenant que l'on voit tout ce grand torrent & desbord de six armées s'estre tourné à neant, les sages en pensent ce qu'ils voyent ; & quelques-fois disent hardiment ce qu'ils en pensent. A Dieu, 1586.

A Monsieur de Sainte Marth.

LE Roy voyant que les six armées de l'an passé auoyent auancé fort peu ses affaires, les a voulu ces jours passez reduire en trois. En l'une desquelles il commande, & s'est campé au milieu de la Beauce, pour estre comme vn fort rampar pour empescher que les Estrangers ne peussent passer iusques au Roy de Nauarre; si tant estoit que Monsieur de Guise, qui commandoit à vne autre armée ne les pouuoit empescher d'entrer en la France. Monsieur de Loyeuse a eu la charge de la troisieme en la Guyenne, avec vne eslite de Noblesse.

*Monsieur
de Loyeuse
deffait à
Coutras a-
vec beau-
coup de
Noblesse.*

Comme le Roy estoit en son camp, nouuelles luy son arriuees qu'il auoit esté tué en vne bataille ragée pres de Coutras, avec trois ou quatre cens que Gentilshômes, que Capitaines de marque. De vous en raconter les particularitez, ie les laisse à vne autre plume; & vous diray seulement, que comme le peuple se donne loy de iuger des affaires par les cuenemens bons ou mauuais: aussi chacun diuersement en compte comme illuy plaist. Les vns imputent ce malheur à sa temerité; & que sur les appats de quelques heureux succez qu'il auoit euz, pensant estre maistre de la fortune, il auoit combatu l'en-

nemy contre l'aduis presque de tous les Capitaines, qui n'y voyoient les affaires en aucune façon disposées. Les autres, qu'il auoit commandement exprés du Roy de donner la bataille à quelque prix que ce fust, quand l'occasion s'y presenteroit. Quelques vns; que pensant estre disgracié de son maistre, il aimoit mieux lors mourir, que de suruiure à la disgrace. Et les derniers le rapportent à vn iuste iugement de Dieu, pour vâger toutes les indignitez que les siens auoyent faictes, en la reprise de S. Maixant. Car si ce que l'on dit est vray, (quant à moy, ie ne le veux croire, & vous, qui estes proche du lieu, le pouuez mieux sçauoir que moy) en reprenant ceste ville, tous les soldats Huguenots ausquels on deuoit faire la guerre, s'en allerent leurs bagues sauues: Et tout le peuple innocent de la ville, ores qu'il fust Catholic, passa de toutes façons par la misericorde du soldat indiscret. On adioust qu'en capitulât à la Mote S. Eloy, lors de la capitulatiõ, les siens ayãs pris d'éblée la ville, firent passer au fil de l'espée tout le Regiment de Charbonniere, sans en receuoir vn seul à mercy. Aussi dit-on, qu'en ceste bataille de Coutras, les Huguenots tuans les nostres adioustoiët ceste parole; *Souuienne vous de la Mote S. Eloy.* Aucuns disent qu'il fut tué en la meüe: les autres de sang froid, apres qu'il eust esté reconnu. Si ceste derniere leçon est vraye, c'est vne reuange de la mort du Prince de Condé, lequel s'estant rédu au Sieur d'Argence en la rencõtre de Chasteau-neuf, le Sieur de Montescut fut depuis commandé de le tuer de sang froid.

Les habitants de S. Maixant traittez à outrance à sa prise, & les soldats enuoyez.

A la Mote S. Eloy.

Mort de Monsieur de Joyeuse.

M. d'Esper-
non fait
Admiral &
Gouver-
neur de
Normandie.

Les nouuelles de ceste mort & route arriuees, le Roy en a fait vn grand dueil; mesmes n'a pas voulu ouir les Gentilshommes qui luy estoyēt enuoyez de la part du Roy de Nauarre, pour receuoir les excuses de ce qui s'estoit passé. Et apres auoir repris ses esprits, il a fait present à Monsieur d'Espèrnon de toute la despoüille du defunct. Je veux dire de l'Admirauté & Gouuernement de Normandie. Ceux qui se dispensent de controoller les actions des grâds, disent qu'en ce faisant sans coup ferir il a perdu plus de Gentils-hommes, qu'il n'auoit fait en la bataille de Coutras. Car en recompensant vn seul Seigneur, au milieu de tât d'autres, qui exposoyent leurs vies pour son seruice, c'estoit perdre autant de cœurs & deuotions. Les Dames pleurent aujourd'huy ceste mort, comme de celuy qui n'estoit mal-voulu d'elles. Les plumes sont muettes, nul ne s'osant hazarder de solemniser vne cheute si grande, que l'on impute à temerité. En fin monsieur du Peron a fait quelques couplets & Stances sur sa mort: & moy, qui auois eu cest honneur par cōmandement du Roy de le presenter au Parlement en deux actes tres-solemnels; l'vn quand il fut fait Pair de Frâce & Duc de Joyeuse; l'autre, pour prester le serment d'Admiral; ie luy ay donné cest Epitaphe, que ie vous enuoye.

Jeune ie reluisois comme le clair Soleil,

Beau de corps, doux d'esprit, illustre de mon e-
stre;

Agreeable à chacun, mais sur tous à mon Mai-
stre,

Epitaphe de
Monsieur
de Joyeuse.

*Marié par ses mains d'un superbe apparell.
 L'Anuergnac estima que i'estois sans pareil,
 Vaillant, prompt à la main; mais las! i'ay fait
 paroistre
 Par mon object, que nul dire ne se peut estre
 Heureux, qu'il ne soit mort, & clos sous le cer-
 cueil.
 J'ay mille & mille fois d'un cœur franc & sans
 doute,
 Par tout où ie passay, mis l'ennemy en route;
 Puis ay senty de Mars le mal-heureux effort.
 Mais pourquoy mal-heureux? moy, qui n'eus onc
 enuie
 Que de payer mon Roy qui me donna la vie,
 Que pouuois ie de moins, que luy voïer ma
 mort?*

A Monsieur de Sainte Marthe.

A Peine auïds nous esté asseurez de la mort *Sur l'arri-
uee des
Reistres, &
leur deffai-
cte.*
 de monsieur de Joyeuse, que nous fus-
 mes saluez coup sur coup de deux nouuelles
 grandement aduantageuses. Les Reistres Hu-
 guenots voulans ioindre le Roy de Nauarre
 ont esté suiuis en queüe par monsieur de Gui-
 se, lequel bié qu'il n'eust tant de forces qu'eux,
 s'iles a-il exercez de iour à autre par vne infini-
 té d'algarades. Le Roy d'un autre costé aduer-
 ty de leur venuë, s'estoit campé le long de la ri-
 uiere de Loire, pour leur barrer le passage. Les
 Reistres n'ayans aucune retraite, sinon de la câ-
 pagne, monsieur de Guise estant à Montargis,
 est aduertty par le Sieur du Cluseau, qu'une

*Charge de
Ville-Mo-
ry.*

bonne partie d'entr'eux logée à Ville-Mory, faisoit tres-mauuaise garde; & qu'il les auoit recognus estans sur le point de souper; au moyé dequoy seroit bon de leur aller porter le desert. Ceste affaire mise en deliberation, il fut resolu d'y aller, & la charge principale donnée aux Capitaines du Cluseau & de S. Paul, deux maistres de camp principaux. L'entreprise est conduite si à propos, que les ennemis sont surpris pendant leur souper. L'on vient aux mains, grand carnage d'eux : toutesfois ils commencerent à se rallier, & firent vn gros. Lors le raiz de la nuict commence de nous surprendre; de maniere qu'il estoit fort malaisé de se recognoistre, sinon par le mot du guet. Voicy sept cens hommes des leurs, qui commencent de descocher, brauement soustenus par les nostres. Et à vray dire, en ce faict cy on ne peut assez louer & la sagesse de Monsieur de Guise, & la vaillance de monsieur de Mayenne. Car il fut aduisé entr'eux deux, pour ne hazarder d'vn coup toutes choses, que monsieur de Guise avec sa compagnie feroit alte, pour en vn besoing donner sur l'ennemy, quand il le verroit en desordre; & que cependant monsieur de Mayenne donneroit dedans. Lequel, comme vn Lyon, s'engage avec soixante cuiraces au milieu de la meilée, de telle furie que les autres estonnez, ne sçachans pour l'obscurité de la nuict, quelle estoit sa suite, se retirent au petit pas, nous demeurant le bourg en proye, & vne bonne partie du bagage; n'ayans perdu des nostres

quele Sieur de Liffenois, Gentilhomme de grande esperance. Mais la perte des autres a esté inestimable. Huiet ou neuf iours apres monsieur de Chastillon, qui conduit les Reistres, voulant faire vne entreprise sur le Chasteau de Montargis, pensant y auoir quelque intelligence; monsieur de Guise de ce aduert y commet le Sieur du Cluseau. *Entreprise de Montargis double.* Je ne vous discourray par le menu toute l'histoire. Suffise vous que la partie a esté conduite de telle façon, par vne foudcade qui y a esté faicte, que les ennemis pensans y entrer à petit bruiet, ont esté presque tous fricassez; & peu s'en est failly, que le Sieur de Chastillon n'y ait eue part; toutesfois comme Capitaine tres-sage, ayant quelque opinion que l'ouuerture des portes du Chasteau n'estoit qu'un piege, il s'en est sagement garenty.

Ce que ie vous ay cy-dessus racompté est beaucoup, mais bien peu si n'entendez le demeurant. Les Reistres se faisans voye au beau milieu de la Beauce, apres auoir pillé Chasteau-Landon, ont faict leur logis à Aulneau. Estans en ce bon paillé, non toutesfois maistres du Chasteau, & y faisans bonne chere l'espace de huiet iours à l'Allemande; monsieur de Guise qui ne dort pas, se resout de les surprendre à la Diane dans leurs lits, par le moyen du Capitaine du chasteau, qui luy ouure la nuit les portes. A la poincte du iour il leur donne au *Deffaitte d'Aulneau* saut du lit, non vne chemise blanche,

mais rouge. Il y a eu douze ou quinze cens hommes tuez; & quatre-vingts chariots prins: La ville iôchee de morts, leur Colonnell lauué de vifteffe, & dix Cornettes renduës. Iamais nous n'eufmes meillieur succez, auquel on ne peut defnier, que monfieur de Guife n'ait apporté tout ce que l'on peut de diligéce, prouefse & vaillance. Et ce qui me semble digne d'estre remarqué, est, que cela soit aduenü à Aulneau, appartenant au Sieur du Bouchage, pour vanger en peu de temps la mort du Sieur de Ioyeuſe son frere. Le Baron de l'Aulnoy General des Reiftres, pour excuſer la perte qu'il auoit faite à Ville-mory au raiz de la nuit, appelloit auparauant monfieur de Guife, le Prince des Tenebres; Mais en ce qui fut executé à Aulneau, il trouua que ce Seigneur ſçait dextrement faire ſon profit du iour, auſſi bien que de la nuit, ſelon que les occasions le conſeillent. Mais voyez encores, ie vous prie, quel fruit cela nous a apporté. Il y auoit environ vn mois que monfieur de neuers negotioit par menées ſourdes avec les Suiſſes leur retour en leur païs: choſe qu'il ne pouuoit obtenir, quelque promeſſe d'argent qu'il leur fait. Soudain que ceſte deffaite eſt aduenüe, ils ſe ſont prezentez au Roy avec ſupplication tres-humble de leur bailler ſeurté de leurs perſonnes par les chemins: requeſte qui leur a eſté fort liberalement accordée. Quant aux Reiftres, voyãs comme ils auoyent eſté careſſez à Aulneau, & le peu de ſecours qu'ils pouuoient eſperer du huguenot; l'armee duquel s'eſtoit d'elle-meſme rompuë,

rompue, pour conseruer son butin de la def-
 faite de Coutras: ioint que la Loire estoit vn
 grand fossé bien deffendu par le Roy, quiles
 empeschoit de passer plus outre. Mettât tou-
 tes ces considerations deuant leurs yeux, ils
 ont pensé de trousser bagage, & fait en vne *Retraite*
 nuict vne caualcade de neuf grandes lieues, *des Reistres*
 bruslans tout ce qui leur restoit de chariots, &
 fait monter en croupe leurs Lansquenets. Le
 Roy a enuoyé monsieur d'Espernon apres
 eux, pour leur donner à dos. Quoy plus? Les
 affaires se sont de telle façon passées, qu'eux
 qui estoient venus de propos deliberé pour
 foudroyer la France, se sont estimez tres-heu-
 reux qu'on leur ait permis de s'en retourner
 sains & sauues. Iamais victoire ne fut si heu-
 reuse que cette-cy: d'autant que cessans tou-
 tes autres particularitez, il semble que Dieu
 ait permis que monsieur de Guise eust malme-
 né de cette façon ces Estrangers depuis la
 frontiere iusques au cœur de la France, pour
 les contraindre de venir rendre les abois aux
 pieds du Roy, afin que la victoire en fust plus
 noble. En l'accord fait par le Seigneur d'Es-
 pernon, monsieur de Bouillon & autres Sei-
 gneurs de la France, qui estoient de la partie, y
 ont esté compris, & à eux donné passeport
 pour reprendre avecques seurté les brizees de
 leurs maisons. Le Seigneur de Chastillon seul,
 par vne magnanimité admirable, n'est voulu
 entrer en cette capitulation; & avec
 vne poignée de gens s'est hazardé d'aller re-
 trouuer le Roy de Nauarre, faisant teste à eux.

quiles ont voulu empeschier. C'est luy qui au parauant auoit aussi trauerſé toute la France, pour receuoir les Reistres, lesquels auant sa venue temporizoient sur la frontiere; mais depuis qu'il les eust ioints, ils se firent voye, quelque empeschement qu'on leur feit. Et à vray dire, si ſuiuant ſon conſeil ils euſſent pris leur chemin tel qu'il leur enſeignoit, nos affaires ne nous euſſent reüſſi comme elles ont fait.

*Accueil
fait au
Roy arri-
uant à
Paris.*

Les choses s'estant paffees de ceste façon, à nostre tres-grand honneur & aduantage, le Roy est reuenu dans Paris la ſurueille de Noel dernier paffé, recueilly de tout le peuple avec vne infinité d'allegreffes, criant chacun par les ruës où il paſſoit, les vns *Vive le Roy*; les autres, *Noel*: Il est allé deſcendre tout botté & eſperonné en l'Egliſe noſtre Dame, pour rendre graces à Dieu; aſſiſté de tous les ordres de Paris, où l'on a chanté vn *Te Deum*. Et le lendemain la Cour de Parlement, Chambre des Comptes, grand Conſeil, Cour des Generaux des Aides, Threſoriers generaux de France, Lieutenant Ciuil & Siege Preſidial, Preuoſt des Marchands & Eſcheuins de la Ville, tous à l'enuy, & en forme de proceſſion luy ont eſté baiſer les mains. Iamais Roy ne fuſt tant chery, bienueigné, & ſi fauorablement accueilly des ſiens, & n'eũt tant de ſubieſt de contentement que luy. Quelques iours apres, pour monſtrer combien il honnoroit la memoire de monſieur de Ioyeuſe, il luy a fait faire des Obſeques de meſme parade & magnificence,

*Obſeques de
Monſieur
de Ioyeuſe.*

telle qu'à feu monsieur le Duc. Et qui est chose qu'il ne faut oublier, le iour mesmes que la harangue funebre a esté faite en l'Eglise des Augustins, nouuelles luy sont venuës de la mort de monsieur le Prince de Condé. Qui est paraenture vn accomplissement de souhait: Parce qu'on luy imputoit en commun propos, la mort du Seigneur de Ioyeuse. A Dieu.

*A Monsieur d'Espeffe, Conseiller d'Estat & Ad-
uocat General du Roy en sa Cour de Parlement
de Paris.*

E pensois faire œuvre meritoire, & gaigner, si ainsi voulez que ie le die, vne Ame à Dieu, vous enuoyant quelques Meditations spirituelles, quel vn de vos amis & des miens auoit faites; mais à ce que ie voy c'est en vain: Car non seulement ne les auez goustees, mais au contraire vous en mocquez, iettant l'œil seulement sur l'Ouurier, non sur l'œuvre. Est-ce icy Saül fils de Cis (disoient les Israélites) qui gardoit n'aguères les Asnes; & maintenāt prophetize avec les Prophetes? Est-ce icy le fils de Ioseph charpentier qui nous presche, disoient les Iuifs? Tout de ceste mesme façon tournez-vous en mocquerie, quel Auteurs de ces Meditations, qu'aez autrefois ven ieu-ne & desbauché, tourne au iourd'huy son esprit à ces saintes & deuotes cogitations. O pauvre homme mal conseillé! estes-vous encor à sçauoir quel Esprit de Dieu souffle où il veut? Que par vne estrange metamorphose il

*Il le repré-
de ce qu'il
n'auoit dai-
gné lire cer-
taines Me-
ditations à
cause de
l'Auteur.*

fait son vaisseau d'election de celuy qui auoit
 esté en la Iudee l'un des plus grands persecu-
 teurs de nostre Religion? Qu'il bastist son E-
 glise sur celuy qui le desaduouia par trois fois
 au milieu des Iuifs? Et à peu dire, qu'il mani-
 festa le sainct & paradoxe mystere de sa Resur-
 rection à celle qui auoit esté autrefois l'une
 des plus grandes pecheresses de Hierusalem?
 Qui eust iamais estimé en sens commun, qu'une
 douzaine de piedeschaux eust peu seruir de
 trompette par tout ce grand Vniuers, pour y
 esandre la semence de nostre Religion Chre-
 stienne? Dieu exerce sa toute-puissance où il
 luy plaist: Il fait marcher droit celuy qui e-
 stoit perclus de tous ses membres, donne la
 veuë aux aueugles, fait parler inespérément
 les muets. Quoy? ne meit il en plus forts ter-
 mes la parole en la bouche d'un asne, pour
 destourner Balaam son maistre du chemin où
 ils s'alloit perdre? Balaam, dy-ie, qui par ses pro-
 pheties disoit aux autres ce qui leur deuoit ad-
 uenir; & en son fait ne voyoit son malheur
 present, s'il n'en eust esté destourné par l'orga-
 ne d'une beste que nous estimons la plus gros-
 siere de toutes les autres? Dieu par un
 merueilleux eschange choisit quelquefois
 pour son truchement celuy qui auparauant
 estoit homme tres-vicieux. Vous n'eussiez pas
 aisément pensé que ce grand sainct Cyprian,
 qu'en la fleur de son aage, nourry en la loy
 Payenne, exercoit la magie (si nous croyons à
 quelques vns) pour iouir d'une sage Dame,
 dont il estoit seruiteur, se fust conuertie à no-

*Balaam
 predisant
 aux autres
 leur fortune
 ne ne voy-
 oit pas la
 sienne.*

*S Cyprian
 premiere-
 ment Paye-
 n & Magi-
 cien.*

stre foy; Ny qu'un saint Augustin, entaché
 ense ieunesse de l'heresie Pelagienne, se fust
 facilement reduit au giron de l'Eglise? Ceneât-
 moins & l'un & l'autre le feirent, celuy là par
 les prieres & oraisons de cette vertueuse Da-
 me qu'il vouloit corrompre; Cettuy-cy par
 celles de sa mere. Et feurent tous deux des plus
 grands Euesques & premiers Docteurs de no-
 stre Eglise. Ostez donc de vostre esprit ces vai-
 nes recherches de nos actions du passé; & con-
 siderez si ce qui est auourd'huy de nostre fa-
 çon se peut tourner à la gloire & exaltation
 du nom de Dieu. Je sçay vrayement, que les
 premiers traits de la persuasion sont plus fon-
 dez sur le bien faire, que sur le bien dire; Et
 que nostre Seigneur commença premieremēt
 par les bonnes œuvres, puis s'achemina au pres-
 cher. Mais, si ceux qui nous enseignent ne
 peuuent atteindre à cette perfection, pour le
 moins sommes nous commandez de faire ce
 qu'ils disent & non ce qu'ils font. Je vous es-
 cry cecy par expres, afin qu'en vous exhor-
 tant ie me sois un esperon à moy mesmes,
 pour apprendre de tenir en bride mes opi-
 nions mondaines; de matter, mastiner, mace-
 rer cette maudite chair, ennemie professe de
 l'esprit, faire littiere de tous ces terrestres hon-
 neurs, mettre sous pieds cette fade apprehen-
 sion des biens, bannir ces flateuses & trompe-
 resses passions, assassins de nostre raison. Brief,
 den'auoir autre passion en moy, que la me-
 moire de la passion de nostre Sauueur Iesus-
 Christ, sur laquelle est assis tout nostre Salut.

*Et S. Au-
 gustin Pe-
 lagien.*

*Faits
 grands E-
 uesques &
 Docteurs*

C'est le but auquel ie desire descocher toutes mespenſees; Celuy auquel decochez toutes les vostres, m'aſſeurant que quand il vous plaira digerer à longs traits ce que ie vous ay enuoyé, vous trouuerez de quoy vous contéter grandement. A Dieu. 1587.

A Monsieur d'Espeſſe.

*Il deſcrit la
vie & les
cruautez de
Basilides
Roy des
Moscouites.*



Amais liure ne m'apporta tant de torture, que celuy que m'auiez preſté, contenant la vie de Basilides, Roy des Moscouites dernier mort. Ie ne penſe point que nature ait oncques produit vn tel monſtre en cruauté. Vns Caligule, Nerô, Domitian, Cômode, Caracalle, n'eſtoient que morquettes en ce ſuject, au regard de luy. Car de quelque coſté que ie tourne ma veüe ſur ſes deportemens, ce n'eſtoient que feus, cendres, meurdres, ſaccagemens, maſſacres, ruines, & pis encores, ſi pis vous pouuez trouuer. Et neantmoins tout cecy neluy eſtoit que paſſetems. Ie le vous reſenteray volontiers en brief, côme ſur vn tableau racburcy. N'attendez d'oc de moy ſur le commencement & milieu de la preſente que carnages & boucheries. Mais ie vous prie de ſuſpendre voſtre iugement iuſques à la fin.

*Cinq cens
filles viols
lees avec
leurs meres
à la priſe
d'Alcle.
rande.*

Basilides ne prit iamais ville (& en prit pluſieurs) qu'il ne fit paſſer tous les principaux habitans par le fil de l'eſpee, & les femmes & filles par la diſcretiõ du ſoldat. Ie vous en reciteray les exemples plus ſignalez. A la priſe de la ville d'Alclerande il fit violer cinq cens filles, & tou-

tes leurs meres, en presence les vnes des autres.

Qui estonna tellement la ville de Vendouise *Generouse*
prochaine, que toutes les femmes qui y estoient *resolution*
sachants qu'il vouloit assieger leur ville, pour *des femmes*
ne tomber en pareil desarroy, se mirēt dās leur *de Vendouise.*
Eglise; Et apres auoir fait leurs prieres à Dieu,
chandirēt plusieurs caques de poudre à Canō,
où le feu mis, elles furent toutes arses & l'Eglise
boule-versee. L'annee d'apres, qui fut 1578. il
auoit enuiron quatre cens prisonniers tres-illu-
stres, des pays par luy conquis, qu'il detenoit en
obscures prisons. Ce gentil Maistre, de cō-
passion & pitié faisant contenance de les vou-
loir r'enuoyer dans quelque temps en leurs
maisons, les fait venir pardeuers lōy, & leur
demāda si en leur ouurāt les prisons ils retour-
neroiēt volontiers en leurs pais. Ces pauvres
Seigneurs & Dames, ne pēsants que ce fust vn
piege pour les attraper, luy respōdēt qu'ils n'a-
uoient rien plus cher quē leur liberte; Toutes-
fois promettoiēt de ne desemparer la Mosco-
uie que tant qu'il luy plairoit; Ce tyrā tourne
cette respōse à iniure; Et dēs l'instāt les fit tous
assōmer sur vn pont, en la presence de luy & *Cruauté*
de Ian & Theodore ses enfans. Et cōme ainsi *plus que*
fust que quelques dames plus magnanimes que *barbare en-*
les autres se plainquirent de cette executiō plus *uers des*
que brutale, il les fit attacher sur des clayes, *prisonniers.*
puis foietter, & en fin arracher les ongles des
pieds & des mains; ne pouuāt cette beste brute
rassasier ses yeux de les voir simplement passer
par les mains de son bourreau. Quelque seditiō
s'esmeut en son cāp; Il fit mourir tous les Chefs;

*Nomogar-
de traittee
avec d'e-
stranges
grauuez.*

Punition excusable. mais non content de cela, il fit tenailler vne infinité de soldats qui auoient esté de la partie. Il eut quelque soupçon d'une rebelliõ de la ville de Nomogarde. Il enuoy son grãd Preuost avec soldats, pour empescher les citoyens d'en sortir ; Puis il y entre avecquis son fils aîné ; Les exhortant que si quelques uns craignoient la mort, ils s'y resolussent par sa presence. Et apres leur auoir permis de prier Dieu, il les tua tous, tant hommes que femmes & petts enfans, sans pardonner mesmes aux bestes. Sept cens femmes avec leurs enfans feurent noyees ; Les chefs de famille pedus à leurs fenestres ; Les Senateurs occis en plein Senat ; Les Presbres dedans leurs Eglises. Iamais si piteuse tapissierie ne fut veüe dedans vne Eglise. L'Euesque cuidant trouuer quelque respit, cõue Basilides à disner. Il y va, mais comme il y estoit il fait tuer tous les Prestres & piller leurs Eglises ; Et à l'issue du disner mit à sac la maison de son festinât, le quel il feit promener par toute la ville sur vne meschante haridelle de cheual ; & au bout de cela l'expose au supplice. De compte fait on y tua deux mille sept cens septante hommes de marque sans le menu peuple. Entrant en Plescouie il fit semblant de vouloir reformer l'Estat, fait assembler le Senat, avec tout le peuple. en cette assemblée tous les Senateurs & les plus signalez citoyens furent mis à mort. Reuenue d'un long voyage en Moscouie, faisant contenance de vacquer vn iour de feste à vne processio generale, & de faire bâquets par les quarrefours au commun peuple, & dans son Palais,

*L'Euesque
mesme cõ-
ment indi-
gnemēt trai-
té apres le
festin.*

à ses Senateurs, nul ne s'y trouua, se doutans que ce fust vne embusche pour les emprisonner. En fin les ayant par douces paroles allechez, il fit occire tous les principaux officiers; puis son propre frere & ses coufins. entendez ie vous prie vn traict d'vne iustice, mais barbare, par luy exercee. Michel Viscoue, l'vn de ses premiers Conseillers est pris par Malut son grand Preuost, comme ayant voulu attenter contre l'Estat. Ainsi qu'il estoit au gibet, parlât au milieu du supplice fortement & hardiment contre ce Tigre, il s'y trouue vn Secretaire, lequel pensant luy faire plaisir, monte sur l'eschaffaut & coupe le membre & les genitoires à ce pauvre patient, dont il mourut; les apporte à son maistre, pensant que ce luy seroit chose agreable. A la verité ceste audace brutale meritoit vne punition exemplaire de mesme. Basilides ayant receu ce beau present, condamna son Secretaire, ou de le manger, ou d'estre exposé à pareil supplice que l'autre. Non (dict l'histoire) pour auoir de son autorité priuée mis la main sur vn hōme, qui auoit receu sa condénation, mais pour luy auoir acceleré sa mort. Ce miserable chasteux pour sauuer sa vie choisit de manger ces parties honteuses. Vers ce mesme temps, il condamne à mort deux cés Bourgeois de la ville de Moscovie, nonobstant les faictz iustificatifs par eux proposez. Et comme ils les voulussent deduire deuant le peuple, il faict battre tambours & sonner trompettes, affin qu'ils ne fussent ouys. Cent cinquante autres citoyens deliberans de se retirer en Polon-

*Iustice
barbare,
mais iuste.*

gne, de ce aduerty, il les faict mourir. Il tuë vn sien frere nommé George, sa femme & ses enfans : De tous ces mailâcres il rend graces à Dieu; & luy-mesme faict le seruice diuin, cōme le grand Pontife. En l'an 1577. fait couper la tette & les pieds à Pierre Cerebrin Rusien, & de tout cela, enueloppé dans vn drap, en faict present à sa femme; faict sortir plusieurs freres & cousins de prison, & prend plaisir deles voir combattre par son commandement, iusques à ce qu'il n'en demeura vn seul sur la place. Condemne à mort l'vn de ses Secretaires, pour auoir acheté vn beau mulet cherement, disant qu'il faisoit le Roy. Tetalonne, l'vn des premiers Conseillers de son Conseil priué, festoyant quelques siens amis; & neantmoins ne voulant faillir de se trouuer au dessert du disner du Roy, enuoye vn sien page pour sçauoir quand on vouldroit leuer les napes. Ce tyran ayant sçeu de ce ieune gars, pourquoy il estoit là venu, préd cela pour vne coniuration; & faict non seulement mettre à mort Tetalonne; mais aussi toute sa famille, commé s'ils eussent tous adheré à ceste imaginaire conjuration. Ocrin, l'vn de ses principaux fauoris est par luy exposé à la torture, puis à mort; par ce que luy ayant présenté vn plein verre de vin pour boire, il en auoit fait à deux fois. Trouuaistes vous iamais en l'histoi-

*Sa penitē-
ce, mais
qui se tour-
ne en
cruauté.*

re vn si prodigieuse punition, que ceste-cy? Aussi est-ce la verité, que le peuple en murmura, & que ce mal-heureux tyrā en voulut faire penitence; mais penitence qu'il conuertit en

cruauté. Pour expier ceste mort, & en faire oublier le scandale, il se reduisit en vne vie solitaire avec ses deux enfans & quelques Princes de sa Cour. Pendant ce vœu il enuoye quelques Seigneurs tous nuds à Moscouie, pour aduertir le peuple, que puis qu'il desiroit vn nouveau Roy, il quittoit volontairement sa Couronne. Sur cest Ambassade le peuple le voulut reblandir; on depesche par deuers luy quelques personages d'honneur, pour le supplier de retourner. Ce qu'il faict, mais soudain apres son retour, il augmente ses Gardes de deux mille bons harquebusiers; & d'une mesme main fait occire tous ceux qu'il pensoit auoir mesdit de luy, pendant son absence; fait prendre prisonnier le Duc de Rostovie au milieu de l'Eglise, luy faict mettre les fers aux jambes; & quelques iours apres l'enuoye au gibet; faict mourir Iean Petrouire. Palatin de Russie, comme crimineux de leze Maiesté. Le reuest d'habits royaux; luy met le Sceptre en la main, la Couronne sur le chef; & apres l'auoir salué comme Roy, & s'estre moqué de luy, le faict tailler en pieces par tous ses soldats; ne pardonnant à aucune teste de sa maison, ny de tous ses parens, qu'il fit fricasser par poudre de Canon: sa femme enceinte tuée, & ses pauvres filles apres auoir esté violées eurent pareille fin que leur mere. Cassassin son Chancelier tiré à quatre cheuaux; & de son corps faictes quatre parts, Basilides loiant publiquement l'industrie de ses bourreaux, qui auoyent faict vn si beau

*Le Pala-
tin de Rus-
sie comme
moqué &
mis à mor*

chef-d'œuvre. Ophanazze estoit celuy de ses Secretaires, auquel il commettoit ses plus deuotes pensées. Il entre en quelque soupçon de luy; & sur ceste deffiance le fait foïetter par les carrefours, puis luy rompre bras & jambes; & en apres pendre & estrâgler; & tout d'une suite mettre à mort tous ses parens; car c'estoit le refrain ordinaire de ses cruautéz. Grâde pitié, que pour vanger la faute qui n'estoit fondée que sur vne imagination, il estendist la vengeance sur vne infinité de pauures gens innocens. Sur vne opinion qu'il auoit que plusieurs honnestes Damoiselles auoyent mal parlé de luy, il les faict pendre dans la sale; mais pour se baigner plus en sa cruauté, il conuie à dîner leurs maris, afin qu'en repaissant leurs corps, ils repeussent aussi leurs yeux de cét impiteux spectacle. Son commun passetemps estoit, allât par les champs, de faire despoüiller toutes nuës les femmes qu'il trouuoit, & les enuveloper dans la neige, iusques à ce que luy & ses troupes fussent passées. Il auoit d'ordinaire quatre Ours, qu'il laschoit au milieu du peuple, le moquant de ceux qui estoient blesez. Brief, la plus grande remarque de clemence qui fust en luy, c'estoit qu'un homme luy desplaissant, qu'il ne vouloit faire mourir le gouuernant, il luy perçoit l'un de ses pieds avec un espieu aigu, qu'il portoit au lieu de son Sceptre; & l'ayant attaché à la terre, le laissoit là en ce point, & s'en mocquoit. Ne pensez pas cependant, qu'au milieu de ces monstrueuses cruautéz, il n'ait faict vne infinité de conquestes en Allemagne, Po-

longne, Gotthie, Liuonie, Turquie, Tartarie : & qu'il n'ait grandement aduancé les lizieres de son pays. Voire fut si heureux, que souz la conduite d'un sien Capitaine nommé Sorebrû, luy absent, il desconfit Selin Empereur de Constantinople en plain champ de bataille, ayant vne armée de trois cens mille hommes. I'ay leu tout cecy aux deux premiers liures ; & croyez que ce n'a pas esté sans vne extreme impatience. Ie me renfrongnoy le front, sourcillois des yeux, grinçois les dents, petillois des pieds, lisant tant d'heureux succez aduenus au plus mal-heureux homme de la terre ; à celuy, dy-je, auquel outres les prodigieuses cruautéz, ie ne trouuois que perfidie. Qui contre les Ambassadeurs à luy enuoyez violoit tout droit des Gens ; qui ne pardonnoit aux Princes estrangers, lesquels en leurs calamitez s'estoyent mis souz sa protection ; qui n'auoit ny Foy ny Loy, que celle où sa brutalité l'emportoit. Commét, disoy-ie, que Dieu ait permis que ce monstre denaturé ait tant prospéré, sans auoir receu quelque atteinte ? Ie me dispoisois, si ie pose dire, de faire le procez au Ciel ; toutesfois en peu d'heure ie me reconciliay avec luy, ou pour mieux dire avec moy. I'arriue au troisieme Liure, où ie trouue vne mutation generale de sa fortune. Vn Estienne nouveau Roy de Pologne, reprendre sur luy, à petit bruiet, tout le pais de Liuonie, par luy conquis, le combattre en pleine campagne, le mettre en fuite, & le reduire en toute extremité de desespoir : & en fin Dieu luy auengle tellemét les yeux, que

*Basilides
tue son fils
aîné.*

*Sa fin mi-
serable.*

par vne cholere forcenee, pour vn ie nesçay quel soupçon de coniuration il tuë d'un coup de baston Iean son fils aîné, seul support de sa vieillesse ; ie veux dire celuy qu'il eust delaislé successeur de ses cruautéz , tout ainsi que de son Royaume. Dés l'heure mesmes reuenant à soy , il fut combatu par les furies pour ce parricide , & tousiours depuis alla en empirant ; iusques à ce que frapé tout à faict de la main de Dieu , il commença d'estre affligé des poux , vermine & putrefaction vers les parties honteuses ; mal qui le rongea petit à petit iusques aux os , l'espace de dix & huit mois , sentant des douleurs insupportables , tant au corps, qu'en l'esprit , sans y pouuoir donner ordre. De mourir d'un coup de balle , ou de dague , ce ne luy eust esté que jeu ; mais Dieu pour monstrier sa toute iustice , apres auoir terrassé sa fortune , voulut que ce malheureux acheuast ses cruautéz en son propre sang, en son fils, en celuy qui le representoit d'esprit & de mœurs : & tout d'une suite ayant faict mourir vne infinité de personnes, voulut aussi que il mourust d'une infinité de morts iour & nuict , l'espace d'un an & demy. Adonques reprenant mes esprits, Voicy , dy-je , vn autre Herode, meurdrier d'un peuple innocent , qui nous est refiguré par vne mort miraculeuse. He ! vrayement ie recognois à veuë d'œil les merueilleux effects de Dieu , qui ne laisse iamais les meschancetez impunies. Les anciens Ethniques disoyent , que

les Dieux auoyent les pieds de laine , & les bras de fer ; voulans dire qu'ils procedoyent tard aux vengeancees : mais les executants , c'estoit avec vne extreme rigueur. Je vous renuoye vostre Liure , & vous remercie. A Dieu, 1587.





L E

D O V Z I E S M E

LIVRE DES LETTRES

D'ESTIENNE PASQUIER.

*A Monsieur d'Espesse, Conseiller d'Estat, &
 Advocat general du Roy, en la Cour du
 Parlement de Paris.*

*Ceste let-
 tre fut es-
 crite avant
 les trou-
 bles par
 Pasquier*

*à Monsieur
 d'Espesse,
 Advocat
 general du
 Roy au
 Parlemēt,
 & depuis
 President
 en la grand
 Chambre.*

*Discours
 du plai-
 doyé que
 fit Pasquier*



Ais ie, vous prie, dites moy d'où vous vient ceste nouvelle deuotion, de vouloir que ie vous escriue le motif, progrès & succez de la cause que ie plaiday pour Arconuille contre Bobie en l'an 1571. Si estiez fémme, ie dirois que ce sont appetits de femmes grosses. Comment? dix ans apres me remettre lus la memoire de ceste querelle. Quand vne cause a esté par moy plaidee, & depuis iugee par Arrest, ie suis tres-content en me deschargeant du sac & des pieces, de descharger par mesme moyen ma memoire de toutes les particularitez qui s'y sont passées. Bien vous diray-ic, que ceste-cy estant l'une des plus grandes que i'aye plaidé, pour l'enormité du delict qui se presentoit, dōt iamais on ne veit le semblable, & les parties ayant esté apointees au Conseil.

Car

i'ay toujours depuis gardé le plaidoyé qu'il me fallut faire, dont ie ne seray marry de vous faire part, puis qu'ainsi le desirez. Mais avant que de ce faire, ie vous reciteray vne particularité notable qui m'aduint, laquelle mérite d'estre par vous sçeuë.

Arconuille, sa femme & toute sa famille ayās esté detenus prisonniers six semaines entieres en prisons fort estroites, en fin les prisons ouuertes à sa femme, & à ses seruiteurs, & luy mis en la garde du Commissaire Grenouveau; me vint trouuer accôpagné de son hoste: & m'ayāt fait recit de son innocence ie le consideray au vilage, & sondai au vif de toutes façons, comme si i'eusse esté son iuge: & ne trouuant rien en luy, que l'assurance d'un homme innocent, ie feus d'aduins qu'il deuoit appeller du decret de prise de corps, ignominieux emprisonnement & longue detention tant de luy que de sa femme & ses seruiteurs & seruantes, & de tout ce qui s'en estoit ensuiuy. Cette cause despendoit des coniectures, (car pour bien dire il n'y auoit nulle charge testimoniale contre luy:) & les coniectures, des esprits de ceux qui deuoient plaider. I'estois pour Arconuille & sa femme, monsieur Brisson pour Bobie: Mais toute l'assistance generalement contre moy. Car ayant esté Arconuille amené prisonnier dans Paris lié & garroté sur vn petit bidet, par Tanchou Lieutenant Criminel de robe courte, & ses archers, comme s'il eust esté ià atteint & conuaincu du crime; & quelques iours apres sa femme, serui-

*pour iein
Blosser Sei-
gneur d'Ar
conuille,
accusé d'un
assassinat le
plus enor-
me qui fust
onques:
Dont il fut
depuis ab-
sous par ar-
rest de la
cour de
Parlemēt.*

teurs, seruantes, & laboureurs, dedans des charrettes entourees d'archers; Il n'y eust aucun qui ne creust, qu'ils estoient complices du crime execrable commis en la maison de Bobie. Nous plaidames en la salle de S. Louys, où se plaident les causes criminelles. Iamais plus de peuple ne se trouua en cause, comme en cette-cy: Chacun y acouroit cōme au feu, pour l'inimitié publique qu'on auoit conceuë contre nous. Ie voulu que mon fils aisné lors ieune escolier y assistast ioignant moy pour l'exemple. Aux pieds de monsieur Brisson estoit Bobie, qui ne manquoit de larmes à ses yeux: Aux miens estoit le gentilhomme, & avec luy sa femme larmoyante, comme aussi deux petits enfans. Par mon premier Plaidoyé ie dy seulement; Que combien que ne fussions chargez de delict, toutesfois on auoit decreté prise de corps contre nous, ignominieusement executé, & detenu prisonniers l'espace de six semaines: dont nous auons appellé, & de tout ce qui s'en estoit ensuiuy: Appel auquel ie cōcluois &c. Monsieur Brisson pleind'entendement & doctrine, se meit sur pieds, comme celuy qui pensoit estre en beau champ pour moissonner; Car outre ce qu'il apportoit du sien dont il auoit prouision à largesse, la compassion qu'on prenoit de sa partie, & la creance commune dont le peuple estoit preuenue contre nous, luy estoient deux grands archoutants de sa cause. Apres qu'il eust mis fin à son plaidoyé: Cōme ie voulois repliquer, Mōsieur l'Aduocat de Tou, contre la commune vñan-

ce m'ost la parole de la bouche, tant il estoit luy mesme preoccupé, & Dieu sçait de quelle façon il le r'enuia sur monsieur Brisson. Tellement qu'il sembloit que le ciel & la terre eussent coniuré contre moy. Et neantmoins cene me fut pas vn petit aduentage que l'Advocat du Roy ne se feust donné la patience de m'ouïr.

Quand il eust paracheué, le peu qui restoit de l'heure tomboit en ma bouche, & fust le commencement de ma replique tel. Que lors que ie m'estois chargé de cette cause, i'y auois voulu obseruer toute autre forme, qu'en toutes les autres: desquelles ie me rendois capable par le sac & pièces qu'on m'apportoit: mais qu'en cette cy ie n'auois assuré l'assurance de mon plaidoyé, que sur la face, & contenance de ma partie. A cette parole s'excite vn bourdonnement infiny de toute l'assistance (estimant que ce fust vne hypocrisie d'Advocat) le quel estant finy, ie repris mes arrhemets, & dy. Que ie l'auois voulu considerer & sonder comme si i'eusse esté son iuge. Icy la parole m'est derechef enleuee par le peuple, & apres son raquoisement ie poursuiuis. Que si contre ma conscience i'entreprendois la destense contre le sang innocent des morts, ie craindrois qu'à l'aduenir Dieu nes'en vengeast sur moy & les miens: Troiesme recharge du peuple, tant il estoit preoccupé contre moy. Qui me fit monter la couleur au visage, & lors d'vne douç'aigre cholere, m'ayant donné quelque respit, esleuât ma voix; En vain (dy-ie) vien-

droy-ie pour vous persuader de la iustice de ma cause, si ie n'en estois le premier persuadé! Cette parole sortant de la bouche d'un homme qui se sentoit à tort malmené me moyenna vne audience plus calme. De sorte que comme ie commençois à me vouloir donner carrière l'heure sonne, & fut la cause remise au Samedi ensuiuant. C'estoit pendant le caresme, que l'Audience commença à huit heures, & finit à vnze.

Ie vous reciteray vne histoire que peut estre ne serez marry d'entendre. La cause estoit grande en soy, qui m'auoit cousté beaucoup de temps & d'esprit pour m'en aprestier : mais rien ne me fut si cher vendu que de sçauoir cōme ie pourrois derechef entrer en lice. De commencer par le simple narré du faict, il me sembloit que c'estoit faire tort à ma cause: de reprendre l'auant propos du Samedi precedent, la grace en eust esté perduë. D'en trouuer vn autre, ie pensois n'auoir l'esprit en main pour y paruenir : finalement tout ainsi que pour bien faire, il faut seulement bien vouloir, aussi remuant de toutes façons cette pierre, ie r'entray par vne plus belle demarche que n'auoit esté la premiere; ainsi que pourrez voir iettant l'œil sur mon Plaidoyé. Le bruit court par la ville de quelle façon Arconuille auoit esté mené; Plusieurs veulent auoir part au gasteau, qui ne s'y estoient trouuez: & de faict le Samedi ensuiuant la sale regorgea du peuple iusques bien loing hors la porte. Ie parfourny lors ma carrière l'espace de

deux heures & plus, avecques vne singuliere audience, & contentement general de toute la compagnie, qui commença des's'asseurer de l'innocence d'Arconuille. Tellement que ie me puis vanter auoir eu lors vn plus heureux succès que Cicéron pour Ligarius, quand voulant l'introduire deuant Iules Cesar; Laissez le venir (dit il) car aussi bien est-ce peine perduë pour luy, estant du tout resolu à la condamnation de Ligarius. Or neâtmoins ce grand Prince changea d'aduis, apres auoir ouy Cicéron: & obtint Ligarius gain de cause. En cela ce grand Orateur vainquit l'opinion d'un homme, & moy celle de neuf ou dix mille, qui tous s'en retournerent persuadez en la faueur d'Arconuille, & sortants n'en faisoient point la petite bouche. La cause ne fut iugée sur le champ, pour l'importance. Mais depuis les parties ayant escrit & produit d'une part & d'autre, le procès distribué à monsieur l'Archer le Jeune, Arconuille fut par Arrest enuoyé absous à pur & à plein: & Bobie condamné en tous ses despens, dommages intersts, que la Cour toutesfois liquida à trois, mille liures tournois pour vne fois payees, afin de n'embarasser les parties en nouveau procès. Des choses cy dessus deduites, vous auez entendu quel fut le cours du procès, entendez maintenant, s'il vous plaist: quel fut celuy de mon Plaidoyé.

*Force de
l'Eloquen-
ce de Cice-
ron enuers
Cesar.*

Plaidoyé pour Iean de Blosset Seigneur d'Arconuille & sa femme, Appellants du Preuost de Paris ou son Lieutenant criminel, de certain Decret de prise de corps; & de tout ce qui s'en est ensuiuy:

Contre Maistre Simon Bobie, Aduocat en la Cour de Parlement, & Bailly de Colommiers, Intimé.

*Entree
par com-
misération.*



Rande est la compassion qui s'est trouuee, de voir vne mere, vne nourrice, deux petits enfãs & vne châbrie-re, toutes personnes innocètes auoir esté cruellement assassinees; Non moins grâde est celle de mes parties, de voir vn mary, vne femme, mestayers, seruiteurs & seruantes, tous innocents, menez par cette ville de Paris ignominieusement prisonniers par chartees, & detenus diuersement aux cachots l'espace de six semaines: Leurs petits enfans laissez seuls en leur maison, à la mercy des pourceaux. En celle-là il y va de la mort: En cette-cy de la perte de l'honneur, dont la noblesse fait plus d'estat que de la vie. En celle-là ces pauures creatures occises sont aujour d'huy deuât la face de Dieu; En cette-cy les Appellants sont en la balance des hommes. Les autres apres leurs decés, viuent aux ioyes de Paradis: Et les Appellants uiuant meinent vne vie plus penible, que dix mille morts. Et qui m'afflige dauantage, c'est que par le tintamarre extraordinaire du peuple,

Samedy dernier ie cognu que chacun en cette cause estoit preuenü contre moy. En toutes choses nous sommes par les sage-môdains conseillez d'enuoyer vne bonne bouche de nous auantcoureuz de nos presences. Icy ie voy tout le cōtraire. Ce n'est pas que moy mesmes, qui me suis roidy en la defenle de ma cause, ie ne contribuë avecques le peuple à cette cōpassion, qui me fait aucunement r'alentir, & quitter ie ne sçay quoy de la force que i'apporte en mes autres causes, pour ne vouloir affliger vne personne affligee. Et me trouue infiniemēt empesché de quelque façon que ie me tourne. Excuseray-ie les Appellans? Ie ne voy nulles charges contr'eux; non pas mesmes vn accusateur particulier: Chacun saigne du nez; & Bobie n'a encores franchy le pas, quelque personnage que maistre Barnabé Brillon ait voulu iouer pour luy. Ne les excuseray-ie? Ie voy que l'on a fait artistement contr'eux vn faux bruit, qu'il faut necessairement effacer. D'ailleurs en les excusant, accuseray-ie le fait de Bobie? Ie voy vn pere, vn mary, vn maistre, affligé de la mort de ses enfans, de sa femme, & ses seruantes. Or à peu dire, si i'entre tant soit peu en cettelice, i'excite la clameur de toute cette audience contre moy. Toucheray-ie les particularitez, que ie voy estre en ma cause pour effacer cette opiniō? Qui est celuy qui ne sçait combien peut vne preoccupation, vraye maladie d'esprit à laquelle nous r'apportons toutes nos pensees? Tellement que tout ce que ie diray, sera retorqué contre moy. Et à bien dire au mil-

lieu de toutes ces perplexitez, si ie veux suiure la vraye voye de ma cause, ie n'ay autre chose à vous dire pour les Appellâts, sinon: Que nous sommes innocens, & appellons Dieu à tescmoin de nostre innocence.

*Fâds de la
Cause.*

Et neantmoins parcé que tout homme de bien & d'honneur a interest de n'estre non seulement entaché de coulpe, mais qui plus est, du seul soupçon, ie vous deduiray sommairement comme toutes choses se sont passées. Il y a vn Dieu, premier & dernier iuge de nos actions. Bobie sçait en son ame la verité du fait : Qu'il mette la main sur sa cōlsciée & recognoisse si ce que ie diray est veritable, ou non. Je veux qu'il soit non seulement ma partie, mais tescmoin & iuge de ce que ie discourray. En l'an 1537. Maistre Ferry du Moulin Aduocat en cette Cour fut conioint par mariage avecques Damoiselle Marguerite Maillard: Quelque peu auparauant, maistre Charles du Moulin son frere, ce grand Iuriconsulte François, auquel la France a tant d'obligations, luy auoit fait vne donation entre vifs de la terre & seigneurie de Mignaut en Beauce. Sous ce titre on baille à son frere vne Damoiselle en mariage, fille du Lieutenant criminel de Paris, sœur d'un Conseiller en Parlement, & niepce de madamoiselle du Boistailly, veufue de l'un des premiers Conseillers de la Cour, & mere du seigneur de Bel-esbat, auourd'hui genre de monsieur le Chancelier. Par le contract de mariage, auquel maistre Charles du Moulin feut present, on assigne douaire à la

fille de deux cens liures, rachetable de trois mille liures, s'il n'y auoit enfans: & où il y en auroit, il leur seroit propre. Le mariage consommé, maistre Charles du Moulin le marie, & ayât enfans obtient lettres Royaux pour faire casser la donation par luy faicte à son frere, fondées sur la Loy, *Si unquam*. Aux Requestes du Palais, il perd la cause: en la Cour de Parlement il la gaigne, mais avecques vne belle Jurisprudence, portant certaines modifications en faueur de la femme & des enfans de Ferry. L'on balança ceste cause entre deux freres: Que ce n'estoit la raison que la *benediction* d'un frere aîné fut suplâtée par son puîné: mais aussi qu'il ne falloit pas qu'une honneste Damoiselle issuë de bon lieu, qui souz le titre de ceste donation auoit espousé son mary, fut circonuenüe de ses conuentions matrimoniales. Parquoy par vne moyenne voye il fut arresté, que maistre Charles du Moulin rentrerait dans la terre de Mignaut, sans toutesfois preiudicier au douaire. Je ne fais aucune doute, affin que ie ne dissimule rien en ma cause, que cela fut de tres-fascheuse digestion, & au mary, & à la femme; et de faict ils plaiderent en l'execution de l'Arrest: iusques à ce qu'en l'an 1543. les deux freres transigerent. Depuis ce temps ils vesquirent en vne cōcorde fraternelle: voire que maistre Simon Bobie sçait, que quād il fut marié, Ferry oncle de sa femme, *nō solum intererat, verum etiam praeerat*. Vous auez dit que depuis cest Arrest, on ne laissa de l'appeller Seigneur de Mignaut. Il aduient ordinairement

qu'ayant pris en nostre ieunesse vne qualité, nous ne la perdons iamais, encore qu'ayons esté euincez de la terre & Seigneurie. C'est vne liberalité que le peuple exerce enuers nous, laquelle ne luy couste rien. Ferry du Moulin & Marguerite Maillard decedent delaislée la Damoiselle cy presente leur fille, en la puissance de la Damoiselle de Boitaillé sa tante. Laquelle on fit porter heritiere sous benefice d'Inuentaie de son pere, souz vne faulx persuasion que quelques vns eurent, que ceste qualité de benefice d'Inuentaie n'empescheroit qu'elle ne peut aussi aprehender le doüaire prefix. On luy cherche party sortable. Le seigneur d'Arconuille auoit esté ieune nourry en la maison de Monsieur le Chancelier, gentilhomme bien morigené, & riche de mille ou douze cens liures de rente pour le moins. Cela fut cause que la Damoiselle de Boitaillé tante, & le Sieur de Bel-esbat son fils gendre de Monsieur le Chancelier, la luy baille en mariage. Depuis ce temps il a tousiours mené vne vie sage & quoye, avecque toute reputation & honneur enuers ses voisins. Ceste Damoiselle estoit mineurè lors que elle aprehenda la succession de son pere. Sur les obscuritez du doüaire qu'on luy faisoit, Arconuille en communique avecque Maistre Claude Mangot, qui luy remonstra, que c'estoyent choses incompatibles d'aprehender la succession de son pere, & le doüaire, partant qu'il falloit obtenir lettres pour estre releué de ce que sa femme mineure auoit appre-

hendé la succession de son pere: & que la qualité d'heritier beneficiaire ne luy profitoit en rien, pour empescher l'effect de la Coustume de Paris. Suiuant ce conseil, lettres Royaux sont obtenues, en vertu desquelles Bobie & sa femme sont assignez pardeuant le Preuost de Paris ou son Lieutenant. Dés l'instant mesmes Arconuille le visite, le priant ne trouver mauuais ce qu'il en auoit fait, pour auoir esté conseillé de ce faire par l'un des premiers Aduocats du Palais. Et au surplus, qu'il estoit d'aduis de passer leur differend à l'amiable par l'arbitrage de quelques personnes d'honneur. Chose que Bobie trouua bonne, & sur cette opinion prindrent congé l'un de l'autre.

Le seigneur d'Arconuille a deux Seigneuries, l'une en Beauce, du nom d'Arconuille; l'autre en la Brie, du nom de la Chatre. Au mois d'Aoust dernier, il bailla Arconuille à ferme, & s'habituua en la Chatre, Vray que ne sçachant quelle part & portion son nouveau fermier luy voudroit faire des grains par luy recueillis: Et apres'estre asseuré, & donné ordre à son fait, à son retour il baise les mains à Monsieur le Chancelier en sa maison de Veigner, puis visite le seigneur de Bellesbat son gendre non loin de là, retourne en sa maison, rend compte à sa femme, comme bon mary, de tout ce qu'il auoit fait en son voyage. Voyla, Messieurs, en quel estat estoient les affaires de la maison des

appellans, lors que le massacre aduint dans Paris.

Au regard de Bobie intimé, il auoit vn valet Gascon, homme sans adueu, il estoit souuent en mauuais mesnagé avecque sa femme, iusques à en venir aux mains, au grand scandale des voisins: on auoit rachepté vne rente de quatre cés liures, qui appartenoit à sa femme, & estoient les quatre mille huit cens liures prouenus du rachapt en sa maison. Ce rachapt n'estoit point caché à ses domestiques, & ne sçay si cela sollicita l'esprit de ce Gascō, mais voicy le train qu'il commença de tramer. Ce que ie reciteray maintenant ie l'ay appris du commun bruit. Bobie sçait s'il est vray ou non. Le Gascō se leue quinze iours durant toutes les nuits, demeure à chaque coup long temps sur pieds, retournoit tout tremblant au liect. Quels estoient lors les motifs de son reueil, ce me sont lettres clausées. Tāt y a que le clerc en aduertit son maistre, qui n'en tint compte. Il prend vn Samedy matin en Ianuier dernier au Maistre enuie de s'acheminer à Colommiers, seiour de son Bailliage, & & trois fois il changea de propos: en fin il part, laissant son valet en sa maison avecques sa femme. Ce mesme iour pendant la nuit aduint ce detestable massacre. Diray-je quel? on assassina la mere, deux enfans, & vne seruante. Les voisins entendent quelque bruit, & mouuement en la maison de Poussémote Procureur en ceste Cour, lequel de bonne foy dit à ses gens, que c'estoit querelle de mary à femme, qui s'appaiseroit entr'eux deux, sans que nul

*Massacre
horrible.*

autres'en deust mesler. Le Dimanche & Lundy s'écoulent, la maison se trouuant fermée: le Mardy, le voisiné s'en remuë: au moyen dequoy vn Commissaire, par autorité du Lieutenant Criminel, se transporte sur les lieux, fait ouurir la maison, suiuy de plusieurs notables personnes; entrez qu'ils sont, trouuent ce pitteux spectacle, & apres auoir donné quelque temps à leur iuste douleur, procez verbal est dressé de tout ce qui se presentoit, des quatre corps trouuez morts, de quelques bagues iettées dans les priuez, avecques le manteau du Gascon, & quelques chandelles; que les buffets auoient esté forcez & ouuerts, & dedans y estoit la vaisselle d'argent, mais quant à l'or & argent monnoyé, nulle mention. Le Mercredy les parents maternels domiciliers de ceste ville comparent. Ce mesme iour vne femme des champs declare au Commissaire auoir veu le iour precedent le Gascon en la maison de Mignaut, dont il charge son procez verbal. Le mary vient vn iour apres, & au lieu de ietter ses yeux sur la recherche du Gascon, que l'on scauoit estre le meurtrier, luy donnant loisir de s'euanoïir, il ramentoit la vieille querelle de Mignaut, avecque les nouuelles lettres Royaux obtenuës par Arconuille & sa femme, & autres circonstances qui seront cy-apres touchées. Heurtez tant soit peu en ces cas execrables la renommée de quel qu'il soit, vous y trouuez assez de subiect pour foruoyer vostre opinion. La proposition generale des Iuges en telles matieres est de faillir, craignant de faillir;

disants que qui est bon à prendre est, pareillement bon à rendre. Decret de prise de corps est decerné; Tanchou Lieutenant Criminel de robe courte de Paris commis pour l'exécuter; Ce pendant la Damoiselle de Boitailé tante aduertit Arconville par lettres, du malheur qui estoit arriué, lequel aussi tost tire quatre cens liures de sa boüette, pour venir à Paris, se ioindre avecque Bobie, en deliberation d'en faire la poursuite encontre le delinquant. Estant arriué à la disnee au village de la Queuë en Brie, le clerc de Bobieluy dict le commandement qu'il auoit de son maistre; & à l'instant, Tanchou le charge sur vn bidet, & lié & garroté l'emmeine en ceste ville. Le peuple desirant sçauoir qui c'estoit; L'assommeur, disoyent ces Archers: & deslors mesme de pescha vne autre partie de ses Archers, qui s'en allerent à la Chatre, où ils se saisirent de la Damoiselle sa femme, & de tout son mefnage qu'ils amenerét par chartées en ceste ville, disant à ceux qui s'en esmouuoient, que c'estoit la femme de l'Assommeur. Le mary & la femme sont estroitement logez en diuerses prisons; affin que ils ne se fissent la bouche l'vn à l'autre, le demeurant mis dans les cachots. Et non contents de tenir les corps prisonniers, on faist leurs biens, tant meubles, qu'immeubles, pour nous retrancher tous moyens de viure, & de nous ayder. Comme de faict, auparauant Tanchou auoit prins nos quatre cens liures. Nous demandons qui estoit nostre partie ciuile: A ceste demande fourde aureille du Iuge: & quant à Bo-

bie, il se tient clos & couuert : & neantmoins hors la preséce du Iuge, il nous publioit les larmes aux yeux, à cor & à cry, estre l'Alïommeur. Brief ny dés lors, ny aujour d'huy nous n'auons aucū qui à l'ouuert se die estre l'instigateur, que la cōmune renommée dōt Bobie s'est fait le pere. Je dirois malicieusement, mais ie n'oze, craignāt d'offenser ceux qui ont esté par luy surpris. On depesche promptement Valençon, Conseiller du siége presidial, pour aller informer sur les lieux : où il fait toutes les recherches à luy possibles, cōtre la vie du mary, mais en vain : car il ne trouua vn seul tesmoin qui luy nuilit. Le mary est interrogé du iour au lendemain qu'il fut en prison, & declare son alibi par le menu iusques au iour de sa capture : sa femme apres interrogée, se conforme en tout & par tout au mary. Le Lieutenant Criminel apres auoir indeuēment tenu ces pauvres gens dedans ses prisons l'espace de six semaines, ouure tout à fait les prisons à la Damoiselle, & toute sa suite : & quant au Gentilhomme l'eslargit entre les mains du Cōmissaire Grenouveau. Du depuis nous auōs appelé du Decret de prise de corps, ignominieux emprisonnement, longue detention de nos personnes saisies, & annotations de nos biens, & auons fait intimer Bobie, que sçauons auoir esté conducteur de cest orne à couuert. Lequel incidément a présenté sa requeste contre les heritiers, tant paternels que maternels, à fin que tous les meubles luy fussent adiugez. Mais de se declarer partie ciuile au criminel, nulle mention ; c'est vne chose en laquelle

il a conuillé iusques à huy. Et toutesfois maître Barnabé Brissón, souz le pretexte de sa requeste a cistalé tous les beaux & riches ioyaux de son esprit, pour nous conuaincre de cest assassinat. A quoy ie ne pretens respondre, sinon que premicrement & auant tout œuure, vous maître Simon Bobie, qui estes Iuge & Aduocat, m'ayez presétemét à declarer, si estes ma partie ciuile en ceste cause, ou nō. Vous, dyje, qui m'avez souz main traicté auecques toutes les indignitez du monde! Vous ne me respondrez vn seul mot! Si vostre cause est telle que Brissón l'a trompetée, & que vous trompetiez en tous lieux, pourquoy doutez vous de respondre? Pour toute response, vous me payez de larmes, qui sont les armes des femmes. Ie vous forme & interpelle derechef; que bannissant toute hypocrisie de ceste cause, vous ayez à me faire la declaration que ie vous demande, deuant ce grand tribunal, où reside la face de Dieu, c'est à dire, de verité. Quoy? vous avez perdu la parole! Hé! vrayement, Messieurs, ie recognois auoir tort. Ce n'est à luy auquel ie dois adresser ma parole, ains à vous, qui avez interest que l'on n'abuze impunément de vostre patience, & qu'à l'issuë de cette audience il n'ait esté permis à Brissón faire telle anatomic qu'il luy a plu de nostre reputation: & que Bobie en soit quitte pour dire, qu'il n'entendoit estre partie, que sur l'enterinement de sa requeste. Ie vous supplie tres-humblement, Messieurs, de luy enioindre qu'il ait à respondre precipitément sur ceste mienne sommation. I'ay
interest

interest de ne combattre contre vn fantosme.

*A cette parole, monsieur le President de Mor-
san ayant pris l'aduis de la compagnie, luy com-
manda de respondre. Et lors Bobie voyant qu'il ne
pouuoit plus delayer, declara qu'il se rendoit à par-
tie : Chose dont me feut baillé acte. Ce fut apres auoir
repris mon haleine, ie poursuiuy ma route de cette fa-
çon.*

Or sus, graces à dieu, tout va bien pour moy :
& m'en prend tout autrement, qu'il ne feist an-
ciennement à ce grand Iules Cesar : Auquel,
ayant trauerfé le Rubicon pour s'impatroni-
zer de l'Estat, aparut vn fantosme : Au contrai-
re, Bobie ayant contre nous franchy le mesme
Rubicon, au lieu d'un fantosme, dont estions
iusques à huy seruis, nous auons maintenāt vn
homme en teste, ressource de la calomnie, &
fausie imputation en fin de cause. Entrons don-
ques maintenant en lice, & examinons nostre
cause piece pour piece. Tout ce dont on nous
bat, est d'une commune renommée, qui a cou-
ru contre nous, d'une ancienne inimitié de trē-
te ans passez, entre les deux freres, pour la sei-
gneurie de Mignaut ; querelle renouuelee
maintenant par les lettres Royaux obtenues
par le gendre & sa femme ; esperāce future
de succession ; bagues & bracelets d'or iertez
aux prieuz, vaisselle d'argent non enleuee ; nul
vel, deux pauures enfans innocents meurtis ;
Ce qui ne pouuoit entrer en teste d'homme, si
non de celuy qui se pretendoit heritier par
leurs morts. En tout ce cy il n'y en a pas allé

pour me faire mon procès extraordinaire, mais il n'y en a que trop pour me faire tomber en vne sinistre opinion du peuple. Et parauenture de vous Messieurs, encores que ne voulussiez alleoir iugement de condemnation contre moy sur cela mesmes de la façon que Brissou s'y est comporté. Car cognoissant qu'il peut prendre tous les aduantages qu'il veut en cette cause contre moy, & qu'il est aisé de luy pardonner, il s'est fort bien donné garde de toucher toutes les particularitez par moy cy dessus discouruës, que j'espere cy apres rapporter à leur poinct: Mais pour rendre la cause plus pleine de compassion a imité ce graue Heliodore, qui fait vn commencement abrupt de son œuvre, sur vn grand vol, tenant le Lecteur en suspends, iusques à ce que petit à petit il arriue à son poinct proietté. Ainsi est il pour sa premiere demarche entré sur cest horrible massacre, sans rien particulariser au vray du passé, & sur ce fondement a basti des presumptionnelles quelles, non pour defendre à mon appel, mais par vn biais industrieux, faigneant de deduire les moyens pour paruenir aux fins de la requeste; laissant cependant vne tres-mauuaise opinion d'Arconuille en la bouche de tout le peuple pédant la huiétaine, pour l'enormité du delit. C'en est pas ainsi maître Barnabé Brissou que nous deuons proceder. De ma part ie vous declare, que ie combas pour la verité, non pour la victoire. Qu'és autres causes il nous soit permis de nous iouër de nos esprits; En cette-cy, il y va du vostre

& du mien: Iedy du vostre & du mien: Car tout ainsi que i'aurois en horreur de plaider contre Bobie, si ie pensois qu'Arconuille eust tant soit peu contribué à ce meurtre: aussi ne devez-vous pas aisement en vous flattant opprimer à fausses enseignes, & par vn artifice indeu, l'innocence de ce gentilhomme: Esclarcissons donques maintenant cette cause, & osons des yeux du peuple la taye qu'y auez voulu apporter.

Premierement i'ay contre toutes vos presumptions, pour fondement general de ma cause, que Bobie ayant fait informer contre moy non tumultuairement, ains d'vn guet apent signalé, par Valençon Conseiller du Chastelet: qui s'est transporté sur les lieux, & y a vaqué trois semaines entieres; toutesfois il n'a rapporté aucune charge contre ma vie, & moins du crime dont est question. Vous me demanderez comme ie le sçay? Par l'organe mesme du Lieutenant criminel, qui n'eust oublié de recoler, & nous confronter les tesmoins, auant que de nous elargir. Outre cela; i'ay mon alibi notable, fondé sur vne souuenance, non exquise, ny affectee: car elle n'estoit que de huit iours lors que ie feus interrogé: Que dés auparauant & pendant cette malheureuse tragedie, ie feus premierement en ma maison d'Arconuille, pour m'asseurer avecque mon nouveau fermier de mon reuenù del'annec. de là retournant en ma maison de la Chatre, sans foruoyer de mon chemin, ie baisay les mains à monsieur le Chancelier à

Vigner, où ie seiournay vn iour, & le lendemain chez son gendte à Bel-esbat: puis arriuay en ma maison où ie recitay à ma femme, cōme bon mary, tout le discours de mon voyage. C'est la recognoissance que i'ay faite de bonne foy deuant le Lieutenant criminel: c'est celle mesme que ma femme a faite. Icy monsieur l'Aduocat plaidant la cause a fait vne grande banniere contre moy de la conformité de nos deux confessions. Disant que nous estants rencontrés sans aucune variation, il falloit bien qu'eussions pris langue l'un de l'autre. Bon Dieu, où suis-je maintenant logé! Si ma femme se feust trouuee contraire par ses responses, aux miennes, ma teste estoit sur vn eschaffaut: & pource qu'elle n'y est contraire, encores l'y faut il porter. Et pourquoy n'eussions nous esté conformes, veu qu'il n'y auoit que huit iours d'interuale entre mon alibi, & nos interrogatoires? Au demeurant ce n'est point vne preuue qui soit de longue ou difficile discussion; huit autres iours vous en peuuet esclarcir, par Seigneurs qui sont hors de tout reproche, & par leurs familles. Ayant ces deux poincts en ma cause, est-ce pas vne vraye mocquerie, bris-son, d'auoir seulement recours à vostre esprit pour me conuaincre d'un crime si detestable que cettuy? De ma partie ne crains rien pour Arconuille, ny de biens, ny de sa vie, ny de son honneur, lors que sa cause sera pleinement approfondie par la Cour. Sa vie passée, sa conscience presente, son alibi tout notoire en maisons de marque, l'information contre luy faite sur les lieux à la poursuite de Bobie, l'ouuertu-

re des prisons à sa femme, & sa famille, l'esslargissement deluy chez vn Commissaire, en vn delict si detestable (car la honte du iuge fut cause apres vne capture si honteuse, de ne l'esslargir tout à fait) la conscience de Bobie qui depuis le iour de l'emprisonnement ne s'est iamais ouzè ouurir pour se declarer partie, que ce iourd'huy. Toutes ces particularitez (dy-ie) mises ensemble sont iuges tres-certains de son innocence. Quoy plus il n'y a autre charge contre luy que sa descharge; C'est à sçauoir, que luy & sa femme interrogez n'ont varié, ny ne se sont trouuez contraires par leurs interrogatoires: Car de toutes les pieces secretes, monsieur l'Aduocat n'a fait estat que de ces deux, pour rendre la cause de ce Gentilhomme odieuse: Et neantmoins d'autant que i'ay grand interest que sa reputatiõ ne demeure engagée enuers le peuple, dont vous maistre Barnabé Brisson auez esté le principal instrument par vostre Plaidoyé, ie veux faire de sa querelle la mienne, & prendre vostre Plaidoyé, comme vn cartel de deffy, que i'accepte. I'entre doncques maintenant en champ clos pour vous combattre teste à teste. Et souhaite que non seulement vous Messieurs, soyez les iuges, mais aussi tout le peuple, qui est icy venu en flote pour nous escouter. Toutes vos armes ont esté coniectures tirees du magazin de vostre esprit, mes armes pour parer à vos coups seront aussi tirees du mien.

Vous me battez de cinq ou six poincts par moy cy dessus touchez. Ie donneray toutes les

façons que l'on ſçauroit deſirer, cōtre vos pretenduës preſumptiōs, & les conſidereray, premieremēt par leurs parcelles, puis en leur tout.

Je commenceray par le commun bruit, grāde abiectiō certes. Car à bien dire la voix du peuple, eſt la voix de Dieu. Mais c'eſt quand vne opinion commune s'inſinue dedans les ames du peuple ſans aucune ſuggeſtion. Cecy eſt-il au cas qui s'offre ? non vrayement, cette opinion ne procede que de l'artifice de Bobie, ou de la malice de ceux qu'il a mis en beſōgne. Vn pauvre gentilhomme expoſé à la veuë de tous, mené par cette ville lié, garroté, ſur vn meſchant bidet, entouré d'une troupe d'archers, qui ſe vantoient auoir pris l'Affommeur, Tanchou leur Capitaine à leur teſte, pour teſmoigner à tous de quelle importance eſtoit cette priſe. Vn iour apres, ſa femme, & tout ſon meſnage mené à chartees par le demeurant des archers. Le mary & la femme logez en priſons obſcures, & le demeurant en cachots. Et eux tous demeurez en ce piteux eſtat ſix ſemaines. Vray Dieu ! qui eſt celuy qui non ſeulement n'eult eſté eſpris de cette malheureuſe opinion contre luy, mais, qui plus eſt, n'eult deſiré d'affommer de ſes propres mains ce grand affommeur, ſ'il luy eult eſté loifible ? Et neantmoins au bout de tout cela, il n'y auoit aucunes informatiōs contre luy, premier fondemēt de tout decret de priſe de corps, nulle partie ciuile pour me faire teſte ; Car quelque rolle que Bobie iouaſt ſous la cuſtode, ſi ne s'oſa-il iamais preſenter ſur le theatre à face ouuerte deuāt le premier iuge : & vous meſmes Meſſieurs auez

veu cōbien il a marchādē avecque sa cōscien-
ce auant que de franchir le pas. Brief il n'a au-
iourd'huy autre preuue de son accusation que
celle qui est nee dedans la teste de son Aduocat.
Les choses estans telles que dessus, ie trouue-
rois tres-estrāge, que le commun peuple n'eust
estē preuenu de cette malheureuse opinion:
mais encores le trouuerois-ie plus estrange, si
apres m'auoir tout au lōg ouy il y persistoit, &
estimerois celuy qui seroit frappē à ce coing,
non seulement opiniastre, ains acariastre.

Vous dites en second lieu qu'il y eust des ini-
mitiez entre les deux du moulin freres, & qu'il
est grandement vraisemblable, que ferry dige-
ra tres-mal l'arrest contre luy donnē: Qui en
doute? Donques que ceste haine se soit perpe-
tuee iusques au dernier soupir de sa vie: ie le
nie. Vous Bobie scauez tout le contraire, & en
quel melnage il estoit avec son frere, quand
vous fustes mariē. Au demeurant cela est bon
pour obiecter à vn Italien, qui nourrit ordi-
nairement en son ame, vne inimitié mortelle,
consequemēt immortelle: Mais non au Fran-
çois, l'air de nostre France ne peut porter telle
ordure. D'ailleurs, les haines ne sōt hereditaires
entre les enfās, nō pas mesmes au pays d'Italie.
Et vrayemēt il est bien à presumer qu'un gētil-
hōme François biē né, qui n'auoit iamais veu fer-
ry, eust voulu espousāt sa fille orpheline espou-
ser aussi vne querelle assoupie par trāsaction dès
l'an 1543. prescrite par le laps de trēte ans, & en
tout euenemēt esteinte par la mort de l'un & de
l'autre freres. Tout sens commun y repugne.

Voyre mais (adioustez-vous) puis n'agueres vous renouuelastes cétte enciéne querelle, par les lettres Royaux par vous obtenuës. Cettcyn'est pas vne presumption en l'air, ains oculaire mensonge: Car par nos lettres nous ne requérons ny la rupture de l'arrest, ny de la transactiõ, ainçois l'enterinemét, affin de iouir du douaire de deux cens liures, ainsi que ces deux pieces le portent. Mais que fussions releuez de la qualité d'heritiere prise par la Damoiselle pendant sa minorité. Dauantage si eussions voulu proceder par voye de fait, nous n'eussions pris celle de iustice, & encores par le Conseil de l'un des premiers Aduocats de cette Cour, ne pareillement vous prié d'en passer à l'amiable.

Vous dites en quatriesme lieu, qu'aucun vol n'auoit esté fait. Grande pitié! que repaissiez la Cour de propositions du tout faulles & mensongeres: Car que sont deuenuës les quatre mille huit cens liures par vous peu auparauât touchées du rachat de quatre cens liures de rente à vostre femme appartenans? Il ne faut point faire de doute que ce n'ait esté le Gascon qui les a volées, s'ils estoient en or: ou la plus grande partie, si en monnoye blanche; & ait mis le demeurât en tel lieu, dont il eust sceu fort bien respondre, s'il eust esté pris.

Et ce poinct dõne solution à la vaisselle d'argent non enleuee, & aux bagues & brasselets d'or iettez dedans les priuez. Parce que ces bons marchands ne craignent rien tant que se charger de telles marchandises, affin que les debitant ils ne soient descouuerts, lingu-

lièrement quand pour se gorger ils trouuent assez d'argent, qui n'a point de suite.

Mais qui peut croire (dites vous) pour closture de vos presomptions, que les enfans innocens ayent esté occis que par ceux qui esperoient rapporter profit de leurs morts? Vous voulez que ie vous en rende raison. Or ie vous prie de me dire, d'où vient que ce malheureux ietta avecques les bagues & bracelets, son manteau & toutes les chandelles de la maison dedans les priuez? Par cela vous voyez qu'estant tombé en sens reprouué, il estoit aussi perclus de l'entendement: & toutes fois encores luy en restoit-il quelque brin : Car se disposant de faire son vol tout à loisir, il pensa de ne faire point de sa cruauté à deux fois: D'autant que le braire & crier des enfans eussent peu exciter le voisiné de venir à la maison, pour sçauoir qui estoit cause de ceste longue clameur. Voyla commēt vos presomptions, dont les vnes sont mensongeres, les autres imaginaires, s'en vont à vau-leau.

Mais prenons les en leur tout: Car il aduient des causes comme des beautez d'une femme, en laquelle considerant separément chaque partie de son corps, vous trouuez assez de quoy ne vous contenter, mais en sa posture generale il y a ie ne sçay quel air qui vous la rend agreable & belle. Ainsi pourra-il aduenir de ceste cause, que combien qu'il y ait à redire en chaque parcelle à part de ces presomptions, toutes fois prises en leur tout elles se trouueront de grande recommandation & merite. C'est là où ie vous

attens, & donneray toutes les façons que l'on ſçauroit delirer à ce poinct, pour vous faire apparoir au doigt & à l'œil du contraire.

Toutes vos preſomptions ſeroient vaines, ſi elles n'aboutiſſoient au *Cui bono*, de l'ancien C. Caſſius: voulât dire qu'il ne falloit pas aisé- ment preſumer qu'un homme ſe fit meſchant à crédit : à tant qu'en un doute & perplexité de preuues, il y auoit ſubiect de croire que celui qui en rapportoit le profit, euſt auſſi commis le delict. Si vous eſtimez qu'une preuue eſtant entre deux fers, Caſſius entendit l'affaire ſeulement balancer ſur le poix de l'or, vous en faiçtes un Iuriſconſultetaquin, non Romain. Dedans Rome le mot de *Bien*, ſe rapportoit aux biés de l'ame, du corps, & de fortune; Tellement que ſur la diuerſité des obieçts, nous deuons diuerſifier les iugemens que tirons des preſomptions. Si c'eſt à faire à un homme de baſſe condition & neceſſiteux, ie me feray facilement accroire que le bien l'aura peu induire au meſfait dont ſera queſtion : Si à un Gentilhomme, & qu'il y aille tant ſoit peu de ſon honneur, ie ne croiray pas que l'argent, ainſ c'eſte opinion commune d'honneur qui ſe loge dedans le cœur de la Nobleſſe, l'aura peu induire à ce faire : Mais ſi c'eſt un homme qui aura tout le temps de ſa vie fait profeſſion de bien viure, ie ne me perſuaderay iamais, que ny l'eſperance aſſamée du bien, ny la vaine opinion de l'honneur, luy ait faiçt outrepaſſer les bornes de ſon deuoir. Quand il n'y a aſſez de clarté litterale, ou teſtimoniale en vne cauſe (diſoit

Caton le Censeur, il faut presumer pour celuy que sçauons estre homme de bien. Et celuy qui a tant baillé de vogue par ses plaidoyez à vostre *Cui bono*, Cicéron, y aportant explication: est d'auis, qu'on ne doit iamais presumer que vn homme de bien ait malfaict souz vne attēte passagere du bien. Et le Pape, premier & dernier censeur de nos mœurs en nostre Religion Chrestienne: Le tesmoignage (disoit-il) de la vie passée m'enseigne ce que ie dois iuger de la cause. Et sans aller mandier les autoritez des hommes, ce grand Seigneur & Maître sur le moule duquel nous deuons former & fermer toutes nos actions, mené au tribunal deuant Pilate: Informe toy (dict-il) de tout le cours precedent de ma vie. Voicy vn Gentilhomme qui a passé sa ieunesse en l'escole de ce grand Caton de nostre France, allié par mariage à l'vne des premieres & plus anciennes maisons de Paris; esloigné de la necessité, riche de deux mille liures de reuenue pour le moins, avecque lesquels il a passé & passé quoyement sa vie aux champs. Et entre tant de bonnes parties de l'ame & de fortune, vous luy imputerez maintenant cest assassinat, souz vmbre que l'on a tué deux enfans ausquels il a succédé?

Mais considerons s'il vous plaist quel fruit il esperoit en rapporter. Leurs successions estoient mobiliere, & immobiliere. Quant aux meubles la moitié en appartient à Bobie, & en l'autre moitié il y a les heritiers maternels qui

font cinq, & moy paternel qui par ma femme fay le sixiesme: Qui tous partageons par testes suiuant la coustume de Paris. C'est vne douziesme en tous les meubles qui nous appartient: & au regard des immeubles, nous recueillirōs la Terre & Seigneurie de Mignaut seulemēt, qui se consiste en maison bastie en la Beauce, quarante arpens de terre labourable, & cinq arpens de vignes pour tout. Sur laquelle ie pretens mon douaire de deux cens liures de rente non rachetable, & les arrerages de plusieurs années. De maniere qu'en ce que pretendons nous sommes aux termes de cest anciē proverbe; Que la moitié passe le tout. Cause qui peut estre iugée à nostre profit en moins d'une heure. Quatre pieces en font la decision, le contract de mariage de Ferry, l'Arrest, la trāsactiō de l'an 1543. & le registre du baptistaire de la Damoiselle d'Arconuille. Se peut-il faire que souz vne si petite esperance, ie me fusse voulu engager en vn crime si horrible, le quel estant auéré contre moy, il faudroit que ie courusse la mesme peine que Tarquel en l'an 1553. la tenaille, la roüe, & le feu au peu qui resteroit de ma vie? Non: cela ne sçauroit entrér en l'opinion du plus scelerat que la terre porte. D'auantage si i'y auoist tant soit peu contribué, il faudroit que i'eusse negocié ce meurtre avecques vostre valet, non vne, ains deux, trois, & quatre fois. Il ne vous est aduenü d'articuler en tous vos discours, quand, comment, en quel lieu, ie me sois iamais abouché avecques luy. Qui estoit toutesfois la principale piece de vo-

stre harnois pour me combattre. Car nul ne doute que ce n'ait esté cest homme de bien qui ait commis l'assassinat. Et au bout de tout cela vous soustenez que ie suis celuy qui l'ay pourchassé. C'est n'auoir ny yeux, ny iugement en la teste, ny conscience en vostre ame.

Ie vous veux mettre en plus beau jeu. Donnons par forme de presupposition, que le Seigneur d'Arconuille soit mal né, donnons que la necessité ait quelque part en sa famille, que l'esperance de Mignaut soit de telle consequence, qu'elle puisse induire vn meschant homme de faire quelque traict desesperé; Qu'avecques cela les inimitiez y soyent visibles, que les bagues & vaisselles d'argent deussent appartenir à nous seuls. Voudriez vous pour cela hardimét charger ce pauvre Gentil-homme? Quoy? ne pouuez vous auoir d'ailleurs quelque ennemy qui preigne vengeance de vous & des vostres? Luy mesme n'en peut-il auoir qui vueille exciter ceste tragedie contre luy, pour prendre vengeance de luy? Ie vous reciteray vne histoire, non mandiée de l'anciéneté, ains née dedans ce Royaume, pour vous monstrier quelle foy il faut adiouter à coniectures. Il y a dixhuiét ans ou enuiron qu'au Parlement de Thoulouze ce cas aduint. En la ville de Villefranche, au Roüerguois, vn ieune homme Procureur du Roy, fiancé contre sa volonté à vne fille, par commandement de pere & de mere. Il aime mieux choisir vne vie penible, que de l'espouser. Et apres auoir amassé mille ou douze cens escus, vn iour il fit contenance de vouloir aller

trouuer sa future espouse, pour luy faire quelques presens: Monte à cheual, son valet sur vn Mulet, qu'il fait galoper deuant, afin qu'il trouuast le soupper prest. Estant ainsi demeuré seul, il tourne à quartier, va loger à vn village escarté: là il soupe, compte ses escus deuant son hôte; Demande gens pour le conduire le lendemain. On luy baille trois hommes qui prennent leurs harbalestes (armes ordinaires des pitiaux en ce pays) & le conduisent. Et se trouuant en tel lieu qu'il desiroit, qui estoit entre le bois & la riuere, il les licentie, leur baillant à chacun d'eux vn double ducat, au lieu d'vn teston qu'il auoit promis. Mais auant leur partement les prie de luy donner trois flesches. Ce qu'ils firent. Soudain qu'ils sont partis il coupe les jarrets à son cheual; le tuë, ensanglante les trois flesches dedans ses flancs, decoupe son chapeau qu'il ensanglante pareillement & son manteau. Il s'achemine en ceste ville, où il demeura trois ans. Cependant le seruiteur n'ayant le soir precedent eu nouuelles de son maistre, le cherche, vient au village où il auoit logé, entend de l'hôte ce qui s'estoit passé en sa maison, il trauerse parmy le bois; en fin il trouue cheual, chapeau, manteau, & flesches ensanglantées, l'orée du bois & de la riuere. La Iustice s'y transporte, procez verbal, on recueille toutes ces pieces. Information contre l'hôte, & les trois harbalestriers: tous pris au corps, & logez en estroites prisons. On estoit d'accord de l'argent compté, en

presence de l'hoste, de la conduite faicte par les trois hommes, des trois fleches, du chapeau, manteau, & cheual. Vray qu'il n'aparoissoit point de mort, mais au lieu de cela, on tenoit presque pour demonstration infailible, que ce Procureur du Roy ayant esté occis & volé, auoit esté jetté dedans l'eau. La cause deuoluë par appel au Parlement, ces pauvres gens appliquez à la question, temperent aux prisons trois ans & plus, en attendant plus ample preuue. Au bout de trois ans, toutes ces familles estans en combustion, voicy vn Rouerguois qui trouue inopinément ce Docteur, souz le grand Chastelet à la barriere des Sergents, il le recognoist, le faict constituer prisonnier, luy mesme entre dedans la prison pour le contregager, & escrit à vn Seigneur de ceste ville, que vous tous cognoissez, duquel i'ay appris ceste histoire; Lequel en donna aduis à Thoulouze, & ces pauvres gens eslargis, arriuent en ceste ville, & s'estans constituez demandeurs, & la cause par lettres patentes du feu Roy Henry, renuoyee au grād Conseil, par Arrest ce mauuais homme fut condamné, tant enuers le Roy que parties ciuiles, ainsi qu'il meritoit: le tout toutesfois hors la mort. Et puis iugez vn homme sur des presumptions.

Que s'il a esté loisible à vostre Aduocat de se iouer de sa langue & de son esprit aux despens de la reputation de mes parties, ne

penſez pas maiftre Simõ Bobie, que ie ne peufſe, ſi ie voulois, me iouier ſouz meilleurs gages de la voſtre, au ſujet qui ſe preſente entre nous. Toutesfois ja à Dieu ne plaiſe que i'entre ſur ces alteres: & c'eſt où ie veux faire mon hola: mais avec vne offre digne du ſeigneur d'Arcouille, ie veux dire d'un Gentilhomme d'honneur, dont ie ne ſeray par luy deſauoié.

Le nom & la famille de maiftres Charle, & Ferry du Moulin eſtoient fondez en deux filles: l'une mariée à Bobie, l'autre à Arconuille, toutes deux aſſaſſinées, & d'une meſme boutique: l'une de ſa vie, par le valet, l'autre de ſa reputation, par le maiftre; & toutes deux, chacune en leur endroit, innocentes. De moy i'attribuë ce malheur à vn iugement caché de Dieu, lequel par fois aſſilge d'une meſme balance le bon, comme le mauuais; Celuy-là pour exercer ſa patience, & ceſtuy pour le chaſtier. Au demeurant de vouloir aſſeoir ſon iugemēt, ſur ces grands iugements de Dieu, ce ſeroit repreſenter la fable ancienne de ces furieux Geants, qui voulurent eſcheler les cieux: Encores que i'aye eſté à tort & ſans cauſe, par vous mal traité, toutesfois ie vous excuse. Il eſt permis à celuy qui perd, en ce premier mouuement de ſa perte, meſcroire impunément quel qu'il veut: mais non d'y perſeuerer quand le temps luy a baillé le loifir de reuenir à ſon ſecond & meilleur penſer: maintenāt que m'auez ouy; vous pouuez recognoiſtre quelle eſt la iuſtice de ma cauſe, & combien vous eſtes meſpris. C'eſt pourquoy ie vous accorde vn hors de Cour & de pro-

de procès, sans despens, dommages & interets d'une part & d'autre: & que vous & moy par vn vœu mutuel embrassions deormais à frais communs la poursuite contre celuy que scauons auoir commis le massacre. C'est bien tard, ie le recognois, & à mon tres-grand regret, mais mieux vaut vn Tard que iamais. Quoy? vous refusez cette offre, & persistez en vostre requeste, tant pour la reparation destrois mil escus contre moy que gain general des meubles? Vous (dy-ie) qui auez tant tergiversé entrel'ouy, & le nenny auant que de vous rendre partie ciuile contre moy. Prenez garde que ne nous aprestiez à penser chose que nul de nous ne veut croire. Comment? vous ne voulez accepter mon offre? Il n'y a remede, il faut que la patience m'eschappe; & que ie lasche toute bride à la iuste douleur que ie couue dedans ma poitrine. A qui ay-ie maintenant affaire? A vn homme qui a esté perpetuellement en mauuais mesnage avecque sa femme, qui des paroles est venu souuēt contre elle aux mains? Et cela seul a esté cause que ce cruel meurtrier ne fut pris par le voisiné en son espouuētable forfait: A vn hōme qui a ià entre ses mains 4800.liures prouenus des 400.liures de rēte qui auoiet appartenu à sa fēme? à vn hōme qui le iour du massacre, (par vn taissible remors de sa consciēce de ce qu'il voyoit denoir aduenir) varia trois & quatre fois s'il deuoit sortir de la ville? A vn hōme qui bailla en garde sa fēme à vn sien valet de Gascon non aduoué; Gascon qui le iour mesme commit l'assassinat, va-

let qui faisant la guerre à l'œil, (comme il est vraisemblable) & outrepassant les bornes de son mandement, voyant les enfans crier comme la mère & les seruantes les assomma tous: mais qui pour demeurer fidelle enuers son maistre, non seulement garda la vaisselle d'argent, bagues & autres ioyaux precieux, mais plutost que de faillir les ietta dedans les priuez, affin que le maistre à son retour des châps, les y trouuast. Mais aussi vn maistre qui en recompense, pour ne demeurer ingrat enuers son valet, luy a tout à fait ouuert la porte à sa fuite, & s'est bien donné garde de le poursuire; ores qu'il eust eu aduis, estant retourné en sa maison qu'on l'auoit veu le iour precedent à Mignaut. Et au milieu de toutes ces ordures, vous penserez non seulement que la requeste par luy presentee, ne soit proueuë d'une auarice, de longuemain precogitée: Mais passant outre il sera recompensé sur moy, & sur tous les meubles pour auoir conuiuë à la prise de ce detestable valet. Voicy vne estrange Iurisprudence. Or pour respondre au premier chef de vostre Requeste concernant les trois mille escus de reparation que demandez contre moy, vous estes vn moqueur, & ne merite cela response. Que pour m'auoir, contre Dieu, & contre raison affligé, ie paye l'amende! Vous me demandez recompense, dont ie demande reparation contre vous. Cela vous dy-ie, ne merite response; C'est vn amusoir pour donner quelque fueille à vostre cause, que sçauiez ne

valoir rien. mais quant aux meubles il y'au-
roit plus d'obscurité, non pour le point de
droit, ains de la compassion & pitié si sans dis-
simulation & hypocrisie elle relidoit en vous.
Vous n'estes heritier de vostre femme, ains
de vos enfans; Il faut donques auoir recours
aux vaines imaginations de vostre Aduocat.
A la verité, quand on demande qui est le pre-
mier mort du pere, mere, ou de l'enfant &
que l'on n'en a de preuues certaines, vous
trouuerez, tantost que la loy estime auoir esté
le pere; tantost l'enfant: Mais voicy la recon-
ciliation. Si le pere & le fils sont occis en chāp
de bataille, on presume le fils qui estoit en pu-
berté, & force d'aage estre mort apres son pe-
re: & pour cette cause comme s'il eust esté he-
ritier du pere, la mere puis apres luy succede
aux biens paternels, à l'exclusion de tous les
heritiers collateraux: Mais quand l'enfant
est; impubere c'est à dire en vn aage foible, &
moins defensible, se trouue submergé avec
le pere ou la mere, il est réputé estre le pre-
mier decédé. Et la raison de ces diuersitez
est, que pour vn droict de nature le plus vieil
doit aller deuant en l'autre monde: & pour
cette cause en tels accidens on iuge la mort
du plus vieux estre premiere que du ieune.
Toutesfois en ces mesmes desarrois, on met
en consideratiō celuy qui vraisemblablement
se peut mieux defendre de la mort. Et c'est
pourquoy l'enfant impubere & moindre de
quatorze ans, pour n'auoir assez de forces
par nature, est estimé mort le premier: Au

L. qui
duos §.
cum in-
beilo De
reb. dub.
& §. si lu-
cin.

L. cum
pubere
seq. eod.

contraire estant au dessus de cest aage, on presume que les pere & mere l'ayent suruescu. Pour cette mesme raison en la concurrence des morts du mary & de la femme, on presume la femme morte la premiere, d'autant qu'elle est naturellement la plus foible : Et pour cette mesme cause vn masse, & vne femelle gemeaux sortans du vêtre de leur mere, en vn doute de leur naissance on presume le masse estre le premier essu. Et à peu dire, les docteurs de droict, apres Accurse sont tous de cette opinion. Voila la maxime generale de droict, fondee non seulement sur les textes expres des Iuriconsultes, mais aussi sur vne raison naturelle qui ne reçoit aucune exception. Quant à ce que soustenez la mere auoir esté assassinee auant les enfans, en auez vous aucune preuue testimoniale ? Nulle. En ce default auez vous recours à la presumption ordinaire de droict ? Encore moins. Ce que i'ay maintenât deduit, y repugne. Vostre cause est en cecy fôdee sur des presôptions mal basties que proulgnez dedans vos ames. Et tout ainsi qu'au procès extraordinaire vous estes preualu de ie ne sçay quelles presomptiôs de faict, mensongeres, & fautiues, aussi vous preualez vous maintenant d'vne presumption de droict erronee. Et maintenant pour vous monstrier que le Seigneur d'Arconuille ne marche icy que d'un pied noble, combien que toute chose degengere en cest endroit contre vous, toutesfois pour le peu d'interest qu'il y a qui n'est que d'vne douzième au total, il ne se

L. qui
duos §.
si maritus.

L. si fuerit
§. plane.
Dereb.
dub.

L. ex fa-
cto. §. si
quis autē
Ad SC.
Trebel.

veut amuser à epinocher, & ne se donne pas grand peine à qui demeurera ce tresor, ains est content que l'on sache, que l'on ne le luy a pas gardé dedans les priuez, ains à vous. C'est pourquoy entant que touche le criminel, il conclud à ce qu'il soit dit, Qu'il a esté mal & nullement decreté, ignominieusement le mary, la femme & toute la famille emprisonnez, les biens mal saisis & annotez: Et demande des penes, dommages & interests: Et Bobie condamné pour sa calomnieuse poursuite en telle reparation & amende qu'il plaira à la Cour arbitrer. Car quant à la requeste, combien que Bobie ne puisse rien pretendre aux meubles qu'en la moitié du chef de sa communauté, & qu'en l'autre moitié les Baldoux heritiers maternels y ont le principal interest, qui sont les cinq parts, dont les six font le tout, s'en raporte à la Cour d'en ordonner comme il luy plaira.

A Monsieur de Sainte Marthe.

E vous ay cy deuant discouru l'heureuse & sage rencontre de monsieur de Guise à Aulneau, & de quelles caresses il auoit courtizé les Reistres: comme le Roy auoit sans coup ferir desfait les ennemis & tout d'une suite avec quelle allegresse il auoit esté recueilly dedans Paris à son retour, sur la fin de l'an passé: Mais i'auois oublié de vous faire part de ie ne scay quelle rencontre qui se passa en nostre Chambre des Comptes, Il me plaist maintenant que ie suis à moy & plein de

*Il raconte
comme la
Chambre
des Com-
ptes ne
voulut in-
teriner un
Edit que
le Roy y
enuoyoit.*

loisir, de vous remplacer ce deffaut. Pendant qu'il estoit avecque son armée en la beauce on nous aporta vnedit pour trouuer argent, par lequel le Roy erigoit de nouveau, deux Presidentz, & douze Maistres en nostre Chambre, fondé sur quelques pretextes fort froids, que ie ne vous veux reciter. Suffise vous que fut porteur de cest Edit Monsieur le Cardinal de Vandomme, suiuy de cinq Seigneurs du Conseil d'Estat, estimant que par leur presence, la Chambre n'ozeroit contrevenir à la verification d'iceluy. Ces seigneurs estants venuz tout exprés pour le faire verifier, apres que l'Edict eust esté leu par nostre Greffier; estant question de prendre nos conclusions, ie m'ouury, & de vous faire part de toutes les particularitez, ny le temps, ny ma memoire ne me le permettent. Je vous diray seulement en gros quelques poincts notables, reseruant les autres à nostre premiere entrevuë.

*Gens du
Roy qui.*

Entre tous les Officiers du Roy de cette France (leur dy-ie) on appelle spécialement les Aduocats & Procureurs du Roy, gens du Roy: comme si nos estats fussent plus particulièrement affectez au seruice de nos Rois, ores que tous les autres Officiers soient aussi bien gens du Roy que nous. Puisqu'on nous fait cest honneur de nous qualifier tels, il me semble qu'avec toute honneste soubmission nous luy deuons rendre seruice, tel qu'estimons en nos consciences se deuoir tourner au profit de luy & de son Estat.

Iamais comparaiſon ne fut trouuee de meilleure grace que celle de Menenius Agrippa au peuple de Rome, quand pour reconcilier le Senat avecques le tiers Eſtat qui s'eſtoit ſequeſté au Tertre Auentin, il compara la Republique au corps humain. Je ſuiuray icy ſes traces, & diray qu'il n'y a rien en quoy le legiſlateur ſymbolize tant qu'au Medecin. Le ſuiect du medecin eſt le corps humain: Le ſuiect du Legiſlateur eſt la Republique. Et tout ainſi que le medecin diuerſifie ſes remedes, mettant en conſideration l'aage de celuy qu'il traite, la ſaiſon en laquelle il le traite; la contree, où il exerce ſa medecine. (Car ce n'eſt pas la raiſon que le vieillard ſoit médicamenté comme le ieune homme, ny que les remedes ſoient auſſi toſt en vn temps d'eſté, que d'hiuer: & doit eſtre l'Italien gouuerné tout d'autre forte que le François, pour eſtre nez & nourris ſous diuerſes temperies d'air, & de pays.) Auſſi le ſage legiſlateur a accouſtumé de diuerſifier ſes loix, qui ſont les medecines & remedes de la Republique, ſelon la diuerſité des rencontres qui ſe preſentent, eſtant bien ſeant de faire vne ordonnance en vn tems, qui ſeroit trouuee de tres-mauuaſe digeſtion en vn autre. Et ne doit-on trouuer eſtrange que les neceſſitez de l'Eſtat ſe trouuant extraordinaires, on y employe auſſi des loix extraordinaires pour luy ſubuenir. Car c'eſtoit vn Aphoriſme ancien au grand Hypocrat, Qu'aux maladies aiguës il falloir remedes de meſmes. Toutesfois il faut qu'on ſoit d'ac-

*Comparai-
ſon de la
Republic-
que au
corps hu-
main.*

cord avec moy, qu'en la medecine il y a une autre regle qui est perpetuellement vraye. Car quelque maladie aiguë qui se presente au corps humain, vous n'offensez iamais les parties nobles, sous esperance de sauuer le corps. D'autât qu'é ce failant au lieu de le sauuer on le perdrait. Que la frâce soit au iourd'huy extremement malade, il n'en faut faire aucune doute, & que ses parties nobles soyent les Cours souveraines des Parlements, des Comptes, des Aides, encores en faut-il moins douter. Il est certain que le fondement de toute Republique c'est la loy: Je ne diray point fondement, Je dy que c'est l'ame sans laquelle la Republique ne peut auoir vie. Or en cette France que les loix prennent leur source & origine du Roy, comme les eaux du grand Ocean, toutesfois si n'ont elles vogue entre nous qu'elles n'ayent passé premierement par l'alambic, & de la Cour de Parlement, & de la Chambre des Comptes, & de la Cour des Aides, selon la diuersité de leurs fonctions. Et de ce ie n'en veux plus ample tesmoignage que celuy que ie voy maintenant, vous estans icy transportez expres pour verifier ce nouuel Edict. Il n'y a celuy de nous qui ne recognoisse avec toute deuotion & humilité en nos Rois pareille grandeur, autorité, & preeminence qu'en tous autres Princes souverains. Mais ils voulurent apporter cette attrempançe à leur Souueraineté de ne donner cours à leurs loix qu'elles n'eussent esté auparauant ve-

Les Loix en France ne peuvent obliger qu'elles ne soient verifiées à la Cour.

rifiées par ces trois cōpagnies souueraines, cha-
 cune endroit soy. Les contraignoient-ils de les
 passer, ainsi qu'un Tabelliō qui est destiné pour
 grossoyer les minutes & breuets des Notaires
 sans cognoissance de cause, pour puis pouuoir
 estre mis à execution? non vrayemet. Les Iuges
 estoient-ils estimez rebelles pour les refuser?
 encores moins. Ains meilleurs & plus fidelles
 seruiteurs. Et nos Roys prenoient ordinairement
 leurs humbles remōstrances en payemēt. Pour
 cela en estoient-ils moins obeis par leurs sujets?
 Au cōtraire, par ceste correspōdance & entre-
 las de la puissāce du Roy avecques les tres-hū-
 bles remonstrāces de ces trois cōpagnies, chacū
 demeuroid content, nos Roys en bien cōman-
 dant, le peuple en bien obeissant. Maintenant
 qu'on les contrainct, tantost par cōmandemēs
 absolus, tantost par la presence du Roy, ou des
 Princes de son sang, sans recueillir les voix & o-
 piniōs des Iuges, tout aussi tost se sōt les affaires
 de nostre Frāce desliées, & la des-obeissance lo-
 gée au cœur des sujets. De maniere que là où nos
 Roys commandoient avecque vne baguette à
 leurs sujets, maintenāt (il faut que ie le die à mō
 grād regret) ils n'y peuuent bōnement cōman-
 der avecque deux & trois armées, & d'où vient
 dōcques cela? La raison y est tres-prōpte, puisée
 des fōtaines de la nature. Par ce qu'il n'y a riē si
 naturel que de voir les choses se dissoudre par
 l'affoiblissement de ce dōt elles estoient liées. Nous
 prenōs nostre naissance, nourriture, & croisāce
 par nostre chaleur naturelle, & à mesure qu'elle
 diminuē en nous, aussi defaillent les ressorts

de nos corps iufques à leurs dernieres periodes. La Couronne de France estoit maintenuë par l'authorité de ces trois Ordres; Diminuez leurs authoritez; certainemēt lors que penserez plus magnifier la Maiefté de nostre Roy par vne puiffance absoluë, c'est lors que la trouuerez plus diminuée, & affoiblie.

Sur cela ie recitay par le menu les trauerfes qu'elles auoient par cy deuant receuës, & receuoient encores auec des promesses certaines de nostre ruine. Et apres auoir estalé tout au long ce qu'une iuste douleur m'auoit commandé, ie pourfuiuy de ceste façon ma route.

Ie ſçay bien que ce discours ne plaira à tous les corrompus de ce ſiecle, & que l'un d'eux me dira; Pasquier, il ne te falloit eſtre Aduocat du Roy, où l'eſtant, il te faut ſouſtenir toute autre proposition que celle là. C'eſt ſe heurter la teſte contre vne paroy, de ſe heurter contre le temps. Et ie luy reſpondray au contraire, qu'il ne falloit que ie fuſſe Aduocat du Roy, où l'eſtant, il faut que ie deſcouure à mon maiftre ce que ie penſe importer à la manutention de ſon Eſtat: Ie doy vne verité à mon Roy; C'eſt vne charge fonciere annexée à ma conſcience, & à mon eſtat, dont ie ne me puis diſpenſer, ſans commettre felonnie enuers luy. Il n'eſt pas dict que toutes les medecines que l'on faiſt prendre au malade luy plaiſent. Au contraire il n'y a rien qu'il abhorre tant: & toutesſois ce ſont celles dedans leſquelles il trouue ſa guerifon. Il n'eſt pas dict que les remonſtrâces que ie vous ſay ſortent maintenant eſſect, mais il

*l'officier
doit dire la
règle à ſon
Prince.*

n'est pas dict aussi que ne les recognoissiez veritables, à part vous. Et en tout euenement qu'on ne les cognoisse quelque iour belles & bonnes: Dieu vueille que ce ne soit trop tard.

Or il ne faut faire aucune doute que la Chābre ne reçoie vne grande bresche par l'Edict que l'on y veut publier. Laisant à part le formulaire nouueau qu'y voulez apporter pour le passer, ie toucheray maintenant ce qui est porté par l'Edict; la creation de tant d'Officiers sans subject, sans necessité, sans raison. Car ie vous declare librement, que dès à present il y en a beaucoup plus qu'il n'est necessaire. Que voulez vous doncques introduire en ce lieu? Ce seroit autant de monstres que vous mettriez sur la montre, & vne supercristation politique qui ne doit, ny ne peut receuoir vie entre nous. La multitude effrenée de tant d'officiers inutiles est la dissolution d'une compagnie: & non seulement d'une compaignie, ains la desolation generale & vniuerselle de l'Estat. Je compare, & non sans cause, tant d'officiers inutiles & superflus que nous voyons par la France, à vn Lierre rampant le long d'un vieux mur, qui luy est comme vne belle tapisserie de nature (pour le reparer) quelque temps soustenuë par le mur: & pense l'on mesmement que ce Lierre en contr'eschange le soustienne. Ce neantmoins la verité est qu'interieurement, il le mine iusques à ce que l'ayant fait tomber, luy mesme demeure de là en auant sans appuy. Ainsi est il de ceste multiplicité d'officiers en vn vieux Estat. Ils font contenance de le reparer

& soustenir ; & d'estre aussi soustenus par l'Estat : Mais ils le rongnonnent petit à petit, iusques à ce que l'Estat tombant, il faut aussi que ces offices tombent , demourants illusoires & sans effect. Il n'y a ie ne diray prognostic , ains demonstration plus certaine que ceste-cy. Car ce sont termes en soy conuertibles. On introduit en vne Republique vne infinité d'offices superflus & non necessaires : doncques la Republique prend coup & tombe en ruine. Semblablement la Republique prend coup, doncques on introduit vne infinité d'offices. Celuy qui entre tous les historiographes a mieux sceu escrire la declinaison de l'Empire de Rome , est Zozime , laquelle il attribue nommément à l'Empereur Theodose, qui multiplia tous les Estats de son Empire, & d'un en fit deux , trois quatre. Quoy faisant, dict cest autheur, il fut contraint de surcharger son pauvre peuple de tant de daces & tributs, pour fournir à l'apointement des officiers, que combien que l'Empire fust de tous costez enuahy par les nations estrangeres, toutesfois il n'auoit le plus du téps plus grands ennemis que ses subjects , qui aimoient autant subir le ioug de l'Estranger, comme de leur propre Prince, pour vne esperance qu'ils auoient d'un plus doux traitement par ce changement.

Et si en toute compagnie on doit craindre la multitude immense des officiers, certainement c'est en ceste Châbre, où il ne se preséte presque cause en laquelle le Roy ne soit partie. En vne Cour de Parlemét, de cét causes s'il y en a deux

*La multi-
plicité d'of-
fices combie
pernicieu-
se à l'E-
stat.*

*D'où vint
la declina-
ison de
l'Empire
Romain.*

ou trois qui concernent l'intérêt du Roy, c'est beaucoup: En ceste Chambre de cent causes, il n'y en a pas deux qui soient de particulier à particulier. Qui me faict dire, qu'il faut apporter de tres-grands respects avant que de contaminer ceste Compagnie par vne pluralité d'officiers, qui n'apporte autre fruit qu'un desordre, & mespris à l'endroit du peuple. Vray Dieu! ne faut-il que la maladie de nostre France soit auourd'huy grande, veu que la medecine qu'on y apporte, n'est autre chose qu'une maladie? Nous voyons l'estranger (si ainsi le faut dire) à nos portes, prest de nous venir assassiner, chose certes fort à craindre. Par quel moyen voulons nous chasser ce mal? par vne autre maladie plus grande qui regne interieurement dedans nous. La premiere regarde le corps: La seconde regarde l'esprit: vous nous apportez l'Edict qui se presente, comme despendant de la publication d'iceluy vne partie de la conseruation de l'Estat. Grande pitié! qu'il falle que ceste conseruation se trame dedans nostre ruine mesme: & que les sages qui manient nostre Estat soyent contraints de le conseruer par la folie de nous autres! Surquoy sont bastis nos Edicts? Sur l'ambition inexcusable, ou pour mieux dire, inextinguible d'un tas de fols, lesquels bien qu'ils aient veu comme toutes choses se sont passées en pleine paix, pour la suppression des Estats, & qu'ils voyent n'y auoir auourd'huy aucun officier bien payé de ses gages: & qu'en matiere d'Estats & Offices, il n'y a rien d'assuré, comme mesmes l'exemple qui s'offre auourd'huy

nous l'enseigne, si est-ce qu'ils courent en poste aux Estats, c'est à dire à la pauureté, sinon qu'ils ayent opinion de trouuer leur ressource sur le pauvre peuple, & qu'ayans acheptez leurs Estats en gros, ils les débitent en detail. Il me semble desia voir ceste generation de viperes (ie veux dire ces partisans, lesquels soudain qu'ils furent esclous, tuerent aussi la France leur mere) Il me semble (dy-ie) les voir promettre vn mont-ioye d'argent qui se tournera en fumée.

Voilà vne partie des discours dont i'entre-tins la compagnie, iusques à ce qu'en fin ie pris mes conclusions telles qu'il pleust à Dieu m'inspirer, par ce que le Procureur general mon cōpagnon n'y estoit lors. Monsieur Dolu President (personnage d'honneur, demanda lors à Monsieur le Cardinal s'il n'entendoit pas que la compagnie opinast sur ceste publication, ainsi que portoit la commune vñance: lequel ayant respondu que non, & que la charge qu'il auoit du Roy estoit autre: Nostre preséce n'y est dōcques requise, repliqua le President, & aussi tost se leue de son siege suiuy de tous ses autres cōpagnons Presidents, & des Maistres, fors & excepté de Monsieur le premier President Nicolai, qui demeura en sa place, & moy sur piēds tenant le bureau. P'allay deux fois par le commandement de Monsieur le Cardinal pardeuers ces Messieurs qui s'estoient retirez au second bureau, affin qu'il leur pleust reprendre leurs places: mais nul d'eux n'y voulut entendre, sinon souz la condition d'opiner. Ce

temps pendant l'heure sonne, Monsieur le Cardinal & les Seigneurs de sa suite se leuent. Toute la compagnie se retrouvant au grand bureau, 'le supplie de ne vouloir trouuer mauuais ce qui auoit esté fait par elle. Je ne vous reciteray le reste des procédures, & comme le Roy qui lors seiournoit à S. Maur s'en ressentit, & depuis adoucit son opinion. La compagnie leuee, & l'Edict non verifié, ie pris la hardiesse de gouverner à quartier teste à teste ce bõ Cardinal & Prince, le suppliant tres-humblement que luy ieune ne voulust prendre de mauuaise part, ce qu'une barbe grise desiroit luy remontrer. Et d'un mesme fil poursuivant ma pointe, luy remonstray qu'estant Prince qui attouchoit la Courõne de si pres, comme il faisoit, il ne se voulust de là en auant charger de telles commissions ruineuses, ains laissast iouïr ce roulet à ceux qui pour n'estre de telle estoffe que luy, faisoient gloire de s'aduantager en credit, au desauantage du pauvre peuple. Qu'il n'auoit que trop de grãdeur, sans en affectionner d'autres par ces voyes extraordinaires. Chose dõt il meremercia, & me dit que c'estoit la premiere, & que ce seroit la derniere dont il se chargeroit à iamais. Il m'a semblé que vous ayant fait par mes autres lettres, part de la guerre qui s'estoit faite aux champs, ie ne vous deuois aussi taire celle qui s'estoit passée dedans nostre Chambre. A Dieu.

A Monsieur de S. Marthe.

*Dissembla-
tions estrā-
ges entre
les François.*



Velque vaillance qui reside en mon-
sieur de Guise; & feust-il vn second
Cesar, tous les deportemens ne plai-
sent au Roy. Il n'en faut plus leur
tesmoignage, que ce que nous veismes sur la fin
de l'autre annee; quand le Roy reuint enflé d'hō-
neur en ceste ville. Car combien que monsieur
de Guise ne desirast rien tant que de le suiure,
pour auoir quelque part en la congratulation
publique, de la victoire dont il auoit esté l'un
des premiers instruments; si est-ce que le Roy
ne l'a pas voulu, ains l'a renuoyé à son Gouver-
nement.

*Le Cardi-
nal de
Bourbon
desia uieil
pretend à
la Couronne,
bien que le
Roy fut
seul.*

Dieu sçait quel creuc-cœur celuy est. Il a
choisi pour sa retraicte la ville de Soissons, où il
sejourne avec Monsieur le Cardinal de Bour-
bon son oncle, & l'Archeuesque de Lyon &
autres Seigneurs: Cardinal qui n'espouse pas
de petites esperances, estimant que par vn droit
d'ancienneté, non de primogeniture, il doit
tourner sa Couronne Presbiterale en vne
Royale, & se faire declarer le plus proche des
Princes du Sang, pour succeder à nostre Roy:
Querelle vraiment d'Allemand! Qu'un vieil
Prelat qui est sur le bord de la fosse, dispute de
la succession d'une ieune Roy plein de vie & de
santé! En ceste ville de Soissons se rendent tous
les fauoris de ces Princes, qui communiquent
de leurs affaires ainsi qu'ils aduisent. Et à vray
dire, ceste assemblée nous appreste aucunement
à penser;

à penser; par ce que nous y voyons le mescontentement, ie ne diray point aussi grand, mais beaucoup plus que quand vers le Mois de Mars 1585. ils s'armerent. Quant au Roy, ie ne voy point qu'il face estat de poursuiure les Huguenotz; pour le moins nes'en parle il pas grandement en Cour. Ceux qui sont pres de luy, tournent toutes leurs pensées à nouveaux Edicts: Chose qui accueille en luy vne haine estrange de son peuple. Les prescheurs declament dans leurs Chaires contre les Daces extraordinaires qui courent auioird'huy par la France: Et par ce qu'ils voyent l'humeur du Roy plus disposée à la paix, qu'à la guerre, ils crient à gueules bees contre ceux qui desirent reestablis nos affaires en tel estat qu'elles estoient auparauât le souflement de la Ligue: les appellants tantost Politiques, tantost Machiauellistes; C'est à dire du tout sans Religion. De maniere que les Catholics sont auioird'huy diuisez en deux; les vns que l'on appelle Ligueux sont estroitement embrassez par nos Prescheurs; & les autres Politics, lesquels ils detestent. En vne mesme Table, malheur! vous verrez vne douzaine de personnes simbolizants en mesmes articles de Foy; toutesfois partialisez, les vns soustenans, qu'à quelque condition que ce soit, il faut exterminer l'heretique par sang, par feu, & pousser de son reste; les autres qui pensent estre plus retenus, disent que tout cela ne prognostique rien que la ruine del'Estat, & par consequant de nostre Religion, qui en fait part, &

*Les Catho-
liques com-
ment di-
uiseZ.*

qu'il vaut mieux caler la voile, & reprendre les anciens arrhements dont nous sommes sortis depuis ces derniers troubles. A quoy les premiers repartissent, que la ruine est plus affleurée, encores que plus tardive, en temporisant: & que c'est vn chancre qui ronge intérieurement nostre France. Tellement que ces temporiseurs sont plus à craindre que les Calvinistes, qui à face ouuerte combattent nostre Religion. En somme, le Politic contribue à l'opinion du Roy, qui est la paix; le ligueur à celle de Monsieur de Guise, qui est la guerre. Quelle est la meilleure, iem'en rapporte à ce qui en est.

Vne chose, sans plus, me desplaist, que les Moines & Escholiers se facent iuges des actions de nos Princes, sous pretexte de la Religion; & crains qu'il n'y ait en cecy quelque artifice. Le Roy voyant que leur ancienne liberté s'est tournée en vne licence desbordée, les a mandez par deuers foy, & leur a fait vne grande reprimende en presence de monsieur le Cardinal de Gondy nostre Euesque, les admonestant de n'y retourner plus, & que pour le passé il leur pardonnoit. Mais toutes ces remonstrances sont tombees en sourdes oreilles; Ny pour cela ils n'ont laissé de reprendre leur premiere piste. Ce sont de dangereux outils, pendant vne guerre ciuile, quand ils aiguissent leurs langues, pour l'un ou pour l'autre party. De les penser gagner par menaces, c'est vne folie. Il y a quelque autre moyen pour les appaiser. Ils disent, que quand ils preschent, le S. Esprit se loge en leurs

Les Prescheurs fort hardis à corner la guerre.

bouches ; Et qu'ils sont en la Chaire de verité , se donnans permission de dire ce qu'ils veulent pour les vns , & contre les autres. Et les mesdisans au contraire leur impropoient qu'ils sont hommes ; Et que comme tels, dedans vne guerre ciuile ils vendent leurs langues au plus offrant & dernier encherisseur. Qui n'est pas vn petit secret , que Ian Duc de Bourgongne sceut fort bien mesnager, quand pour se purger de l'assassinat du Duc d'Orleans, il mit en ieu maistre Ian petit, Docteur en Theologie son Escholier, & pensionnaire. A Dieu, de Paris ce dernier iour de Feurier. 1588.

A Monsieur de Sainte-Marthe.

Nous ioions tous au malcontent, & *Histoire au*
 auôs oublié toutes autres sortes de *long des*
 ieux. M^{rs}ieur de Guise & les siens de *Barricades,*
 dans la ville de Soissons du cōmance- *Et comme*
 ment rongeoient vn desdain : maintenant ils *le Roy tir-*
 ne le dissimulent point. Le commun peuple *ait de Pa-*
 de Paris s'entre-voit d'un œil de trauers, sous *ris.*
 ces mots partiiaux de Politique & Ligueur ;
 Le Roy mesmes n'est espargné par nos Pres-
 cheurs. Brief, combien que nos Troubles ne
 soient arriuez, que pour guerroyer le Hu-
 guenot, nous laissons nostre premiere visee,
 pour estre aujourd'huy les vns aux autres
 nouvelles butes de querelles. Estimez com-
 bien ce faisant nous fortifions le party Hu-
 guenot, puis que nous autres Catholicks som-

mes ensemblement en mauuais mesnage. I'auoy iusques icy pensé que les prediCTIONS des Astrologues iudiciaires estoient vrayes folies & fantosmes; maintenant ie ne sçay qu'en dire. Il y a deux cens ans, & plus, que les Allemands eurent vers Strassbourg vn grand Mathématicien, que les vns appellerent de Regiomonte, les autres Regiomontanus. Cettuy escriuit en sa langue les malheurs qu'il preuoyoit de uoir aduenir à vne longue posterité. Son liure fut mis en vers latins, sous le regné du Roy Henry deuxiesme, & imprimé à Lion par Gryphuis en l'an 1553. Plusieurs l'ont depuis gardé: Et vous puis dire, que trois ans deuant nos Troubles ie le vy à Stinx, és mains de monsieur le premier President, & deux iours apres en la Bibliotheque de monsieur l'Aduocat d'Espesse. Or voyez ie vous pry ce qu'il predict de cette presente annee.

Regiomonte fusseur d'Almanachs & prediCTIONS.

Les prognostics de plusieurs malheurs. qui arriueront l'an 1588.

Post mille elapsos, à partu Virginis, annos,

Et post quingentos rursus in orbe datos,

Octuagesimus octauus mirabilis annus

Ingruet, & secum tristia fata feret.

Si non hoc anno totus malus occidit orbis,

Si non hoc anno, Terra Fretumqueruunt;

Cuncta tamen sursum voluentur, & alta deorsum

Imperia, atque ingens undique luctus erit.

Moy-mesmes m'en estoy mocqué en la Congratulation que ie fis au Roy sur sa victoire. Mais, ô bon Dieu! il faut que ie demente mon liure: & neantmoins bien glorieux que les Astres soucieux de nous ayent particulieremēt sous cette generalité rencontré sur la France,

comme la premiere, & plus noble de toutes les Nations de l'Europe. Estans de cette façon diuisez dedans cette ville, comme ie vous escriuoy maintenant, quelques Catholicqs Liguez font courir vn bruit, que le Roy se deliberoit de les maltraitter. Ils en donnent aduis aux Princes qui estoient à Soissons; Plusieurs allées & venuës, qui ne se faisoient à couuert, affin d'estre par eux secourus. Le Roy mande à monsieur de Guise qu'il ne bougeast de la ville, iusques à ce qu'il eut receu autre commandement de luy. Comme nos affaires se passoient par ces mescontentemens reciproques; Voicy plusieurs Gentils-hommes & Capitaines Ligueurs qui arriuent à la file dans Paris; & se logent aux Fauxbourgs S. Germain des-Prez, aux enuiron de l'hostel de la Roche-Suryon, demeure de Madame de Montpensier. Cela ne peut estre si sourdement tramé, que le Roy qui lors seiournoit au bois de Vincenne n'en eust aduis. La Royne mere voulant aller prendre l'air à S. Cloud luy enuoye vn Gentilhomme pour sçauoir comme il se portoit. A quoy il fit responce, qu'il auoit ce iour-là pris medecine; Mais que pour cela il ne lairroit de retourner à Paris pour receuoir vne requeste que il sçauoit luy deuoir estre presétée par monsieur de Guise. Cela arresta court la Royne en la ville, & le mesme iour le Roy y vint. Deslors vne grande rumeur par toute la Cour. Et pour obuier à vne sedition, le Samedy septiesme de May est faite vne assemblée de ville, où fut opiné fort librement d'vne part & d'autre, cha-

cun diuerſement rendant compte des mouuemens de ſon Ame. Enſin fut conclud que l'on deputeroit gés pour aller voir par les maiſons, quels Eſtrangers y eſtoient logez, quelles affaires les y detenoient: & faire commandement aux Vagabonds de ſortir. Mais tout cela ne fut que vent. On propoſa autres moyens au Roy pour y remedier; Et le plus prompt & expedient fut de loger au meſme Faux-bourg les quatre mille Suiſſes qu'il auoit fait de nouveau venir. Quelques vns à la cholere paſſerēt plus outre, dilans que pour eſtouffer ce feu, il falloir faire pendre vne douzaine des principaux conducteurs de ceſt œuvre. Le vent en vient à leurs oreilles; ils prennent cette colere pour l'effect; Et en eſcriuent à Monſieur de Guiſe, afin quil luy pleuſt de les ſecourir. Et pour le haſter adiouſtent, que les potences eſtoyent toutes preſtes en l'hoſtel de ville. Sur ces entreſaictes il aduiant que monſieur d'Espernon prend la route de Normandie auec vne infinité de Nobleſſe pour ſe mettre en poſſeſſion de ſon nouveau Gouuernement. Ces meſſieurs eſtiment qu'il ne falloir laiſſer enuoler cette belle occaſion. Le Roy eſtant demantelé d'vne grand partie de ſes Gentils hommes, eux enuoyent deux & trois recharges à Soiſſons, par Brigard Aduocat. En ce martel ſe paſſent les Vendredy, Samedy & Dimanche. Le Lundy neufieſme monſieur de Guiſe arrine en poſte, & vint deſcendre en la maiſon de la Royne mere, qui voulut prendre le deuant du Louure, pour faire trouuer bonne

*Monſieur
de Guiſe
arrinē à
Paris.*

cette venuë : Mais il la pria de permettre qu'il l'accompagnaſt. Ce qui fut fait. Elle le preſenta au Roy, lequel d'un viſage hagard, luy demanda pourquoy il eſtoit venu, veu qu'il luy auoit par expres enuoyé le Seigneur de Belieure pour le deſtourner de ce voyage? A cela il luy *ſa reſponſe au Roy.* reſpondit, qu'il eſtoit venu ; premierement pour luy faire tres-humble ſeruiſe, puis pour luy apporter ſa teſte & ſe juſtifier contre les calomnieuſes charitez qu'on luy preſtoit ; Et finalement pour mourir avec pluſieurs ſiens amis, que l'on deſtinoit à la mort ; ainſi que le bruit commun eſtoit. On dit qu'à ce mot le Roy changea de couleur, & demeura court; Toutesſois ayant quelque peu apres repris la parole, monſieur de Guiſe ſ'en alla chez ſoy, tellement accueilly du menu peuple, qu'il n'a- *Cōment re- cueilly à Paris.* uoit pas moyen de paſſer. Entre autres vne bonne vieille fend la preſſe, qui luy dit qu'elle ne ſe ſoucioit plus de mourir, puis que Dieu luy auoit fait la grace de le voir ; Et à l'inſtant meſmes fit toucher ſon Chapellet à ſes habillemens. Vn couureur eſtant ſur vne maiſon en la ruë S. Martin, ſçachant qu'il paſſoit par là, ſe deſcend avec vne corde au hazard de ſa vie, affin d'auoir moyé de l'enuiſager. Il ſe prepare cependāt pour preſenter vne Requeſte au Roy baſtie à Soiſſons, dont le premier chef eſtoit de faire aſſembler les trois Eſtats, pour la reformation du Royaume. Le lendemain le Roy fait redoubler ſes gardes tant Francoiſes que de Suiſſes deuant le Louure; monſtrant par cela la deſſiance qu'il auoit de cette venuë. Ce neant-

*Troupes
dispersées
par la ville
de Paris.*

moins ce iour mesmes il le vient saluër au matin avec quelque suite de ses principaux amis & seruiteurs, chacun faisant diuersement bon-ne mine à mauuaisieu. Le Mecredi le Roy ne voulant qu'en le suppliant on luy commädast, le veit avec vne chere plus facheute que le iour precedant, & se fit au soir apporter les clefs des portes de la ville. Le Ieudy douziesme sur la Diane il fit entrer toutes ses gardes, quel'on dispose par les principaux cantons, aux Hales Cimetiere S. Ian, place de Greue, Marché-neuf, pres nostre Dame, vers le petit-Pont pour se venir saisir de la place Maubert; les principales ruës tapissées d'un costé & d'autre de telle maniere de gens armez. A nostre leuer le peuple void ce nouuel & inaccoustumé spectacle; la peur se saisit de luy, estimât que ce fut vne garnison, que l'on voulust mettre en la ville, nouveau suiet de seruitude. Quelques vns qui auoient plus de nez ingeoient, que c'estoit vn preparatif encontre monsieur de Guise, auquel on ne vouloit que le peuple apportast obstacle. Chacun court aux armes; Les Capitaines s'assemblent en leurs Dixaines; Le Roy pour nous asseurer mande aux gens de la iustice, qu'ils ne discontinuassent leurs Audiences. Le matin monsieur de Guise inesperémēt salué de ces nouuelles est de prime face aucunémēt estonné; si ne perdit il cœur. Quelques vns des siens estoient d'aduis de quitter la ville; mais il leur fit respōse, que qui auoit peur s'en allast. De ce pas il va à la Messe avec sa famille en la Chappelle de Brac, sur les sept heures, sans porter sur le front

aucunè marque de crainte. Ce temps pendant il ne s'endort, ains donne ordre de se fortifier par l'entremise de quelques Citoyens, qui luy estoient voüez. Et voyant les affaires se disposer en quelque esperance de bon train, il enuoye le Cheualier d'Aumalle d'un costé, & le Seigneur de Brissac d'un autre, pour sonder le cœur du Parisien. Le Seigneur de Brissac préd pour son quartier la place Maubert, où il arrive sans destourbier : Car combien que les gardes fussent en armes, si auoient-ils commandement, comme on dict, de ne se remuer. Ceux qui suiuoient l'un & l'autre Seigneur confirmoyent au peuple, qu'on vouloit mettre garnisons en nos maisons, & nous asservir souz la misericorde du soldat. Au demeurant que monsieur de Guise se portoit bien : Les soldats du Roy vouloient gagner pied à pied la place Maubert. Le peuple commence de se barricquer vers la rue Gallande, pour leur bouscher le passage. Les Suisses ne pouuans par ce moyen passer, font alte. A l'exemple de ceste barricade chaque quartier fait le semblable, pour fermer le pas aux autres soldats. Vn certain Rodomont de Cour, qui auoit promis monts & merueilles au Roy, voyant que sa promesse s'esuanoüissoit à neant, par vne fureur desesperée, dict sur le Pont S. Michel, qu'il n'y auroit femme de bien qui ne passast par la discretion d'un Suisse; parole qui depuis fut cher vendue au Roy, & qui aiguïsa grandement la fureur du peuple. Vers vne heure de releuée le Seigneur de Brissac reuenant sur ses premieres brisées, avec

*Les barricades faites
à Paris, &
quel fut
leur commencement.*

quelque troupe bien montée, s'assemble chez le Colonel de la place Maubert; Et apres auoir capitulé de ce qui estoit à faire, suiuy de plusieurs gens de ceste ville armez, luy à la teste de la compagnie, commande aux Suisses d'estaindre leurs mesches. A leur refus, l'escarmouche commence en la ruë S. Iacques. Iamais on ne vit chose mieux conduite, ny plus heureusement succeder. Les Suisses abandonnent leurs armes, & baissēt les mains. On en auoit disposé vne bōne partie au marché-neuf, lesquels pour euitier vne boucherie de leurs persōnes, priērēt d'estre enfermez tous desarmez dās la boucherie de cel lieu. De mesme façon le Gast, l'vn des Capitaines des gardes Françoises, qui occupoit les aduenues de la ruë S. Iacques, fut desarmé; & pour le sauuer fut confiné luy & les siens dās vne maison. La matinée fut pour le Roy; iusques à dix heures; le demeurant du iour, pour monsieur de Guise, lequel se voyant au dessus du vent mōté à cheual en pourpoint, suiuy d'vne grande compagnie de gens, se promeine par toute la ville; Vfant certes de son bō-heur avec vne merueilleuse modestie. Car tout ainsi que le matin pēsant estre au dessus de toutes affaires, il ne raualla rien de sa magnanimité accoustumée; aussi lors qu'il fut au dessus, il ne se haussa dauantage; Ayant toute ceste iournée là vne mesme teneur de visage; voire voulut obliger de toutes sortes de courtoisies ses mal-veillans. Car il desgagea sur les quatre heures du soir le Gast avec toute sa compagnie, leur-faisant rendre leurs armes. Le semblable fit-il aux Suisses

Magnanimité de monsieur de Guise.

qui tenoient garnison fermée dans la bouche-
rie du Marché-neuf; & encores aux autres, qui
estoyét en la Greue, lesquels sans sçavoir secours es-
toient en danger d'estre mis en pieces par les
soldats de Paris; Et les renuoya tous au Roy. Il
n'est pas qu'il n'exerçast pareille courtoisie en-
uers le Seigneur de Tinte-ville, Gouverneur
de Troye, qu'on disoit estre en mauuais mesna-
ge avec luy: Iamais succès ne fut plus heureux
que cestuy. Car de l'appeller victoire; Le luy fe-
rois tort; ayant eu par vn mesme moyen le des-
sus de ceux qui le vouloyent offenser, & de soy.
Et estimoient plusieurs personnes, que par vn
grand mystere de Dieu il auoit, sans y penser,
ataint au comble de ses desirs; & qu'il pouuoit
de là en auant commâder pres du Roy, & souz
son authorité, ainsi que bon luy sembleroit, es-
tant mesmement assisté du vent & de la faueur
populaire. Toutes fois le lendemain fortune luy
liura toute autre chance.

Le Vendredy, le Roy voyant que le iour pre-
cedent non seulement ses affaires ne luy estoient
reüssies selon son project: Mais, qui plus est, que
le peuple taschoit de forcer ses gardes ordinai-
res, où ils sont iournellement assis vis à vis du
Louure, il s'aduise d'vn nouueau stratageme. Il
fait semblât de vouloir entrer en quelque con-
ference avec monsieur de Guise, pour adoucir
toutes choses; & de fait luy enuoya dire par le
Capitaine de S. Paul, l'vn des siés, que la Royné
sa mere s'en iroit tenir l'apresdinee conseil en
l'hostel de Guise, cōme aussi elle y alla. Mais elle
ne fut à mi-chemin, que le Roy sort de Paris par

*Le Roy sort
de Paris &
comment.*

la porte Neufue, & vient prendre ses botes aux Capucins, où il est accueilly par deux ou trois cens cheuaux, avec lesquels il alla faire son logis à Trapes. Ce partement apporta vn esbahissement infiny à tout le monde. Iamais ne fut si furieuse desbauche de peuple, que celle du Ieudy & Vendredy. Car les Religieux mesme quittans leurs frocs s'estoyent armez deuant leurs Monasteres; Et le Samedy quatorzième du mois, toutes choses se trouuerent si calmes, que vous eussiez dict, que c'estoit vn songe. Les portes de la ville fermées par deux iours furent lors ouuertes, le commerce ordinaire remis, avec toute la modestie que l'on pouuoit desirer au peuple, pour auoir seulement perdu l'objet & presence de son Roy : Tesmoignage tres-assuré du mal-talent qu'il luy portoit : ie veux & entends parler du commun. Voilà l'histoire de huiet iours, dont ie vous ay voulu faire part, bien estonné de voir nos affaires constituées en vn si piteux estat : Mais que i'aye recueilly mes esprits ie vous en manderay mon aduis. A Dieu, de Paris ce 20. de May 1588.

A Monsieur de S. Marthe.

Il remarque les fautes qui furent faites aux barricades tant de la part du Roy que de

E ne suis homme d'Estat ; Toutesfois ie me donne la liberté de iuger des coups d'Estat, tels que celuy qui s'est passé dans Paris depuis que M^{rs}ieur de Guise y fut arriué. Permettez moy doncques, ie vous prie, de commenter sur les fautes qui me semblent auoir esté faites, & par le Roy, & par Monsieur de Guise; combien que chacū d'eux soit tres-sage & tres-

aduifé. Ie dy fautes tres-lourdes & inexcusables. Ie commenceray par monsieur de Guise ; quand il vint dans Paris avec sept cheuaux seulement, luy pouuez vous imputer à sagesse ; veulez desfenfes expresse qu'il auoit du Roy, de venir ; & que dès sō premier abord il cognut & au visage, & en la parole du Roy le melcontentement qu'il en auoit ; Et encores plus, par les gardes qu'on redoubla le lendemain deuant le Louure ? Celuy qui voudra excuser monsieur de Guise dira, que l'on peut recueillir de cela combien il s'estimoit innocent, contre les calomnies qu'on luy impropéroit ; veu qu'à li petit bruit il auoit apporté la teste au Roy. Un autre plus mauuais garçon soustiendra, qu'il pensoit auoir ses intelligences assurees avec le commun peuple par tout la ville. Ie ne sçay si ceste derniere leçon est vraye ; Mais quant à moy, ie m'assure qu'il estoit en la puissance du Roy, les trois premiers iours, de s'assurer de luy & des siens, dans le Louure, comme il luy eust pleu. Et s'il l'eust faict, il falloit tirer le rideau, la farce estoit iouée contre monsieur de Guise. Les corps generaux du Parlement, Chambre des Comptes, Cour des Aides, Preuost de Paris, & Siege Presidial ; comme aussi les Preuost des Marchands & Escheuins de la ville, qui en telles esmeutes ont grande voix, estoient à la deuotion. D'ailleurs il auoit faict venir quatre mille Suisses de surcroist, sans en ce comprendre ses autres gardes ordinaires : tellement que tous ces particuliers Bourgeois à la requeste desquels monsieur de Guise auoit

*celle de
Monsieur
de Guise.*

pris la poste, y eussent perdu leur escrime. Le Roy ne suiuit pas ce Conseil; mais comme il le plaist en nouueaux theatres, fit le Ieudy asseoir ses gardes le long des ruës, avec cōmandement expres de ne ferir: Qui estoit en vser cōme d'espouuentaux de cheneuiere. Car par ce conseil il mit tous les Citoyens en alarme, hormis quelques particuliers ausquels il s'estoit descouvert. Et à dire le vray, cest aduis pouuoit estre de quelque merite, si les Parisiens eussent esté desarmez: mais la discipline estant aujourd'huy militaire entre nous, & toutes les dixaines armées, il eust esté impossible aux gardes de venir à chef de leur entreprise; voire quand le Roy leur eust lasché toute bride: Car nous estions à l'abry des coups, par le moyen de nos maisons, flancquez d'un costé de ruë à l'autre; partât les soldats nous seruiët de butes. Il ne faut en telles affaires rien entreprendre, ou bien ne iouer à petit semblant. S'il visoit à monsieur de Guise, il le falloit dès le matin inuestir à l'impourueu, sans luy donner loisir de respit. Les Cours Souueraines & la Iustice se mettans de la partie, avec la force, le peuple n'eust eu moyé de se mutiner, ny d'en venir aux armes; estans mesmes tous les Capitaines de la ville creatures du roi, & dont il s'estoit asseuré en les eslisant. Il ne le fit pas, mais par vn autre aduis il distribua ses gardes par les cantons, cōme statuës seulemēt, donnāt occasion au peuple de se mutiner, sans prendre langue de ses Capitaines; & aux partizans de monsieur de Guise de se faire voye par toute la ville sans crainte. Brief, donnez telle

façon qu'il vous plaira à ce conseil, vous n'y trouuerez rien de conduite en l'entreprenant, & moins encores en l'exécutant. Je vous en puis presque autant dire de monsieur de Guise, pour le Vendredy: Car ayant eu cest heureux succès le Ieudy, il deuoit sur toute chose donner ordre, ou par beaux semblâts esquels il n'est point apprentif, ou par autre voye, que le Roy ne dessemperast la ville. Par sa presence toutes choses se fûsét raquoisées. Et neâtmoins de là en auât il eust tenu pres de luy le rang & grade qu'il desiroit. Et maintenant que le Roy est party, ceux qui seront pres de luy trompeteront par toutes les Nations, que monsieur de Guise est rebelle. Et nous Parisiens serons mis en ce mesme predicament: Conclusion; en tout ce qui s'est passé dedans nostre ville, pendât ces cinq iours, vous n'y trouuerez qu'une chaine de lourdes fautes; Faute en monsieur de Guise, quand le Lundy il vint en poste luy septiesme; Faute au Roy qui ne se saisit de luy le Mardy ou Mecredy, côme il pouuoit, s'il estoit entré en quelque mauuaise opinion de luy. Autre faute le Ieudy en ceste grande leuée de bouclier que le Roy fit; Faute derniere en monsieur de Guise, quand le Vendredy il le laissa sortir de la ville. Et au bout de tout cela, une plus grande faute en moy simple subject, de vouloir interposer mon iugement sur si hauts suiets. Mais puis que si licentieusement nous auons abusé de nos armes dans Paris, pourquoy ne me fera-il permis d'abuser maintenant de ma plume? A Dieu.

A Monsieur de S. Marthe.

*Suite de ce
qui se passa
après les
barricades.*

*Excuses des
Parisiens
au Roy.*

*Response
du Roy.*

LE Roy estant party de Paris, s'est retiré en la ville de Chartres. Du iour au lendemain de son partemēt, monsieur de Guise a depesché par deuers luy le Capitaine de Saint Paul, porteur d'vnes lettres pleines de respects & obeïssances. Messieurs du Parlemēt, des Comptes, des Generaux des Aides, & du siege Presidial, ont diuersement député quelques Seigneurs de leurs corps, pour faire toutes sortes d'excuses & submissiōs à ce requises; & nommément que le scandale estoit procedé d'vne crainte que le peuple auoit eue des garnisons, dōt il sembloit estre menacé; mesmes pour quelques paroles hōteuses dont les cōducteurs de ceste orne auoient brauaché les femmes de bien & d'honneur. A quoy le Roy debonnairement a fait responce, qu'il n'auoit iamais pēsé de mal traiēter sa bonne ville de Paris; mais biē de faire chasser quelques estrāgers sans adueu, qui estoient venus pour troubler le repos commun; Que cela seul l'auoit occasionné d'espandre ses forces. Qu'entre toutes ses autres villes il auoit specialement chery & aimé celle de Paris, en laquelle il auoit choisi son ordinaire demeure; Et n'estoit si mal aduisé d'estimer, que quatre mille Suisses eussent esté bastants pour tenir ce grand peuple en bride. Que quand il seroit reblandy par nous, ainsi qu'en telles affaires estoient les Princes Souuerains, il nous ouuriroit les bras; Sinon il estoit resolu de n'y espargner

& spargner rien de ce qui appartiendroit à l'ex-
 emple de la vindicte publique. Or pendant ces legations nous-nous sommes emparez de la Bastille & du Bois de Vincennes, & mis mō-
 sieur de Perreuse Preuost des Marchands en prison. messieurs Lugoly, & le Côte Escheuins, & Perrot Procureur du Roy de la ville, se sont
 garentis par la fuite. D'vne mesme main on a
 esleu pour Preuost des Marchands Marteau, Maistre des Comptes ; pour Escheuins Ro-
 land, Compan, des Prez, Cotteblanche : & pour Procureur de la ville, Brigard ; Mettant
 en auant que tous les Estats del'Hostel de ville
 estoient populaires ; Et qu'il n'y falloit point
 de Procureur du Roy. En toutes ces assem-
 blees de ville, nul de Messieurs du Parlement,
 des Comptes & Generaux des Aides n'a esté
 delegué pour s'y trouuer. Depuis on a depu-
 té quelques honorables Bourgeois, pour
 aller à Chartres supplier le Roy, qu'il luy
 pleust confirmer toutes ces Eslections ; Et
 par mesme moyen le Seigneur de Meneville
 a porté vne Requeste au Roy que les Catho-
 lics luy faisoient, tendant à trois ou quatre
 points. Nous ne sçauons quel fruct ces mes-
 sieurs rapporteront de leur legation. Ce-
 pendant le Roy a depesché vn Edict conte-
 nant la suppression de trente sept autres, qui
 couroient à la foule du peuple ; Lequel a esté
 verifié au Parlement le ving septiesme May ;
 & le lendemain en la Chambre des Com-
 ptes. Pareillement nous en auons veri-
 fié vn autre par lequel le Roy sup-

*La Bastille
 saisie & le
 Preuost des
 Marchands
 emprison-
 né.*

*Officiers
 nouveaux
 esleux
 par le
 peuple.*

prime tous les Contents, qui se faisoient sous noms supposez principal malheur & corrupte de nostre Regne. Nous attendons de iour à autre pareilles reformatiōs. A Dieu.

A Monsieur de S. Marthe.

*Il despire
la calamité
du tēps, &
en descript
les misē-
res.*



LE Seigneur de Meneville, & les Deputez de Paris sont de retour, sans auoir rapporté grand fruit de leur legation.

A ce que ie voy, les affaires de nostre France sont disposees à vne guerre Ciuile; Et par consequant à la ruine generale de nous tous. Le Roy est arriué à Mante. Le bruit est qu'il la veut fortifier, pour retrancher au Parisien le traffic de la Normandie. Le Seigneur d'Espernon s'est retiré de la Cour. Monsieur de Guise s'est asseuré de Corbeil, S. Cloud & Meulan. Il depesche Commissions de toutes pars. Nous voyons desia les champs couuerts de gendarmes, qui mangent, rauagent & ruinent tout le plat-pays. O miserable spectacle! Il y a long temps que ie rongie ie ne scay quelle humeur melancholique dans moy, qu'il faut maintenant que ie vomisse en vostre sein. Je crain, ie croy, ie voy presentement la fin de nostre Republique. Nous ne pouuons denier que n'ayons vn grand Roy; toutes-fois si Dieu ne l'aduise d'un œil de pitié, il est sur le point ou de perdre sa Couronne, ou de voir son Royaume tout renuersé. Les Corps Politiques ont certaines propositions, par lesquelles ils prennent leurs commencemens,

progrez & periodes. Introduifez y vn bigarrement de Religions, foule extraordinaire des Subiects, mefcontentement general des Princes, la Republique eft de telle façon malade qu'il eft malaisé del'en releuer. Il ne faut pratiquer ny l'Allemand ny le Suiſſe, ny l'Eſtranger, pour ce changement. Tant de pauvres gens malcontents ſont autât de materiaux de la ſubuerſion del'Eſtat. Le vray ſubſide dõt le Prince doit faire fonds, eſt de la bien-veillance de ſes ſubiects. La plus grande partie de ceux qui ont eſté pres du Roy, ont eſtimé n'auoir plus beau magazin pour ſ'accroistre, qu'é luy fourniffant memoires à la ruine du pauvre peuple; C'eſt à dire à la ruine de luy meſme: Dignes certes, ces malheureux miniſtres, d'vne punition plus horrible, que de celui qu'on tire à quatre cheuaux, pour auoir voulu attenter contre la Maieſté de ſon Prince. D'autant qu'en conſeruant leur grandeur par ces damnables inuentions,, ils ont mis leur maiſtre en tel deſarroy que nous le voyons maintenant.

*Quels ſurēt
cause du
malheur d'
Henry III.*

Au milieu d'vne infinité de grâces & faueurs que les Rois reçoient de Dieu, ils ont vn particulier malheur, de n'entendre la verité, s'ils ne s'y diſpoſent d'eux-mesmes. Ceux qui ont ceſt honneur de les approcher, pour ne leur deſplaire, ſe conforment du tout à leurs volontez. De maniere qu'vn pauvre Prince affligé de mille flateurs, ne cognoiſt iamais ce qui luy eſt bon, ſinon lors qu'il n'en eſt plus temps, & quand il eſt au deſſous de toutes ſes affaires.

*Malheur
particulier
des Rois.*

Car adonques son infortune luy enseigne les fautes par luy commises pendant qu'il auoit le vent en pouppe. De ma part, ie ne seray iamais del'aduis d'Eslope le Phrygien, quand il remōstra à Solon, que celuy ne deuoit viure avec les Rois, qui ne leur vouloit applaudir. Plus me plaist la responce que luy fit Solon, luy disant; que tout aucontraire, nul ne deuoit se presenter deuant eux, pour leur deguiser ce qui estoit vray. Nous deuons toutes choses au Prince, qui nous est ordonné de Dieu : mais sur tout vne verité, de laquelle s'il ne se veut rendre capable, c'est lors que l'on peut dire de luy, ce que nous lisons dans la Bible, des Rois d'Ægypte, qui s'estoient obstinément vouëz à l'affliction des enfans d'Israël; Que Dieu'auoit auégulé les Pharaons; voulant dire qu'ils estoient tombez en sens reprouué, & sur le point de leur cheute. Et passeray encores plus outre; Car ie ne me contenteray de donner selon ma conscience vn bon aduis à mon Roy par ambages; Par ce que ie le trouueray preueni de quelque opinion contraire, comme faisoit autre fois vn Seigneur de nostre temps, lequel apres auoir donné vn sage conseil, ne se formalisoit iamais pour le soustenir. C'est peu que d'estre preud'homme, si l'on n'accompagne la preud'homnie d'vn force. Ie veus qu'apres quel'homme de bien aura avecques toute modestie remonstré à son maistre ce qui est bon, qu'il le soustienne fortement, & luy remonstre les inconueniēces qui luy aduiendront, faisant le contraire. Car encores que sur le chāp

Nous deuons à nostre Prince sur tout vne verité.

le Prince ne le digère, si est-ce qu'auec le temps il le trouuera tel qu'il est : Et l'accoustumant à telles leçons, cōbien que facions peu pour nous si faisons nous beaucoup pour luy, & pour son Royaume. Ie sçay qu'è ce faisât on dure moins; mais lequel vaut-il mieux, ou en ployant à toutes les volōtez de son maistre, mourir sur les batus, au milieu de la corruption de la Cour; ou bien rompre & faire vne honneste retraite en sa maison; telle que fit le Chancelier de l'Hospital; & cependant conseruer celuy auquel nous deuons nostre bien, & laisser tout d'vne suite vne bonne bouche de nous, auec vn honnorable regret en la memoire de celuy auquel nous auons despleu?

Le Chancelier de l'Hospital loué pour sa retraite.

Dieu doia nostre Roy de plusieurs grandes benedictions, qui luy sont particulieres: Mais comme il est né homme, aussi ne peut il estre accompli de tant de bonnes parties, qu'il n'ait des imperfectiōs. Y a il aucun Seigneur, (ie n'en excepteray pas vn) de ceux qui ont eu part en ses bonnes graces, qui ait, ie ne diray point resisté, (ce mot seroit mal mis en œuvre contre vn Roy) mais qui ne se soit estudié de fauorizer en toutes choses ses opinions, ores qu'elles se fouruoyassent à l'œil, du chemin de la raison? On le voyoit naturellemēt enclin à vne liberalité. C'estoit vne inclinatio qu'il tenoit de la Royne sa mere; vertu vrayement Royale, quād elle ne se desborde à la foule & oppression des subjects: Qui est celuy qui par ses importunitéz extraordinaires n'è ait abuzé? Quelques corrompus de Cour ne luy chantoiet du cōmencemēt

*Henry III.
enclin à la
Liberalité.*

autre chose, sinõ qu'il n'y auoit rien plus digne d'un Roy, que d'estre veritable, propositiõ tres-plausible: mais ils apportoiẽt vne glose, qui gaistoit le texte: C'est à scauoir, que quãd vn Roy auoit promis quelque chose, son honneur y demouroit engagé, s'il n'entretenoit sa parole. Et qu'il n'y auoit police anciẽne en tout son Royaume, qui peut ou deũt cõtreuenir à cette Loy, laquelle prenoit sa racine du tige de la nature, cõmune & generale à tous peuples. Cõment? Pourriez vous mieũ cõbatre les opiniõs d'un bon Roy, que de la Verité & Hõneur ensemblement? Cette propositiõ s'insinuẽ à lõgs & doux traits dedãs son esprit. Le malheur veut que nul deses principaux Officiers, qui estoient pres de luy, ne la controolle. Voylà comment vn grãd & bõ Prince se laissant en premier lieu emporter par ses volonte, puis vaincu par les importunitẽs des siens; en fin non secouru de ceux qui pour la necessitẽ de leurs charges y deuoient auoir l'œil, il n'a pas esté malaisẽ de voir toutes nos affaires tomber au desordre & confusion telle que nous voyons aujourdhuy.

Sur ce pied a esté bastie la ruine de nostre France; premierement par ie ne scay quelle malheureuse inuention de Contents (qui ont rendu tous les gens de bien malcontents,) lesquels ne pouuans à la longue fournir aux liberalitez extraordinaires du Roy, ont eu recours à vne infinitẽ de meschãs Edicts, nõ pour subuenir aux necessitez publiques, ains pour en faire dons, voire au milieu des Troubles, à vns & autres. Et pour leur faire sortir effect, on a forcẽ les Seigneurs des Cours Souueraines de les passer, sã-

Cause principale des malheurs de la France sous Henry III.

Contents causes de beaucoup de maux.

toſt par la preſence du Roy, tant toſt des Princes du ſang: Liberalité qui ne s'eſtoit iamais pratiquée en autre Republique que la noſtre. Et ſi l'argét n'y eſtoit prôpt, pour ſupléer à ce deffaut la malignité du tēps produiſit vne vermine de gēs, que nous appellâmes par vn nouveau mot *Partiſā*s, qui auācoiēt la moitié ou tiers du denier, pour auoir le tout. Race vrayement de Viperes, qui ont fait mourir la France leur mere, auſſi toſt qu'ils furent eſclos.

*Partiſans
maudite
vermine
en France*

On adiouſta à tout cela pour chef-d'œuure de noſtre malheur, vn eſloignement des Princes & grāds Seigneurs, & aduancement des moindres pres du Roy. Ie vo⁹ racôpte tout cecy en gros. Car ſi i'auoy entrepris de vous particularizer en detail, & par le menu cōme toutes ces choſes ſe ſôt paſſées l'ācre me deffaudroit pluſtot que la matiere. Mais quel fruit a produit tout ce meſnage? Vne oppreſſiō de tous les ſubieçts, vne pauureté par tout le Royau me, vn meſcōtētemēt general des grāds, vne haine preſq; de tout le peuple encontre ſon Roy. Et puis au bout de tout cela, que pouuions-nous attendre autre choſe, que ce meſchef, qui nous eſt ces iours paſſez aduenū? Ie ſuis & ſeray tāt que l'Amē me battra au corps, fidelle ſubieçt & treſhūble ſeruiteur de mon Roy. Dieu m'enuoye pluſtoſt la mort que ie ſoye autre: Ce nonobſtant voyant tous ces faſcheux deſportemēs, ie ne ſcay comment i'ay touſiours craint; (Que dy-ie, craint?) Mais ie me ſuis aſſeuré de voir quelque iour ce que ie voy maintenāt, vn deſarroy general de noſtre Frāce. Et de faiçt 4. ou cinq mois apres le ſouſleuēment de la Ligue, en l'an 1585. il m'ad-

uint de faire ce Sonnet, que ie communiquay à
quelques miens Amis.

Ie veux la Paix, & la guerre ie corne,

Ie hay la Ligue, & la Ligue ie suis;

Les petits j'aime, & les Grands ie les fuis;

Mes Amitiez sans mesure ie borne.

De mes Subiects ie recoy mainte escorne;

Roy deux fois Roy, Roy presque ie ne suis;

Pour plus donner cent fois que ie ne puis.

Ie vy d'Edicts, dont mon peuple j'escorne.

Tout mon Conseil la verité me tait;

Autre conseil que le mien ne me plaist:

Absolument ie veux ce que j'ordonne.

O pauvre Roy Henry tu ne vois pas,

Que tout cela n'est autre chose, hélas!

Qu'un changement fatal de ta Couronne.

Et ce que ie predy en cecy de luy, j'e diray autât
de tout autre, qui vsera de mesmes procedures.

Tout ainsi cōme au corps humain qui se dis-
pose à maladie, on accueille petit à petit les
mauuaises humeurs, qui se ramētoient à nou-
tout d'un coup, lors que penlons estre moins
malades: Ainsi en a il pris au Roy. Tant de no-
ualitez mises fus, à la foule des pauvres subiects
sans subiect, estoiet autât de malignes humeurs
ramassees au corps de nostre Republique; les-
quelles ne nous promettoient autre chose, que
ce grād esclat de scandale, que nous auons veu
dās Paris. C'estoit vn pus, c'estoit vne bouë qui
se couuoit dās nous, à laquelle le medecin super-
naturel a voulu dōner vêt, lors que nul de nous
n'y pēsoit. Le Roy mesmes l'a fort biē recogneu;
quād soudain apres estre arriué à Chartres, pour
dōner quelquel ordre à ce mal, il a reuouqué trē-

ce malheureux Edict & encores promis par autres lettres patentes, de n'vser plus de Cōtents. Pleut à dieu que deux mois auparauāt il les eust reuoquez de sō seul instinct, affin que ceux que ie voy cōtre luy vlcerez eussent estimé luy deuoir totalemēt ceste grace; & nō au scādale aduenue. Mais c'est vn mal commun à tous Roys, de ne recognoistre iamais leurs fautes, que quand ils sont visitez de Dieu. Et toutesfois en tels accessioires, quand ils commencent d'auoir recours à luy, par vne contrition de cœur, ils sont ses mieux aimez. Entre toutes les histoires ie n'en trouue point qui me plaie tant que celle des Roys, dans la Bible. Si vn Roy se gouuerne bien enuers son peuple, Dieu benit aussi sa fortune; Si mal, il est chastié en sa personne, ou en ses enfans, selon le plus ou le moins de son demerite. Tous les secrets de Machiauel y faillent. De ma part, ie ne pense point que iamais Roy ait receu vn plus grād affront de son peuple, (il faut que ceste parole à nostre tres-grand hôte m'elchape) que celuy qu'a receule nostre. Que luy, qui à son retour de la Beauce auoit esté receu auec tant de congratulations & applaudissemens du Parisien, six ou sept mois apres ait esté caressé de telle façō qu'auons veu, en la iournée des barricades; mēme dans vne ville de Paris, qu'il auoit aimée & chérie par-dessus toutes les autres. Que le Ieudy & Vrededy qu'il demeura dans la ville, on ne veit iamais plus grand chaos & emotion populaire; & le Samedy soudain que l'on fust aduertie de son partemēt, nous veismes vn raquoisement ino-

piné de toutes choses : Signe malheureux & trop expres de la haine qu'on luy porte. Mais quel remede à tout cecy, me direz vous? Si vous croyez à Hipocrat; *Aux maladies desesperées il ne faut apporter aucun remede*: Si à Celse, Il vaut mieux y en apporrrer vn tel quel, que d'abandonner le malade. Ie vous en diray vn fouuerain. Il me semble que deuous fuiuere le formulaire commun des medecins de nostre temps, lesquels aux maladies chroniques, se voyans au bout de leur art, enuoient leurs patients aux fontaines de Cepoix, Luques, Poulques, Bourbonnenfy, Aigues-caudes. Remede dont ils ne peuuent rendre raison, que d'vne longue experience des guairisons qu'ils en ont veu aduenir: Ainsi la maladie qui se presente entre nous, estant vne vraye maladie du temps, ie suis d'aduis, & que nostre roy & nous tous ayons recours à la source & fontaine vifue, qui est Dieu; affin qu'il luy plaise par sa sainte grace destourner son ire de nous. C'est luy qui par vn caché iugement a permis ce mal; Et aussi est-cel luy seul qui nous le peut destourner. A Dieu.

*Eaux medicales
de France.*

A Monsieur de S. Marthe.

Vous estes d'aduis cōme moy, qu'apres auoir eu recours à Dieu, chacun de nous doit mettre la main à l'œuvre, pour donner ordre à nostre mal. Ie louë vostre intention, encores que ie pense n'estre en la puissance des hommes d'y remedier, sans la main du grand Ad-

operateur. Il me semble que nous tous deuõs
vnanimement conspirer à vne Paix; La coniu-

*La paix
combien
difficile à
faire.*

ration sera belle. mais par où la prendrõs nous?

Car entre toutes celles que i'ay veu faire dès &

depuis le commencement de nos Troubles, ie

ne pense qu'il y en ait iamais eu vne où tant

d'obstacles se presentassent qu'en cette-cy. Ce

sera vn vray chef-d'œuvre d'Estat. Il est malai-

sé, me direz-vous, que le Roy tant qu'il viura,

ne couue vne vangeance dãs soy, quelque beau

semblant qu'il nous face ; & que le peuple ne

soit perpetuellement bourrelé d'vne crainte de

punition, veu l'insolence dont il a vsé enuers

luy. Et finalement que monsieur de Guise, pip-

pé des doux appas de la fortune, ne loge d'or-

mais en son cœur vne ambitio desmesuree. Ce

sont trois maladies de nos Ames presque incu-

rables. La vangeance n'est pas moins douce en

celuy qui est offensé, que l'amour à vn Amou-

reux : Cõbien doncques plus en vn Roy outra-

*L'Ambitiõ
fait ordi-
naire com-
paignie aux
grands.*

gé par ses subiects? Quãd i'ay le remede en mes-

main, ie puis garentir tout hõme du mal, mais

non aucunement de la crainte ; & moins enco-

res vne populace, Et au regard de l'ambition,

elle fait ordinaire compaignie aux plus grãds.

Quels martels doncques pensez vous que puis-

se produire en mõsieur de Guise l'heureux suc-

cez de la Iournee des Barricades? Car si vous

parlez à celuy qui ne iuge des affaires que sur

les apparences; Il vous dira que iamais Iournee

ne fut plus heureuse à Prince, que celle-là luy a

esté. Que luy qu'on se donnoit en proye le ma-

tin, surpris à l'impourueu, soit sans auoir en-

dossé cuirasse venu à chef l'apresdisnee de

tant de gens armez, qui n'ont eu autre ressource de leurs vies, que de celuy à la ruine duquel ils s'estoient voiez: & que lors avec toute modestie il renuoya au Roy les Suisses sains & saues, & autres qui s'estoient rendus à sa mercy. Adioustez que iamais Seigneur ne fut plus retenu que luy. Car ny Paffliction du matin ne luy fit rié rabattre de sa magnanimité, ny l'heureux euenement de l'apres-dinée rien hausser. Il fut tout le iour d'un mesme visage. Le premier trait de la fortune est assez suffisant pour le perdre, estant mesme au iourd'huy demeuré le seul maistre de nostre ville. Le second, qui est de son fonds, est merueilleux pour captiuer le peuple à soy. Mais si vous parlez à un homme qui approfondira ceste affaire à son vray poinct, il vous dira que iamais iournée ne fut tant malheureuse à homme, que celle-là; D'auoir sans y penser, troublé le repos general de la France; & que sa seule presence ait seruy de pretexte à vne fureur populaire, pour s'armer encontre son Roy. M'asseurant que s'il eust preueu ce scandale, il se fust bien gardé de venir en Cour, à l'appetit & semöce de quatre ou cinq babouins, qui ne feront pas garends de nos maux; ioint que ie crains, que le Roy ne luy impute à brauade la courtoisie dont il vfa, luy renuoyant les Suisses; comme chose bien seante à un Roy enuers son subiect, mais non d'un subiect à son Roy. Tellement que c'est vne piece, que ne pouuez bonnement mettre en œuvre au profit de monsieur de Guise, de quelque façon qu'il vous plaise la prendre. C'est pourquoy, pour

Magnanimité de monsieur de Guise.

expier ce malheur, il faut qu'il jette loing de luy les deux principaux outils des grands Princes, l'ambition & la dissimulation, & reblandisse le Roy sans aucune arriereboutique. Qu'il croye que tout ainsi que le pere, apres auoir chastie son enfant, brusle les verges, pour mon-
 L'Ambi-
 tion & la
 dissimula-
 tion
 principaux
 outils des
 Princes.

strer qu'en le chastiant il estoit marry de le chastier; Aussi combien que Dieu, pere vniuersel de nous tous, l'ait choisi pour l'estre, lors que moins il y pensoit, instrument de sa vengeance, si est-ce qu'en fin il aduiendra de luy comme des verges du pere, s'il abuze de sa fortune au desauantage de celuy, qui est son Souuerain Seigneur. D'ailleurs, comme sage Prince qu'il est, il doit penser, qu'ores que pour le iourd'huy il soit enuironné de la bien-veillance d'une populace; toutesfois il n'y a rien tant à craindre, lpour estre vne beste sans bride. S'il en vse de cette façon, & met toutes ces considerations deuant ses yeux, ie me promets toutes choses bonnes: Autrement qu'il se flatte tant qu'il voudra, il se perdra pour fin du ieu, & se perdant enseuelira dans sa ruine & sa maison & nostre Estat tout ensemble.

Quant aux Bourgeois de Paris, i'entends de ceux qui se sont mis furieusement de la meslee (car tous les Ordres generaux n'y ont consenty) ils se doiuent prosterner aux pieds du Roy, & luy demander pardon. Il n'est permis au subiect de iuger des actions de son Prince; tel
 Le subiect
 ne doit iu-
 ger
 des actions
 de son
 Prince.

que Dieu nous l'a donné, nous le deuons prendre, & penser que si tous ses deportemens ne nous plaisent, cela ne prouient de luy, ains de

nos pechez. C'est en quoy nous deuõs fermer nos opinions, & n'extrauaguer en discours qui ne sont de nostre iurisdiction. Au surplus, nous criõs tous ensemblement qu'il faut exterminer l'heresie de la France. C'est le lieu commun de nos Prescheurs dans leurs chaires; C'est celui dont nous entretenons nos tables en particulier. Où est maintenant nostre iugement, d'estre d'un costé en mauuais mesnage avec nostre Roy; d'ailleurs qu'il y ait diuision entre nous autres Catholiques sous mots damna- bles & partiaux, de *Catholic Ligué*, & *Catholic Politic*? Et qu'au milieu de telles partialitez intestines nous pensions qu'il soit en nostre puissance de guerroyer le Huguenot? C'est luy bailler au tant de relasche; c'est luy bailler autāt de loisir pour reprendre haleine, & pour s'estab- blir mieux que deuant. Et n'en delplaise à vn- tas de Prescheurs escholiers, qui nous nourris- sent en telles diuisions.

*Le Roy en
demy an
senty deux
effects du
tout con-
traires à
Paris.*

Ie vien maintenant au Roy, lequel semble auoir iuste occasion d'estre courroucé. Mais quand il luy plaira repenser comme toutes choses se sont passees dās Paris, il trouuera qu'e ce dernier accidēt il y a eu plus de malheur que de malta lent. Il se doit souuenir, qu'en moins d'un demy an il y a senty deux effects cōtraires. Iamais Roy n'y auoit esté receu avec tant d'al- legresses comme il fut au mois de Decembre dernier; Et iamais Roy n'en sortit avec tant de mescōtatement cōme il fit dernieremēt. Qui a causé cette contrarieté en vn mesme peuple? Luy seul le peut sçauoir mieux que nous; Et

doit iuger, qu'en ce qui s'est passé en ces deux iours de Barricade, l'euuenemēt a mōstré qu'il n'y auoit rien de la main de l'hōme, ains que c'estoit vn mystere de Dieu; Pour enseigner au Roy de se contenir dans les bornes de son deuoir enuers son peuple; Et à mōsieur de Guise & au peuple, de faire le semblable à l'endroit du Roy. A l'vn de ne se laisser emporter par vne chaude opinion de vengeance: Aux autres, de ne se trop fier à vne flateuse fortune. Il faut que chacun louē diuersement Dieu, qu'apres vne telle fureur, toute cette emotion se soit raquoisee de soy-mesme. Que le Roy pense que cest accident luy a esté enuoyé du ciel pour le recognoistre; & le peuple, pour la reformatiō del'Estat. Et à tant que sans nous souuenir de cette desbauche, nous embrassions vne Paix; Mais Paix que nous fermions à double ressort, sans qu'elle puisse estre crochete'e par quelques Sophistes d'Estat, ennemis du repos public. Que le Roy se persuade, que monsieur de Guise ne desire rien tant, que de se voir fauorizé de luy. Qu'il s'assure, que son peuple de Paris ne conspire, qu'à ce que le Roy doit aussi conspirer; C'est qu'il viue Royalement, bannisse de soy toutes volonte'z absoluës, & imprime cette opinion dans sa teste, que les grandes vertus des Rois sont non seulement obscurcies, ains enseuelies, quand ils attachent leurs actions aux extremittez, n'y ayant rien qu'il faille tant craindre, que celuy qui veut tout ce qu'il peut, & qui peut tout ce qu'il

De quels Ordres l'E-
stat de France est
compose. veut. Cette pierre fondamentale estant assize,
il luy sera puis apres aisé, de conseruer tout le
bastiment de son Royaume en son entier;
Quand il considerera, que son peuple est cōpo-
sé de trois Ordres, del'Eglise, de la Noblesse,
& du tiers Estat, & encores d'un quatriesme
alambiqué des trois autres, qui est la Iustice.
Ie passeray sommairement sur tous ces Ordres.

Quant à l'Eglise, ie desire qu'il la maintienne,
non seulement au Spirituel, ains au Temporel.
Car combien qu'il ait pris son commencement
d'une pauvre et obstinee, si est-ce tourner cette
proposition en abus, quand nous faisons fonds
ordinaire de la vente du bien de l'Eglise, pour
subuenir au defroy de nos opinions. Qu'il bā-
nisse pareillement la Simonie, qui nous est au-
jourd'huy malheureusement trop familiere:
Et estime qu'il n'y a plus assureé prognostic de
la mutation generale d'un Estat, que quand
par vne prodigieuse metamorphose, on grati-
fie les gens d'espee, d'Eueschez & Abbayes, au
lieu d'en reuestir ceux qui font profession de la
Theologie & des saintes Lettres. Car quant
à la Religion nouvelle, ie m'assure que tout
ainsi que nostre Roy est entre tous nos Rois
tres-Catholic: aussi n'a-il rien tant en sa pen-
see que de nous voir tous vnis en la religion du
S. Siege. Vray qu'il pensoit en venir à bout par
les procedures qu'il pratiquoit deuant nos
troubles. Nous par un contraire aduis, l'auons
contraint de prendre les armes. En quoy il y a
double question; l'une de sçauoir, si nostre
conseil est meilleur que le sien; l'autre, si quād
il seroit

il seroit meilleur, il nous estoit permis de vouloir donner la loy à nostre Prince. l'adiouteray volontiers, qu'il y a quelques esprits viqueux, qui doutent, si c'a esté le zele de religion, ou bien quelqu'autre l'uiect qui nous y ait induit. Et disent qu'entre tous les Articles de nos mescontentemens portez par nostre premier manifeste, celuy qui concernoit la Religion estoit le dernier; Mais qu'apres nous estre abouchez avec la Roynie mere, nous corrigeasmes nostre Plaidoyé, par le second, & rayasmes les autres Articles. Je ne veux pas dire que leur opinion soit vraye; bien vous diray-je que quelquefois les grands selon la commodité de leurs affaires se ioient du masque tantost de la religion, tantost du bien public; afin que le commun peuple, qui ne voit que de la longueur de son nez, espouse plus aisément leur party; ne preuoit pas que cela n'est qu'une amorce de sa ruine.

*Le masque
de la Reli-
gion Es-
du bien pu-
blic fort
commode
pour les
Grands.*

Ne flatons nostre maladie, puis que nostre dessein est de la guerir. Quant à moy, ie ne fais aucune doute, qu'elle ne prouienne d'un mescontentement general tant de la Noblesse que du Tiers Estat. Quand ie parle de la noblesse i'y comprends aussi les Princes, ores que comme Seigneurs illustres ils ayent titre plus releué mais ie les y mets come chefs. Or la plus belle regle que le Roy doive suiure pour contenter les princes & à leur suite la noblesse, est de respecter tous Seigneurs selon leurs ordres & dignitez. La plus grande faute que puisse commettre un Roy est, quand il prefere un simple gentilhomme à un prince. L'Italien en deux mots a

*Regle d'ob-
seruer pour
les Rois.*

dit, que *Troppo di rispetto e di dispetto* perdoit les Princes Souuerains. Il n'est en la puissance d'un Roy de faire d'un simple gentil-homme,

*Les Princes
naissent &
ne sont
faits.*

Vn Prince. Les Princes naissent, & ne se font. Quelque desfaueur qu'un Roy leur face, elle est seulement viagere. Il ne peut faire quel luy mort, le Prince ne soit toujours Prince, & naturellement respecté. Et combien qu'un roy estant hōme ne se puisse tant commander, qu'il n'ait des inclinations plus enuers quelques particuliers Seigneurs, qu'aux grands Princes; si ne doit il mespriser ceux cy, ou les cherir seulement par contenance. Car les mesprisant il leur donne enuie de se re tirer ou en leurs maisons, ou en leurs gouuernements, s'ils en ont: là où estants, ce sont autant de petits Rois que le commun peuple respecte. Et cependant captiuans petit à petit par beaux semblāts la bien vueillance d'vns & autres, s'il leur prend opinion de troubler l'estat, pour se voir mesprisez de leur Roy, les moyens leur en sont ouuerts. Au contraire estans caresséz par luy, tantost d'honnestes accueils, selon leurs rangs, tantost par liberalitez modestes (& pour ces causes induits de demeurer en Cour) ils ne reluisent aupres de luy non plus que la Lune pres du Soleil: & neantmoins viuent en quelque repos d'esprit, ne proiettās aucunes nouueautez; & ores qu'ils les proiettaissent, la seule presence de leur Roy leur en retrencheroit les moyens. Si le Roy se peut tant commander que de suiure ce conseil, croyez que ce n'est pas vn petit secret pour la conseruation.

Entant que touche le commun peuple, bien qu'il ne soit de tel respect que les deux autres, si n'est-il pas moins redoutable. Car s'il n'egale l'Eglise & la Noblesse en poix, il les passe grandement en nombre, opposant à leurs qualitez, la quantité. Tout ainsi que le peuple doit toute obéissance à son Roy; aussi le Roy en contr'exchange luy doit tout bon traitement. Pour enseigneur aux suiets à bien obéir, il faut scauoir leur bien commander; autrement seloge à la longue vn mescontentement en eux, qui engendre la haine encontre leur Prince, & elle la desobéissance. Dieu apres auoir permis que le peuple soit affligé, tourne en fin son bras de fureur contre celuy qui l'affligeoit. Lors qu'il y auoit cent fois moins de Daces & imposts extraordinaires qu'au iourd'huy, chacū demouroit content, tous les Officiers estoient payez de leurs gages; La gendarmerie faisoit monstre. Ny pour cela n'estoient nos Rois plus malaisez. Iamais n'y eust de si grandes charges qu'au iourd'huy. Les trois Rois precedans ne leuerent en tous leurs Regnes tant de deniers que l'on a fait en dix ans sous nostre Roy; Ny iamais Roy ne fut en telle disette qu'il est. Pendant que nous voulōs contenter quelques vns, nous mescontentons tout le monde: Et ne considérons, que celuy qui ne se contente que par des bienfaits, est vrayement comme vne putain, laquelle n'ayant esté gaignee que par les dons de son Amoureux, soudain que l'argent luy defaut, tourne son opinion ailleurs: Ainsi ces corrompus de Cour, qui n'aiment leur Roy,

*Le Peuple
doit obéissance au
Roy: Et le
Roy luy
doit bon
traitement.*

que pour receuoir de luy des prodigalitez prodigieuses tirées de la pauvreté de son peuple, l'abandonneront aisément, quand elles seront espuisées ; par ce que la cause de leur amitié cessera. Demeurant par ce moyen vn pauvre Prince abandonné, & de ces Sang-sues insatiables, & tout d'une suite deses subiects, par vn mescontentement qu'ils auront des extorsions que l'on aura faites sur eux. Voyez doncque, comme il est bien aisé à vn sage Roy de se maintenir. La difference qu'il y a entre ces importuns Courtizans, & le commun peuple, est que les vns ne se peuuent iamais assouuir, quelques bien-faits qu'ils ayent receu de leur Maistre ; Et vn pauvre peuple sacrifiera sa vie pour luy, mais qu'on ne luy oste rien. Le dy trop, disant, quel'on ne luy oste rien. Mais bien moyennant que son Roy se contienne dans les bornes de la modestie en luy demandant. Qu'il pense que les Subsidies ont esté trouuez pour subuenir aux necessitez, & non aux voluptez des Rois. Et pour m'estancher ; ie souhaiteray qu'un Roy suive en cest endroit le conseil de Machiauel, lequel veut qu'il soit auaricieux : Proposition qui semble de prime-face paradoxe: (Car qu'y ail plus digne d'un grand Prince que la liberalité ?) mais toutesfois tres-louable. Car pendant que le Prince se rend prodigue envers ceux qui l'environnent, il faut qu'il remplace ses fautes sur ses subiects : Et la liberalité est beaucoup plus grande en les espargnant & ne les vexant. Ainsi en fit nostre bon Roy

*Difference
d'entre les
courtizans
& le peu-
ple.*

*Les Subs-
ides pour
quoy trou-
uez.*

Louys douzième, lequel ores que des Courtisans fut estimé vn tacquin, pour estre plus retenu en les dons, si rapporta il l'Eloge, apres sa mort, de pere du peuple. Eloge, dy-ie, que tout bon Roy doit affectionner sur toutes choses. Voila le conseil que le Roy doit prendre pour le Tiers Estat.

Après auoir donné lieu à l'Eglise, Noblesse & Tiers Estat, ie vien maintenant à la Iustice; Et spécialement aux Cours Souueraines, que nous considerons en trois manieres, dans cette France; Parlemens, Chambres des Comptes & Generaux des Aides sur le faict de la Iustice.

Si vous recherchez toutes les autres Monarchies, il n'y en a vne seule qui ait tant duré que la nostre, ni entre les familles des Rois aucune qui ait tant regné, que celle de Hugues Capet. Ie ne m'esloigneray des bornes de nostre Royaume. Nous auons eu trois lignees, grandes guerrieres, celles des Merouingiens, Carlingiens & Capetiens. La famille qui descendit de Merouee vint à la Couronne, & tint toute l'Allemagne, à quoy les Romains auoient tant failly. Celle de Charlemagne tout le pais d'Italie; & la dernière de Hugues Capet planta son sceptre au milieu de Hierusalem, & de toute la Palestine. Toutes fois les deux premières avec leurs victoires s'esuanouirent en peu de temps. Et combien que la dernière ait esté en fin supplantée de ses conquestes d'outre-mer, si est ce que ç'a esté sans changement de sa Couronne. S'il vous plaist en rechercher la cause, il est aisé de la trouuer. Les deux premières firent plus

Louys XII^e appelé le pere du peuple & pour quoy estimé le tacquin.

Cours Souueraines de trois manieres en France.

Trois lignees de Rois en France, & les conquestes de chacune.

La troisieme race de nos Rois a plus fait d'estat de la Justice que de la Force. grand fonds de la Force, que de la Iustice. Cete-cy encores qu'elle ait fait estat de la Force, si a elle tousiours estimé, que la principale force de toute Royauté gisoit en la Iustice. Tellement que ces derniers Rois estimerent que leur fortune estoit liee avec ces trois grandes compagnies; premierement avec la Cour de Parlement & Chambre des Comptes, selon la diuersité de leurs charges; Et depuis avec les Generaux de la Iustice, quand les Aides, Subsidés & Tailles furēt inuētees. Il est certain que le fondement de toute Republique est la Loy, ou pour mieux dire c'en est l'Ame, sans laquelle nulle Republique ne peut auoir vie. Et cōbien que les Loix prennent en cette France leur premiere source du Roy; Toutesfois si n'ont elles vogue, qu'apres qu'elles ont esté bien & deuēmēt verifiees par ces trois Ordres, en ce qui les cōcerne. C'est vne Loy fondamentale de nostre Estat. Or quand il estoit question anciennement de publier ces Edicts en ces lieux-là, estoit-ce de les leur enuoyer, comme on enuoye des Breuets aux Tabellions pour les grossoyer, sans cognoissance de cause? Non vrayement. Nos Rois prindrent plaisir de receuoir leurs Remonstrances, suiuant lesquelles les Edicts estoient souuent modifiez & quelque fois reiettez: Ny pour cela ils ne s'estimoyēt moins Rois: Au contraire iamais Princes ne furent tant aimez ny honorez de leurs subiects comme ils estoient. Je ne scay comment par cette correspondance, chacun demeuroit & content & dans son deuoir; les

La Loyame de la Republ.

Rois, en bien commandant; les subiects en obeissant, par l'entremise de cestrois Colleges.

Mais depuis que le mauuais conseil a introduit la puissance absolue, par dessus ces Cours, les affaires de la France se sont de telle façon desliées, qu'à peine le Roy peut estre obey avec deux & trois Armées; luy qui auparavant commandoit à tout son peuple par vn clin d'œil. Il n'y a rien si naturel, que de voir dissoudre les choses par l'affoiblissement de ce dont elles auoient pris leur accroissement.

Les desordres introduits en la France à cause de l'autorité absolue du Roy en ses Edicts.

La Couronne de France s'estoit maintenue, par l'autorité de cestrois Ordres; diminuât leur autorité, vous diminuerez d'autant la maiesté de nos Rois. Que le Roy d'ôques maintienne ces trois Cours Souueraines en leurs anciennes prerogatiues; Il ne faut point d'Assemblée des trois Estats, pour restablir nos affaires. Elles se restabliront d'elles-mêmes. Iamais on ne fit plus d'Assemblées que l'on a fait sous ceregne, pour la reformation de l'Estat; Et iamais Estat ne fut tant difformé que le nôstre. La conuocation generale des Estats tenus à Blois, l'an 1576. La particuliere faite à S. Germain en Laye en l'an 1581. Les Deputez enuoyez par les Prouinces, pour donner ordre aux desordres, à quoy est reuenu tout cela sinon à rien? Vn trait de plume l'a effacé tout d'vn coup. Il ne faut rien esperer de bon, si le Roy par sa bonté ne reduit sa puissance absolue, sous la ciuilité des Loix Royales de la France, comme ont fait ses Predecesseurs. En ce faisant il aura la paix avec Dieu, ill'aura

dans son Royaume, il l'aura avec ses Subiects: Mais si par vn autre conseil il vſe ſeulement de la paix, pour la neceſſité de ſes affaires preſentes, en intention de retourner ſur ſes anciennes brisées; Le public dès à preſent à ſon de trompe, par tous les cantons de la France, la ruine de luy & de ſon Eſtât. Il n'y a rien qu'il faille tant craindre és maladies que la rencheute. C'eſt en eſſect ce que j'auois à vous eſcrire, & qui me ſemble neceſſaire, pour reduire toutes choſes en bon train. Que pleuſt à Dieu que tout ainſi que ie me ſuis donné le loïſir de le vous mander; Auſſi tous ceux qui y ont intereſt, peuſſent voir ma lettre, & la lire de pareille deuotion, que ie l'ay eſcrite. A Dieu.

A Monsieur de S. Marthe.

*deſcription
du progrez
de la Ligue
& cōment
elle print ſe
accroſt
d'un coup.*

*Conſeille.
ſtably à pa-
ris par
monſieur
de Guise
qui en ſuret
ſes cheſs*

NOs deputez eſtāns de retour, monſieur de Guise voyant que le Roy ne vouloit prendre aucune excuſe de luy en payement; ſ'eſt deliberé de iouer à quitte ou à double. Et de fait a eſtably vne forme de Conſeil d'Eſtat en ſa maiſon: auquel nos nouueaux Preuoſt des Marchands & Eſcheuins ont voix deliberatiue, & avecqu'eux quelques particuliers Bourgeois; gens de peu ſans le malheur du temps; mais qui pour auoir fait les fandans la iournee des Barricades, ont empieté ie ne ſçay quelle créance & authorité ſur la populace; vns uſſi le Clerc, procureur, Senault Clerc du Gieſſe au Parlement, Aimonnot Aduocat, Louchard Commiſſaire au Cha-

stelet, Heuron Bancquier, & Crucé Procureur en Cour d'Eglise. Cela s'appelle en vn Seigneur qu'on reduit aux termes de desesper, faire feschcs de tout bois. Les deux Roines qui n'ont eu le loisir de iuure le Roy, ne sont respectees que par beaux semblants. Prou de bonnetades & baitemains, mais de sortir hors la ville nulle liberté, ores que ce soit le cõble de leurs souhaits. Ce Prince s'est emparé de Meaux, Troye & Chasteau-Thierry, a fait pointer le canon deuant Melun, & l'a prise. S'est saisy de la pluspart des receptes generales, & n'elpargne or, ny argẽt pour attirer à sa cordelle les Capitaines des fortes places, pendant que le Roy reduit au petit pied connille, tantost à Chartres, tantost à Vernon. En fin les portes de Roüen luy ont esté ouuertes : Qui n'est pas vn petit seruice que luy a fait le Seigneur de Cairouge Gouverneur. Là il a despeché commissions de toutes parts, pour faire assembler les trois Estats en la ville de Blois, suiuant la Requête à luy presentee par Monsieur de Guise, lors qu'il arriva à Paris. Et neantmoins on n'a laillé pour tout cela d'entendre à la paix : Et comme en quelque chose mal-heur est bon, aussi est il aduenu que la Royne mere demy prisonniere s'est chargee de cette negotiation : & y a be-

*Monsieur
de Guise
fait
Lieutenant
General
pour le fait
des armes.*

uoit iamais esté octroyé qu'aux Princes du sang, mesmes aux freres & oncles de nos Roys. Et par des articles secrets, on luy assigne sept villes, dedans lesquelles quatre ans durant il pourra commettre tels gouuerneurs qu'il luy plaira, pour l'assurance de luy & des siens : On les appelle Villes de seurté.

*Villes de
seurté.*

Il faut que cette parole m'eschappe : Pleust or à Dieu que ce braue Prince eust esté bien endormy quand charmé par les importunitéz de douze mutins, il vint en poste en cette ville : & que ces mal-heureux eussent esté pendus & estráglez aux potées que faussement ils disoiét auoir esté apretees en l'hostel de ville. Toutes choses se feussent mieux portees pour luy, pour nous, & pour toute la France. La magnanimité est logee en son cœur dès sa naissance ; toutesfois cette racaille de peuple luy met tant d'ombrages deuant les yeux, qu'elle luy fait oublier ce qu'il est. Tellement que ie crain que d'oresenauant en vne assurance de tout il craigne tout. Quoy que soit, il en a fait vne grande demonstration, lors que l'Edict de paix nous a esté apporté par le Seigneur de Villeroy pour estre verifié au Parlement & autres Cours Souueraines. Car à l'instigation de ces Messieurs il s'en est saisi. Disant qu'il vouloit s'esclaircir & diligemment examiner s'il y auoit rien dedans qui luy preiudicialt, & l'a gardé vingt iours entiers.

Que si desirez sçauoir pourquoy, Entendez que le Roy dés l'an 1585. lors du souleuement de la Ligue, auoit pour luy faire teste,

par aduis de son Conseil, créé Capitaines & Lieutenants en chaque Dixaine de nostre ville, tous personnages de qualité. Bussy & les suffragants estimants que ceux cy n'estoient à leurs postes, complotent avec le Preuost des Marchands & Escheuins, qu'il falloit proceder à nouuelles creations, auant la publication de l'Edit. Or voicy l'ordre qu'ils y ont tenu, que ie vous veux tout au long enfler, pour auoir eu quelque part en ce nouueau meſnage au grand danger de ma vie, ainsi qu'entendrez presentement.

La ville de Paris est composee de seize *Seize Quartiers dans Paris, qui ont sous eux les Dixaines.* Quartiers, qui ont sous eux diuerſes Dixaines. Ce fut l'ouurage de seize iours. Ils designent ceux dont ils pensoient mieux cheuir, & en font vne liste entr'eux, qu'ils reueſtent d'un beau, mais faux pretexte d'election. A chaque iournee on donnoit assignation à toutes les Dixaines exposees sous vn Quartier. Les Dixainiers choiſiſſoient ceux qui leur plaisoient de leurs Dixaines pour s'y trouuer. Le Greffier les appelloit à tour de rolles. Bussy & les associez qui se donnoient entre les mandez, ores les premieres, ores les secondes places, souffloient de bouche en bouche ceux qu'ils desiroient estre nommez. Mesmes de chaque Dixaine y auoit gens par eux attitrez qui les secondoient. Cela ainsi fait, pour monſtrer de quelle deuotion ils embrassoient nostre liberte; Le Preuost des Marchands prenoit les

voix non seulement des mandez de la Dixaine dont estoit question, mais aussi de toutes les autres: lesquels ores qu'ils n'eussent cognoissance des nommez, si inclinoient ils aisement à leur nomination, tant pour ne desplaire à ces nouueaux tyrans, que pour le peu d'intereſt qu'ils estimoient y auoir, ne preuoyants la conséquence. C'estoit vn torrent auquel nul ne s'oſoit oppoſer. Ainſi par la voye de leur ſainct Eſprit (car d'autres paroles ne couchoient ils) ſe faiſoient les elections. Pour le faire court on deſapoincte tous les anciens Capitaines, & Lieutenans, tous perſonnages d'honneur, auxquels cette vermine de peuple n'eust oſé faire teſte, & ſurrogel'on en leurs lieux, vns Sire Guillaume, Sire Michel, Sire Bonaduenture; Que dy-ie Sires? car ce mot n'eſt mis en vſage que pour les notables marchands: mais bien la plus part de ſimples tauerniers, cabaretiers & autre telle engeance de gens, par deuers lesquels on commet toute l'autorité des armes. Il n'y a remede. Je ſuis impatient de la tyrannie. On auoit assigné quelques Conſeillers du Parlement de noſtre Dixaine en l'Hoſtel de Ville; Mais nul d'eux ne s'y trouua, faſchez de voir cettē indignité, & neantmoins ne l'ozant contredire. Tellement que i'en fus le premier & plus ſigné. Au deſſous de moy estoient Buſſy le Clerc, Crucé, Heuron, & Senault, & vis à vis Boucher Curé de Saint Benoist. Ayant eſté le premier ſecond par le Preuoſt des Marchands de donner ma voix, la patience m'eſchappe, & au peril de ma vie, au

*Capitaines
deſapoin-
tez à Pa-
ris, & quel
les gens mis
en leurs
places.*

milieu de ces espadacins ie parle de cette façon.

Il y a vingt-cinq ans & plus qu'on a accoustumé de m'appeller aux assemblees de Ville en celieu, quand la necessité l'a requis, & graces à Dieu j'ay tousiours eu cét honneur de n'estre iamais dedit. Chose que ie ne desire maintenant, ains seulement qu'il vous plaise m'ouir fauorablement, pour puis en estre par vous ordonné ainsi qu'il vous plaira. J'ay veu naistre les troubles en France pour le fait de la Religion, & dès leur naissance ie vy aussi creer Capitaines & Lieutenans en cette ville l'an 1561. L'auteur de cette discipline fut ce grád guerrier, Monsieur le Marechal de Brissac, lors Lieutenant general du Roy Charles 9. en cette ville. Il voyoit que Paris estoit vn grand vaisseau inaccoustumé de receuoir garnisons estrangeres: D'ailleurs que le Roy son maistre estoit grandement à l'estroit d'argent, & qu'il eust esté malaisé voire impossible de soudoyer garnisons en toutes les villes qui estoient demourees sous son obeissance. C'est pourquoy il s'auisa d'introduire dedans Paris vne nouuelle police militaire. Qui fut que tous les Manants & Habitants de chaque Dixaine, sans aucun triage particulier d'vns & autres, s'assembleroient és maisons de leurs Dixeniers, & que là ils procederoient à l'election d'vn Capitaine & Lieutenant. Ce que nous feimes. Les troubles qui s'estoient estanchez, se renouvelerent vers la Saint Michell l'an 1567. & lors on ne changea rien de cette premiere poli-

*Remon-
strance de
monsieur
Pasquier
en l'assem-
blee de
ville.*

824 LIVRE XII. DES LETTRES
ce, sinon d'effire en chaque quartier vn Colonel, lequel selon la diuersité des occasions, receuroit les commandements de vous autres Messieurs les Preuost des Marchands & Escheuins, dont il feroit part à ses Capitaines & Lieutenants.

A la verité ce premier ordre fut suprimé en l'an 1585. Par ce que le Roy nomma par toutela ville nouueaux Capitaines & Lieutenanstels qu'il luy pleut ; Que si en cela vous pensez qu'il ait enfraint la liberté ancienne de nostre ville ; prenez garde ie vous supplie, que ne tombiez maintenant d'une extremité en vne autre de plus dangereux effect, & que faisant contenance de nous restablir en nostre ancienne liberté, nous la barriions & reduisions sous la puissance de dix ou douze, & que par eux nous n'vions des elections que pour forme de masque seulement.

A ce mot Buffy, Louchard, & leurs compagnons, qui par fortune estoient au dessous de moy, quittent leurs places, & se logent ioignant Boucher, de l'autre costé, monstrans à l'œil par cette demarche combien cette parole par moy proferce leur pesoit. Qui estoit assez pour m'apprester à craindre. Non pour cela ie ne fors de ma posture, ains continuant ma route, comme si ie n'eusse veu cette alteration en eux: Je vous supply (leur dis-je) Messieurs, prendre garde si en ce faisant il n'y a point du Machiauelisme en nous, tant dete-

été par monsieur Boucher en ses Sermons, contre les Politiques qui desirent la paix. Il y a trente ans passez que ie me tiens en ma Dixaine, & neantmoins à peine y en recognois-ievne douzaine de personnes, & mesmement celles qui sont cōstituez sur les autres en quelques grades & dignitez. Et toutesfois pour authorizer les elections qui se font maintenant, les mandez donnent leurs voix sur chaque Dixaine: Eux (dy-je) qui n'en ont non plus de cognoissance que moy. N'est-ce pas cela proprement machiauelizer, & vouloir pretexter vne chose arrestee dedans nos maisons, d'un faux visage d'election? C'est pourquoy ie vous supplie, Messieurs, qui n'aspirez qu'au bien de la ville, vouloir reprendre & continuer les anciens arrhelements de nos elections: Et que chaque Dixaine qui reste de ceste apresdisnee soit réuoyee chez son Dixenier, pour estre par tous les chefs des maisons aduisé de l'election selō le deu de leurs consciences, sans prendre l'aduis de ceux qui n'y ont aucun interest. Quoy faisant ferez acte digne de vous, & nous obligerez à bien faire.

A peine estoit sortie cette parole de ma bouche, qu'un ieune sot, fils d'un Aduocat qui fait contenance de me biē vouloir, cōmēça de marmōner entre les dēts que i'estois Esparnoniste, mais si bas qu'il fut entēdu de tous. Qui estoit pour exciter la haine publique cōtre moy. Car pour vous biē dire, le Seigneur d'Esparnon est aujourd'huy si peu aymé dedans nostre ville, quel'on impute à grand crime de s'estre meslé de ses affaires. Adoncques non seulemēt ne me

ralentissant, ains roidissant ie luy reparty. Vous estes vntres-mal habile homme, & faut pardonner à vostre ieunesse d'auoir esté si indiscret non de me blasonner, ains faullement calomnier. A la verité estant Aduocat des parties, ie feus en l'an 1580. commandé par le Roy de presenter au Parlement deux Seigneurs ses principaux fauoris en quatre diuers actes: l'un Pair de France & Duc de Joyeuse; & en apres Admiral: L'autre Pair de France, & Duc d'Espernon, & quelque peu apres Colonel de l'Infanterie François. Mais r'ay beaucoup plus d'obligation à Messieurs de Guise, qui m'ont fait cét honneur auparauant que ie feusse Aduocat general en la Chambre des Comptes, de m'employer en leur Conseil vingt ans entiers. Pendant lesquels i'ay plaidé plusieurs grandes causes pour eux. Et singulierement pour Monsieur de Guise en l'an 1573. celle du Vicomte de Martigues l'espace de trois matinees, en la presence de Messieurs les Cardinaux ses oncles, & de tous les Seigneurs & Dames de la maison de Lorraine, qui estoient habitez en cette France. Ce grand Prince est en cette ville, ie ne desire autre tesmoignage que de luy, partant ie veux que chacun entende que ie combats maintenant pour son autorité & grandeur (de laquelle nous abusons,) & tout d'une main pour le repos & tranquillité de nostre ville.

Je cogneu lors combien vne parole hardie, guidée d'une bonne conscience a de force sur le commun peuple, car combien que Busly
& ses

& ses adherants eussent fait demonstration oculaire de leur maltalent contre moy, lors que ie parloy d'eux sans les nommer, & que ce ieune babouin l'eust renuié sur eux, toutesfois cela non seulement ne me preiudicia, mais au contraire ie fus en partie suiuy, & fut ordonné que toutes les Dixaines qui restoient de cette apresdisnée, seroient assemblees en diuerses Chambres, pour proceder à nouuelles elections, & ainsi fut executé.

Cela courut par toute la ville, & le lédemain matin monsieur le President Brisson & moy nous trouuans par les ruës sur nos mulets, il me dit qu'il ne me pouuoit assez congratuler du bon deuoir & office que i'auois le iour precedant rendu à nostre ville, contre ces nouueaux Tygres. Vous dites vray (luy respondy-ie) si vous & tous Messieurs de vostre compagnie entrepreniez de mesme deuotion que moy cette querelle. Mais vous-vous en donnerez bien garde. Comme aussi suis-ie asseuré, qu'auourd'huy Buffy & ses associez iouïront du benefice de leur insolence. En quoy ie ne fus nullement trompé; par ce qu'on reprit en l'Hostel de ville la mesme piste quel'on auoit fait du commencement.

Ces nouueaux Capitaines & Lieutenans creez, l'Edict de la Sainte Vnion a esté du jour au lendemain leu, publié, & enregistré en la Cour de Parlement, & quelques iours apres en la Chambre des Comptes, & Generaux des Aides: De moy ie vous diray franchement qu'en tout ce qui s'est passé depuis le mois de

*L'Edict de
la Sainte
Vnion pu-
blié & en-
registré.*

May dernier, ie ne voy coup d'Estat moins excusable que cettuy. Et l'impute non à monsieur de Guise, que ie cognoy Prince sage, debonnaire, & tres-valeureux; ains à cette lie de peuple qui l'environne, & craint la paix comme la peste, par vn remords de sa conscience. La iournee des Barricades fut merueilleusemēt furieuse, mais fondee sur vne garnison que le peuple s'imaginoit luy vouloir estre baillee: à quoy toutesfois le Roy n'auoit pensé. Mais en ce dernier acte combien que monsieur de guise ne desire rien tant que de demeurer pres du Roy en ses bonnes graces, & que tout ce qui s'est passé iusques à huy soit enseuely; toutesfois comme l'on est sur le point de verifier, non vne simple paix, ains vne Sainte Vnion, (car ainsi l'auons-nous baptisee) on fait cette honte au Roy de casser tous les Capitaines & Lieutenans par luy nommez & d'en commettre d'autres en leurs lieux. N'est-ce pas offenser à veuë d'œil sa Maiesté, & en faisant cōtenance de vouloir viure en concorde, commencer par vne discorde? Quāt à moy ie vous diray librement, qu'en la calamité publique dans laquelle nous sommes plongez, ie ne me veux non plus fier à du parchemin non assisté de la force, qu'à ces nouueaux menagers de nostre ville, qui ne s'aident d'autre loy que de leur temerité. C'est pourquoy ie suis resolu de quitter ma maison, & me transporter la part où sera mon Roy, pour suiure sa fortune de quelque façon qu'elle se tourne. A Dieu.

*A Monsieur Tournebus Conseiller au Parle-
ment de Paris.*

Ant de doctes mains qui ont escrit le pour & contre de cette ancienneté, m'inuitent à vous en dire franchement & à face descouuerte ce que i'en pense. Ioint que desirez sçauoir de moy quel iugement i'en fais. Et vrayement il faut bien qu'ayez vne puïssance abloluë sur moy si ie vous obey. Car pour bien dire, cette pretenduë histoire est du nombre des maladies que les medecins appellent *Noli me tangere*, tant en est le recit espineux. Et neantmoins ia à Dieu ne plaise que ie ne vous obeisse au moins mal qu'il me sera possible, en cest endroit, tout ainsi qu'en toute autre chose ou ie vous verray poussé d'une bonne deuotion, mais ie desire au preallable recognoistre auecques vous, quelle en est l'opinion dedans Rome.

*Recit de
l'histoire de
la Papesse
Jeanne.*

Cette fille à laquelle selon la diuersité des auteurs on a donné diuers noms, mais par la pluralité des voix celui de Jeanne, fut extraite, si vous en croyez quelques vns, du pays d'Angleterre; & selon les autres de la ville de Mayence en Allemagne. Et comme dès sa ieunesse elle se fut enamourée d'un quidam, qui sembloit faire profession des bonnes lettres, à son instigation elle quitta les habits de femme & prit ceux des hommes: Et sous ce malque s'acheminèrent en-

*Lieu de son
origine, &
ses premiers
commence-
ments.*

*Ieanne fort
docte entre
ses condisciples.*

*Faict le Pa-
pe & com-
bien de
temps y
reigne.*

*Comment
morte.*

semblement en la ville d'Athenes pour y estudier. En laquelle cette ieune garce fit tel aduancement & progrez, qu'elle deuança d'un long entrejet en sçauoir tous ses compaignons d'estude. Et continuant cette route, estant depuis arriuee à Rome acquit si grand bruit, tant par les lectures, que disputes publiques qu'on la tenoit pour vn miracle de nature. De maniere que le Pape Leon quatriesme estant allé de vie à trespas, elle fut sans aucun destourbier appelée à la Papauté, où elle siegea deux ans, vn mois & quelques iours. Mais comme le malheur a consuit souuent nos bonnes fortunes, aduint que ayant esté engrossée par vni sien valet, & dissimulé sa grossesse plusieurs mois; toutesfois son premier malheur rengregea d'un autre, qui fut sa ruine finale. Allant en vne procession anniuersaire du Vatican à l'Eglise saint Iean de Latran, elle acoucha d'un enfant en plaine place, à la veüe de tout le peuple, & deceda avec son fruit sur le champ. Histoire que le peuple de Rome par vne longue tradition de main en maintient pour tres-veritable. Disant que c'est la cause pour laquelle depuis ce temps, n'est aucune procession passée la part où cette honte publique suruint: Mesmes qu'à l'auenement de chaque Pape on l'assiet sur vne chaire percee, pour recognoistre s'il est vrayement masle, affin de ne retomber plus en cest inconuenient. On adioust qu'en l'Eglise Cathedrale de la ville de Siëne, l'une des plus magni-

fiques, non del'Italie seulement, ains de toute l'Europe, où les statues des Papes sont mises selon leur ordre, celle de Ieanne y a trouué s^{on} lieu avecques les autres. Qui ne s^{ont} pas petites ^{Sa statue à Sienn.} remarques pour faire croire qu'il n'y a rien de fable en cecy. Grande bresche faite cōtre l'honneur de la papauté, disent ceux qui p^{ré}sente estre les plus clair-voyāts, d'estimer qu'é ce grand & S. Siege telle imposture se soit logee. Le premier qui à face ouuerte a desmenty cette anciēteté, fut Onufrius en certaines annotatiōs ^{Qui sont ceux qui ont les premiers re-} par luy faites sur Platine en la vie de Iean 8. qui est cette Papess^e Ieāne. Apres luy nostre Pierre Masson, autremēt Papirius Mallonius, au liure ^{fut é ceste opinion,} par luy intitulé. *De Episcopis Urbis, qui Romanā Ecclesiam rexerunt, rebusque gestis eorum*, qui fut premierement imprimé chez niuelle l'an 1586. Lequel en la vie de Benoist III. immediat successeur de Leon IV. declame fortement cōtre tous ceux qui nous ont repeu de cette fable: car ainli l'appelle-il. L'an d'apres qui fut 1587. Nicolas Veignier fit imprimer sa bibliotheque historique, diuisee en trois Tomes: Et au second en peu de paroles dit beaucoup. A Leon IV. succeda (dit-il) selon Anastasius Bibliothecaire de Rome, au siege Papal Benoist III. fils d'un citoyen Romain, qui presida depuis son electiō deux ans cinq mois, seize iours; rous les autres toutesfois qui ont escrit l'histoire des Papes telmoignent d'un consentement qu'une certaine femme natieue de Maience, qui auoit estudié à Athenes occupa le Siege Papal sous le nō de Ieā VIII. l'espace, cōme dit Ieā Lucide, de

deux ans, vn mois, entre lesdits Leō & Benoist: Au bout desquels elle mourut en trauail d'enfāt. mais Onufrius soustiēt fermemēt qu'elle n'a iamais esté, & que c'est pure fable ce qu'on escrit d'elle; D'autant qu'Anastasius, Luitprand, Regino, ny les anciēnes Annales n'aucun autre des plus proches de ce siècle, n'en ont fait aucune mention: Estimant que ce qui est escrit en la Chronique de Sigebert, y a esté faussement adiousté. Cependant marianus Scotus, qui viuoit l'an 1080. declare bien expressement que cela se disoit dès son temps.

Quelque party que le docte Veignier face semblāt de soustenir, toutesfois s'il vous plaist y prendre garde, vous le voyez balācer entre l'ouy & le nanny. Cela a esté cause que depuis Florimōt de raimōd, Cōseiller au parlemēt de bourdeaux, le voulut rēnier sur eux tous, par vn traité par luy fait sous le nō de l'Antipapeſse, c'est à dire cōtre Ieanne la papeſse. Liure de dās lequel ie ne voy auoir esté riē par luy oublié pour le soustenemēt de son opinion. Ie louē & la doctrine, & la diligente obseruation, & le zele d'Onufre, masson; Veignier, & raimōd; mais parce que toutes choses qu'ō expose en dispute, sont subiectes de recevoir diuers visages, s'il m'estoit loisible d'estre de la partie en subiect de si haute estoſe, ie souhaiterois volōtiers (pardonnez ie vous prie à ce mien souhait) qu'ō eust laissé le moustier où il estoit. Auparauant chacun tenoit ceste histoire pour vraye, sans penser faire tort au S. Siege, non plus qu'à l'honneur des Assyriens par leur Semiramis, qui sous l'habit d'hōme gouerna longuement leur Estat: & en fin cōme femme,

*Semiramis
fut Roi-
ne des As-
syriens.*

tomba au mesme defarroy que Ieanne. Mais depuis qu'on a mis cette histoire sur le trottoir, ceux qui font profession d'estre mal affectionnez au S. siege, se sont mis sur les rangs, & entre autres le seigneur du Plessi Mornay au liure par luy intitulé *Le Mystere d'iniquité, c'est à dire l'histoire de la Papauté*. de dans lequel par vn long chapitre il entend prouuer cette histoire estre veritable: & tout d'vne main se donnant telle carriere qu'il luy a pleu, fait le proces extraordinaire aux Papes, comme si cette imposture de femme auoit supplanté leur reputation. Ce liure contient plusieurs autres Chefs contre la dignité du S. siege, ausquels Coeffeteau, religieux del'ordre des freres prescheurs, a merueilleusement bien respondu, & singulieremet en ce qui concernoit le fait de cette pretendue rapelle en vn gros œuvre portât ce titre sur le front *Response au liure intitulé Le Mistere d'iniquité du Seigneur du Plessi*: & apres luy de fraiche memoire Pierre Coton Iesuite, en son Institution Catholique, chacun d'eux s'armants à l'enuy l'vn de l'autre de plusieurs raisons contre cette Ieanne Papelle.

Et puis au milieu de tant de braues guerriers vous voulez que i'entre en la lice, & vous die quel iugemēt ie fay sur ce suiect. Croyez que me reduisez en vñ estrange accessoire: Car de vous desobeir, ce m'est conscience: & en vo⁹ obeïssāt, ie crains tout: Car pour biē dire le croire, ou mescroire cete histoire est auourd'huy entre nous vn demy article de foy pour la consequāce: & neātmoins ie frāchiray le pas

pour vous obeïr; à la charge que me seruirez de garend & prédrez la cause pour moy, contre ceux qui me voudront attaquer.

*Iugement
de M.*

*Pasquier
sur cette
histoire,*

Les vns & les autres estiment cette histoire scandaleuse, & pour cette cause selon la diuersité de leurs Religions, ceux qui sont zelateurs du S. Siege la soustiennét estre fabuleuse: & les autres qui en sont deserteurs, pour tres-veritable: pensant par ce moyen acquerir vne grande marque au desauantage de la Papauté: Et quât à moy ie veux croire cette histoire, nō pour scādaleuse, ains miraculeuse, & qui soit grādemēt à l'edification de nostre Eglise, si tant est qu'elle soit veritable. Consequemment que les vns & les autres alambiquent en vain leurs esprits, sur le poinct du vray, ou du faux. A cette premiere demarche il me semble vous voir fremir, & me dire. Mon bon amy, il vaut mieux de vous imposer vn silence, que d'entrer en cette opinion brusque, farouche, & bisarre. Je vous supplie suspendre vostre iugement iusques à la fin de ma lettre; m'asseurant que lors reuenant de vostre premier penser au second, trouuerez que si ie fay faute c'est avecques quelque raison.

Leon 4.

*Pape com-
bien haut
de cœur.*

Ceux qui anciennemēt nous repeurent de cest extraordinaire Papat, firēt immediatemēt succeder cette fille au Pape Leon iv. du nom. Duquel, qui sans passion examinera les deportemēs, le trouuera auoir esté grād Pape, nō seulement en l'exercice de sa charge au spiriuel; mais aussi d'un cœur releué par dessus tous ses deuāciens, auoir ioué le persōnage d'un excellēt Capitaine & guerrier! Car aéslo aduenemēt il n'al-

la reblâdir Lothaire Pere, ny Louys son fils empereurs, pour cōfirmer son election, ainsi que le vouloit la cōmune vlâce, ainsi oustint fortement qu'il n'estoit tenu de ce faire: & cōduisit cette tresme de telle façon que les Empereurs luy en passerēt cōdemnation, moyennât que dedâs la ville de Rome il tint la main à ce que les loix capitulaires de l'Empereur Charlemagne, & de Louys le Debonnaire son fils y feussent entretenues. Reestablit les principales Eglises de Rome, qui par vne rafiade de Sarrazins auoient esté violees, pillées & sacagees. Et cōme quelque temps apres il eust aduis, que ces infidelles s'armoient derechef en Afrique, en deliberation de faire voile au pays d'Italie, & d'acheuer le piteux mesnage qu'ils auoient encōmencé à Rome, ce braue Prelat par vne diligence incroyable fortifia le Vatican, Palais & seiour ordinaire des Papes, accommoda la ville de portes neufues au lieu de celles qu'une longue ancienneté auoit fracassées, la ceignit en plusieurs endroicts de murailles, qu'il reuestit de diuers festours, pour se mirer les vnes aux autres, flanqua de deux bastiōs l'emboucheure de la riuiera du Tybre, pour empescher que la ville ne feust prise d'emblee de ce costé là. Se trouuant, tantost de pied, tantost de cheual, à toutes ces manufactures, pour fermer le pas promptement à ces Sarrazins. Et d'un autre costé sans mandier aucune ayde, ny des François, ny des Gregeois, comme ses predecesseurs auoient accoustumé de faire, leua à ses propres cousts & despens, vne forte armee, à laquelle s'estants ioincts les Siciliens & Neapolitains

*Rome sep-
ré en deux
demeures.*

(sur lesquels comme plus proches & voisins se deuoit esclater la premiere bourasque) il endossa le harnois, comme vn autre Iule Cesar, se mit à la teste des siens & ioua tellement des mains, qu'il obtint vne victoire absoluë sur ses ennemis. Dont les aucuns qui furent occis ne se souuindrent plus de telles entreprises, les fuyards en oublierét la voye, & les prisonniers eurent prou de loisir pour s'en repentir. Ayât par ces moyens asseuré la ville il en fit de là en auant deux demeures, dont l'vne fut appelée la vieille & haute, dedans l'enceinte de laquelle sont les sept anciennes Colines, qui fut depuis la moins habitee, & la basse ville, du depuis hebergement ordinaire tant des Prelats & Seigneurs, que du commun peuple. Laquelle il voulut estre nommée du nom de Leon, en cōmemoration des biens faicts qu'elle auoit receus de luy. Toutesfois preueni de mort, sa volunté ne luy reüssit. Par vostre foy trouuez vous en toute l'histoire des Papes vn plus signalé traict de grandeur (i'entends quant au monde) qu'en cettuy cy : duquel ie diray franchement que c'estoit vn Pape Leon, qui auoit vn cœur de Lion? Entendez doncques s'il vous plaist, quelle fut la fin & catastrophe de tout ce ieu. Soudain apres le deceds de ce grand guerrier; dieu luy baille pour successeur vne fille pour presider à la Papauté, c'est à dire pour raualer à ses successeurs leur nouuel orgueil, & les reduire à leur premier pied. Et puis nous estimerōs que par cette extraordinaire & inouye promotiō, il y ait du scandale au desad-

uantage de la Papauté? Au contraire, ie la tire à edification, comme vn vray miracle de Dieu, eu esgard au temps auquel il aduint, si tant est que l'histoire fut veritable.

Mais si ce n'est histoire, ains fable, comme plusieurs doctes plumes de nostre temps ont presuppposé, encores estime-ie vn autre miracle, qu'une infinité d'auteurs l'ayent tenue pour veritable, aucun desquels ne se trouue auoir esté mal entalenté contre la dignité du sainct Siege. Vns, Martinus Polonus, *Auteurs non suspects* Marianus Scotus, vn autre Martinus en sa *qui ont tenu cette histoire pour* Chronique intitulee *Flores temporũ*, Petrarque, Boccace, Othon Frisinghen, Platine, Raphaël Volaterran, Sabellic, Philippe de Bergame, *vraye.* Mathæus Palmerius, Trithemius, Naclerus, Ioannes Lucidus, Cælius Rhodiginus, Baptista Mantuanus. Qui sont tous alleguez en bloc & en tasche par le Seigneur du Plessy Mornay. Et à la mienne volonté que faisant son profit de leurs autoritez, il ne l'eust non plus voulu faire au preiudice du sainct Siege, qu'eux tous tenant cette histoire pour vraye.

Voire mais me pourrez vous dire, l'approuuant vous tombez en vn grand desarroy, d'estimer que plusieurs ayent esté faits Prestres, Euesques, Archeuesques par les mains d'une femme? A quoy ie vous respondray avecques Antonin Archeuesque de (que Coeffeteau met au rang des ames beatifiees sous ce nom de Sainct Antonin) quand il dit; si ce qu'on disoit de la Papesse Ieanne estoit veritable il ne preiudicioit au salut de personne.

*L'Eglise
auoit tous-
iours son
chef prin-
cipal qui est
Iesus Christ
& la grace
des Sacre-
ments.*

Car l'Eglise ne fut lors sans Chef, qui est Iesus-Christ, duquel elle receut l'influence. Et le dernier & principal effect des Sacremens, qui est la grace, ne manqua pas à ceux qui les prenoient d'elle avec deuotion, cōbien qu'elle ne fust non plus que les autres femmes, susceptible du caractere d'aucun ordre, ny d'absoudre des pechez : & qu'elle ne peust, ny consacrer l'Eucharistie, ny donner les saincts Ordres; au moyen dequoy ceux qu'elle auoit ordonnez, auoient besoin d'estre reordonnez: mais leur ignorance les excusoit du peché, & nostre Seigneur Iesus-Christ suppleoit en eux la grace des Sacremēts. A quel propos tout ce que dessus? Pour vous dire que si avecques vne conscience timoree nous eussions embrassé l'histoire de cette pretendue Papesse, nous n'en feussions maintenāt aux coulsteaux, comme nous sommes par alterations reciproques.

Mais la beauté du fait qui se presente, est que moy qui fay icy le Palemon, ay quelque part en cette querelle sans y penser. D'autāt qu'en quelque endroit de mes Recherches parlant de cette Papesse Ieanne, il m'est adueni de ne reuouer en doute sa Papauté, nō plus qu'à tous ces auteurs par moy cy dessus mentionnez. Chose que Raimond m'a fort bien sceu improprier au 4. chapitre de son Antipapesse, & toutesfois avecques quelque marque d'honneur: car apres s'estre plaint que quelques notables personnages de ce temps auoiēt par mesgarde approuué cette histoire. Celuy (dit-il) qui a fait

voir à la France ses belles Recherches, deuoit rechercher la verité de cette histoire, afin de n'enlaidir par vne telle ordure la beauté de ses escrits : Et en la marge a mis par forme d'apostille ce mot de Pasquier. Et tout d'une suite regrette que ie ne me sois estudié d'aprofondir cette question par la lecture d'vns & autres auteurs. Et vrayment ie recognois luy auoir beaucoup d'obligation, comme celuy qui auois auparauant les yeux sillez. Mais depuis sans me donner grande peine de fueilleter les liures pour cét effect, relueillant aucunement mes esprits sur sa sermonce, il me semble que cette hilstoire porte son dementir quant & soy, soit que vous consideriez le commencement ou le milieu, ou la fin. Je vous diray doncques à cœur ouuert ce que i'en pense, & en après auant que clorre ma lettre, ie reprendray mes premiers arrhements. On vous represente icy vne ieune fille, laquelle aagée de douze à treize ans, trauestie se transporte en la ville d'Athenes pour se proumouuoir aux lettres humaines. Veu la bassesse de son aage, c'estoit en la Grammaire, Rhétorique, hystoires, pour puis apres prendre son vol plus haut en la Philosophie & Mathematiques : Je vous prie me dire en quel endroit vous trouuez, ny qu'auant l'estat populaire de Rome, ny depuis sous les Empe- seigner les arts de cette façon. Bien trouuerez que dans nostre Marseille on faisoit cét exercice, & c'estoit vn rendez-vous ordinaire de la ieunesse Romaine qui se vouloit adonner aux

*Confuta-
tion de ce
refable.*

*Marseille
rède & vous
de la ieunes-
se Romaine
pour estu-
dier.*

Escoles en
Athenes &
quelles.

lettres : Et au regard de la ville d'Athenes, elle auoit certaines maisons & salles, es-
quelles on faisoit profession icy de la do-
ctrine des Academiciens, illec de celle des
Peripateticiens, en vn autre endroit des
Stoiques, & ailleurs des Epicuriens, & des
autres; qui estoient escoles ouuertes pour
gens promeus d'aages, & non ieunes en-
fans : Au demeurant nul autre exercice
ordinaire des lettres tel que nous voyons au-
iourd'huy en nos Vniuersitez. Et quand il y
eust esté autresfois, chose dont ie ne puis pas-
ser condamnation, toutesfois lors de la Papesse
Ieanne, qui est dedans le siecle de l'an huiectcés,
cette ville estoit par l'iniustice des ans tombee
en telle desolation que Synesius passant par là
escriuit n'auoir trouué dedans Athenes, vne
Athene, ains vne ville champestre sans plus,
dõt le principal mesnage estoit de nourrir auet-
tes, & y faire du miel. Parquoy ie trouue que
dés cette premiere demarche on a lourdement
bronché. Et c'est la cause pour laquelle Boc-
cace en son traicté des Femmes de marque au
chapitre qu'il a voué à cette pretendüe Papes-
se, se donne bien garde de la faire estudier en
Athenes, ains en la ville de Rome, soudain
apres qu'elle eust abandonné l'Angleterre.
*Et sic scientiâ mirabili prædita, iam ætate pro-
uecta ex Angliâ Romam se contulit, & ibidem
aliquibus annis in Iano legens insignes habuit au-
ditores, & cum præter scientiam singulari hone-
state & sanctitate polleret, homo ab omnibus cre-*

ditus est. Adiqustez qu'en la ville de Rome désle premier fondement de la Papauté, & continuation d'icelle, le commun vsage fut, & tousiours depuis a esté, de ne promouvoir à cette grande dignité que des vieillards, & encores ceuxqui reluisoient en saincteté & prud'hommie sur tous les autres: Si non que quelquesfois par les factions des grands on y commit quelques ieunes gars de Rome; mais leur autorité ne fut de longue duree. Icy on presuppouse auoir esté estably vn estrangier, escolier, qui auoit sceu iouer du plat de sa langue, mais imbarbe, consequemment réputé ieune, comme aussi, falloit il que cette fille n'eust atteint à l'aage de vieillesse, puis qu'on la figure auoir depuis porté enfant, & vrayement tout sens commun repugne à cette election de Papeesse. Et finalement se peut il faire que ceste grande ouuriere en matiere de dissimulation, qui tout le temps de sa ieunesse auoit sceu couvrir son ieu, estant montée à ce haut degré, se voyant sur le poinct de gesir, eust esté si mal aduisee de se commettre à la mercy d'une procession generale, & qu'elle qui en cette qualité de Pape auoit toute puissance sur la ville, n'eust dissimulé vne maladie, affin de garder la chambre, ou le liét quelque temps, pendant lequel elle se feut deschargee de son ventre, sous la confidence de ses plus fidelles seruiteurs? Toutes ces particularitez accueillies ensemble me semblent assez suffisantes pour faire croire

Les vieillards seuls prouueus à la papauté.

qu'il y a beaucoup de la fable en cette Ieanne Papeſſe.

Mais à quel propos cette Fable, me pourrez vous demander? Car il ne faut faire nulle doute que ce compte ne fut cōtrouué pour vilipender le ſainct Siege; d'autant que lors ny Vviclef, ny Iean Hus, ny Hieroſme de Prague, ny Martin Luther, ny Iean Caluin n'estoient arriuez pour luy faire la guerre. Au contraire il eſtoit adōcques de tel reſpect & autorité, que le Pape n'estoit pas ſeulement honoré de ce grād nom, ains d'un autre beaucoup plus grand, qui eſtoit celui d'Apoſtolic. Vn Martinus Polonus, auquel on attribue le plus ancien recit de cette hiſtoire, eſtoit Religieux del'ordre de Ciſteaux. C'eſt celui que Platine allègue en la vie de Iean 8. (ainſi appelle il Ieanne la Papeſſe) fable dont Martin n'estoit le premier autheur: car il veſquit deux cens ans apres, & faut qu'il l'eust empruntée de quelque autre dont nous ignorons le nom. Iel'eſtime doncques vne fable telle que nos eſcriuains modernes nous pleuiſſent, mais non faite à la vauuole, puis que le nom du Sainct Siege y eſtoit engagé. Et quiconque en fut l'inuenteur voulut ſous l'eſcorce d'icelle enſeigner aux Papes de ne ſe glorifier en leurs armes: Non que Leon ne les eust ſur iuſte tuiect endoſſées contre les ennemis de noſtre foy en ſe defendant: Mais pour apprendre à ſes ſucceſſeurs que c'eſtoit vn meſtier qu'ils deuoient ſobrement exercer, puis qu'à ce grand Capitaine Prelat vne femme du tout imbecile auoit ſuccédé. Conclusion, ſi

l'hiſtoire

*A quel deſ-
sein ceſte
fable fut
inuentee.*

L'histoire est veritable, ce fut vn coup de Dieu;
si fabuleuse, vn ieu d'hommes, l'un & l'autre
tendants à mesme fin non de scandale, ains e-
dification, telle que ie vous ay cy desustou-
chée. En effect voila le iugement que i'en fay,
bon ou mauuais, ie m'en remets du tout au
vostre. A Dieu. Ce vingt-quatriesme de
Mars 1614.

Tome I.

Hhh



TABLE
DES CHOSES PLUS ME-
MORABLES CONTENUES
EN CES DOVZE LIVRES
d'Epistres.

A

Ages des troubles
de la France. 618
Selon la diuersité de nos
aages il est bien seant
que nous representiôs
diuers personnages.
366

Royaume des Abeilles.
601

Abeilles viuent & man-
gent en commun. 602.
maison du Roy des A-
beilles plus sur-haussee
que les autres, & en
forme de Palais. ibid.

Abeilles plus anciennes
assistent leur Roy côm-
me pour conseil. ibid.
& 603

Abeilles ont soin de leurs
malades 603. iettent les
corps morts hors de leur
demeure. ibi. leur Roy
estant mort elles en
portent dueil. ibid. se
font la guerre les vnes
contre les autres. 604
le Roy des Abeilles n'a
point d'aiguillon. 634

Accord fait entre Mes-
sieurs le Prince de
Condé & de Guise. 191

Accueil fait au Roy Hé-
ry III. arriuant à Paris.
718

Acheminement au siege
d'Orleans. 239

Acheminement au siege
Hhh ij

T A B L E

de la Rochelle.	316	Aduocat en quels ſuiets	
Actions du Prince ne		de cauſes ſe doit prin-	
doiuet eſtre iugees par		cipalement addonner.	
le ſuiet.	807	326. l'eſtat d'Aduocat	
Adieu, mot dont nous		eſt meilleur & plus	
uſons en François pre-		ſeur qu'un office de iu-	
nās congé de bouche.		dicature.	420.
3.		Jeune Aduocat doit avec	
Admiral ſe ioint à l'An-		toute ſubmiſſion ſe ré-	
glois, duquel il reçoit		dre auditeur.	534
argent.	240	Aduocat quel doit eſtre.	
Admiral eſcrit vn mani-		535	
feſte touchât le meur-		La premiere piece de	
tre commis en la per-		l'Aduocat eſt d'eſtre	
ſonne de monsieur de		preudhomme. ibidem	
Guiſe.	252	Aduocat doit eſtre cour-	
il eſt déclaré innocent		tois & modeſte.	537
de la mort de mōſieur		Aduocat plaidant eſt au-	
de Guiſe.	258	cunemēt excuſable en	
en quel eſtat il fut		ſes paſſions.	537
trouué par le Sei-		Quatre grāds Aduocats	
gneur de Thoré.	272	appelez aux grāds E-	
il eſt vaincu par le duc		ſtats pour leurs vertus.	
d'Anjou.	190.	425	
eſt occis à Paris.	307.	Adulteres furent cauſe	
ſa vie		de perdre l'Eſtat Ro-	
& ſes deportemens.		main.	552
Admiration de que eſ-		Afrique a produit des	
fect eſt auicune hom-		plus grands Docteurs	
me.	535	del'Egliſe.	19
Aduocats & Procureurs		Agathocles paruenue au	
du Roy pourquoy ſpe-		Royaume de Sicile	
cialemēt appelez gens		par ſa meſchanceté.	
du Roy.	768		

437.438

Agésilas surpris par quel
que sien amy faisant
l'estât avec ses enfans le
pria de suspendre le iu-
gement de ce qu'il a-
uoit veu iusques à ce
qu'il fust pere. 117

Agnes Sorelle appelée
par les Annales la bel-
le Agnes. 159

Monsieur d'Aigremont
recommandé par mō-
sieur le premier Presi-
dent. 574

Albigois ruinez par Guy
de Mont-fort. 623

Alciat a escrit en Latin
des Epistres. 7

Alexandre souhaittoit a-
pres auoir subiugué v-
ne partie de l'Vniuers
en subiuguer d'autres.
23

La vie d'Alexandre escri-
te en vers de douze
syllabes. 107

Alexandre receut grand
heur d'estre mort ieu-
ne. 438

Alexandre le grand ne
vouloit estre represen-

té en peinture que par
Apelles ou Lyssippe.

694

Allegations reprouuees
par l'autheur, 444. &
d'où vient ceste nou-
uelle forme d'eloqué-
ce qui gist en icelles.
ibid. & 445

Alienation du bien de
l'Eglise. 253

Allemand parlant Latin
est mal-aisemēt enten-
du du François. 132

Allemands appellèrent le
Roy à leur secours cō-
tre l'Empereur. 38

Alphenus Varus sage Se-
nateur de Rome. 405

Amant auant la iouïssan-
ce n'est iamais apleuré.

35

Amant ne peut estre si as-
seuré qu'il reçoie vn
parfaict contentemēt.

37

Ambition plus forte que
l'amour. 23

Ambition si elle se trou-
ue aux bestes. 599

Ambition ordinaire cō-
paigne des Grands. 805

Hhh iij

T A B L E

Ambition & diffimulatiō. principaux outils des Princes. 807	ce parle Duc de Bour- gogne. 630
Amitié entre les bestes. 562.593	Bon. offices prestez à nos Roys par les Citoyens d'Angoulesme. 348
Amour n'est iamais sans crainte. 352	privileges octroyez à ceux d'Angoulesme. 349
Amour des peres enuers leurs enfās, quelle suit- te porte avec luy. 394	Calamitez que la ville d'Angoulesme a souf- fert pendant nos trou- bles. 353
Amphion musicien ex- cellent.	Angoulesme receptacle des ancestres de nostre Roy. 362
Amulius Roy d'Albe fut tué par Romulus & Remus ses nepveux. 548.549	Anguerrant de Marigny eut vne fin honteuse. 438
Amurath prit les villes de Philipoli & Adriano- poli. 630. chassa l'Em- pereur Paleologue. ibi- dem.	Sçauoir si les autres Ani- maux sont participans de la raison. 584.
Anagrammes François. 500	Combien les autres Ani- maux abondent en prudence. 590.
d'Andelot delaiissé à Or- leans pour y cōmander. 241	Animaux plus continens quel'homme 565
Anglois chassez de Fran- ce du temps de Charles VII. 25.	Sçauoir si les autres Ani- maux sont sociables en leurs especes. 596
Anglois maistres d'vne partie de la France. 630.	Duc d'Anjou Lieutenant general de France. 190.
Anglois attirez en Fran-	Annibal Carthaginien vaincu par le ieune Sci-

- pion. 302
 Annibal sentit grād mal- 582
 heur par la longueur sçauoir si les Arbres ont
 de sa vie. 438 quelques estincelles de
 sens. 585
 Antioche Roy de Mace- le seigneur d'Ardiuiillers
 done prend à sa solde a escrit des poësies.
 les Gallogrecs. 46 62.
 Antiquailles de Rome à Arioste auteur Italien
 quoy nous doiuet ser- de grand bruit. 15
 uir. 395 Ariouiste venu au secours
 des Sequanois, s'empa-
 ra du plus beau territoi-
 re. 633
 Anthoine Carracioli ex- Aristides deuant le peu-
 traict de la famille de ple d'Athenes s'oppo-
 Melphes Euesque de sa au conseil de Themis-
 Troye. 202 tocles. 257
 Anthoine Fontanon Ad- Aristote grand personna-
 uocat en la Cour de ge. 11
 Parlement. 515 pour la plus grand' part
 traduit en nostre vul-
 gaire. 84. sa sentence.
 319 97.
 Aoust mois fatal pour nos Armes plus en vogue que
 troubles. 370 les lettres au cōmence-
 ment des monarchies.
 20
 Appanage du Duché Arrest donné en faueur
 d'Anjou a cest heur de du Prince de Condé
 produire des Roys. demandeur en declara-
 tion d'innocence. 190
 479
 Apologie de la Main. Arrests tenus la veille des
 Roys en la maison del'au-
 476 Hhh iiij
 Appius Claudius abusant
 de son autorité de-
 cemuirale. 552
 Apollo fauorisa tous-
 iours le party Troyen.
 479
 Apprendre les choses par
 cœur d'où viét ce mot.

TABLE

theur.	78	empesché par ses domestiques d'estre heureux.	438
Arriuee des Reistres en France & leur deffaitte.	713	S. Augustin Docteur Africain tres-sçauant.	19.
Asyle basti par Romule.	543	son liure de la Cité de Dieu traduit en nostre langue vulgaire.	84
Assassin commis en la personne de son ennemy, s'il est excusable, double opinion.	251	S. Augustin Pelagien, fort grand Euesque & Docteur.	721
Assemblée premiere où fut faite la resolution de prendre les armes pour la religion.	149	d'Aumale porté par terre & fort froissé.	237
Assemblée à Vaugirard village pres Paris.	179	Auuergnacs pourquoy se licentioient extraordinairement.	404
Assemblée des Estats dās Orleans.	92	Autheurs non suspects qui ont tenu l'histoire de la Papesse Iehanne pour vraye.	837
Assemblée à Fontainebleau sur la police de la France.	182		
Assurance n'y a au cune en amour, il faut estre auaricieux de son honneur.	538	B	
Des Auenelles Aduocat descouure la coniuration.	180	B achelier en Theologie condamné.	201
Augurs de Rome.	586.	Baings ordonnez en certains mois és maladies desesperées & chroniques.	408
Auguste harangant ses soldats les appelle ses compagnons.	405	Balaam predisant aux autres leur fortune ne voyoit pas la sienne.	720

DES MATIERES.

Barbarie par quel moyen s'est logee entre nous par plusieurs centaines d'ans. 20	excellent. 26
Barberousse general des galeres du grand Sei- gneur. 438	Bellouese conducteur des Gaulois en Italie. 45
Bardes manioient la Theologie & Philoso- phie des Gaulois. 48	Bembe a escrit des lettres en Latin. 65
Bailly & Preuost d'Or- leans mis prisonnier. 185	Benedictions du peuple sont prieres. 678
Baltazar de Chastillon celebre auteur Italien. 15	Benedictions des Peres à leurs enfans en quoy consistent. 685
Baron des Adrets cōmet toutes sortes de cruau- tez contre les Catholi- ques. 234	Berenger Comte de Pro- uence Poëte excellent. 88
Barricades faites à Paris, & leur commandement. 787	Bestes brutes plus fauo- risees de nature que l'homme. 580
Basilide tue son fils aisné. 730	Bestes miles au rang des Dieux par quelques peuples. 586
La Bastille saisie. 795	Bestes non ingrates. 589
Bataille de Dreux. 236	Bestes capables de honte & pudeur. 190
Bataille S. Denis donnee la veille S. Martin 1567. 283	Bestes s'entendent assez entre elles par leur voix. 606.607
Bayonne ville fatale à l'E- stat. 258	Bible traduite en nostre vulgaire. 84
Du Bellay Poëte François	Bibliotheque de mōsieur de la Croix du Mans. 554
	Biens d'Eglise alienez iuf- ques à trois millions de liures. 253

TABLE

Bienueillâce. des subiects
 vray subside du Prince.
 797
 Bigarruresliures de mon-
 sieur Tabourot. 492
 Bisance depuis appellee
 Constantinople. 47
 Brennon conducteur des
 Gaulois en Italie. 45
 Bretagna la grande ap-
 prenoit à orner son lan-
 gage sur nostre patron.
 10
 Breton Aduocat pendu &
 estranglé pour auoir in-
 considerément escrit.
 669
 Bresil & les mœurs des
 Bresiliens. 125
 Brissac Marechal de Frâ-
 ce, Lieutenant dedans
 Paris. 231
 Mōsieur Brisson authœur
 des formules des Ro-
 mains. 513
 il dresse le Code Henry
 par le commandement
 du Roy. ibid.
 La Brosse vieil Capitaine,
 tué. 238
 Bruicts nouveaux des
 troubles. 1585. 621
 Brulart Procureur gene-

ral du Roy s'oppose
 aux requestes des Iesui-
 tes. 261
 Brutus iugea son fils à
 mort, & fut spectateur
 de son supplice. 553
 Bocace authœur Italien,
 bien renommé. 15
 Bonamie a elcrit des let-
 tres en Latin. 65
 Bourbon met le siege de-
 uant Rome. 47
 Bourdillon Marechal de
 France, & gouverneur
 de Piedmont. 346 & 347
 Du Bourg Conseiller au
 Parlement bruslé. 178
 Bourguignons quand &
 pourquoy ils chassoïent
 leur Roy de leur Roy-
 aume. 74
 Bourgongne promise à
 l'Empereur par le trai-
 cté de Madril. 346
 Budé a escrit des Epistres
 en Latin.

C

C Latin combien di-
 uersement se pronõ-
 ce. 139
 Calais reprise par mon-

DES MATIERES.

fieur de Guise. . 170
 Calomnie est à craindre
 sur toutes choses en
 tous grands iours.
 410
 Camillus chastiala trahi-
 son du pedagogue des
 enfans des Faleriens.
 251. il eut le milieu de
 sa fortune trauerriere.
 438. fut banni prenant
 qualité de Dictateur,
 donne à dos aux Gau-
 lois, & les desconfit.
 595
 Capitaines & Lieutenans
 esleus à Paris en chasque
 dizaine. 231
 Vieux Capitaines qui ont
 couru grande fortune
 doiuent craindre de
 s'aheurter aux ieunes.
 299
 Capitaine ne doit estre
 blasphemateur. 678
 doit estre sobre, doux &
 affable. ibid:
 Capitaines desappointez
 à Paris, & quelles gens
 mis en leurs places. 822
 Caprice de Iean Baptiste
 Gello. 14
 Carase neuveu du Pape

Paul Theatin est de Ca-
 pitaine fait Cardinal. 167
 Cardinal de Lorraine cō-
 stitué souuerain apres
 le Roy. 60. porte la pa-
 role au College de poif-
 sy. 199. presche à nostre
 Dame, & à S. Germain
 del'Auxerrois. 232
 Cardinal de Tournon fait
 vieux routier en affaires
 d'Estat. 199
 Cardinal de Tournon fait
 que les Iesuites sont re-
 ceus en forme de societé
 & college tant seulemēt,
 263. 264
 Cardinal de Bourbon des-
 ia vieil pretend à la cou-
 ronne, bien que le Roy
 fust ieune. 778
 Carlomā & Louys le Fay-
 neant appelez bastards
 pour auoir esté engen-
 drez d'vn mariage de
 Louys le Begue fait
 sans le consentement
 du roy Charles le Chau-
 ueson pere. 117
 Carneades enuoyé des A-
 theniens Ambassadeur
 en la ville de Rome.
 508

TABLE

Cartel de deffi.	18	treprise.	295
Cassiodore a escrit des Epistres.	1	Causes solénelles & toutes publiques plaidees par Pasquier.	455
Castelnau pris & executé à Amboise.	190	Cause principale des malheurs de la France sous Henry 3.	800
Catherine Royne de France supplie le Roy de se deporter de la iouste.	176	Censure à Rome de quelle autorité.	666
Catholiques comment diuisez.	779	Centeniers constituez par le Roy dans la ville de Paris.	271
Caton le vieil n'apprit le Grec que sur son dernier aage.	15	Ceinture est quittee par celuy qui fait cession de biens.	163
Caton n'estoit moins seul que quand il estoit seul.	74	Cesar Borgia & son pere emprisonnez.	550
Caton redoutoit autant que Pompee vint au dessus de Cesar, comme Cesar de Pompee.	225	Chambre Royale supprimee.	705
Caton pourquoy erigea l'Estat de Preteur de Rome.	419	Champignon naist en vne nuit, & perit en vne nuit.	686
Caton combié de fois accusé & absous.	665	Chancelier de l'hospital loüé pour sa retraicte.	799
pourquoy appelé Censeur.	ibid.	Changement de la volonté du Roy de Nauarre contre les Huguenots, & pourquoy.	216
Cause entre l'Vniuersité & les Iesuites traictee en Parlement.	259	Chapperon pour bonnet, chapperonner pour bonnetter, & deux testes en vn chapperon.	163
Cause, mot entre les Huguenots pour leur en-			

DES MATIERES.

- Charité entre les animaux 587
- Charge de Ville-mory. 714
- Charlemagne Empereur de Rome. 47
- Charlemagne fort docte. 88
- Charles Monsieur contrainct se contenter de la Guyenne, au lieu de la Normandie. 346
- Charles cinquiesme Empereur mit le siege deuant Mets. 42. sur ses vieux iours choisit vne vie solitaire. 167. fut contrainct se retirer de deuant Mets. 317. il ceda à la fortune de Henry deuxiesme. 300
- Charles Conte d'Anjou, Roy de la Pouille & Sicile. 319
- Charles cinquiesme Roy de France prenoit les villes en se ioüant de sa plume. 76. fit tomber l'Euesché de Lisieux à Nicole Oresme pour recompense deses labours. 85
- Charles huiëtiesme a fait trembler Rome.
- Charles neuuiesme visite sa sœur la Roync d'Espagne. 258. harassé de faim & de la lógue traite, se retire à Paris. 273
- Charles de Marilhac Archeuesque de Vienne. 192
- Cheualiers de l'Ordre de S. Michel creéz par François second, & la cause. 182
- Cheualiers du S. Esprit instituez par nostre Roy. 372
- Le Chien se rend aisément intelligible entre nous. 607
- Chilperic petit fils de Clovis escriuit plusieurs liures en vers Latins. 87
- Chiromancie. 483
- Chirurgie, d'où dite. 488
- Ciceron a escrit des Epistres. 1. il ne fut detourné d'escrire en sa langue. 9
- Ciceron appellé grand Orateur. 691
- Ciceron s'est rendu admirable entre les Grecs. 12. monta par sa vertu aux

TABLE

grands Estats. 437. di- loit de sa langue tout ce que contrefaisoit Roscius de ses gestes. 484	Citadelle erigee à Orleans & Lyon. 257. leur inuē- tion plus pernitiue que profitable à l'estat. 280
Cicongneaux nourrissent leurs peres & meres af- failliez de vieillesse. 889	Clairmont siege Episco- pal d'Auuergne. 423
Cincinnat pour la diuer- sité aimoit la vie cham- pestre. 71	Claude Seyssel Euesque de Marseille a fait plusieurs beaux liures. 153
<i>Cimbalum mundi</i> composé par Bonauenture du Pe- rier. 493	Closture de nos lettres Françoises. 3
Cimon Athenien par les instructions de So- crate paruint au de- gré de Philosophie. 13	Clodio Tolomei gran- dement estimé pour ses Epistres. 65
Cinges de Rabelais. 25	Code traduit en vieil langage François. 83
Cinges qui veulent à fausses enseignes paroistre grands aux despens des œuvres d'autrui. 637	Code Henry conte- nant les ordonnances de France. 514
Cinq cent filles violees avec leurs meres à la prise d'Aclerande. 722	Coleric fort aisé à appai- ser. 406
Circé forcieri. 470.	Coleriques ne doiuent e- stre mariez ensemble. 30
Circé de Iean Baptiste Gello. 14	Colleged des Dormans au- trement de Beauuais. 53
	Colloque de roisy de grād parade & peu d'effect. 128

- Colonies qui estoient en-
uoyees par les Gaulois
à la conqueste de nou-
ueaux pays. 561
- Combat de Iarnac & la
Chastaigneraye. 175
- Commencement des let-
tres de nos ancestres. 50
- Commencemens aspres &
facheux produisent vne
fin tres-douce. 51
- Commencement dás Pa-
ris de la ruine des Hu-
guenots. 206
- Cómençement des trou-
bles de. 67. 271
- Cómençement des trou-
bles de la Flandre. 267
- Commencemens & pro-
gres de la Ligue.
667
- Tirer cōmodité de ses in-
cōmoditez est belle cho-
se. 644
- Concile general clos & ar-
resté par la diligence de
monſieur le Cardinal de
Lorraine. 253
- Conciles s'ils sont vtils &
necessaires pour la recō-
ciliation des deux reli-
gions qui sont en Fran-
ce. 174
- Conneſtable de Luxem-
bourg du temps du Roy
Louys xi. condamné à
la mort. 158
- Conneſtable deffait par le
Duc de Sauoye. 300. ar-
riué à Paris ce qu'il y
fait. 224. Conneſtable
chef principal de l'ar-
mée par le Roy, pris à la
bataille de Dreux &
bleſſé 276. il eust le mi-
lieu de sa fortune tra-
uerſiere. 438
- Confederation du Roy
François premier avec
coniuration contre l'E-
ſtat est mal-aiſement
mence à fin. 179
- Connuiſſance des Iuges du
pays. 411
- Conseillers de la Cour de
Parlement mis en pri-
ſon. 174. 175
- Conseillers de parlement
deleguez par les Pro-
uinces pour faire execu-
ter l'Edict de pacifica-
tion. 249
- Conseil que l'Authen
ensuiuit en ses actions.
454
- Conseils des Princes ren-

TABLE

des illusoires en ce nou- veau remuement de re- ligion. 217	Contention entre la court de Parlement, & la cour des Generaux des Aydes sur la publica- tion d'un Edict. 195
Conseil establi à Paris par monsieur de Guise, & qui en furent les chefs. 818	Côtents causes de beau- coup de maux. 800
Consentement des peres & meres selon le droit n'est requis aux maria- ges des enfans, sinon par honneur & non par necessité. 117	Contracts des François differens de ceux des Romains. 519
Consentement seul est suf- fisant pour la perfe- ction du mariage. 119 120	Coq & sa monarchie. 601
Constantin le grand ce que fit apres la conclu- sion du Concile de Ni- ce. 157	Corbeau Romain & son histoire admirable. 605
Constantinople prise par nos Baudoyns Comtes de Flandres. 47	Corbeil assiegé par le Prince de Condé. 235
Contarein a escrit des let- tres en Latin. 65	Corneille prononçant des propos entiers & ap- prenant tous les iours quelque chose de nou- veau. 605
Contemnement fait met- tre à nonchaloir tout le plaisir. 36	La Cour de nos Roys n'est le seiour & abord des mieux-disans. 102
Contentement que peu- uent receuoir deux A- mans qui sont assurez l'un del'autre. 32	Cours souueraines de trois manieres en Fran- ce. 815
	Crainte, premiere pointe de nos actions pour bien faire. 426
	Cræsus mené à la raison par vn ieune Roy Cy- rus. 300
	Costumes quelles tyran- nies

DES MATIERES.

- nies produisent en nos
esprits. 365
- Coustumes de Paris reformees par monsieur le premier President. 425
- Coustumes particulieres defaillant ne faut recourir au droit commun des Romains. 522. mais aux plus proches. ibid.
- Cruautez de Basilides Roy des Moscouites. 722
- Cruauté plus que barbare enuers des prisonniers. 723.
- Cujas docte Iurisconsulte. 83
- Cuyure de Corinthe. 48
- Curius pourquoy aimoit la vie rustique. 71
- S. Cyprian Docteur Africain tres-sçauant. 19. fut premierement Payen & Magicien. 720. fait Docteur & Euesque. 721

D

- D** Amesloüees & solénisées par les vers des Poëtes. 457
- Darius vaincu par Alexandre n'ayant encores 28. ou 29. ans. 300
- Declaration & association escrete par les Huguenots. 228
- Declinaison de l'Empire Romain d'où vint. 774
- Defaute qui se peuuent remarquer en nostre droit François. 525
- Demosthene attribuoit les 1. 2. & 3. parties à l'action. 484
- Deportemens des François pendant la courte paix de 1568. 291
- Desordres intro duicts en France à cause de l'autorité absoluë du Roy en ses Edicts. 817
- Dialogues sont fort propres pour cōmuniquer nos conceptions. 67
- Dieu ayant puny les subiects par la sceleratesse d'un Prince, il punit apres le Prince. 548
- Dieu fait le procez aux Roys. 359
- Dieux pourquoy figurez par les payens anec pieds de laine & les bras de fer. 731

TABLE

Difference entre celuy qui enseigne par liures ou qui harâgue en public.	entre les François. 778
448	Distique de l'auteur de s ^{on} tableau. 477
Difference entre le droit François & Romain.	Diuersité de nos ancien- nes loix avec le droit des Romains d'où viét.
513	521
Difference entre les Cour- tisans & le peuple.	Diuisions de la Frâce sous diuersité de noms par- tiaux. 432
814	Domaine de la Couronne sacro saint. 338
Difficultez faites par le Parlement de Paris à la reception de l'Edict de Ianuier. 212	Donation faite par mai- stre Charles du Moulin à son frere infirmee par arrest de la Cour de Parlement. 741
Dignitez de France à pre- sent changees. 6. & 7	Doüaire coustumier pro- pre aux enfans. 526
Diligence admirable du premier President.	Dragut Reis general des galeres du grand Sei- gneur. 438
426	Druydes manioient la Theologie & Philoso- phie des Gaulois. 48
Diogenes pour n'estre oi- seux rouloit son ton- neau. 62	Ducs & Comtes tant de la France que del'Italie, d'où se sont faits. 632
Discipline publique en grande recommanda- tion dans Rome. 553	Es duels à qui appartient le choix du champ & des armes. 576
Discipline guerriere entre les bestes. 589	
Discipline à celuy qui cō- mande surpasse la vail- lance. 678	
Discours gaillard sur les passions d'amour. 369	
Dissimulations estranges	

E

E Aux medecinales de France. 804

Edicts pour mettre ordre contre les Heretiques qui pulluloient en la France. 178

Edict de l'imposition des cinq sols pour muy. 195

Edict du 25. Iuillet 1561. sur la souffrance de la religion nouuelle. 196

Edit de Ianuier de l'an 1561. 210

Edict de pacification de l'an 1562. 248

Edict premier sur l'alienation du bien de l'Eglise. 253

Edict des mariages pourquoy publié à la Cour de Parlement. 117

Edict de la subuention des procez. 255

Edict de Pacification en Mars. 1568 260

Edict des cōsignatiōs des procez quel'on vouloit renouueller. 449

Edict de Pacification fait en Iuillet 1585. 642

Edicts à la foule du peuple supprimez.

Edict de Iuillet contre les Huguenots publié en Parlement. 705

Edict contenant la suppression de trente-sept autres. 795

Edict supprimant tous les Contents. 765. & 796

Edict de la saincte Vnion publié & enregistré.

Eglise a tousiours son chef principal qui est Iesus-Christ & la grace des sacremens. 838

Elephant & le coq semblent auoir quelque instinct de religion. 586

Elephants & leur Republique. 599

Elephant ayant appris à escrire en Grec. 605

Elephans dansans sur les cordes, & escrivans aux theatres publics. 605

Elephans recordent leur leçon de nuit de ce qu'on leur apprend de iour, afin de n'estre batus par leurs maîtres, ibid.

TABLE

Elie & Elisee premiers instituteurs des moynes.	gis double.	715
701	Epigrammes de maistre Anthoine Marnac.	
Elizabeth fille aisnee du Roy Henry second mariee à Philippe par Procureur.	478	
Eloquence grandement descheüe du temps de Tacite. 691. pourquoy plus familiere aux Romains qu'à nous. 692	Epigrammes Latins de l'Autheur dediez à monsieur le premier President.	247
Empire de Rome transporté par Constantin en la ville de Byfance.	Epistres escrites par grâds personages.	
47	Epistres amoureuses mises en lumiere par l'autheur sans l'inscription de son nom.	1
Empereurs se sôt aymez à Paris. 648	Epitaphe de monsieur de Joyeuse.	712
Enfans de monsieur le President de Thou.	Epistres d'Erasme. 3. son iugement touchant les Epistres.	65
534	Erection des sieges Presidiaux de Clairmont & Beauuais l'an 1582.	
Enfant mineur d'ans ne peut aliener son bien sans l'autorité de son tuteur. 115	450	
Enfans ne se peuuent vouier en religion sans l'expres consentement des peres & meres.	Eschile tué au milieu des champs, d'une tortuë.	
701	77	
Ennodius a escrit des Epistres. 2	Escholes Grecques & Latines necessaires.	
Entreprise de Montar-	14	
	Escholes en Athenes & quelles.	840
	Escriture est comme l'image de la parole. 150	

- Ecrire parliures exprez
 contre les œuures d'au-
 truy, c'est vne chose
 pedantesque. 568
 Elmond Auger & Mal-
 donat doctes Iesuites.
 263
 Esprit infatigable de
 monsieur le premier
 President aux affaires
 du Palais. 432
 Esprit Romain pour ce-
 luy qu'on appelle main-
 tenant en Cour, hom-
 me déterminé. 551
 Esprits il cōsiste au cœur
 ou au cerueau. 582
 Esprits sont faits à la sem-
 blance & image de Dieu
 73
 Estat de premier Presi-
 dent de Paris de quelle
 estoffe & grandeur.
 416
 Estats tenus à Orleāns 192.
 Estats quel fruit appor-
 tent en France. *ibidem*.
 Estats ne se doiuent enuier
 par vn homme de bien
 en temps calamiteux.
 418.
 3. Estats qui reluisēt prin-
 cipalement entre nous
 533
 Estat de France de quels
 ordres est composé
 Estrangers que nous ap-
 pellōs à nostre secours
 se font en fin maistres
 de nous. 632
 Estude de monsieur le
 premier President.
 432
 Ethniques semblent a-
 uoir appris de nous les
 premiers rudimens de
 la religion. 596
 Euesques appelez Ora-
 teurs des Roys. 691
 Euesque de Nomogarde
 indignement traicté
 par Basilides apres le
 festin. 722
 Euocations du propre
 mouuement des Prin-
 ces de quel dangereux
 effect sont, & comme
 elles ont pris leur ply
 par la France. 363
 Euocations & abolitions
 à craindre en matie-
 re de grands Iours.
 412
 Excuses des Parisiens au
 Roy sur le subiect des
 barricades. 794

TABLE

Exercice à porte ouuerte
de la nouuelle religion.

198.199

F

FAble de la Papeſſe
Ieanne pourquoy in-
uentee. 842

Fabricius renuoya à Pyr-
thus ſon medecin. 251

Faceties de Bonauenture
du Perier. 493

Fanfares de langage pro-
pres à qui. 10

Fantome apparu à Iules
Cesar ayant paſſé le Ru-
bicon pour ſ'impatroni-
ſer de l'Eſtat. 749

Fatalité qui ſ'eſt trouuee
en nos troubles. 315.
316

Monsieur Fauchet docte
homme en noſtre ſiecle.
557

Faute grande d'auoir rom-
pu la paix de 68. ou de
n'auoir mieux executé
la rupture. 292

Fautes que les Aduocats
commettent au barreau
meſans les deux droicts
enſemble. 205

Fautes commiſes par le
Prince de Condé au

cōmencement des trou-
bles. 223

Fautes grandes faites par
les grands hommes. 419

Fautes imputees à mon-
ſieur le premier Preſi-
dent. 439

Fautes de la vieilleſſe.
450

Fautes des Chefs pour-
quoy trainét quād& ſoy
vne longue queſie. 678

Fautes faites aux barrica-
des, tant de la part du
Roy que de monsieur de
Guiſe. 790

Femme doit ployer ſous
le mary. 29

Femmes ſont foibles de
corps&d'entendement.
119.120

Fême perd beaucoup plus
de ſon doüaire, quand
elle fait perte de ſon
honneur. 124

Femmes ont plus de com-
mendement ſur les Prin-
ces, que nuls autres. 79

Femmes à Rome en la per-
petuelle tutelle des hō-
mes. 526

Ferdinand Roy des Ro-
mains. 43

DES MATIERES.

Feu des troubles de 61. al- lumé generalement par la France. 229	monſieur le premier Preſident. 433
Fiertre de S. Romain. 358	Formules de parler ve- nues de la main. 48
Fiebure quarte pourquoy ſouhaittee entre les François pour grand maudiffon. 615	Fortifications de Paris ſe ſont tournees en formé detaille. 439
Fin miſerable de Baſilides. 730	Fortune heureuſe du Roy Henry 3. eſtant encor Duc d'Anjou. 301
Flandre pays fatal à n'e- ſtre remis ſous l'obeiſ- ſance des François. 629	Fortune admirable de monſieur le premier Preſident, de tous ſens 437
Fleurs de Rhetorique ap- pellez par quelques vns deſguilemens de verité. 22	bône fortune de l'auteur contre-balancee par la mauvaiſe. 643
Fleurs de nos eſprits ſur- paſſét celles des ſaiſons. 256	Fortunes des hommes il- luſtres diuerſes. 437. 438. & ſeq.
Monſieur de Foix Arche- ueſque de Tholoſe. 398	Fourmis enterrent celles qui ſont mortes. 587
Folie du temps qui court de prendre vn amy qui nous ſeconde en nos combats. 373	Republique des fourmis. 601
Force de l'eloquence de Ciceró enuers Ceſar. 737	France anciennement ap- pellee Gaule. 10
les Forces croiſſent par l'obiet. 81	François, c'eſt à dire, franc & libre. 6
Forme de vers eſquels l'E- cho eſt representé. 495	le François ne ſe peut en beaucoup de choſes rap- porter au Latin. 7
Formulaire d'arreſt de	le François n'a telle varieté

TABLE

de mots que le Romain
& le Grec, & la cause.
8
les François s'emparent de
nos Gaules. 47
François & son naturel.
167.
François curieux de nou-
velles de sa nature. 50
François 1. du nom Poëte
excellent. 94. blessé en
la teste par le Sieur de
Lorges. 174
François insolent de sa
nature. 677
Frontispices de nos let-
tres Françaises. 2

G

Gen Latin prononcé
diuerfement. 143
Gabaſton & Rouge-au-
reille menét par troup-
pes prisonniers les
Catholiques. 207
Gabaſton Cheualier du
guet à Paris. 207. fauo-
riſe les proteſtans. ibid.
vaillât de ſa perſone. ib.
Galere Maximian & Cō-
ſtance Empereurs. 213
Gallipoli occupee ſur les

Chreſtiens par Orcan
Roy des Turcs. 630
Gallogrecs iſſus de l'an-
cienne ſource des Gau-
lois. 46
Garde de harquebuſiers
François introduitte
pres la perſonne du
Roy. 182
Gaſcons & Eſpagnols ve-
nus au ſecours des Ca-
tholiques. 236
Marquis du Gaſt deſſait
par monſieur d'Anguyé.
300
Gaule touſiours eloqué-
te. 10.11
Gaule Cifalpine quelle
partie eſt-ce d'Italie.
45
la Gaule ne fut iamais deſ-
garnie de ſçauans per-
ſonnages. 46
Gaulois ſe ſubiuguerent
eux meſmes. 46
Chefs des Gaulois faits Se-
nateurs par Iules Ceſar.
47
Gaulois meſpriſerent de
mettre leurs con-
ceptions par eſcrit.
48
Gaulois au cōmencement

- plus forts qu'hômes, mais
à la lōgue plus foibles
que femmes. 528
- Gaulois sous la conduite
de Brennus prirent Ro-
me. 560
- Gaulois auoyent toute
puissance de vie & de
mort sur leurs enfā. 704
- Genius Archiprestre d'A-
mour. 78
- Gens du Roy quels. 760
- Gens d'armes durant les
troubles se donnēt plus
de loy & d'autorité
que leurs Capitaines 405
- Geofroy de Thery au-
theur entre nous. 415
- Germanie florit à present
en toutes sortes de dis-
ciplines. 20
- Giury tué à la bataille de
Dreux. 237
- Grammairiens se font a-
pres que les lāgues sont
paruenues à leur per-
fection. 150
- Grammairiens comme les
Censeurs auoient la
charge sur les liures que
l'on diuulguoit. 151
- Grammont remue toute
la Guyenne. 222
- le Grand & Pietre mede-
cins de Paris, morts.
572
- Grands comme do. uent
estre chastiez. 408
- Grands iours de Clair-
mont en Auuergne. 403
- és grands iours la calom-
nie est à craindre & les
euocations & aboli-
tions. 410
- Grece farcie d'une infinité
de grands auteurs. 12
- Grecs tout ainsi que les
Romains brusloyent
les corps des morts. 365
- republicque des Gruës. 599
- Guerres ciuiles dāgereu-
ses, & mesme pour la re-
ligion. 224
- Guerres ciuiles plus aigues
& dangereuses que nul-
les autres. 232
- le Royaume grandement
affligé de guerres ciuiles
sous Charles 3. & 6. 630
- Combien de maux pro-
duisent les guerres ciui-
les. 631. 632
- Guerres ciuiles apportent
la subuersion del'estat.
633
- Guerre ciuile moins tole-

T A B L E

rable qu'une tyrannie en
 temps de paix. *ibidem*,
 Guerres civiles ont tou-
 siours de loques queuës.
 646
 Guerres civiles ont faict
 grand tort à la ville de
 Paris. 647
 Guerre violente contre
 l'Espagne, l'an. 558. 188
 Guelfes & Gibelins fac-
 tions dans l'Italie. 183.
 & 632
 Guet perpetuel de soi-
 xante archers à gages
 estably à Paris à soixante
 liures par an. 207
 Guillaume Cretin du re-
 gne du Roy François. 312
 Guillaume de Lory florif-
 soit sous Philippe Au-
 guste. 652
 Monsieur de Guise desti-
 né Lieutenant du Roy
 en Italie. 168
 est aussi Lieutenant gene-
 ral à Mets. 36
 beaux succez de monsieur
 de Guise. 170
 Monsieur de Guise re-
 tourne en Cour ligué a-
 uec le Connestable &
 mareschal de S. André.

221
 Monsieur de Guise blessé
 à mort par Poltrot. 242
 louanges & blasmes de
 monsieur de Guise. 244
 Madame de Guise de-
 mandede iustice de l'assassin
 commis en feu son mary.
 258
 Guy de Montfort faisoit
 la guerre aux Albigeois
 à cause de l'heresie. 623
 Guy de Lusignan. 629

H

H Abitude del'air pro-
 duit quand & soy les
 esprits plus doux & plus
 hagards. 405
 Harangues funebres fai-
 tes au parlement au
 decez d'un Conseiller.
 573
 Harangues de monsieur
 le premier President,
 des Seigneurs qui esto-
 yent morts. *ibidem*
 Harangues funebres fai-
 tes en l'honneur de ceux
 qui n'ont merité per-
 dent le Palais. 572
 monsieur de Harlay pre-

DES MATIERES.

- fident aux grâds iours
 de Poictiers. 413
 le haure de graceliuré aux
 Anglois pour gage &
 assurance. 236
 le hazard seruit de dis-
 cours aux Huguenots
 sans y penser. 294
 Hellepont, maintenant
 appelé le bras S. Geor-
 ge. 630
 Henry second protecteur
 de la liberté Germani-
 que. 174
 Henry second tué par môt-
 gommery. 174
 Henry troisieme enclin à
 la liberalité. 799
 Henry troisieme sentit en
 six mois deux effects du
 tout contraires à Paris.
 808
 Herbes leurs proprietéz
 & vertus par qui des-
 criptes. 76
 heresie se doit exterminer
 par les armes. 623
 Heritier n'a nulle repri-
 mende ni esgard sur la
 vie du deffunct. 124
 Hierosme Cardan auoit
 prognostiqué au Roy
 Henry le malheur qui
 luy deuoit aduenir. 175
 Histoire du Roy Louys
 xi. appelée mesdisante.
 152
 Histoire des barricades, &
 comme le Roy Henry 3.
 sortit de Paris. 781
 Histoires de la Papesse
 Iehanne. 829
 Holofernes assassiné par
 Iudith. 251
 Hommen'est establi en ce
 monde que pour la con-
 seruation de l'humaine
 societé. 71
 Homme est à l'homme vn
 Dieu. 482. l'homme à
 l'hôme vn loup. ibidem.
 Homme déterminé, mot
 inepte qui s'est aujour-
 d'huy insinué entre les
 Courtizans. 552
 Hóneur est l'ame des bons
 esprits & cœurs gene-
 reux. 70
 de l'hospital Chancelier
 dissuade de prendre les
 armes. 225. est tousiours
 different en opinions de
 monsieur de Thou pre-
 mier President. 431. 432
 Huguenots pourquoy
 appelez au cōmencemēt

TABLE

Huguenaux.	181	appelez Freres Pres-	
deffences sur peine de la		cheurs.	633
hard de n'appeller au-		Iacques Cœur & sa for-	
cun homme Huguenot.		tune.	158
184		Causes pour lesquelles il	
Huguenots portans les		fut condanné. 157. arrest	
armes declarez rebelles		de la Cour contre luy.	
& criminels de lese Ma-		160. ses enfans. 162. la	
iesté.	234	composition d'iceux a-	
aux Huguenots toutes		uecle Roy Charles sep-	
choses rioyent soudain		tiefme.	ibi.
apres la mort du duc de		Iacques Peletier a escrit	
Guise.	252	de l'ortographe Fran-	
toutes choses se tournent		çoise.	16. 127. 128
au desaduantage des		Icare precipité du haut en	
Huguenots contre leur		bas.	694
opinion.	270	Iean Baptiste Gello a es-	
Lors que les Huguenots		crit plusieurs liures	
penferent estre au des ^s		pleins de bonne Philo-	
de toutes choses les af-		sophie.	14
fares leur reussirent à		Iean Clopinet dit de Me-	
souhaiten l'an 1568. 293		hum estoit sous le re-	
Des Hyenes admirable		gne de Saint Louys.	
nature.	608	85	
Hypocrates a escrit des		Iean le Maire de quelse	
Epistres.	2	crits il se fit riche.	
Hypocrisie tresgrande en		107	
matiere des armes. 296		Iean de Niuellet Poëte	
		François	ibid.
		Iean de Baif a escrit de	
		l'ortographe François.	
		127	
		Iean de Hans Minime me-	

I

Iacobins Inquisiteurs
de la foy, & pourquoy

DES MATIERES.

- né prisonnier au Roy. Iesuites receus au collo-
 205. fait teste aux Mi- que de Poissy en forme
 nistres. 203 de société & college
 Ieanne la Pucelle deliura tant seulement. 263
 la France des Anglois. Iesuites recens à la charge
 25 de prendre autre titre
 Ieanne Papesse fort docte que de Iesuites, & sous
 entre ses condisciples. quelles autres charges.
 830. faite Pape, & com- 263
 bien de temps y regne, Bulles des Iesuites cassées
 ibid. comme morte. ibi- par la Cour de Parle-
 dem, à Sienne. 831 ment. 263
 Iesuites par qui instituez, Iesuites presentent reques-
 approuuez & soutenus ste au Recteur de l'V-
 259. leur institution, niuersité afin d'estre v-
 leur progres & leur or- nis & incorporez au
 dre, ibidem leur vœu. corps. ibid. leur reques-
 260 ste refusee par le Re-
 Iesuites recognoissent le cteur. 264
 Pape par dessus toutes Iesuites plaident contre le
 les puissances terrien- Recteur de l'Vniuersi-
 nes, voire par dessus le té. ibid.
 Concile general & vni- Iesuites cōposez de deux
 uersel de l'Eglise. 260. manieres de gens. 264
 presentent leur reques- Iesuites grands ennemis
 te à la Cour de Parle- des Huguenots. 266
 ment pour estre leur Ignace gentilhomme Na-
 ordre authorisé. 261 uarrois Iesuite. 259.
 Iesuites censurez par la auoit tout le temps de
 Sorbone. 263. renuoyez sa vie porté les armes.
 par la Cour de Parle- ibid. fut blessé au siege
 ment au colloque de de Pampelune. ibid. cō-
 Poissy. 262 me s'aduisa de se faire

T A B L E

Iefuite.	ibid.	270
Images réuerſees par ceux de la religion en l'Eglife S. Medard.	207	Journee de S. Medard. 260
Indiës mangeoyent leurs peres & meres decedez.	364	Journee de Mōcontour. 302
Institution de l'ordre des Cheualiers du S. Eſprit	372	Journee de Chasteauneuf. 302
Inſtrumēs militaires ſont aujourd'huy changez.	6. & 7	Italien tombeau des Fran- çois, & pourquoy. 168
Inuenteurs ſe perpetuent non leſ traducteurs.	84	Italie ſe doit voir ſobre- ment. 610
Inuentions mal-aiſees à ſupprimer.	508	Mœurs des Italiens diffi- ciles à eſtre meſnagez. ibid.
Inuentions diuerſes & gē- tilles ſur la main.	479. & 480	Italien fait profeſſion de vengeance. 407
Ioinuille tombeau ancien de, meſſieurs de Guiſe.	244	Italiens redeuables à no- ſtre France de leur roē- ſie. 88
Iouial gayement amou- reux.	33	Grand iugement & gran- de memoire ne ſ'accō- pagnent pas ſouuent. 514
Iouiſſance d'amour eſt ac- compagnée de beau- coup de tintoins.	35	Iugement de mōſieur Paſ- quier ſur l'hiſtoire de la Papelle Ieanne. 834
Iours & mois qui ont eſté fatalement heureux ou malheureux à vns & au- tres.		Iuiſ qui ſe fit Chreſtien pour manger du lard. 468
Journee de S. Quentin.		Iules Ceſar ne fut ſubiu- gateur de nos Gaules 46. comme il rendit toutes les Gaules tribu-

DES MATIERES.

taires au peuple de Rome. 633
 Jules Cesar mis à mort au milieu des affaires publiques. 173
 Jules Cesar assassiné par Cassius & Brutus. 251
 Julian l'Empereur sejourna six mois à Paris. 648
 Monsieur Iurel a escrit des vers sur la main. 402
 Iustice ne peut estre oüye au milieu des sons des armes. 407
 la Iustice couste plus en France que nulle autre marchandise. 531
 Iustice entre les Animaux. 590
 Iustice barbare mais iuste. 725

L

LE Laboureur traine avec sa charrue tout le malheur du temps quant & soy. 75.76
 Lactance Africain tref-eloquent. 19
 Languedoc, langue de Got. 631
 La langue est de grande

efficace en nous, de telle que la main. 485
 Langue Grecque n'estoit cogneüe aux François. 646
 Les langues pourquoy s'apprennent. 12
 Langage vulgaire propre à coucher les conceptions. 4
 Langage vulgaire changé de cent en cent ans. 648
 Langages ne se r'appor- tent les vns aux autres. ibid.
 Le Latin est cogneu & entendu de tout le monde. 7
 Le Latin n'est prononce d'aucune nation en son naïf. 142
 Laurier qui estoit dans Rome prognostic de la grandeur & ruine de la posterité d'Auguste. 362
 Leçon de l'Autheur à son fils. 532
 Leon 4. Pape combien haut de cœur. 834
 Lettres de gés de marque exposees au public. 1
 Les Lettres nont pastant de vogue à l'establissement des Monar-

TABLE

chies que les armes.	829
20	
Lettres de nos anciens comment se commen- çoient.	50
Lettres bien dictées en Latin.	64
Lettres d'un Iuif admon- nestant le Roy Henry de se garder du combat d'homme à homme.	176
Lettres humaines de Mô- sieur le premier Presi- dēt ioinctes avec la Loy.	429
Les libelles que l'on fait courir au commence- ment des troubles, sont les seminaires de nos rui- nes.	622
Liberté de l'Alemagne re- couuerte par le moyen du Roy.	59
Librairie du grand Roy François establie à Fon- taine-bleau.	84
Lycurgue pourquoy se bannit à iamais de son pays par vn exil volon- taire.	156
Lieu, origine & premiers commencemens de la Papesse Ieanne.	
Subtilité de la Liône pour couvrir son impudicité enuers le Lion.	592
Litterature n'est pas com- me la tyrannie.	68
Liures des Arriens mieux bastis & plus doctes que les Catolics.	624
Trois logis du Roy dans Paris.	925
Les loix reçoient polif- sure par le temps.	366
Loix obseruees tant en E- gypte que Sparte.	532
Les loix descouurent l'in- firmité de nostre raison.	597
diuersité de loix entre les hommes.	ibid.
Les loix mesmes se chan- gent en vn mesme pays.	583
multitude des Loix signi- fi la corruption d'une Republique.	584
Loix ame de la Republi- que.	816
Loix en France ne peu- vent obliger qu'elles ne soient verifiees à la Cour de Parlement.	770
Longueil a escrit des let- tres	

DES MATIERES.

tres en Latin. 65
 Lorges blellà le Roy François en la teste. 174
 Louanges de mes dames des roches mere & fille. 385
 Loure basti par feu monsieur de Claigny à l'antique. 445
 Louys le gros par la rencontre d'un pourceau, tombant de son cheual se rompit le col. 173
 Louys neufiesme mis au | calendrier des bien-heureux. 88
 Louys vnziesme sommaire recueil de ses mœurs. 152
 Louys douziesme pourquoy appellé Pere du peuple. 815. pourquoy appellé Tacquin. ibidem.
 iugement de Dieu qui tomba sur le Roy Louys vnziesme. 156
 Loy de l'Empereur Constantin prohibât de disputer de la foy & par special de la Trinité. 622
 Loy de Charlemagne
 Tom. I.

pour les Religieux. 702
 Lucrelle par sa mort fut cause de l'extirpation de la tyrannie des Roys à Rome. 552
Lutetia, d'où ainsi ditte la ville de Paris. 645. 646
 à Lyon on faisoit des declamations tous les ans. 10
 Lyon embouchure de toutes nouvelles. 50

M

M Achiauel & son liure de l'institution du Prince, digne du feu, 539
 Magnanimité de certaines bestes. 588
 Magnanimité des Romains n'a esté enseuelie avec leur Republique, 680
 la Main est vn outil en nous qui produit du bié & du mal en extremité. 482
 la Main par ses gestes nous represente toutes les passions de nos ames. 483

Kkk

TABLE

la main produit effects e- merueillables mesmes aux choses spirituelles. 484	reprennent leur appel- lation de la main. 488
Maine, Touraine & An- jou erigez en gouuerne- ment. 186	Manifestes permis aux Cē- seurs contre les vns & les autres. 666
Maires du Palais commēt s'impatroniserent de l'e- stat. 281	Manifeste de la Ligue. 607
Maisons anciennement à bon marché est vn argu- ment du malheur qui e- stoit lors. 655	Manlius pourquoy con- demna son fils à mort. 553
Maison bien reglee est vn vray monastere. 703	Marc Anthoine par le ieu- ne Octauien fut vincu 300
chacun veut estre maistre pendant vne guerre ci- uile. 405	Marchands d'Orleās four- nissoient argent pour la coniuration d'Amboise. 184
Maladies de longue guer- son. 406	le mareschal de S. André tué. 238
Maladies longues de dan- gereux effect aux vieilles gens. 620	le mareschal de Hesamené des Reistres au Prince de Condé. 235
malheur ne peut estre fuy, l'heure estant venue. 307	la marguerite des margue- rites composee par la Royne de Nauarre. 94
Maledictions des Peres à leurs enfans en quoy consiste. 685	Marguerite sœur du Roy Henry 2. mariee au Duc de Sauoye. 471
Malheur particulier des Roys. 797	quel mariage va tou- siours de bien en mieux. 30
manœuvres & manufactu-	Mariage du ieune Ro- han avec la Brabançon

DES MATIERES.

- | | |
|---|--|
| <p>fait à Argentueil. 200</p> <p>Mariages des enfans selon
la loy de Dieu bornez
par la volonté bien re-
glee du pere. 115</p> <p>Mariage des enfans nul se-
lon les Payens s'il n'estoit
authorisé du Pere. 126</p> <p>Mariages des enfans sans
l'autorité paternelle
appelez par les docteurs
de l'Eglise. paillardises.
116</p> <p>Marié commet peut accu-
ser sa femme d'adultere.
122</p> <p>Mary par vne prerogative
de son sexe ne se doit roi-
dir contre les opinions
de sa femme. 31</p> <p>Mariages des François en
quoy different de ceux
des Romains. 516</p> <p>Mariages de la fille aisnee
du Roy avec le Roy Phi-
lippe & de la sœur avec
le Duc de Sauoye. 471</p> <p>Mars mois fatal pour nos
troubles. 369</p> <p>Martin mesnart Poëte de
gentil esprit. 505</p> <p>Marseille où on executoit
la haute iustice avec vn</p> | <p>glaiue enrouillé. 140</p> <p>Marseille le rendez-vous
de la ieunesse Romane
pour estudier. 839</p> <p>Masque de la Religion &
du bien public fort com-
mode pour les grands.
811</p> <p>Mazere gét il homme pris
& executé à Amboise.
180</p> <p>Medecines comment se
prenoyent anciennement
403</p> <p>l'homme pense estre plus
sage que la nature en la
Medecine. 594</p> <p>Medecines que nature a
diuersement apprises aux
Animaux. 594</p> <p>Medecins de nostre temps
en quoy semblent faillir.
109</p> <p>Marque d'un homme qui
fut tué durant les barri-
cades. ibid.</p> <p>Mauuais morceaux man-
gez par les habitans. 305</p> <p>Melancolic tardiuement
bannit le courroux de sa
fantasie. 406</p> <p>Melphe ostee aux pa-
rens du Pape Paule
Kkk ij</p> |
|---|--|

TABLE

Theatin.	167	ge des ames damnees.	480
Mercuré mis avec les autres metaux fert infiniment pour les assouplir.	664	Mocquerie contre ceux qui sont en leurs maisons à rien faire.	644
Mercuré se dissipe à faute de subiect.	665	Moitoyen d'où vient ce mot.	136
Mercuriale tenuë au Parlement deuant le Roy Henry sur la punition des Heretiques.	174	Mœurs des conioincts par mariage.	29
Mercuriale tenuë en peu d'estime.	664	Mœurs de mōsieur le premier President de Thou.	429
Mercuriale comparee à la Censure de l'ancienne Rome.	ibid.	Moines & Nonnains contraincts, de retourner en leurs monasteres, ou vuidier la France.	254
Mescontentement de l'Amour est l'assaisonnemēt du plaisir.	37	Mois certains ordonnez pour les baings naturels.	407
Mescontentement des Princes & Seigneurs Catholiques.	201	Monarchie de France.	338
Mefnage heureux de monsieur le premier president.	433	Monarchies s'establissent au commencement par les armes, non par les lettres.	20
Mets, Toul, & Verdū mis sous la protection du Roy Henry.	39	aux Monarchies les subiects se composent à la volonté de leur Roy.	21
Minime mené prisonnier au Roy, retourne dans Paris avec triomphe.	205	la Mole executé à mort en l'an 1574.	457
Minos Roy de Crete, iu-		Monophile liure de l'auteur fait luy estant fort ieune.	16. & 454
		Montberon	quatriesme

DES MATIERES.

- | | |
|---|--|
| fils du Conneſtable tué.
236 | Monsieur de Guiſe fait
Lieutenât general pour
le fait des armes. 819 |
| Montbrun & Mouuant
font pluſieurs grands ex-
ploits d'armes en Dau-
phiné. 234 | Mort lamentable du bon
Roy Henry deuxieſme.
188 |
| Monferrant ſiege des tail-
les. 423 | Mort du petit Roy Fran-
çois. 187 |
| Montgommery Capitaine
des Gardes tua le Roy
Henry. 173 | Mort de monsieur de Gui-
ſe. 241 |
| Montgommery remue
toute la Normandie.
222 | Mort de Monsieur le Prin-
ce de Condé. 296 |
| Monsieur de Morſan pre-
ſident aux grands iours
de Troye. 476 | Mort de l'Admiral de Cha-
ſtillon. 307 |
| Monsieur de Briſſacie une
Seigneur & braue Ca-
pitaine. 677 | Mort honorable de mon-
ſieur le Conneſtable.
284 |
| Monsieur de Ioyeuſe def-
fait à Courtras avec
beaucoup de Nobleſſe.
710 | Mort de monsieur de
Ioyeuſe. 711 |
| Monsieur d'Eſpernon fait
Admiral & gouverneur
de Normandie. 712 | Morts de quelques ſei-
gneurs de robe longue
qui aduindrent en l'an
1584. 572 |
| Monsieur de Guiſe arriué
à Paris. 784. ſa reſponſe
au Roy. 785 | Mots empruntez des E-
ſtrangers & faits Fran-
çois. 102. 103 |
| Monsieur de Guiſe com-
ment recueilly à Paris.
785 | Mot de Gueux entre les
factieux de Flandre.
268 |
| | Mots qui ne peuuent eſtre
traduits. 601 |
| | Motif du plaidoyer fait en
l'an 1576. pour le pays |

T A B L E

d'Angoulesme. 321
 Motifs pour lesquels
 le Roy de Nauar-
 re changea d'opinion
 contre les Huguenots.
 218
 Moulins bruslez vers la
 porte S. Denis par les
 Huguenots. 274
 Moyse prie Dieu les bras
 esleuez au ciel. 485
 Multiplicité d'offices cõ-
 biè pernicieuse à l'Estat.
 774
 Multitude effrencee d'offi-
 ciers est vne desolation
 generale de l'Estat. 774

N

Natiuité de Theodore
 fils de l'auteur.
 Natiuité du petit roy Frã-
 çois. 187
 Nature nous doit estre
 proposee pour seule &
 principale butte de nos
 actions. 71
 Nature douce de mōsieur
 le premier President.
 429
 Naturel de l'auteur. 570
 Neron dernier de la famil-

le d'Auguste Cesar. 362. à
 sa mort le laurier planté
 par la femme d'Auguste,
 mourut. ibid.
 Neron desire rencontrer
 quelqu'un qui le massa-
 cre pour mettre fin à ses
 miseres. 551
 Duc de Neuers tué à la ba-
 taille. 237
 Nicole Oresme braue tra-
 ducteur fut du temps de
 Charles cinquieme.
 85
 Noblesse de France sur v-
 ne pointille d'honneur
 fait estat de perdre la vie.
 118
 Nœud Gordien coupé
 par Alexandre le grand.
 112
 Nomogarde traittee avec
 des tranges cruantez. 724
 Noualitez introduittes en
 France à l'occasion des
 troubles. 304
 Nouvelles croissent en la
 sale du Palais & pour-
 quoy. 400
 aux nouvelles premieres
 d'une bonne fortune est
 malaisé de ne se perdre.
 418

Numitor spolié de l'Estat
d'Albe par Amulius. 542

O

OBitannuel de mō-
sieur de Guise cele-
bré tous les ans en nostre
Dame de Paris. 244
Obseques du Cōestable.
285
Obseques de monsieur le
premier President. 436
Obseques de monsieur de
Ioyeuse. 718
de n'estre moins Ocieux
que quād l'on est ocieux,
vieillerencontre. 644
Ode de l'auteur sur la
main. 470
Officier doit dire la ve-
rité à son Prince. 772
Oliuier de Clisson assassiné
par le Seigneur de Craō.
651
Opinions des hommes
renuersees inespérémēt.
ment. 188
Opinion de Machiauel de
la sceleratesse condām-
nee par Tite Līue. 548
Opinion fille batarde de la

raison & passion. 583
Opinions qui doiuent en-
trer és esprits de ceux
qui se veulent marier. 28
combien les Opinions des
hommes sont difficiles à
contenter. 655
Optat Docteur Africain
tres-eloquent. 19
Oracles anciens trōpoient
les hommes par vn mot
à deux ententes. 57
Orateur du tout voué &
ententif à la surprise du
peuple. 10
Orateur estoit d'autre qua-
lité à Rome qu'aduocat
entre nous. 691
Orcan Roy des Turcs
appellé par Iean Palcolo-
gue à son secours. 630
Ordonnances d'Amour.
78
Ordre nouuel de Cheua-
lerie voué au saint Es-
prit. 372
Orgueil & presomption
de l'homme. 601
Origine de la Ligue &
les effects. 669. &
670
Orleans ville presque
exposée au milieu
KKk iij

TABLE

du Royaume.	184	ce.	103
Orléans surprise par le Prince de Condé.	223	Palais chôme par hazard lors de la mort du premier president.	137
Orléans prise en l'an 1567 par le Seigneur de la Nouë.	334	Palatin de Russie commetté mocqué & mis à mort.	727
Ormes croissans avec vne grande suite d'annees, prennent fin en peu de temps.	406	Palme plus terrassée moins se rend.	
Orpheus musicien excellent,	69	rapiste & huguenot, mots de faction introduicts entre nous.	183
Orthographe ancienne est la meilleure & la plus certaine. 15. 16. ne se faut esloigner d'icelle aysement.	141	paradoxes hardis que ceux de Ciceron.	100
Republiques des Oyes sauvages.	600	Paris assiégé par le prince de Condé.	235
		Paris le Troyen n'a pas esté fondateur de la ville de paris.	645
		Paris pourquoy porte vñ Nauires en les armoiries.	647
P acificacion faite avec la Ligue.	707	Paris pourquoy ainsi nommé.	648
Paix faite avec l'Espagnol.	471	Paris sejour des Roys depuis le Regne de Clouis.	ibid.
Paix des Financiers.	705	Paris n'a iamais peu estre vaincu de ses ennemis.	650
Paix entre le Roy & monsieur de Guise.	704	Paris tombeau à ses ennemis.	651
Paix combien difficile à faire.	805	Paris grandement opulent.	
Palais n'est le sejour des mieux-disans de la France.			

DES MATIERES.

te sous le regne de Charles.	655	me, mort.	572
Paris en grande souffrette par le moyen des guerres ciuiles.	657	Paul Theatin introducteur de l'ordre des Theatins, est appelé à la Paupauté.	167
Paris comme s'est remis sus.	659	Amour de nostre pays ne nous retient point tant que des nôtres.	577
Paris est vn raccourcissement de tout l'Italie au petit pied.	660	Pays aux sages est par tout	578
Paris occupé par l'Anglois l'espace de dix huit ans.	631	Pelican se fait mourir pour donner guerison à ses petits.	422
Parlement de Paris fait regner nos Roys.	338	Penitence tournée en cruauté.	726
Parlement de Paris cômét estably.	ibid.	Peres proposent de leurs enfans, & leurs enfans en disposent.	394
Parlement estably au Palais, ibid. loix emologues au Parlemét pour auoir force.	ibid.	Perigueux surprise par Langoran.	334
Partisans generation de Viperes & maudite vermine en France.	776.	Permission aux Ecclesiastiques de reuendre leurs terres les moins incommodés.	253
805		Perseuerance du Parlemét contre l'Edict de lx.	213
Patriarche lieu où les Huguenots de Paris faisoient leur exercice.	207	Pentecoste iour fatal à nostre Roy.	371
Passions tant du corps que de l'esprit troublent nostre raison.	582	Petrarque a escrit des Epistres.	2
Paul de Foix; Ambassadeur pour le Roy à Ro-		il a mandié de nous les premiers traités de sa Poësie. 10. a acquis la vo-	

TABLE

gue pour auoir emprun-	ordonnances en or-
té plusieurs paroles de	dre plus raccourcy.
diuerſes contrees. 105	515
Peuple doit obeiffance au	Pierre Paſchal homme
Roy, & le Roy luy doit	qui ſe faiſoit valoir par
bon traitement. 813	les plumes d'autrui.
Philippe de macedone au	511
milieu de ſes feſtins fut	Pierre de S. Cloct poëte
mis à mort. 173	François. 127
Philippe Roy d'Eſpagne	monſieur Pithou a eſ-
mette ſiege deuât la vil-	crit vn traicté des
le de S. Quentin. 170	Comtes de Champagne.
Philippe de Commines	346
a eſcrit la vie de Louys	Plaidoyé pour la ville
vnzième. 153	d'Angoulême fait en
Philoſophe nom adapté	Parlement le 4. Feurier
maintenant aux tireurs	1576. 325
quint'eſſence. 26	Plaiſirs & deſplaiſirs pren-
la philoſophie fournit	nent en nous leur origi-
plusieurs diſcours. 68	ne d'une meſme ſource.
Phyſique, politiques &	73
Ethiques d'Ariſtote tra-	Platon a eſcrit des Epiſtres.
duits en François.	1
85	Pline ſecond a eſcrit des E-
Pibrac Preſident l'une des	piſtres ibid. fut grãd Ora-
lumieres de noſtre ſiecle.	teur en ſon tẽps & fit des
447	Epigrammes. 458
Picus mirandula a eſcrit	Plumes ſeruent aux doctes
des Epiſtres en Latin.	gens de glaïue. 62
7	Plus outre deuife de l'Em-
Pierre de Cogneres Aduo-	pereur. 43
cat du Roy. 481	Poëme fait à Poitiers ſur la
Pierre Guenois a mis nos	ruce. 448

DES MATIERES

Poëſie doit ſeulement vouër ſa plume en la celebratiõ de ceux qui le meritët. 28	France pour aſſeurer l'Eſtat du Roy. 257
Poëtes diſcourans le mieux de l'amour, ſont ceux qui ſont moins attains de ſa maladie. 16	Polycrates Samien ſe diſoit l'heureux des heureux. 438
Poëtes qui ont mis la main à la puce. 459	Politian a eſcrit des Epiſtres en Latin. 3
Poëtes qui ont célébré leurs amours: 459	Pollion auoit commandement ſur ſes heures. 63
Poinct d'honneur dont la Nobleſſe Françoisiſe fait eſtat. 612	Pollion recognoiſſoit en Tite Liue quelque choſe de ſon Padoüan. 129
Poitiers remis és mains du Roy. 217	Royaume de Pologne deſferé à noſtre Roy eſtant lors Duc d'Anjou. 319
Pole a eſcrit des lettres en Latin. 65	Poltrot natif d'Aubeterre. 241
Polemon addonné à ſes plaiſirs fut du tout conuertty par Xenocrates. 14	Poltrot eſtât eſperdu apres le coup fut pris. 243
Police que tint le feu Duc de Guiſe dans la ville de mets. 39	Pompee que ſit apres auoir deſſait Sertorius. 197
Police que monſieur le premier Preſident apporta aux audiences. 428	Pompee ſit mal de quitter Rome pour la laiſſer à ſon ennemy. 223
Police entre les Abeilles contre les faineans. 590	Pompee vaincu par Iules Ceſar. 300
Polices nouuëſſes par la	Pompee ſentit grand malheur par la longueur de ſa vie. 438

TABLE

Populace bestes sans bride. 807	met de surprendre le Roy. 273
Pourtraict de l'auteur. 476	Prince de Condé vuide la ville de Paris & se retire à Meaux. 222
Porus pris par Alexandre ce queluy dit. 409	Prince de Condé est tué. 296
Preparatifs pour l'Edict de Ianuier 1561. 208. 209	Prince sage reduit sa puis- sance absolue sous la ci- uilité de la loy. 82
Preparatifs du Roy con- tre les Huguenots tour- nez à neant. 708	Prince mineur doit tout craindre pendant vne guerre ciuile. 225
Presches descouuerts dans la ville de Paris le iour S. Laurent. 1557. 170	le Prince est en fin puny de Dieu pour ses mes- chancetez. 548
Presches des Ministres hors les murs de la ville de Paris. 199	Principes diuers entre les Philosophes. 583
Presches des Huguenots commencent de proui- gner impunément par la France. ibid.	Priuilege des vieilles gés. 18
Presches des Huguenots retranchez. 257	Priuilege de la fiertre de S. Romain à Roüen. 461
Pretextes diuers pris par les Princes. 226	Priuilege ancié des Clercs. 469
Prince de Condé mandé en Cour. 184	Priuilege des Bourgeois de Paris. 645
Prince de Condé estant arriué en Cour est con- stitué prisonnier. 185	Procession faite en l'Egli- se S. Barthelemy & pour- quoy. 205
Prince de Condé déclaré innocent. 190	Procez encommencé à faire au Prince de Con- dé. 185
Prince de Condé se pro-	

DES MATIERES.

- Procez sont pleins de grād
ennuy & fascherie. 530
- multiplicité de procureurs
nuisible au public. 440
- Profit qui nous reuien-
droit si toutes les discipli-
nes estoient redigees en
nostre langage. 13
- Prognostic vray & pre-
mier des malheurs qui
depuis sont aduenus en
la France. 183
- Promotion belle & heu-
reuse à l'Estat de pre-
mier President. 414
- Progrez de la Ligue &
comment elle print son
accroist tout d'un coup.
818
- Prononciation ancienne
est la meilleure & la plus
seure. 129
- Prononciatiō latine n'est
obseruee de nulle nation
comme faisoient les Ro-
mains. 143
- Prononciation & valeur
des lettres. 143. selon la
proportion des progrez
toutes choses prenēt fin.
406
- Proposition soustenue par
vn Bachelier de Theolo-
gie. 203
- Propositions diuerfes en-
tre les Seigneurs de la
Cour du Roy & de par-
lement. 441
- Protagore par la lecture
d'Antisthene deuint so-
bre & honneste. 13. &
14
- Prouerbe, Pour vn poinct
Martin perdit son Asne.
504
- Protestation des Princes
& Seigneurs Catholi-
ques. 227
- Ptolomee Roy d'Ægypte
demande secours aux
Romains contre ses sub-
iects. 421
- Pudicité de la femme est
le seul moyen par le quel
elle demeure forte. 121
- Pulce de Catherine des
Roches. 378
- Pulce d'Estienne Pasquier.
381
- Pucelles affronteuses qui
se firent prescher par pa-
ris cōme estant enuoyees
des cieux. 25
- Punition des Grands cō-
ment se doit faire. 408
- Pureté de la langue Fran-
çoise.

T A B L E

çoise où il la faut cher-
che r. 103
Pyrrhus Roy des Epirotes
tué d'vnetuille. 77

Q

Q Vatre-mesnage, ga-
ste mesnage. 645
Quels furent cause du
malheur de Henry. 3. 797
Quinquailleurs de quel ar-
tifice ils vsent au soin de
leur marchandise. 5

R

R Aimont Comte de
Tholose, Poëte excel-
lent. 83
Discours sur la raison dont
l'hommes'aduantage sur
les bestes. 581
la correspondance qu'il y a
de nostre raison avec nos
passions. 582
Raison folle de l'homme
cause de tous nos mal-
heurs. 583
Ramus a escrit vne Grā-
maire François. 127

Rapt fait aux parens que
c'est. 112
Rebuffe fut le premier des
nostres qui reduisit nos
ordonnances en quelque
ordre. 515
Rebus par qui premiere-
ment mis en lumiere.
499
Recherches de la France
entreprise de grand la-
beur. 86. 87
Recit de l'Estat des trou-
bles de 77
Reconciliation de la mai-
son de Guise avec celle
de l'Admiral. 258
Reduction des coustumes
par monsieur le premier
Président de Thou. 425
Regence donnee à la Roy-
ne mere & au Roy de
Nauarre. 194
Regiomonte faiseur d'Al-
manachs & predictions.
782
Regle à obseruer pour les
Roys. 811
Regrez en matiere be-
neficiale où a lieu.
363
Reistres deffaits par

DES MATIERES.

monſieur de Guiſe.	le Roy.	180
713	René de Birague Chan-	
Religion ancienne ne doit	celier de France. 572. &	
aiſément eſtre remuée.	573	
209	Rentes conſtituées par les	
Religion fondement de	decimes.	274
toute République bien	Repliques & duplicques	
ordonnée.	des plaidoyers, référéces	
340	par le premier préſident	
Religion ancienne ne doit	de Thou.	428
eſtre changée, mais il	Repos grand d'eſprit eſt	
ſaut corriger les abus.	quand on vit en repos	
33	auec ſa femme.	31
diſputes de Religion	Reprendre nos anciens er-	
ſont ſur tout à craindre.	remens.	108
Religieux quels doiuent	Représentation en ligne	
eſtre.	directe & collatérale.	
687	425	
Remonſtrances du Chan-	trois eſpeces de Républi-	
celier de l'Hôſpital aux	que, & d'une quatrieſme	
députés de la Cour	qui participe des deux	
de Parlement de Paris.	ou des trois.	336
212	Républiques de pluſieurs	
Remonſtrances de mon-	beſtes.	598
ſieur Loyſel à l'ouuer-	Républiques comparées	
ture de la ſéance d'Agen.	au corps humain.	363
443	Requête pour & au nom	
Remonſtrance de mon-	des proteſtans de Fran-	
ſieur Paſquier en l'aſ-	ce préſentée par l'Admi-	
ſemblée de ville. ibi-	ral.	183
dem	Requêtes préſentées au	
Remus tué par ſon frère.	Roy par les Proteſtans afin	
542		
Renaudie eſt directeur de		
l'entreprise faite contre		

T A B L E

qu'il fust permis faire v-	auteurs.	94
ne Eglise separee de la	Rome saccagee & ruinee	
nostre.	par les Gaulois.	45
196	Rome en vn clin d'œil se	
Resolution folle de ceux	mettoit en armes à la	
qui reduisent l'air de la	moindre rumeur de	
France à celuy des Ro-	guerre de la part des	
maines.	Gaulois.	46
515	Rome entre les autres Re-	
Resolution admirable des	publiques est infiniment	
Romains.	solennisee par nos ance-	
552	stres.	337
Resolution genereuse des	Rome separee en deux de-	
Femmes de Vendouise.	meures.	836
723	le Romain nous deuance	
Restriction sur l'exercice	en quelques particulari-	
de la Religion nouvelle	tez de droict.	525
254	Romains studieux de l'é-	
Retraicte des Reistres.	bellissement de leur lan-	
717	gue.	22
Rhearendue nōnain voi-	Romant d'Amadis fait	
lee, commet inceste.	François par le Seigneur	
533	des Essars.	26
Monsieur Riant Aduocat	Romains n'ont esté supe-	
du Roy.	rieurs aux anciens Gau-	
425	lois.	45
Riom ou Moulins ancien	Romains n'orthographi-	
sejour des grands iours	oyent comme ils pronō-	
au pays d'Auuergne &	çoient.	130
de Bourbonnois.	Romains desconfits par	
412	les Gaulois à vn iour pres	
Riō presidial d'Auuergne.	que les trois cent Fabiés	
423	estoyent passez au fil de	
Mesdames des Roches	l'espee.	
mere & fille honneurs de		
la ville de Poitiers.		
374		
Monsieur de la Roche sur		
yon gouuerneur de Pa-		
ris.		
204		
Romant de la Rose & ses		

DES MATIERES.

l'espee.	370	la Poësie.	87
Romains anciens estoient plus lascifs en leurs Epigrammes que n'ont esté ceux qui leur ont succédé.	458	Roy de Nauarre & Prince de Condé mandez venir en Cour.	184
Romains qui abregerent les droits des Roys & Empereurs de Rome.	514	Roy de Nauarre tué deuât Roüen d'un coup de balle.	234
Romains feignans de prendre en main le faict de leurs alliez s'en faisoient maistres.	562	Roys de France portent en leurs images la main de iustice, & pourquoy.	345
Romains combien redoutoyent la descente des Gaulois en Italie.	566.	Roys obligez enuers Dieu de rendre la iustice à leurs subiects.	365
Romulus fut tué par les Patrices & Senateurs qu'il auoit instituez.	541	Roys de Rome paruenus à leurs Estats par mal-engin.	541
Ronsard & Pasquier ont esté amis en leur viuant.	27	Roys d'Egypte desquels on permettoit au peuple d'honorer ou accuser la memoire selon leurs merites ou demerites.	575
Roscus Comedien à Rome du temps de Ciceron,	10	Roys de France de la troisieme lignee ont lié leur fortune avec celle de Paris.	649
Roüen prise d'assaut par le Conseil de monsieur de Guise.	234	Roys doiuent estre plustost auaricieux que liberaux.	814
Rouge-aureille Preuost des Mareschaux de l'Isle de France.	205	Royne mere empeschée à pacifier les troubles.	229.
Roys de France qui furent studieux & amateurs de			230

T A B L E

uerneur du pays d'Angoulmois.	328	leans rasee à fleur de terre.	280
Ruines publiques par la France sous le pretexte de la religion.	232	Saladin Soudan d'Egypte occupa tout le Royaume de Hierusalem.	630
S.		Salcede tiré à quatre chevaux & pourquoy.	669
S employee par les Romains pour significatiō de salut.	66	Sçauoir pedantesque & sçauoir courtisan.	637
Sabines rauies par les Romains.	543	Saturnien mene l'amour avec crainte.	33
Sadolet a escrit des lettres en Latin.	65	Sciences & disciplines chāgent de domicile ainsi que les monarchies.	19
Sagesse & hardiesse sont choses compatibles.	677	Scindics generaux du Clergé creez.	25
Sainct Denis ville prochaine de Paris surprise par les Huguenots.	274	Scipion mit à fin le fort de la guerre des Africains encontre les Romains.	303.
Sainct Medard Eglise és fauxbourgs de Paris rompue par les Huguenots.	206	il fist retourner Hannibal de l'Italie.	170.
Sainct matthias iour favorable à l'Empereur Charles cinquiesme.	371	il sentit vn grand malheur par la longueur de sa vie.	438
Sainct Romain deliure de prison les criminels & mal faicteurs.	461	Scorpion par son huile garentist du mal par luy procuré.	22. & 23.
Saincte Croix ancienne & venerable Eglise d'Or-		Scrutin des voix bruslé par le commandement de la Roynemere.	197
		Seaux ostez au Cardinal Bertrand.	178
		Monfieur Seguier Aduo-	

DES MATIERES.

- | | |
|--|---|
| <p>cat du Roy. 425</p> <p>Seigneur a droict de suite
contre son homme de
corps. 702</p> <p>Seigneur haut iusticier
peut vendiquer son sub-
iect, se voulant distraire
de sa iurisdiction. 702</p> <p>Semiramis Royne des Al-
syriens. 832</p> <p>Seneque pourquoy ne se
lit par tant de gens que
Plutarque. 661</p> <p>Sens de monsieur le Presi-
dent de Thou. 433</p> <p><i>Sens dessus dessous</i>, d'où vient
ceste maniere de parler.
142</p> <p>Sepulchre & tombeau de
Lonys vnzième demoly
à Clery par les Hugue-
nots. 233</p> <p>Sernice des Dames est la
premiere planche pour
paruenir aux grâds lieux.
79.80.</p> <p>Seruius Tullus tué par
Tarquin l'orgueilleux.
541</p> <p>Sexte Pompee eust Augu-
ste & Marc Anthoine en
sa deuotion dedans ses
nauires. 251</p> | <p>Monsieur Sibilet donna les
premieres instructions
de la poësie Françoisse à
Pasquier. 456</p> <p>Sidonius a escrit des Epi-
stres. 1. & 2.</p> <p>Sidonius seul entre les La-
tins faict mention des
vers retrogrades. 495</p> <p>Siege deuant Paris par les
Huguenots. 236</p> <p>Siege de la Rochelle, &
quel progres & euene-
ment il eust. 218</p> <p>Sigebert assassiné d'as Soif-
sons par la pratique de
Fredegode la belle sœur.
201.</p> <p>Simple descrits par Pline,
Dioscoride & Matthiole.
76</p> <p>Sindicat entre les Procu-
reurs. 429.</p> <p>Sobriquet que nos anciens
donnoyent aux Roys de
France s'ils auoyent mal
fait durant leurs vies. 575</p> <p>Soleil adoré par les Payens
sous diuers noms de Dieux.
594.595</p> <p>Solon & Platon ont escrit
des liures d'amour. 460</p> <p>Sonnet de l'Autheur. 464</p> |
|--|---|

T A B L E

Sors Virgiliens.	96
Sortie du Roy hors de Paris & comment.	789
Soubize commande en la ville de Lyon sous l'autorité du Prince.	241
Subiect s'il peut par remonstrances quelques fois s'opposer aux commandemens de son Prince.	343
Subsides pourquoy trouuez.	814
Suppression des offices reuocque, & tous estats remis.	282
Stuart Escossois blessé mort par le Connestable.	283
Symmache a'escrit des Epistres.	1

T

T En Latin prononcé diuersement.	145
Tanaquil femme de Tarquin nourrie en la science de deuiner.	645
Tarquin le vieil assassiné par les menees d'Ancus Martius.	ibid.
Tatius Roy des Sabins tué	

par Romulus.	544
Tauerny homme de robe longue tué combattant vaillamment.	309
Tel qu'est le Capitaine, tel sont les soldats.	8
Téperie du ciel si elle rend les gens plus ou moins doctes.	19
Temple de nostre Dame de Paris, la Sainte Chapelle & le Palais bastis à la moderne.	445
Temple de la foy basti à Rome par le Roy Numa.	327
Termes d'effect par le Duc de Sauoye.	300
Terres neufues pourquoy ainsi appellees.	125.
les mœurs des habitans d'icelles.	126
Tertullian escriuain d'Afrique tres-sçauant.	19.
centuré pour son zele ardent enuers Dieu & son Eglise.	440
Testament & succession des François differēt de ceux des Romains.	518
Tester à quatorze ans.	524
Thebains solennifoyent le troisieme iour de Iuin.	

DES MATIERES.

- 370
Theophraste grand per-
sonnage. 12
Thibaut Comte de Châ-
paigne, excellent Poëte.
87
Tholosains se sont appel-
lez mondains. 98.99
Thraseas second Caton de
son temps. 326
Tiart aggregé avec les
sieurs de Ronfard & du
Bellay. 16
Tibere Empereur abhor-
ra les lāgues estrangeres.
12.
Tigresse combien soigneu-
se & amoureuse de ses
petits. 587
Tionuillē reprise par mō-
sieur de Guise. 170
Tite Liue traduit en nostre
vulgaire. 74
Tombeau de messire An-
ne de Montmorency
Pair & Connestable de
France. 286
de Thou President mandé
pour faire le procez au
Prince de Condé. 185. sa
vie & sa mort. 423. il ne
sçauoit que c'estoit de
bayr. 431
Tournois en la rue saint
Anthoine deuāt les tour-
nelles. 653
Hostel des Tournelles fatal
à la ruine de France.
653
Tours, le Mans, Angers,
& Saumur remis es mains
du Roy. 233.234
Traduction d'une langue
en autre difficile & peni-
ble. 84.& 688
Traict hardi d'Alcibiades
enuers sa femme. 703
Trefue conclüe entre le
Roy & monsieur son fre-
re par l'entre-mise de la
Roynie. 321
Tribulations & fascheries
d'où procedent. 38
Tribuns conseruateurs du
peuple. 337
Trois lignees de Roys en
france, & les conquestes
de chacune. 815
Troisiesme race de nos
Roys a plus fait d'Estat de
la iustice que de la force.
816
Trouble d'Amboise. 181
Troupes dispersees par
la ville de Paris. 786
Tumultus mot Latin, ce

T A B L E

qu'il signifie. 560
 Turcs n'ont cessé qu'ils ne
 se soyent emparez de tout
 l'Empire de Grece. 630
 Turcs appelez chiens. 672
 Tutelles & curatelles des
 François différentes de
 celles des Romains. 517.
 518
 Tyrannie pèdant vne paix
 est plus à desirer que de
 tōber en la misericorde
 d'une guerre ciuile. 633

V.

V voyelle comment se
 prononçoit ancien-
 nement dans Rome. 146
Vale, mot de celuy qui en
 Latin prend congé. 2. &
 3
 Vallaa escrit en Latin des
 Epistres. 7
 Vefue faisant folie de son
 corps ne perd son doüaire.
 121
 Vefues en quels cas subie-
 ctés à la peine. 123
 Vendosmois est fertile en
 Orateurs & Poëtes. 22
 Vengeance non moins

douce en l'offensé, que
 l'amour en l'amoureux.
 805
 Venise gouuernee par vn
 bon nōbre de gens d'hō-
 neur qu'ils appellent ma-
 gnifiques. 337
 Verité cachee par l'igno-
 rance de nostre raison.
 584
 Verité sur toutes choses
 deuë au Prince. 798
 Vers Alexandrins d'où ain-
 si dits. 107
 Vers retrogrades François.
 493
 Vers rapportez. 498 -
 Vers ascendants. 506
 Vers presque sous mesmes
 mots raportez. ibid.
 Vers de monsieur le grand
 Prieur. 510
 Vers prognostics de plu-
 sieurs malheurs qui arri-
 uerent l'an 1588. 782
 Vertus & vices de chasque
 nation sont hereditaires.
 19
 Vice propre aux François.
 25
 Victoire de la bataille de
 Dreux à qui doit estre at-

DES MATIERES.

tribuce.	239	Villes donnees en garde à	
Victoires obtenuës iadis		ceux de la religiõ à leurs	
par les Gaulois en Italie.		allociez Catholiques.	
45		322	
Vidame de Chartres mis		Villes prises & occupees	
prisonnier en la Bastille.		par les Huguenots voisins	
182		nes d'Angoulesme.	349.
Vie des villes est à present		Ville de seureté.	820
à celles des champs.		Virgile lisoit les œuures	
69		d'Ennius pour s'en ser-	
Vie solitaire est malheu-		uir.	86
reuse.	70.71	Virginus tua sa fille inno-	
Vie & deportemës de l'Ad-		cente, à fin qu'elle ne fust	
miral.	309	violee.	553
Vie & deportemens de		bon visage d'un Roy com-	
monsieur de Guise.		bien il importe enuers la	
312		noblesse de France.	280.
Vie & mort tresbelle de		281	
monsieur le premier		Vnion de l'Eglise a de	
President de Thou.	423	tout temps dependu de	
Vicillards seul pourueus à		la chaire saint Pierre.	
la Papauté.	841	627	
Vignier Historien Fran-		Voix du peuple est voix de	
çois.	72	Dieu.	754
Villes de Piedmont &		Voyage de Monsieure de	
de Sauoye rendues par la		Guise en Italie à la semõ-	
paix.	471	ce du Pape Paul Theatin.	
Villes rendues au Roy Phi-		198	
lippe.	ibid.	Voyage du petit Roy Frã-	
Villes prises d'elles mesmes		çois à Orleans en delibe-	
en faueur des Hugue-		ratiõ d'exterminer l'he-	
nots.	232	resie.	848

TABLE DES MATIERES.

Voyage du Roy Charles neufiesme par la France. 256	X.	Xenophon grand per- sonnage. 11
Voyes du Cerf. 108		Xenophon a escrit la vie de Cyrus pour servir d'e- xemple. 154
Vulgaire propre pour ex- primer nos conceptiōs. 6		

FIN DE LA TABLE
du premier volume.









